

尚秉和著

歷代社會風俗事物考

尚東和著

歷代社會風俗事物考

商務印書館叢行

歷代社會風俗事物攷敍

中國歷代典章制度。詳於各朝專史。而統紀於三通諸書。燦乎備矣。然一國之事。有鉅有細。其鉅者。固宜攷定。以爲法戒。其細者。又何莫不然。社會之推移。風俗之演變。一事一物之沿革。可以攷人羣之進化。防弊害於未然。其事雖小。其所關則甚大。且歷代風俗事物。真象不明。一讀古書。則生扞格。目前一事一物。雖通儒達士。有不能道其所以然者矣。昔之人。如程大昌之攷古編。葉大慶之攷古質疑。高承之事物紀源。彭大翼之山堂肆攷。或語焉不詳。或強說而誤。蓋中國歷代風俗之演變。事物之改革。從古學者。以其微細。忽焉不察。無一書可爲資借。非多讀古書。不能知其事。第多讀古書。不旁徵曲證。鉤深索隱。仍未易會其通。而得其真象也。吾師行唐尚節之先生。凡所著述。皆發前人所未發。其注焦氏易林也。得失傳之象。百五十餘。於是周易二千年之不能解。或解之而誤者。一一正之。左傳國語之言易象。杜預韋昭不能解。或解之而誤者。亦一一正之。茲復以其餘暇。成歷代社會風俗事物攷。四十四卷。近取諸身。如周秦時之下體無衣。則於墨子呂氏春秋拾遺記證明之。於是禮記之不涉不櫛。暑月不褰裳。得解。履而無襪。從左傳之衛褚師證明之。於是史記王生履行雪中。其下留足迹。後漢向栩管審坐牀久。牀有足趾痕。得解。由是而推及於社會。凡家庭之瑣屑。起居之早晚。民氣之朝暮。張弛之深意。下而至於更衣之狀況。遺後。

拭穢之用籌用紙防鼠之用犬用狸用貓無不詳稽其起源及其成功之歷史而於古令節人民活潑之氣象古游戲煅煉身體之方法古燈節鰲山星橋高百五十餘丈之偉觀春秋兩社全國簫鼓之騰沸一切繁華統亡於蒙古時代之鉗束禁忌尤涕洟慨歎痛恨於外族之蹂躪至宋以前家庭女子必習音樂上九下九鬪草迷藏士夫宴會樂妓詠歌少婦失夫必爲改嫁具見古人於家庭節宣之得宜於禮制人情並行而不悖自南宋諸儒倡女子無才便是德之說而家庭之和樂無自明初方胡諸儒揚嚴氣正性之波而官吏狎妓之風寂而文化因以低落矣文化既低道德亦因以日降至末世遂生反響而越軌之事層出而不窮此先生所尤痛恨腐儒之說之誤我人羣蠹我社會致使有今日悲慘之風俗也他若此書攷訂之精詳徵引之繁富及剖駁漢唐古注之訛誤雖起古人質之亦不得不俯服也真讀古書者之管鑰祛疑惑者之蓍龜而究研古社會狀況者之淵海也至其文章之寬博詞藻之華贍論斷之宏通公允一洗攷據家呆滯之病使人讀之有順流看山之樂尤古文家之餘事也

民國二十六年三月受業杜琨謹識

例言

一 中國書籍皆詳於國家章制。至社會情狀風俗變遷無專書記錄。茲編因經史百家之言。追想其社會情狀類別區分。摭拾薈萃。凡人所習焉不察者。均擇出研究。以期易明。

一 古社會真狀不明。故一讀古書。則生隔閼。如禮夏月忌褰裳。不涉不斂。一再言之。夫褰裳亦偶然之事耳。胡諄諄若是。而不知古下體無衣。褰則露矣。而注疏恐傷雅祇。以不敬爲說。又如左傳褚師韁而登堂衛哀公怒褚師曰。臣有疾異於人。若見之。君將設音卻之。又史記補傳東郭王生履有上無下。人笑之。生曰。孰能履行雪中。視之其上履也。其下乃似人足者乎。初讀之莫明其故。不知古人足無襪。脫履卽赤足。故懼見而設履無下足。卽親地。故印成足形。從來注釋家皆不詳其故。在古人作注時。或以爲無須說明。今則茫然矣。推之拜跪坐席乘車等事亦然。故夫古社會真狀不明。則古書難讀。茲編本自幼讀書經過之困難。力爲剖析。縱傷大雅。亦所不避。

一 社會事物。漢唐以前則詳。以後則略。因事物變遷。大概至唐而極。如燈燭至晉則油燈蠟燭俱備。後卽不詳。履至隋唐。以長靿鞢爲官服。鞋爲便服。後卽不述。其餘例推。

一 三通等書專紀大事。茲編則專察小。例如周時下體無衣。揅即舉外則露體。則於墨子之是猶裸者。

謂攝之不恭也證明之又如漢魏時坐牀牀上鋪席與否古無言者則於後漢向栩傳牀上有膝踝足指痕及魏書管寧傳榻上當膝處皆穿證明其無席復證明其仍跪坐又漢魏時士夫仍脫履卽赤足亦於向栩傳牀上有膝踝足指痕證明之蓋若著襪任何年久不得有足指痕也借甲以證乙因乙以明丙以是攷沿革察變遷自知瑣碎無關宏博倘大雅君子加以匡正則幸甚矣

一 前三卷祇有上古社會衣食住之創造及禮教緣起不能如周以後之分類閱者諒之

行唐尙秉和識

目錄

卷一 有巢燧人時社會狀況	一一三
卷二 伏羲神農黃帝時社會狀況	五一六
卷三 五帝時社會狀況	一七一二二
卷四 三代以來首服	二三一四七
卷五 身服	四九一七八
卷六 足服	七九一九〇
卷七 飲食	九一一一三〇
卷八 周時車馬	一二一一三六
卷九 漢以來車馬	一三七一一五六
卷十 屋室	一五七一一六六
卷十一 燈燭	一六七一一七五
卷十二 城郭	一七七一一八〇

卷十三 都城街衢	一八一一一八六
卷十四 市肆	一八七一一九五
卷十五 閭里	一九七一一〇三
卷十六 祠祭	二〇五一一一五
卷十七 學校	二一七一一三四
卷十八 農田	二二五一一三二
卷十九 嫁娶	二三三一一四八
卷二十 葬事	二四九一一六二
卷二十一 葬	二六三一一七一
卷二十二 墳墓	二七三一一七九
卷二十三 坐席	二八一一二九一
卷二十四 拜跪	二九三一一九九
卷二十五 訟獄	三〇一一三〇八
卷二十六 筆墨紙硯之沿革	三〇九一三一八

卷二十七	迷信 禁忌	三一九—三三三
卷二十八	廁溷	三三五—三四〇
卷二十九	取水 取火 取材木	三四一—三五〇
卷三十	官吏休沐 佩印 受杖 多蟲	三五一—三五七
卷三十一	古貴賤之觀察	三五九—三六七
卷三十二	歷代物價	三六九—三七九
卷三十三	歷代稱呼	三八一—三九〇
卷三十四	奴婢傭賃	三九一—三九七
卷三十五	治病 鬱疫	三九九—四〇五
卷三十六	賦稅 力役 戶籍	四〇七—四一六
卷三十七	行旅	四一七—四二五
卷三十八	兵事	四二七—四三一
卷三十九	歲時伏臘	四三三—四四八
卷四十	各種游戲	四四九—四五七五

卷四十一 家庭狀況	四七七—四八八
卷四十二 社會雜事雜物	四八九—五〇六
卷四十三 平民仕進	五〇七—五一六
卷四十四 嫉	五一七—五二七

歷代社會風俗事物攷

卷一

行唐尙秉和著

上古 無父時代

社會狀況歷代不同。自黃帝至今四千餘年。其世次略可考。由黃帝溯炎帝。由炎帝溯伏羲。當又有千餘年。合黃帝以來。共五千餘年。此五千餘年中。社會嬗變之情狀。豈惟古之人不能料今。今之人苟不追研推測。亦不能見古也。孔子贊易始述伏羲。刪書斷自堯典。太史公作史記首黃帝。後儒輒因以爭論。豈知書經乃孔子古文之選本。而非史記。史記必詳世次。自黃帝以上。世次尤不明。非謂盡無稽也。茲編所述。重在社會狀況。凡可考見者。著於篇。故斷自伏羲。其伏羲以前。人羣狀況。散見百家。無事實可徵者。皆理想之詞。並不取。惟有二氏。有事實功德在民。故附及以爲卷首。

上古穴居有巢氏始架屋

禮運。昔者先王未有宮室。冬則居營窟。疏營累其土而爲窟。地高則穴於地下。則窟於地上。又莊子古者。

禽獸多而人民少於是民皆巢居以避之始學篇上古皆穴處有聖人教之巢居號有巢氏三墳云有巢氏俾人居巢積鳥獸之肉聚草木之實天下九頭咸歸有巢始君也

按始學篇人皇九頭者九會長也

按穴居之苦不得光一也暑濕二也不得空氣三也易爲猛獸所害毒虫所螫四也而民智未啓睢睢盱盱無如之何有巢氏出架木巢居出幽谷遷喬木置身高曠諸害盡除以此功德民盡歸之宜矣後之宮室亦巢也進而益精耳有巢氏之巢不必在樹上壘土石上架以木簡陋有類於巢實卽屋也

燧人氏始造火始炮食

尸子燧人上觀星辰下察五木以爲火拾遺記遂明國有大樹名逐屈盤萬頃後有聖人遊至其國有鳥啄樹粲然火出聖人感焉因用小枝鑽火號燧人氏古史考太古之初人吮露精食草木實山居則食鳥獸衣其羽皮近水則食魚鼈蚌蛤未有火化腥臊多害腸胃於使有聖人出以火德王造作鑽燧出火教人熟食鑄金作刃民人大悅號曰燧人三墳燧人氏教人炮食鑽木取火有傳教之臺有結繩之政按火自無而有者也其發明至爲難能燧皇感森林自焚知木實藏火不知幾經攻治幾經試驗始鑽木得之其功又進於有巢而卽以是爲帝號可見當時之詫爲神聖而利賴之深矣

或謂火化而食始於庖羲故以爲號豈知燧人旣發明出火其智慧豈尙不知炮食况炮者裹肉而燒之燒其毛使熟耳在熟食中爲至粗之法燧人去伏羲近伏羲益發達美備耳其創於燧人無疑也

由今追想未有火之先。凡肉皆生食。其有害於人而夭折者。不知凡幾。且不知味。及得熟食。肉之腥臊者。忽馨香矣。草木實之淡泊寡味者。忽甘腴脆美矣。水之冰者可燠飲。居之寒者可取溫矣。至黑夜燔柴。以禦虎豹。猶後也。當夫登臺傳教。廣播火用之時。萬民之感戴慶幸。爲何如。真驚天動地之偉業矣。既有火。則可冶金作刃。及他器用。未有火之先。凡器皆以石爲之。今所謂石器時代也。

上古之時。無所謂風俗。無所謂綱常。人但知有母。不知有父。食住略有基礎。衣服尙未慮及。亦生活之程序然也。至於廉恥禮義。相去尙遠。其情狀略與南洋諸島之土人同。尙不及滇黔之苗猺。於此之時。有能於衣食住生活上。創一新法。以利生民者。民自然歸之。而奉以爲君。聽其號令。此時之君。殊無所利于民。以無富貴榮華之念。故亦無爭帝位者。如有巢。如燧人。皆以功致帝也。

卷二

行唐尙秉和著

伏羲

有父時代之始

始制嫁娶有夫婦

白虎通云古之時未有三綱六紀民人但知有母不知有父衣能覆前不能覆後臥之詰詰起之吁吁饑卽求食飽卽棄餘茹毛飲血而衣皮葦於是伏羲仰觀象於天俯察象於地因夫婦正五行始定人道又古史考伏羲制嫁娶以儺皮爲禮

按儺者並也偶也自太昊以前男女隨遇匹配初無定偶朝暮更易或女棄男或男棄女棄則相仇其嫁而艾者或女爭男或男爭女爭則相殺不見夫犬乎春秋婚媾之際日夜鬪爭獮矜牙之聲中夜不絕何況於人當時社會因此相仇相殺者日不知幾千百起不惟於禮教有傷且於治安有礙太昊仰觀天俯察地首定夫婦一倫而禮教基矣

自開闢至伏羲人始知有父

新語云先聖仰觀天俯察地圖畫乾坤以定人道民始開悟知有父子禮郊特牲男女有別然後父子親

父子親然後義生。義生然後禮作。

由開闢至太昊。其年雖不可考。然據百家所常稱道者。有天皇。地皇。人皇。女媧氏。大庭氏。赫胥氏。葛天氏。無懷氏。有巢氏。燧人氏。中間不顯著之氏。尙不知凡幾。而夫婦一倫訖未有定。無夫婦則無父子。只有母子。太昊制爲嫁娶。以禮迎聘。於是男女別而夫婦定。其非夫婦而相悅者。則必有禁矣。且必以爲恥矣。夫婦定而生子。然後父子一倫相因而生。若以前則婦無定夫。子無定父。

始創罔罟以佃以漁

易曰。伏羲作結繩而爲網罟。以佃以漁。蓋取諸離。漢書云。作網罟以佃漁。取犧牲。故天下號曰炮犧氏。戶子。宓犧氏之世。天下多獸。故教民獵。

按此時雖火化而食。然五穀尙未發明。仍以動物爲主要食料。而動物之獲頗艱。獵獸之器。雖有兵刃。而無弧矢。佐之以罟。獲獸易矣。至水中動物。非網不得。太昊由結繩而爲網罟。爲謀食之唯一利器。

始創陶器

拾遺記。均土爲墳。世本。暴辛公作墳。通志。伏羲作塈。按墳者樂也。詩所謂吹墳吹鑪也。銳上平底。以土爲之。燥以火。音大如叫呼。且既能作塈。其他日用之陶器必多矣。記載失之耳。

始名事物

春秋命歷序伏羲始名物蟲鳥獸按凡事凡物須皆有名然後能識別草昧之世甲歷未作人知有寒暑而已年之名無有也知月盈虧而已月之名無有也推之天空地上山登之而悚其高水盪之而駭其流金石草木虫魚鳥獸日月星辰風雲雨露日相見相接相用而不可離不有定名胡由取携胡由指目太昊知之凡百事物皆與以名由少及多由甲推乙以定民志以一民稱由是談虎而色變說梅而舌津矣則名之效也

更創八卦以代結繩

易繫古者庖羲氏之王天下也仰則觀象於天俯則觀法於地觀鳥獸之文與地之宜近取諸身遠取諸物於是始作八卦以通神明之德以類萬物之情拾遺記伏羲和八風以畫八卦分六位而正六宗古史考庖羲氏作卦始有筮

按結繩爲識其變化甚難代以八卦則肆應不窮較結繩進矣三墳云命飛龍氏造六書三墳號稱僞書難盡信然以理揣之太昊始名草木禽獸蟲魚後神農嘗百艸必有詳細紀載若六書至黃帝始有將無法以紀物名及百艸之味矣故謂六書至黃帝改造增修則可謂黃帝以前無書契則不可矧太昊既斂作八卦以爲筮必能再由八卦增造六書以紀事無疑也

始創爲音樂

世本庖羲氏作瑟五十絃。瑟潔也。清潔於心。淳一於行。史記。太帝使素女鼓五十絃瑟。悲帝禁不止。故破其瑟爲二十五絃。拾遺記。太昊立禮教以導文。造干戈以飭武。絲桑以爲瑟。均土以爲墳。禮樂於是興。漢前律歷志八音。曰墳大如雁卵。

按樂也者。心之所樂者也。蓋所以平和性情。宣導抑鬱。發於心之所不容已。太昊首創絲土二音。後八音。以次生矣。

由今追思。伏羲之世人羣狀況。居處則由巢穴漸進爲廬室矣。飲食則由炮燔漸進而爆炙矣。至衣服既可以蠶絲製爲瑟絃。編爲網罟。則必能織爲衣服。史失之耳。而最大之更革。在能對男女淫亂無別之狀況。制爲夫婦。易曰。有夫婦然後有父子。有父子然後有君臣。上下故夫夫婦者。人道之起源。風化之根本也。春夏秋冬。孰界之哉。東西南北。孰定之哉。自太昊定名。凡百事物。昭著名晰。無隔閡之虞。蓋至是世界稱謂大定。文明之啓。十已五六矣。

神農

始藝五穀不專肉食 始作耒耜

自虎通。古之人民皆食禽獸肉。至於神農。人民衆多。禽獸不足。於是神農因天之時。分地之利。制耒耜。教

民農作易繫云伏羲氏沒神農氏作斲木爲耜採木爲耒按月令季冬之月命農計耦耕修耒耜注耜者耒之金也周禮冬官考工記耜廣五寸二耜爲耦疏耜謂來頭金金廣五寸釋名耜者似也似齒之斷物也是耜者金器戴於耒足以耕地故云似齒今北方民猶用之神農之時金器尙未大行故斲木爲之後方易以金也

又新語民人食肉飲血衣皮毛至於神農以爲行虫走獸難以養民乃求可食之物嘗百艸之實察酸苦之味教民食五穀

又淮南子古者民茹艸飲水采樹木之實食蠃蠅之肉時多疾病毒傷之害於是神農乃始教民播種五穀相土地宜燥溼嘗百艸之滋味水泉之甘苦令民知所避就當此之時一日而遇七十毒

按由太昊至神農不知若干年而人民日益衆者勢也禽獸爲人所害必日益寡其不能供給於人者亦勢也且謀食而必獵獵有獲有不獲何其難哉故嘗百艸擇其可久食而無病者種而食之又不知試驗比較若干年而始得五穀之最良也因嘗艸之故一日遇七十毒是直以身殉民也後世思其功血食數千年宜矣

時織布已大盛

文子神農之法曰丈夫丁壯不耕天下有受其飢者婦人當年不織天下有受其寒者故其耕不强者無

以養生其織不力者無以衣形。按呂氏春秋漢書皆引此教而呂氏織作績績績麻也。並曰身親耕妻親績男女工作似此時已分章身之具至此已大有進步蓋已不衣皮韋彬彬有文矣。

始教民鑿井

本艸經神農問於太一曰鑿井出泉五味煎煮口別生熟蓋古聖所居皆在大河左右不能處處有水泉故必鑿井以濟其窮水經注曰神農既誕九井自穿是亦鑿井之證當時之人必甚駭怪神之曰自穿耳始有醫藥以救人

本艸經神農從太一嘗藥以救人命上藥一百二十種爲君久服不傷中藥一百二十種爲臣有毒無毒斟酌其宜欲遏病補虛羸者本之下藥一百二十種爲佐使不可久服欲除寒熱邪氣破積聚愈病者本之按所謂上藥無毒可久服必五穀之屬也中藥下藥卽今日藥肆所有之藥也既有藥必有醫爲民診治病

時市政益發達

易曰神農日中爲市致天下之民聚天下之貨交易而退各得其所按此時百姓於衣食住既日臻美備嗜欲亦日益多交易有無生活始便而錢幣未興祇以物易物耳日中爲期路遠者可往返也法實創於伏羲但其時未大盛耳

時已有城

漢書神農之教曰有石城十仞湯池百步帶甲百萬而無粟不能守也按人有欲必有爭爭則戰故築城以爲衛惟創於神農或神農以先卽有之無從考也

按帝王世紀神農在位百餘年此百餘年中救濟人民生活者甚衆發明穀食救肉食之窮一也穿井汲水濟自然水之窮二也夫耕婦織救衣皮之窮三也嘗百藥醫民疾四也創耒耜以便耕耨五也大市政以便民六也由是百姓非獵不得食之苦免旣有井則無河流之地亦可移居以前地無泉水卽無居民之困亦免未有藥之先百姓有疾任其夭折神農殉身製藥於是疾始有醫農器以耒耜爲最重織績以機杼爲最繁耒耜人知爲神農所創機杼紡車亦必創自神農史失紀耳衣食備而不通工易事則有匱乏積滯之患爲之市以通有無濟困乏民皆得所矣蓋自開闢至神農其間聖哲皆致力於衣食住之創造至是已大備在今日視之而覺爲尋常者在創造之始皆列聖焦神勞思而後有此效果也

黃帝時代

始造舟車始役使牛

漢書黃帝作舟車以濟不通古史考黃帝作車引重致遠少昊時略加牛禹時奚仲加馬呂氏春秋舟車

之始見也。三世然後安之。世本黃帝臣骸作服牛。

按易剗木爲舟。剡木爲楫。及服牛乘馬之事。不專屬之黃帝。蓋黃帝創之於始。堯舜增修於後也。始有車時。必先以人力推輓。既而牛馬漸馴。更用牛馬也。自黃帝以前。無役使牛馬之紀錄。亦無牧蓄鷄犬羊豕明文。疑其時皆爲野獸。尙未馴熟。至此時役使之事。始及於牛。尙未及馬。遲至禹時。始以馬引車。以此見馬之馴熟。難於牛也。今之談中國古史者。自黃帝以前。輒曰游牧時代。吾疑中國古時。並未游牧。何言之。神農之時。民族人口雖漸增多。而地皆荒蕪。到處皆牧場。若其時牛羊犬豕之屬。可以牧蓄。足可供給民食。而無匱。胡以神農遽代以五穀哉。可見此時牛羊皆爲野獸。不服於人。非佃獵不能得食。故必以五穀濟其窮。觀役使牛馬。至黃帝時始試驗。而馬尙不能引車。是其證已。

凡今之以游牧時代。談中國古史者。皆未詳考。而服從於發達最晚民族之理想學說。須知晚起民族之必有游牧時代者。乃我民族馴服禽獸。既成功以後之事也。

始修官道

史記。黃帝披山通道。未嘗寧居。按披者開也。或剗榛莽。或移土石。以利交通。交通利則文明易於傳播。

始造年歷起甲子

史記正義。黃帝命大撓造甲子。容成造歷。按炎帝旣教民藝五穀。五穀之生。與天時有莫大關係。其時春

夏秋冬節氣寒燠必已明晰至黃帝更作歷頒之民所謂敬授民時也既而歷則宜有甲子以爲標識六十年一更六十日一易計算便矣

時男女始有別

淮南子黃帝治天下別男女異雌雄按神農時始盛織布當時之民由衣皮進而衣布旣便且觀美然其服制必男女爲一往來動作社會上必有許多誤會或因以召亂別雌雄異服式風俗易以整齊矣

時宮室已有棟宇

易繫云上古穴居野處聖人易之以宮室上棟下宇新語天下人民與鳥獸同域黃帝乃伐木構材築作宮室上棟下宇按說文棟極也爾雅釋宮郭注棟卽屋脊也卽今日屋式也宇卽今日之廊簷也詩八月在宇箋宇簷下也蓋自有巢創爲屋室苟簡樸陋至黃帝則上有屋脊以壯觀瞻旁爲廊簷以爲掩護以便憩息至於今四千餘年仍而不改則其制之大備可知矣

始服垂衣冠履

拾遺記黃帝始垂衣服冕又世本黃帝作旃冕伯余作衣裳於別作屨通典上古衣毛帽皮黃帝始用布帛按神農始織布帛其時尚貴祇短衣蔽體尙無威儀至黃帝始講求儀式襟袖寬博彬彬下垂矣百姓化之漸褒衣博帶也黃帝以前祇努力於衣服之構造至冠履則未聞至黃帝衣服垂垂旣已完備遂

漸及於首足。帝既服冕。人民必冠幘矣。足無衣則寒。且不利行走。是以艸製屨。以皮製履。蓋足衣之發明爲最後。較衣服更難也。

時字已大備

拾遺記。軒轅始造書契。淮南子。倉頡作書。天雨粟。鬼夜哭。荀子故好書者衆矣。而倉頡獨傳者壹也。按書契斷非一時所能造成。諸書多言始於軒轅。余以爲伏羲能畫八卦。必能造書契。神農若無字。百艸之名。胡從而記。不過初尙少。至軒轅增修大備耳。軒轅時有史官紀錄其事。後人不察。以爲軒轅命倉頡始創耳。觀荀子可證已。

又倉頡不定爲黃帝時人。馬氏逸史引外紀曰。倉帝名頡。始創文字。在伏羲前。又按春秋元命苞。倉帝史皇氏。名頡。姓侯。仰觀奎星圖曲之勢。俯察龜文鳥羽山川。指掌而創文字。天爲雨粟。鬼爲夜哭。治百有一十載。都於陽武。是則倉頡爲古之皇帝。史皇乃其號。而在伏羲前。是說也頗可信。倉頡惟在伏羲前。所以能開伏羲易學。又自伏羲至神農事漸詳。足徵有紀錄。其稱曰史皇者。以能造字爲史所自起耳。猶燧人造燧。卽曰燧皇也。

時八音已大備

漢書律歷志。黃帝命令洽呂氏春秋作伶倫。疑後世伶人本此。爲律。自大夏昆侖之陰。取竹之嶰谷。生其竅厚均者。斷兩節間。

而吹之以爲黃鐘之宮。

注律之最長

制十二筒以聽鳳之鳴其雄鳴爲六雌鳴亦六比黃鐘之宮而生之是爲

律本禮樂記咸池備矣莊子帝張咸池之樂注咸池者黃帝樂也。

按黃帝既創爲律管以候氣六陰六陽上下相生陽謂之律陰謂之呂故亦曰十二律曰黃鐘十一月律管正月始洗三月蕤賓五月夷則七月無射九月六律也大呂十二月夾鐘二月中呂四月林鐘六月南呂八月應中十月六呂也律以黃鐘爲最尊而黃鐘之宮聲實五音之本帝既定律於是諸樂備作金石絲竹匏土革木八音咸備承用至今。

始以黍粒創度量衡

漢書律歷志度者分寸丈引也所以度長短本起黃鐘之長以子穀秬黍中者一黍之廣度之九十

分訛字隋書引作黍黃鐘之長言九十一黍爲一尺

言一黍爲一分黃鐘長九寸

量者龠合升斗斛也所以量多少本起於黃鐘之龠以子穀秬黍千二百黍實其龠以井水準其概合龠爲合十合爲升十升爲斗以次量也。

衡者稱桿平也權稱錘重也所以稱物知輕重分銖兩斤鈞石也本起於黃鐘之重龠容千二百黍重十二銖兩之即二十四銖爲兩十六兩爲斤。

按說苑云度量權衡以粟生一粟爲一分一粟者一黍也時市政久已發達交易繁多不有度量衡胡由

交易而度量衡不有根本胡能齊一黃鐘與黍皆永久不變者也故以爲本古人立法之精如此晉荀勗作樂自謂諧調獨阮咸心不謂然無一言勗忌咸出爲始平太守後田父耕得周玉尺勗持以校已所作鐘磬覺皆短一黍始服阮神識周尺卽律尺也是千百世後仍可以黍正誤也

時陶器木器益大備

通攷神農作甕餅缶黃帝作釜甑盤櫟按自伏羲燒土作器爲陶之始炎黃繼作器用益備利賴至今蓋中國社會之制造至黃帝時不惟衣食住皆備且有文有章矣而其最大最深之創作爲年歷爲甲子爲律萬世賴之而六律尤能辨陰陽之氣識造化之微武王伐紂吹律聽聲便知吉凶師曠知南風之不競亦以律知周禮所謂太史執同律以聽軍聲是也又歷代制作之不能決定者則以律攷定之而其源實創于黃帝其深微奧妙爲何如哉

卷三

行唐尙秉和著

五帝時代

太史公列黃帝爲五帝首而減少昊氏後人頗議其輕信大戴禮致舜禹世次权柄不合然觀太史公後敍不謂無疑特以大戴禮文尚雅馴故依據之耳後世重行論定大概以少昊顓頊帝嚳帝堯帝舜爲五帝今從之

始以斗杓指寅爲正月

逸史顓頊以斗杓建寅爲歲元古史攷顓帝以孟春正月爲歲元按建者指也寅東北方也蓋自黃帝以來攷定星歷建立五行起消息正閏餘節四時之度而已無正月之名正月者政教之始故不曰一月而曰正月元者長也首也卽以正月爲歲首也正月之名始此卽夏時也

時男女之別益嚴女遇男須避行不避則辱之

淮南子帝顓頊之法婦人不避男子於路者拂之於四達之衢按黃帝之時但曰別男女而已此云婦人須避男子不云男子避婦人不公甚矣拂之者以手摩其肌膚四達之衢人衆之地以女旣不避男卽令

男子拂其肌膚。又何妨哉。罰太酷矣。

時始有祭祀

史記。顓頊依鬼神以制義。治氣以教化。潔誠以祭祀。按顓頊以前。無祭祀之名。至顓頊始以神道設教也。第所祭爲何。尙不詳耳。

堯時以華表 今牌樓 標識都城衢路

古今注。堯立誹謗之木。今之華表木也。以橫木交柱頭若花也。形若桔槔。大路交衢悉施焉。或謂之表木。以表王者納諫也。亦以表識衢路也。又尸子。堯立誹謗木於四達之衢。按古今注所言。古華表之形與今之牌樓無以異。然則今北平城內之東四牌樓。西四牌樓。仍唐虞之制也。

時父母喪三年

書堯典。二十有八載。帝乃殂落。百姓如喪考妣。三載四海遏密八音。史記。堯崩。百姓悲哀。如喪父母。三年四方莫舉樂。孟子。堯崩三年之喪畢。是可證唐虞時父母之喪行之三年已成定禮。故書以父母喻君也。

始有流刑鞭刑朴刑贖刑

通攷。自黃帝以來。不用命者。則征之以兵。無所謂刑。刑之作始於唐虞。虞書流宥五刑。鞭作官刑。朴作教刑。金作贖刑。流者流之遠方。今所謂充軍也。鞭朴者撻也。贖刑者。以金贖罪也。史記集解。以墨劓刑。即刑

宮大辟當五刑。或謂此時祇有大辟。尙無上四刑。不知果如何耳。

時商賈已發達

孟子。舜遷於負夏。益稷謨懋遷有無化居。尙書大傳。舜販於頓丘。就時負夏。按就時者。逐時射利。卽益稷謨所謂懋遷有無化居也。時民尙愚魯。祇知耕田爲農。至爲賈爲商。則不能也。觀舜之所爲。則當時社會商賈之狀況可知矣。

時已有繪畫

書予欲觀古人之象。日月星辰山龍華蟲作會。按注會者繪也。畫六章於上衣也。六章者。卽日月星辰山與龍雉蟲。即華蟲。也。又孟子。及其爲天子。被袗衣。注袗衣。畫衣也。是可證當時畫學已盛。

時已有刺繡

書宗彝藻火粉米黼黻絺繡。以五采章施於五色。按絺繡者。以絺繡六章於下裳也。六章者。宗彝藻火粉米黼黻也。五采者。言無論繪衣繡裳。色皆有五也。

自黃帝制爲垂衣。衣。即長衣。較以前進化矣。然至堯時。尙服素衣。未有服色。史所謂黃收純衣也。至舜。則加以五色繪繡。兼施上衣下裳。文采彪炳。而六章之制。承用至清末。抑可謂久矣。

時葬用瓦棺始不用薪

禮檀弓有虞氏瓦棺注始不用薪按易繫云古之葬者厚衣之以薪不封不樹喪期無數後世聖人易之以棺槨蓋有虞氏有棺而無槨鄭注蓋以進化程序攷之故曰始不用薪

時學校已大備

書命汝典樂教胄子直而溫寬而栗剛而無虐簡而無傲詩言志歌永言此言學校教學子之宗旨也禮王制有虞氏養國老于上庠養庶老於下庠鄭玄云上庠右學大學也在西郊下庠左學小學也在國中周之小學爲有虞氏之庠制是以名庠云觀此則舜時之學制實已大備故至周猶采用其法而虞書但言教胄子之法不詳其制由是知唐虞遺法爲後世所知者百不及一也

時五禮咸備

虞書修五禮五玉三帛二生一死贊按五禮者注云吉凶軍賓嘉各禮也修者言舊有此五禮舜巡狩所至攷察其是否舉行也史五帝紀三帛注云鄭玄曰帛所以薦玉高陽氏後用赤繪高辛氏後用黑繪是高辛高陽時已有此禮故其後沿用之然則謂五禮至唐虞咸備則可謂始於唐虞則不可也唐虞以前皆失紀耳

始以詳歷授民以日月星辰鳥獸爲識時標準

堯典乃命羲和欽若昊天歷象日月星辰敬授民時按此時識時之法尙不能如夏小正月令之詳而以

春分秋分夏至冬至爲定四時之最大關楗詳仲春仲夏仲秋仲冬其孟季則不詳因仲月定其孟季亦定也。

其定仲春之法曰日中星鳥以殷仲春厥民析鳥獸孳尾按日中者春分也星鳥者言至春分昏則鳥星畢見此一識也乳化曰孳交接曰尾言至春分則鳥獸自然孳乳交接此又一識也殷者定也仲春定則孟季可知。

其定仲夏之法曰日永星火以正仲夏厥民因鳥獸希革按日永者夏至星火者言至夏至則昏時火星正中也希革者言夏時熱鳥獸毛羽脫落也亦以星辰鳥獸爲識。

其定仲秋之法曰宵中星虛以殷仲秋厥民夷鳥獸毛氉。

按宵中星虛者注云虛星見則正秋分也氉者理也言毛更生若整理然。

其定仲冬之法曰日短星昴以正仲冬厥民隩鳥獸氉毛按日短者冬至也昏昴星中則冬至到矣氉毛者言溫柔也時天寒鳥獸氉以自溫。

按此時識時尙未及於草木不能如夏小正月令之詳然以閏月定四時成歲歲歷之成至堯已大備虞書紀事簡想尙有其他標識未備舉耳。

然其時歷法實略遠方日月不免錯誤故中央常爲訂正

虞書協時月正日同律度量衡。按自黃帝以來用甲子紀日月年每六十則一周。史記稱紂爲長夜之飲忘其日辰。春秋時各國月日亦每有錯誤。况簡略如唐虞遠方節侯差錯不齊。因以誤民者多矣。舜因巡狩協同時日使之齊一。非爲奉行正朔亦利民要政也。至於度量衡之製造皆原本於律執黃鐘律隨所至而同之。不憂不齊一矣。

蓋唐虞之時社會狀況其屬於風俗者夫婦父子尊卑上下已秩然有章。其屬於政教者已五禮五刑定有常制。其屬於音樂者已聲律克諧八音咸備。其屬於技藝者則繪畫刺繡黼黻文章。孔子曰大哉堯之爲君巍巍乎其有成功煥乎其有文章惜其詳細狀況皆失載僅禮記中溯各事源流偶爾及之爲可惜耳。

又唐虞時洪水爲災當其未平草木暢茂禽獸逼人獸蹄鳥迹遍於中國人與獸雜處水與人爭地觀禹鼎所鑄及山海經所述魑魅罔兩及殊形詭狀不可名言害人之禽獸如巫支祁屬者不可勝數蓋極恐怖之時代也。及夫大禹疏導注之東海萬派順流益更烈山澤以與逼人之禽獸戰然後稷播百穀益夔興禮樂唐虞之郅治乃成。

卷四

行唐尙秉和著

首部

三代社會狀況

夏殷禮俗。摭拾所得。不及周之十一。僅名物制度。散見於三禮而已。社會狀況。欲窺其全要難。雖然。孔子云。周盛於二代。郁乎文哉。又曰。周因於殷禮。殷因於夏禮。其損益可知也。孟子述三代井田學校名異實同。是周之禮俗。卽夏殷禮俗。夏殷社會與周無大異也。故並述之。

三代首服狀況

欲知古人首服。須先明古人留髮狀況。古人髮皆上挽。約之以笄。音雞說文笄簪也。所以連冠於髮。使不墜也。然其詳至漢鄭康成作注時。已云不能盡詳。茲所述者。特其形狀之概略耳。

一大禮冠狀況

王制云。夏后氏收而祭。殷人冔而祭。似夏殷無冕。然論語云。禹致乎黻冕。書太甲。惟三祀。十有二月。伊尹以冕服奉嗣王歸於毫。是夏殷亦冕也。特異其名曰收冔耳。至冕之形象。據後漢書引大小

夏侯說皆廣七寸長尺二寸前圓後方前垂四寸後垂三寸係白玉珠爲十二旒通攷云冕惟卿大夫以上得服之以旒數多寡爲等差天子十二旒大夫三旒大夫以下不得服卽今俗所謂平天冠也民國初年常採用其制以爲祭服而無垂旒蓋冕之制起於黃帝至周而大備故孔子取之曰服周之冕冕之制至明尙承用中國冠服沿襲至數千年之久者惟此耳

冕之表裏顏色及其高低

按周禮夏官弁師掌王之五冕皆玄冕朱裏延紐注延之覆在冕上也疏云爵弁前後平故得弁稱冕則前低一寸餘故得冕名冕則俛也以低爲號也由上說攷之是冕之上色玄裏則色朱前簷較後簷低一寸餘也

一常禮冠狀況

按通攷云弁亞於冕郊特性所謂周弁殷冔夏收是也自天子至於士皆得服之周禮夏官弁師疏云爵弁前後平故得弁稱觀經傳所載國君及卿士大夫除大朝大祭外皆御弁弁固爲常禮服通攷謂爲冕之亞者信矣

弁之物質及其形狀之顏色

弁之形前後平前旣言之矣至其物質顏色據白虎通云皮弁者何謂也所以法古至質冠名也弁之言

樊也。所以樊持其髮也。以鹿皮者取其文章也。又左傳僖二十八年初子玉自爲瓊弁玉纓杜注弁以鹿皮爲之次瓊玉爲飾是古之弁皆以鹿皮爲之且必以鹿皮之帶毛者爲之鹿毛斑駁可愛故曰文章又釋名云弁如兩手相合抨時也象以爵韋爲之謂之爵弁以鹿皮爲之謂之皮弁以韎赤韋爲之也按釋名之說與白虎通稍異白虎通謂必以鹿皮者取其文章明皮而有毛也釋名則謂以韎韋爲之似用赤色之皮而去毛者是韎也韎則何必鹿皮又爵弁後漢書謂象形釋名謂以爵韋疑釋名或誤也。

一燕居冠服狀況

按通攷云冠亞於弁所謂委貌章甫毋追是也按郊特牲云委貌周道也章甫殷道也毋追夏道也士冠禮鄭注云委安也言所以安正容貌章明也言所以表明丈夫毋發聲追猶堆也皆言冠之形道者言常所服以行道之冠也正義曰行道謂養老燕飲燕居之服若視朝則皮弁也按晉書輿服志云委貌形如覆杯與皮弁同制清時夏日服委貌形正如覆杯殆採周制歟。

通攷云周以前冠冕之制其詳不可得聞惟虞書言章服戴記言冠制耳然冠之制有三曰冕曰弁曰冠弁與冠自天子至於士皆得服之冕則卿大夫以上服之而可以兼服弁弁則士以下服之而不可以僭服冕。

春秋時視冠極重去冠則失禮以爲大恥

韓非子齊桓公飲酒醉遺其冠恥之三日不朝按韓詩外傳齊景公縱酒醉而解衣冠鼓琴以自樂顧左右曰仁人亦樂此乎晏子曰自齊國五尺以上力皆能勝嬰與君而不敢者畏禮也今君先失禮矣據此雖燕居不冠亦非禮也

古製冠有模至求之於外國以爲冠法

左傳昭二十三年晉范獻子求貨於叔孫使請冠焉取其冠法而與之兩冠注冠法者作冠模法也以是爲國際交際品其重可知矣

春秋弔用白冠

說苑楚孫叔敖爲楚令尹一國吏民皆來賀有一老父衣麤衣冠白冠而弔

冠若非法可至殺身

左傳僖二十八年楚子玉自爲瓊弁玉纓人知其將得禍後果然然其殺身之故不盡在冠也僖二十四年鄭子華之弟子臧出奔宋好聚鶡冠鶡翠鳥羽可爲飾鄭伯聞而惡之使盜誘而殺之則直以冠殺身矣

春秋戰國時冠樣可隨意製有獮豸冠

左傳成九年南冠而摲者誰也正義曰南冠楚冠卽今獮豸冠也獮豸觸不直故法冠象其形按後漢書解豸神羊能別曲直楚王常獲之故以爲冠秦滅楚以其君服賜執法近臣御史服之夫獮豸既爲羊則

有兩角冠狀如是怪甚矣。而春秋時楚人全國服之。故一望而知爲南冠也。楚滅。祇法官服之。沿至漢唐。不改。蓋冠式以此爲最久矣。

有鷄冠

史記弟子列傳子路性鄙。好勇力。志伉直。冠雄鷄。佩瑕豚。是又以雄鷄爲冠。取其勇猛。其形狀之可畏。亦獮豸之亞。

有鷄冠

真隱傳。鷄冠子。楚人。隱居幽山。衣被屢空。以鷄爲冠。著書言道家龐謾常師事之後。顯於趙。鷄冠子懼其薦己。乃與謾絕。又坊記云。趙武靈王製鷄冠以表武士。按正字通。鷄色黃黑而褐。首有毛角。有冠性愛儕。黨有被侵者。直往赴鬪。雖死不置。是亦鳥之勇猛者。取其狀以爲冠。亦猶鷄冠之義也。狀愈奇矣。

其固冠之法則有紐貫之以笄而以縱約其髮

周禮。夏官弁師。延紐注云。紐者。小鼻在武。冠卷也。禮玉藻縞冠玄武。上笄所貫也。今時冠卷當簪者。廣袤以冠縱。同繩名云。以釋韜髮者。前漢江充傳。冠禪纏步搖。注云。纏織絲爲之。卽今方目紗也。蓋未冠之前。先以縱約束其髮也。其舊象歟。疏古之紐。武笄貫之處。若漢時冠卷當簪所貫者。於上下之處。及隨縱之袤。博雅長也。以冠縱者。貫簪之處。當冠縱之中央。云舊象者。是周冕垂紐於武。貫縱之舊象也。按士冠禮。緇縱廣終幅長六尺。是縱長之度也。

然服冠亦有不用笄貫者但必圍以組儀禮士冠禮緇布冠缺項又詩小雅有頰者弁鄭康成直讀頰爲缺以爲弁貌六書通云冠無笄者用頰以組圍頭以繫冠缺其當項處以俟繫束也據此是以組圍頭以期冠固而組之兩端蓋當腦後冠缺處使下垂以爲繫束若有笄之弁則屈組爲紜冠垂爲飾不用頰

而繫冠之法纓尤爲重

士冠禮緇布冠缺項纓屬於缺左傳子玉爲瓊弁玉纓說苑楚莊王與羣臣夜宴盡醉燭滅有人牽王之夫人夫人絕其纓語王云頃有人無禮于妾妾斷其冠纓請罰之莊王遂令於羣臣曰今日飲須盡斷冠纓以爲樂於是羣臣盡斷其纓按說文纓冠係也釋名纓頸也自上而係於頸也以故左傳哀十五年以戈擊之斷纓子路曰君子死冠不免結纓而死結纓於頸則冠固故曰不免戰國策淳于髡仰天大笑冠纓索絕頭仰後則纓急急則絕也莊子曾子居衛縕袍無表正冠而纓絕冠久則纓敝敝而頓之故亦絕也愈見纓與冠所係之重已

纓上有飾

左傳楚子玉爲瓊弁玉纓是飾纓以玉也儀禮士冠禮其綾也注云綾纓飾也是纓上更綴以纈以爲美觀

周庶人首服狀況

以上所言弁冕皆士以上所服。庶人不與。然則古庶人首服果何如乎。案蔡邕獨斷云。幘古者卑賤執事。不冠者之服。又釋名云。巾者謹也。二十成人士冠。庶人巾。據是則廝役幘而庶人巾。巾爲普通商民之首。服然庶人有事亦冠。郊特牲黃衣黃冠而祭。是也。

周庶人亦露髻髻在項後不在頂

莊子支離疏者。駝肩高於頂。會撮指天。注會撮髻也。古人髻在項中。脊曲頭低。故髻指天。據是則古人或露髻。髻在項後。不似後人之在頂也。

漢冠服狀況
冕仍周制

後漢書輿服志。冕廣七寸。長十二寸。前圓後方。朱綠裏。玄上。前垂四寸。後垂三寸。係白玉珠爲十二旒。是仍周制也。惟周冕裏朱。漢增以綠爲小異。又周制大夫以上方服冕。漢志未言限制。然據趙喜傳不得已解巾之郡。注云既服冠冕。故解幅巾。是太守即可服冕也。

有爵弁爵同雀

後漢書輿服志。爵弁一名弁。廣八寸。長尺二寸。如爵形。前小後大。繪其上似爵頭。按周弁純以鹿皮爲之。不言加繪。帛其上亦未云。後大前小。蓋漢弁視周小異其狀矣。

時仍有獮豸冠

後漢書法冠或稱獮豸冠。又淮南王傳作漢使節法冠。又張敞傳且當以柱。後惠文冠彈治之耳。注漢法冠也是獮豸神羊之象。至漢仍存也。

有劉氏竹皮冠

史記高帝紀。高祖爲亭長乃以竹皮爲冠。時時冠之。及貴常冠。所謂劉氏冠也。後詔曰爵非公乘以上不得冠劉氏冠。卽此。但史祇言其質。未詳其形。

有高山冠

後漢書高山冠。蓋齊王冠也。注以其形似山。

時學者皆服進賢冠

後漢輿服志。進賢冠文儒者之服也。前高七寸。後高三寸。以梁多少別貴賤。自博士以至私學弟子皆一梁。是凡學者皆服之。魏晉六朝承用不改。

漢仍重視冠

汲黯傳丞相弘燕見上。或時不冠。至如黯見不冠。不見也。

漢冠卷

周禮弁師延紐疏云。古之紂武笄貫之處。若漢時冠卷當簪所貫者。

漢幘狀況

後漢輿服志。古者有冠無幘。至戰國時。秦雄諸侯。乃加其武將首飾爲絳帕。同帕也以表貴賤。其後稍稍作顏題額。漢興續其顏却擗理之施巾連題。却覆之。至孝文乃高其顏題。續之以耳。崇其巾爲屋。合後施收。上下羣臣貴賤皆服之。文者長耳。武者短耳。又蔡邕獨斷云。幘古者卑賤不冠者之服。元帝額有壯髮。不欲令人見。始服之。羣臣皆隨焉。然尙無屋。至王莽內加巾。故言王莽禿幘施屋。又劉玄傳。俠卿爲制絳單衣。半頭赤幘注幘巾。所以覆髻也。續漢書曰。童子幘無屋。示未成人也。半頭幘卽空頂幘也。其上無屋。廣韻弁缺四隅爲帽。夫旣有四隅。則形方也。

按幘之起。獨斷謂始於元帝。後漢書謂始於戰國。盛於文帝。並謂崇其巾爲屋。獨斷則謂至王莽始加巾。微有不同。然幘之始起。以絳帕首蓋與巾無異。後始加顏。加耳爲屋。形狀又略同於冠矣。然前漢時不多見。至東漢末則大盛。集異記云。漢延熹中京師幘額短耳長短上長下。時中常侍單超徐璜左悊。至於家貧。不能自辦。自號無頭。就人借頭。此其沿革之大略也。

屋者。隆起而空。上今戲劇之冠。色青頂後半隆起。有兩耳。橫於左右者。殆卽幘之遺制也。續漢書謂半頭幘卽空頂幘。其上無屋。然則幘之平頂者。雖空其上。不得謂之屋。屋則有脊。高起前後。漸低如屋形也。

漢卷幘及幘梁狀況

士冠禮。緇纓廣終幅長六尺皮弁笄爵弁笄緇組絃鄭康成注云纓今之幘梁也又云今未冠笄者著卷幘疑其形與冠卷類也。

漢頭巾貴賤前後不同

正韻云巾蒙頭衣也玉篇云佩巾本以拭物後人著之於頭急就篇注云巾者一幅之巾所以裹頭也釋名云巾者謹也二十成人士冠庶人巾當自謹修於四教也在兩漢時巾純爲庶民所服郭泰傳注云巾以葛爲之居士野人所服是也朱博傳皆罷斥諸病吏白巾走出府門馮衍傳乃共罷兵幅巾降于河內是甫罷官卽須白巾不得服官幘趙喜傳詔書迫切不得已解巾之郡是旣爲官吏卽須脫去白巾不得仍庶人服趙咨傳太尉楊賜特辟咨使飾巾出入請與講議是旣非官吏須特許其服巾然後能出入府門是兩漢四百年間祇庶人服巾其界甚嚴至東漢末雖王公學士亦服之遂無區別魏武紀注云傅子曰漢末王公多委王服以幅巾爲雅是以袁紹之徒雖爲將帥皆著縑巾王公且然官吏可想郭泰傳常於梁陳間行遇雨巾一角下也溺也時人乃故折巾一角以爲林宗巾其見慕皆如此孔融傳融幅巾奮袖談詞如雲名士且巾儒雅風流效慕益衆於是自周迄漢以下等社會之頭服至此乃遍於朝野而周代禮秩之等差遂淆然莫辨矣彼晉書輿服志謂巾古尊卑共服者非也

漢官吏謝罪則免冠士庶則脫巾

周亞夫傳。景帝視而笑曰。此非不足君所乎。條侯免冠謝。後漢高鳳傳。鄰里有鬪者解之不已。乃脫巾叩頭固請。是無論貴賤皆以脫冠巾表示待罪之意。且服過也。

漢以前士庶盡白巾不忌白色

漢以前祇官吏冠服有色。或青或玄或緇。淺黃餘士庶盡白巾成爲風俗。不似後世必持服而後服白也。觀漢末妖賊以黃爲巾亦所以別於白自爲標識。

魏晉六朝冠服狀況

天子冕旒歷代皆然。故不更詳。茲所重者燕居之服及社會真狀也。故略於冠冕而詳於帽幘。

魏晉時帽幘大行

幘玉篇云帽也。廣韻云弁缺四隅曰幘。類篇幘或作幘。幘玉篇云帽也。同幘然則幘也。幘也帽也一物也。魏志太祖紀注云漢末公卿多委王服以幅巾爲雅。魏太祖擬古皮弁裁縑帛以爲幘以色別其貴賤。是爲帽之所自始。

晉書輿服志。幘本未有歧。荀文若或名巾之行觸樹枝成歧。謂之爲善。因而弗改。按觸樹枝而成歧者中陷。

魏幘有歧六朝尙白帽

兩邊高也。晉因之。輿服志云。漢儀立秋日獵服。紺淺黃幘。後哀帝改用素白幘。又咸和九年制。聽尚書八座丞郎門下三省侍官乘輿白幘。低幘出入掖門。又二宮直官著烏紗幘。然往往士人燕居皆著幘矣。又隋書禮儀志。宋齊之間。天子燕私著白高帽。太子在永福省著白紗帽。南齊桓崇祖守壽春著白紗帽。肩輿上城。至隋以白幘通爲慶弔之服。國子生亦服白紗巾。是六朝至隋上自天子下至士庶皆白巾帽之證也。

晉時以幘爲禮服帽爲便服

世說。王鎮西往尚書墓還。葬後三日反哭。諸人要之。便回駕。把臂下車。裁得脫幘著帽。酣宴乃覺。未脫衰。是幘爲禮服。帽爲燕服。故脫幘著帽。又晉書謝安傳。安爲桓溫司馬。溫詣謝。值謝梳頭。遽衣幘。溫命以帽見。是亦以幘爲禮服。帽爲便服。故溫令帽見。以示優異。

晉幘質勁帽質輶

世說。時庾頽然已醉。幘墮几上。以頭就穿取。可證幘爲勁質。故可以頭穿取。又桓宣武少家貧。戲大輸求救於袁耽。耽遂變服懷布帽。隨溫去。可證帽爲輶質。故可懷也。

晉帽無纓

世說。孟參軍九月九日從桓公遊龍山。風吹落帽。是晉帽無纓。有纓則不至風吹落也。

六朝至隋帽有裙

南史和帝紀百姓皆著下屋白紗帽而反裙覆頂。又隋書禮儀志帽自天子下至庶人皆服之。以白紗者名高頂帽又有繪皂雜紗爲之。高屋下裙又云其制不定或爲卷荷或有下裙。按帽有裙爲古所未見。五代史補云僧謙先飲酒食肉嘗曰但願鵝生兩掌鼈留兩裙足矣是以鼈邊下垂者爲裙也。又釋名云裙連接裾幅也。六朝至隋時或於帽簷下綴橫幅以爲飾故反裙可覆頂也。

唐尚烏紗帽

唐書車服志烏紗帽者視事及燕見賓客之服也是官吏視事及燕居皆烏紗帽也。又雲溪友議李回謂魏晉曰如今脫却紫衫紗帽秀才僕爲試官依前不送公是秀才亦服紗帽也。

唐宋頭巾形尖爲美

聞奇錄又覆巾子射之云近來好裹束各自競尖新秤無三五兩因何號一斤是唐庶人仍以巾裹頭而以尖新爲美觀又歸田錄陶穀詩云尖簷帽子卑凡廸是宋初帽子亦尖形。

宋頭巾帶垂前

老學菴筆記予童子時見前輩猶繫頭巾帶於前作胡桃結背子是頭巾之裹束亦以帶爲固且必垂帶於前以爲飾也蓋至宋已以帽爲禮服巾爲便服與六朝時之以幘爲官服以帽爲便服者異矣。

周以來笠之狀況

詩小雅彼都人士臺笠縕撮傳云臺所以禦暑笠所以禦雨也鄭箋臺夫須也都人之士以臺皮爲笠按小雅云南山有臺傳臺夫須也疏夫須莎草也可爲簾笠是笠之質以草織成也

笠無貴賤皆服之

左傳注兵車無蓋籩人執笠依轂而立以禦寒暑名曰笠轂是貴人用笠也詩小雅何箋何同荷笠是下至牧人亦服笠也然後世之笠皆用以禦風日及雨夏秋用之冬日則否而杜注兼云禦寒則不得其義矣

古笠有柄

史記平原君傳虞卿者游說之士也躡蹠擔簦說趙孝成王徐廣曰笠有長柄者謂之簦又篇海簦笠以竹爲之無柄曰笠有柄曰簦

古簦笠卽今之傘

急就篇注云簦笠皆所以禦雨大而有把手執以行謂之簦小而無把手戴以行謂之笠是以古逸詩越謠云君擔簦我跨馬他日相逢爲君下由是證之左傳笠轂之笠旣云籩人手執亦必爲有柄之簦簦較笠大而廣形蓋與今傘無異惟今傘能開闔簦能開闔與否載籍未言不知果何如耳

晉時有曲柄笠

世說新語。謝靈運好戴曲柄笠。按急就篇。笠有柄。手執以行。笠無柄。方戴於首。茲雖曲柄而仍戴之。其真狀不能明也。

唐以笠禦雪

唐宋以來。詩歌言笠者極多。太白云。飯夥山頭逢杜甫。頭戴笠子日卓午。又云。簷笠青茫茫。簷亦竹類。以無異義。並不錄。惟柳子厚云。千山鳥飛絕。萬徑人蹤滅。孤舟蓑笠翁。獨釣寒江雪。是以笠禦雪。左傳注所謂禦寒者。或即此歟。

清時草帽

古爲笠。或以臺草。或以竹。或以簷。至清時。以麥莖編爲辯。盤綴成笠。光澤輕鬆柔軟。廣約二尺。極爲外國所羨。於是草帽辯爲出口大宗。

周時沐髮義意

韓非子爲政猶沐也。雖有棄髮必爲之愛。愛棄髮之費。而忘長髮之利。不知權者也。又淮南子。今沐者墮髮。而猶爲之不止。以所去者少。所利者多。夫曰。忘長髮之利。曰。所利者多。則沐者不惟去垢取潔。亦所以沃髮。使舒長也。

周沐髮狀況

左傳僖二十五年頭須求見公辭焉以沐謂僕人曰沐則心覆心覆則圖反是沐時須平身低頭平身故心覆也又叔武將沐聞君至喜捉髮走出前驅射而殺之是沐時須解髮髮已解而迎客故捉以出也

周沐髮洗面盥手去垢之法惟恃米汁至漢猶然

左傳哀十四年陳氏方沐使疾而遺之潘沐備酒肉焉注潘米汁可以沐頭又內則云沐稷而醴梁注沐髮用稷汁取其滑也醴洗面洗面用梁汁取其潔也蓋古時髮之上覆以纓纓之上加以冠不勤沐則髮垢膩垢膩多則蠣蟲生矣滑則去垢易也又史記外戚傳丐沐沐我請食飯我乃去注沐米潘也是漢仍以米汁沐也

古櫛髮盥沐醴面次數

內則子事父母鷄初鳴咸盥漱櫛縱笄總拂髦然則每日晨起須理髮一次也又內則云日五盥盥者以手沃水取淨也手操作多則生垢易故日五盥手又云三日具沐其間面垢煙溫潘請醴蓋髮沐而乾乾而櫛須時甚久故不能日日爲須隔三日至面垢則隨時可洗繹經義或日一爲之其間者言三日之間也

晉時澡豆

世說王敦初尚主如廁還婢擎金澡盤盛水琉璃盤盛澡豆因倒箸水中而飲之謂是乾飯羣婢莫不掩

口而笑。

唐宋人用澡豆者仍少。

酉陽雜俎貶誤云。予門吏陸暢娶童溪女。羣婢捧匣以銀奩盛澡豆。陸不識。輒沃水服之。其友生問君爲貴門女婿。幾多樂事。陸云。貴門禮法甚有苦者。日俾予食辣麵。殆不可過。又漁隱叢話。王荊公面黑。夫人爲置澡豆。公曰。天生黑於予。澡豆其如予何。以是證唐宋人沐浴不盡用澡豆。尙與今異也。

古沐後晞髮狀況

莊子。孔子見老聃。老聃新沐被髮而乾。俟。懃然似非人。蓋古人髮多而長。被髮下垂。形狀詭怪。故曰非人。又淮南子。今沐者墮髮而猶爲之不止。以所去少。所利者多。

晉唐晞髮狀況

世說。謝萬造王恬坐少時。王便入門內。謝以爲厚待己。良久乃沐頭。散髮而出。亦不坐。仍據胡牀。在中庭。曬頭。神氣傲邁。了無酬對意。唐杜甫詩云。當風晞白髮。是亦沐後欲髮得風易燥也。

周櫛髮器

內則。櫛用櫛。注白櫛。注理木也。髮晞用象櫛。注沐髮爲除垢膩。故用澀木以爲梳也。晞燥也。沐已乾則髮澀。故用象梳以取滑也。

漢唐理髮用梳

說文。梳理髮也。釋名。梳言其齒疏也。長楊賦。頭蓬不暇梳。唐書吳競傳。朝有諷諫。猶髮之有梳。

若周時越人則剪髮不冠

韓詩外傳。越王勾踐使稽廉獻民於荆王。荆王使者曰。越夷狄之國。請欺其使者。荆王曰。勾踐賢人也。其使者必賢。子慎之。使者出見稽廉。曰。冠則得以俗見。不冠不得見。稽廉曰。夫越亦周室之列封也。處江海之陂。與鯀鱣魚鼈爲伍。文身剪髮。而后處焉。今來至上國。必曰冠。得以俗見。不冠不得見。如此則上國使適越。亦將劓墨。文身剪髮。而后得以俗見乎。荆王聞。披衣出謝。

周以來重鬚狀況

左傳昭七年。楚子享公於新臺。使長鬚者相。是以長鬚爲美。故使相君行禮。又昭十七年。吳公子先謀藉取餘皇。名船衆許之。使長鬚者三人伏於舟側。詐爲楚人。尤足證楚人長鬚之多。

周時以無鬚爲恥

孔叢子。子思適齊。齊君之嬖臣。美鬚眉。立乎側。齊君指之而笑。且言曰。假貌可相易。寡人不惜此之鬚眉。於先生也。子思曰。非所願也。人之賢聖。在德不在貌。吾性無鬚眉。天下侯王。不以此損其敬。假患德之不昭美也。不病毛髮之不茂也。此可證子思無鬚。齊王以爲可恥。故欲以其嬖臣之鬚移於子思。則當時之。

風尙可想矣。

漢仍以鬚多爲美

後漢書光武紀。是美鬚眉者耶。又東平王傳爲人美須頽。要帶十圍。趙壹傳美鬚豪眉。蜀志關羽傳猶未及鬚之絕倫也。羽美須頽。故云。又史記張良傳贊觀其像乃如婦人女子。是子房無鬚故太史公譏之也。

六朝人之保護鬚法

南史劉文仲嘗獻齊高帝纏須繩一枚。世說陸雲詣張華。華爲人多姿制。又好帛纏鬚。雲見大笑不已。夫以繩纏以帛纏者。恐鬚或著汗而點塵土也。又後漢溫序傳序受劍銜鬚於口。顧左右曰。旣爲賊所迫殺。忽令鬚汙土。是將死而仍護鬚也。

六朝時面脂

世說江淮以北謂面脂爲面澤。按面爲風日所吹曝塗以脂則光澤。

漢以來口脂

釋名唇脂以丹作之。象唇赤也。正字通燕脂以紅藍花汁凝脂爲之。燕國所出。後人用爲口脂。

漢初男子傅粉

史記佞倖傳孝惠時郎侍中皆冠駿驥貝帶傅脂粉。

周以來婦女首飾狀況 周婦人不冠

內則婦事舅姑。鶴初鳴咸盥漱櫛纊笄總按釋名總束髮也。總而束之也。詩齊風總角卯兮注總束其髮以爲兩角。又儀禮喪服總六升注首飾象冠縱注云韜髮者也。蓋婦每日晨起理髮既韜之以縱更以笄也。簪總約其髮使整齊也。與男無異也。所異者男冠女則否耳。內則婦事舅姑禮節與子事父母同惟男冠綏纓婦則否故知周婦不冠

周婦笄衡頭上飾以玉

詩衛風君子偕老副笄六珈傳副者首飾編髮爲之笄衡笄也垂於副之兩旁。珈笄飾之最盛者所以別尊卑。既笄而加飾如今步搖上飾孔氏曰珈加也。王后之衡笄皆以玉爲之垂於副之兩旁當耳其下以統繫瑱由副既笄而加此飾故謂之珈據此見周時婦人雖王后祭祀亦不冠祇以笄衡於副之兩旁繫之以玉垂於耳際以爲瑱此女最盛禮服之狀況也。

周時以髮黑爲美

詩衛風云鬢髮如雲傳黑髮也。又左傳昭二十八年有仍氏生女髮黑而甚美注服虔云髮美爲鬢是古以髮多而黑者爲美觀。

古又以斂髮爲莊重

曲禮斂髮毋髢注毋垂餘如髢詩經注髢益髮也言取他人之髢以益己之髢即假髢也垂餘則有假髢

之嫌。不荅。雅故禮以爲戒。

然周初貴婦人已有假髮

禮少牢饋食禮主婦被褐注被褐讀爲鬚髮古者或剔賤者刑者之髮以被婦人之紿結爲飾故名鬚髮焉是周初貴婦已以假髮爲飾曲禮之言不必拘也。

至春秋婦人假髮盛行

詩衛風鬢髮如雲不屑髢也言己髮甚美不屑以假髮爲飾又哀十七年初公自城上見己氏之妻髮美使髢之以爲呂姜髢音剃注髢髮也假髮也是竟以暴力剔賤者之髮而益其妻髮其重視假髮爲何如哉

古以油沐髮使光澤

詩衛風自伯之東首如飛蓬豈無膏沐誰適爲容按膏者油也以油塗髮髮卽光澤至今猶然

春秋貴婦人時髻樣

詩小雅彼君子女卷髮如蠻又匪伊卷之髮則有旗通俗云蠻蠍也箋蠻尾上翹婦髮卷起如蠻尾也旗箋云揚也蓋髻樣卷起如旗之揚空生動飛舞也茲二語寫當時婦髮結束狀況可謂神妙入微而髮則有旗四字能意會不可言傳尤奇絕爲後人百思所不到經文之可貴如此

古婦人理髮器

詩衛風玉之瑱也。象之。揃也。箋。揃所以摘髮也。卽今之梳也。有齒以象牙爲之。取其潔而滑然此。祇貴婦人能辦。若庶人則以木爲梳。所謂櫛櫛也。

周時妾不得笄

國語司馬子期欲以其妾爲內子。訪之左史倚相曰。吾有妾而願欲笄之。其可乎。按笄者簪也。士昏禮女子許嫁笄而醴之。又內則十有五年而笄。女之有笄禮。猶男之有冠禮。妾賤故終身不得笄。笄則可衡笄於首。繫六珈以爲飾服最貴之首服矣。司馬子期以其非禮。故訪於左史倚相。古人之不敢放肆如此。

漢婦首上步搖

詩副笄六珈傳云。旣笄而加飾。如今步搖上飾。錢氏曰。今人步搖加飾。以珠飾之。小者六多者倍蓰至三十六。疏云。步搖副之遺象。又周禮天官追師鄭注。副以覆首。若今步簾。釋文簾本作搖。據是則漢之步搖。周副之遺也。

漢步搖狀況

前漢江充傳。冠禪纏步搖。注云。冠禪纏故行步。則搖。由是證之。步搖女飾。以行步顛動爲美。故以爲名也。

漢假髻

宋書禮制。皇后謁廟。首飾假髻步搖。八雀九華。假髻者卽詩所謂髢也。

漢婦人畫眉

漢書張敞傳。又爲婦畫眉。長安中傳張京兆眉撫。蘇林云。撫嫵也。媚也。按詩云。螢首蛾眉。眉與目自周以來爲婦容所最重。眉欲其細而長。或廣而短疏而薄。則以黛畫之。令其濃翠彎長。以增嫵媚。遠望之與真無異。觀蛾眉之語。殆自周時已畫眉。不然無由與蛾類也。而至今未已。以些微之事。傳之數千年。可謂久矣。

周婦人以粉黛爲飾

韓非子。故善毛嬪西施之美。無益吾面用脂澤粉黛。則倍其初。

漢美人傅粉狀況

廣川王傳。延畫工畫舍望卿。王姬名。袒裼傅粉。其旁傅者塗也。塗粉於面及項也。凡美人晨起梳洗妝飾。須褫去長衣。方動作靈敏。故袒裼也。

晉婦人仍重假髮

世說。陶公侃少有大志。家酷貧。同郡范達舉孝廉。投侃宿。時冰雪積日。室如懸磬。母湛氏曰。汝第出外留客。湛頭髮委地下。爲二鬢。賣得數斛米。斫諸柱割半。爲薪。剉諸薦。以爲馬草。達感其意。到洛稱薦。終得其力。

後齊時婦人至貴假髮賤真髮髻狀如飛鳥

集異記後齊時婦人皆剪剔以著假髻而危邪之狀如飛鳥至於南面則髻心正西始自宮內被於四遠蓋不剪剔真髮則假髮礙於安放飛鳥之狀殊不易得也

春秋時美人項領眉目口齒姿態

詩衛風碩人其頤領如蝤蛴齒如瓠犀螓首蛾眉巧笑倩兮美目盼兮此詩狀美人首上之姿態可謂千古絕調矣蝤蛴者爾雅注木中虫白而長故詩人以比婦人之頸犀堅也前漢馮奉世傳器不犀利言堅利也瓠犀者言美人齒如瓠子之潔白而堅利也螓首者傳云螓額廣而方蛾眉者前漢楊雄傳何必颺纍之蛾眉師古云影若蠶蛾眉也倩者明媚盼者分明言目黑白分明也讀此詩千載下如睹其貌如面其人矣

戰國美人眉目朱唇姿態

宋玉神女賦眸子爛其精朗兮瞭多美而可觀眉聯娟以蛾揚兮朱唇的其若丹

東漢時美人首部時妝姿態

集異記漢桓帝元嘉中京都婦女作愁眉啼妝墮馬髻折腰步齦齒笑愁眉者細而曲折啼妝者薄拭目下若啼痕墮馬髻者作一邊折腰步者足不在體下齦齒笑者若齒痛樂不欣欣始自大將軍梁冀家所

爲京師翕然諸夏皆放。

唐時美人粉黛之重致印眉痕

北里志顏令賓傳令賓卒諸客挽詞頗多其一章云昨日尋仙子轎車忽在門人生須到此天道竟難論客至皆連袂誰來爲鼓盆不堪襟袖上猶印舊眉痕又妝樓記徐州張尚書建封書也諸妓多涉獵書史人有借其書者往往粉指痕印於青編夫以黛畫眉而痕能印於襟上雖今日演劇之女裝其濃無以過之而指尖塗粉則今日之所無想見古美人塗抹濃重狀態駭人也。

自周以來婦女穿耳

莊子爲天子侍御不剪爪不穿耳又吳志諸葛恪傳注母之於女恩愛至矣穿耳附珠何傷於仁夫曰不穿耳可見普通穿耳者多耳有孔可綴物故可附珠

卷五

行唐尙秉和著

身部

三代以來衣服狀況 殷尙白衣

禮王制殷人辱而祭。縞衣而養老。傳殷尙白而縞衣裳。按詩縞衣綦巾。傳縞衣白色。是殷時以白色爲極重。故以養老也。

周時單衣

禮玉藻禪爲絅。注有衣裳而無裏曰禪。按說文禪衣不重也。卽今所謂單衣也。詩曰衣錦尙絅。言錦外覆以單衣。卽今所謂袍罩也。

周時夾衣

按急就篇衣裳施裏曰祫。玉篇祫衣無絮也。韻會祫夾衣也。詩衛風綠衣黃裏。旣有裏則祫夾衣矣。又禮以帛裏布非禮也。尤周御夾衣之明證。

周時綿衣

左傳宣十三年申公巫臣曰師人多寒王巡三軍拊而勉之三軍之士皆如挾纊注纊綿也古時無棉皆以蠶絲爲絮挾纊者言於夾衣之中絮以蠶絲輕而煖故巫臣取以爲喻然此祇富人能爲之一般軍民蓋不能也。

周時裘服之雜等級之分

中論救寒莫如重裘周禮天官司裘掌爲大裘以供王祀天之服詩小雅彼都人士狐裘黃黃幽風取彼狐狸爲公子裘玉藻君衣狐白裘戰國策千金之裘非一狐之腋是最貴者狐白裘也故云士不衣狐白玉藻云君之右虎裘厥左狐裘君子狐青裘羔裘是士大夫次貴之裘也詩小雅舟人之子熊羆是裘玉藻云大羊之裘不文飾也是最次之裘庶人所服也。

周時裘服毛外向

禮玉藻大裘不裼裼者袒而有衣大裘以黑羊皮爲之雖祇天子服以祭天然黑黯無文采故無庸裼以增美是可證文外向也詩曰狐裘黃黃蓋狐皮惟腋純百餘黃色者多惟毛外向故視之有黃黃之色論語羔裘玄冠不以弔弔主哀不以美爲敬羔裘鮮潔華美炫人瞻視故於弔不宜又周時以裘分等級毛若不外向級何由分哉。

惟裘毛外向故服有裼襲之分

禮玉藻君衣狐白裘。錦衣以裼之。君子狐青裘。玄綃衣以裼之。羔裘緇衣以裼之。狐裘黃衣以襲之。裘之裼也。見美也。注云。裘上加裼衣。裼衣雖加他服。猶開露裼衣。見裼衣之美。以爲敬也。又云。袒而有衣曰裼。示威猛之衛也。蓋裘美矣。更稱裘之色。加以裼裨。飄揚飛舞。以助其美。其制今劇場。猶有之。披於肩上。而無袖。但於領處結項。以爲固。披拂威風。裏衣盡露。故注曰。袒而有衣。又曰。猶開露也。是於裘之外。裼以助裘美也。吉服也。

襲者。玉篇云。重衣也。禮玉藻服之襲也。充美也。注充覆也。充美者掩塞其美也。又玉藻云。弔則襲不盡飾也。是襲者卽今之衣罩。清時弔喪。以石青單桂罩於外。使內美不著。是其遺制也。

又檀弓。曾子襲而弔。子游裼裘而弔。曾子指子游而示人曰。夫夫也。爲習於禮者。如之何其裼裘而弔也。主人旣小斂。袒括髮。已成子游趨而出。襲裘帶經。今孝條而入。曾子曰。我過矣。我過矣。夫夫是也。注主人始喪。未變服之前。弔者吉服。故裼裘及主人變服後。弔者雖著朝服。而加武以絰。故襲裘是衣裘者當弔。則以襲掩覆其裘之美。使不著也。

周時暑衣狀況

詩周南爲絲爲紿。注精曰。絲麤曰紿。疏煮葛爲之。蓋古時皆以麻布爲尋常衣品。夏日禦暑。則以葛葛布較麻布尤爽健也。若今日則棉布盛行。至夏日則以麻衣禦暑。而兼用葛。麻布較棉布亦清爽。故今日冬

春無衣麻者。又周禮天官內司服綠衣素紗。注素紗者今之白縛也。漢時俗名今不知其義按玉篇紗穀也。縞紗曰穀。紡絲而成之。又宋玉神女賦動霧縠以輕步。是周時禦暑之衣。葛穀織品有綿絹絲織品有紗穀已大備也。

周時大禮服狀況 國君禮服

按玉藻云。玄端而朝日於東門之外。周禮春官其齋服有玄端素端。穀梁僖二年桓公委端搢笏而朝諸侯。注端玄端之服疏其色玄而制正幅無殺故謂之玄端。

卿大夫禮服

左傳昭元年劉子曰。吾與子弁冕端委以治民。又昭六年晏平仲端委立於虎門之外。服虔云。禮衣端正無殺文德之衣尙褒長故曰委。

大禮服形狀如帷

由上攷之。是君臣大禮服皆曰端委。服虔所謂端正無殺者。按論語云。非帷裳必殺之。注殺者削也。剪也。帷裳禮服以正幅製不剪縫端正若帷蓋禮服既以整幅製則上下寬狹如一不能如深衣下畔之寬倍上畔也。

周深衣狀況

深衣者疏衣裳相連被體深邃故謂之深衣經云古者深衣蓋有制度以應規矩準繩權衡蓋大禮服之外卿士大夫最重要之服也

深衣去地高度

深衣云短毋見體長毋被土蓋周時下體之衣未備衣太短則下體露矣太長則拖地觀漢時朱博令掾史衣去地三寸則周時衣去地至多不過寸耳

深衣袖口尺寸

禮玉藻云祛尺二寸注祛袂口也又鄭風參執子之祛兮疏袂是祛之本祛是袂之末玉篇云袂袖也袂末者袖口也寬尺二寸圍之則二尺四寸也

深衣腰深尺寸

玉藻云深衣三祛注三祛者謂要中之數也祛尺二寸圍之爲二尺四寸三之七尺二寸古腰要同深之度也

深衣下擺尺寸

玉藻縫齊倍要注齊者裳下畔今名下擺要者裳上畔其廣度卽上文所云深衣三祛七尺二寸也倍之則一丈四尺四寸又深衣云要縫半下注裳下畔一丈四尺四寸是古衣下擺之寬度也惟今之所謂腰深下

擺祇度其半。此則其全度也。

深衣袖長尺寸

深衣云。袂之長短。反詘之及肘。注。衣幅自肩下垂。及肘而盡。接之以袂。長二尺二寸。自肘至腕。長一尺一寸。而袖長二尺二寸。爲自腕以下。袂尚餘一尺一寸也。故回詘之。袂可及肘也。

按今日度袖長。自領起至袂末。共尺寸若干。古則命肘以下者爲袖。肘以上。仍謂之衣。所以然者。古衣當腋處最肥。望之仍與上衣爲一。故自肘以上。不謂爲袖。若今衣。則當腋處。衣與袖分。故度之起不同也。

深衣抬肩寬窄尺寸

禮玉藻云。袂可以回肘。深衣云。袼各音。之高下。可以運肘。注。袼衣袂當腋之縫也。即今抬肩運肘者。袂當腋處。使稍寬。可以回轉其肘。按身體或須抑騷。必肘能回轉入內。然後如意。古人袂口既一尺二寸。以今例古。則當腋處必二尺始可回肘。然無明文。不能臆斷。

古袖下餘衣尺寸

禮玉藻。袂可以回肘。長中繼揜尺。注。長衣中衣繼袂之末。揜餘一尺疏言。袂下尚餘衣一尺也。

深衣前後幅交接處皆在旁

玉藻。衽當旁。注。衽裳幅所交接處也。又深衣續衽鉤邊。注。衽在裳旁者也。鉤邊若今曲裾也。時言漢

疏深衣

裳一旁則連之相著。一旁則有曲裾掩之。與相連無異。鄭以後漢之時。裳有曲裾。故以續衽鉤邊。但漢時曲裾是古人前後裳之連結。皆在兩旁而連接處。又有鉤邊以爲掩護使。若相連至爲美觀也。

周時衣方領其高二寸

玉藻衿二寸。注曲領也。又深衣曲衿如矩以應方。注衿交領也。古者方領如今漢時小兒衣領疏。漢時領皆向下交垂。故鄭云古者方領似今唐時擁咽。今俗名圍脖故云若今小兒衣領。但方折之也是周時衣領其高二寸。形方故云如矩。如矩則曲矣。

周蔽膝狀況

說文。韞。蔽也。所以蔽前以韞。禮玉藻。韞下廣二尺。上廣一尺。長三尺。其頸五寸。是蔽膝之廣。狹於裳之上。下畔數倍也。蔽膝尺寸。

蔽膝異名

詩小雅采菽箋。芾。太古蔽膝之象。冕服謂之芾。其他服謂之韞。疏云。韞。俱是蔽膝之象。是蔽膝因事而異名實則一也。

蔽膝顏色以貴賤而分

禮玉藻。韞君朱。大夫素。士爵韞。註爵韞者。爵色之韞也。又詩檜風。庶見素韞兮。又說文。一命縕韞。再命赤

韞。又玉藻一命繯紱幽衡。再命赤紱幽衡。三命赤紱葱衡。注繩赤黃之間色。所謂韞也。衡者佩玉之衡。按詩小雅。韞韞有奭。傳韞韞者茅蒐染草也。其色蓋亦赤黃。佩玉之衡者。按周禮。冬官玉人。大璋中璋九寸。邊璋七寸。衡四寸。注衡勾柄龍頭也。蓋以衡繫玉佩之使不墜也。是蔽膝以朱色爲最貴。赤與素次之。蘊又次之。爵色之韞爲最次也。

古衣不定身長尺寸之故

凡經傳所記衣裳尺寸。皆有廣狹而無長度。蓋以人身高矮不同。人人各異。故不能預定也。

周時束帶高下之度

禮深衣帶下毋厭。髀膀上毋厭。脅當無骨者。按漢書杜鄴傳注。厭壓也。髀脅皆有骨。帶壓於骨則不固。且不適。故戒之。

周帶之顏色等級及緣飾等級

禮玉藻天子素帶。朱裏終辟。諸侯素帶終辟。大夫素帶辟垂。士練帶率律音下辟。居士錦帶。弟子縞帶。注辟緣也。終竟也。天子終此帶盡緣之也。辟垂者。言帶之下垂者緣飾之。由紐及末。擊束于腰者爲擊。則否也。下辟者祇緣飾帶末。卽紳也。

周帶結束真象

禮玉藻弟子縞帶並紐約用組三寸長齊於帶注紐謂帶之交結之處約者以物穿紐約結其帶也三寸者組之廣也蓋古者帶不自結自結則兩端或參差不美觀而紐有定處外用組約之以爲固而組之長復與帶齊故又曰紳韁結三齊也又列子管夷吾射中小白帶鉤孟子豈謂一鉤金注帶鉤也是春秋時又以鉤爲帶結也

周垂紳尺寸

論語子張書諸紳疏以帶束腰垂其餘以爲飾謂之紳玉藻云紳長制士三尺有司二尺有五寸

紳下垂過裳

玉藻凡侍於君紳垂足如履齊蓋侍君以罄折爲敬紳下垂及足則出裳之下畔矣

周時觀衣裳緣飾卽知父母存否

士冠禮服纏裳純衣注純衣緣衣也曲禮父母存冠衣不純素注純緣也又深衣具父母大父母在言俱衣純以續具父母衣純以青如孤子衣純以素是無論父母在否衣皆有緣飾特以色爲別望卽知之

古庶人布衣

史記田單傳王蠋布衣也義不北面於燕況在位食祿者乎又蘭相如傳臣以爲布衣之士尙不相欺按古所謂布麻布也純爲庶人服不染後世謂之白衣亦謂之褐

春秋時紫色衣最貴僭服則殺身

左傳哀十六年良夫紫衣狐裘至袒裘不釋劍而食太子使人數以三罪而殺之杜注紫衣君服按論語惡紫之奪朱也可見紫非正色杜所謂君服者必春秋之時尙非周制也

春秋六國時惟儒服寬大守周制

禮儒行魯哀公問於孔子曰夫子之服其儒服與孔子曰某少居魯衣逢掖之衣注逢大也肘腋之所特寬大也又孔叢子子高衣長裾振褒袖見平原君平原君曰子亦儒服乎蓋時代久則服式改獨儒者仍守周舊制寬博異衆故咸異之是儒服之寬博特異於衆也

周以灰水洗衣

禮內則冠帶垢和灰請澈衣裳垢和灰請澣又禮深衣完且弗費注鍛濯灰治疏鍛濯謂打洗用灰治理使和熟也按以灰水洗衣今鄉民猶然蓋以灰水膩滑去垢而不知仍周遺法也

周時雖不忌白衣然事若可哀則白衣而不采衣

曲禮大夫去國踰境爲壇位嚮國而哭素衣素裳素冠徹緣又史記荆卿傳太子及賓客知其事者皆白衣冠以送之是凡凶事皆衣白也

周時內衣

深衣之內必有裏衣近身取煖無古今一也禮內則衣不帛襦袴急就篇注短而施要腰同曰襦說文短衣也釋名襦喪也言溫喪也又單襦如襦無絮也據是則襦純爲裏衣裏衣不外露故不帛此上身之裏衣也

袴者急就篇注脰衣也釋名跨兩股各跨別也蓋上身長有深衣短有襦既足取煖而兩股無所衛深衣雖長仍不能禦下體之風寒故著袴以衛兩脰脰以上至膝卽無矣故別者不著袴韓非子齊有狗盜之子與別危子戲而相誇盜子曰吾父裘有尾危子曰吾父冬不失袴注別足者不衣袴雖終其冬夏無所損失按古脰以上無衣故別足卽不袴注曰脰衣言脰以上不衣也其制大概如今之套袴每股各一不相連也然在內不繫觀瞻故亦不帛也此下身之裏衣也

周下體無衣故防露下體

周時下體祇有脰衣脰以上無衣說苑晉平公以蒺藜布堂上召師曠曠至而上堂平公曰安有履而上堂者乎師曠解履刺足伏刺膝夫惟膝無衣故伏而刺膝也又膝以上無衣下體易露故時時防之曲禮暑毋褰裳褰則下體露論語當暑袗絺綌必表而出之蓋絺綌透明露體表之則實而不露又曲禮不涉不擗注擗揭衣也說文揭高舉也言涉水揭衣露體不得不爾否則怠高舉也又墨子公孟篇是猶裸謂擗者不恭也裸體全露擗則祇露下體故取以爲喻若擗不露體而以裸爲喻則不合矣是尤下體內衣

不備隱微易露之確證也。又呂覽是猶保謂高纘者之不恭義與墨子同。又拾遺記蘇秦張儀同志好學遇見墳籍行路無所題記以墨書掌及股裏夜還而寫之夫惟股無衣故不書於臂而書於股若有衣服如何書又三國志賈逵傳注逵貧冬常無袴過其妻兄柳孚宿天明著孚袴去是漢時貧者有時不著袴尙與周同也。

古振衣致敬狀況

說苑田忌至舍王北面正領齊祛按裾者袖末也將致敬於人使兩袖或有參差則不莊故既正領復齊兩袖想見古人振衣鶴立情形也。

漢單衣紗衣夾衣

前漢江充傳初充召見大臺宮衣紗縠單衣師古曰禪衣若今之朝服之中禪也按中禪者於朝服之內著一單衣清時謂之趁衣卽單衫也衣紗縠禪衣卽紗衫必夏日也又史記匈奴傳服繡袷綺衣注言繡表綺裏又賈誼傳白縠之表薄紈之裏夫既有表裏則夾衣也。

漢絮衣

前漢文帝紀九十五以上帛人二匹絮三斤師古曰絮綿也按急就篇注漬蘭璧之精者曰綿粗者曰絮今則謂新者爲綿故者曰絮帛二匹絮三斤言以帛製夾衣中置絮以禦寒所謂挾續也。

漢衣青紫最貴

漢書夏侯勝傳經術苟明其取青紫如拾芥耳又後漢耿弇傳弇兄弟六人並垂青紫省侍醫藥當代以爲榮可證兩漢貴人皆服青紫故俗尚榮之

漢白衣賤

漢書龔勝傳聞之白衣戒君勿言也師古曰白衣官府趨走賤人也

漢士夫衣仍寬博

雋不疑傳不疑褒衣博帶師古曰言著褒音大之衣廣博之帶按自周以來儒者皆褒衣博帶與世俗殊

岫

故平原君見孔子高衣長裾振褒袖卽曰子亦儒服乎是儒者之服自古寬大故一望而知漢仍如此也

漢官吏衣長拖地

漢書朱博傳敕功曹官屬多褒衣大紱不中節度自今掾史皆令去地三寸師古曰紱大綺也夫特敕令去地三寸則未敕之先衣綺之拖地可想而知也又朱雲傳有薦雲者召入攝齋登堂師古曰齋衣下裳也攝之使離地以防失足又蓋寬饒傳初拜司馬未出殿門斷其襷衣令短離地此又漢官吏衣拖地之確證也

漢學者猶方領餘則圓領交而下垂

後漢馬援傳。援兄況勃衣方領能短步。注前書音義曰：頸下施衿領正方學者之服也。是兩漢士人皆方領也。餘則皆圓領禮深衣曲裕。鄭注云古者方領既云古方領以見漢圓領多也。圓領者自項後交於前下垂今僧道衣領其遺象也。

漢官吏不吏服則罰

景帝紀六年詔曰夫吏者民之師也。車駕衣服宜稱亡度者或不吏服出入閭里與民亡異長吏二千石朱兩轡千石至六百石朱左轡車騎從者不稱其官衣服出入閭里無吏體者二千石上其官屬三輔舉不如法令者是官吏不吏服則必罰也。

漢仍有蔽膝

史記武安侯傳坐衣襜褕入宮不敬。注云爾雅今蔽前謂之襜。郭璞云蔽膝也。然古冕服尚有蔽膝。名蒂是蔽膝亦禮服之一茲云不敬似漢時已爲燕居操作之服矣。

西漢朝服尚單衣

江充召見大臺宮衣紗縠襱衣蓋寬饒拜司馬未出殿門斷其襱衣俱見前是皆朝天子也而皆襱衣按說文襱衣不重也。禮玉藻襱爲絅注云有衣而無裏曰襱蓋西漢朝服未有定制故見天子者多以襱衣襱衣蓋與周深衣同也。

東漢朝服狀況

晉書輿服志。西漢二百餘年未能制立。中興後明帝始採周官尚書禮記及諸儒記說制天子三公九卿特進之服。衣皂上絳下。前三幅後四幅。衣畫而裳繡。凡十二章。素帶廣四寸。朱裏以朱綠裨飾其側。中衣以絳緣其領袖。赤皮爲轍。絳袴袜赤舄。按前三幅者古人忌胸前衣縫當中。後四幅者又深衣所謂負繩及踝。使衣縫正當正中也。六朝皆用之。

漢時裏衣 單襦

揚子方言。汗襦或謂單襦。按今則曰汗袴。夫曰汗則爲親身內衣可知。然至後漢則又有長襦。後漢書李忠傳注。上使忠解滌長襦是也。夫既曰長襦。則爲外衣與袍蓋同。

漢袴開檔如今日小兒

漢書上官皇后傳。帝時體不安。左右及醫皆阿意言宜禁內。雖宮人使令皆窮袴多其帶。服虔曰。窮袴有前後。當不得交通也。可證未窮袴之時。袴檔皆開露。如今日小兒多其帶以爲約束。則交通絕矣。雖欲施無禮不得也。由此推之。周時祇有袴以衣脰。自膝以上即無衣。故禮戒暑月褰裳。孔子繩紲必表誠以下體祇有外衣遮護。若高揭外衣或外衣透明固不便。卽漢時之開檔袴衣服若不寬博穩重。有時亦或露不雅也。又以證周時雖欲禁內而無術也。舊說解褰裳爲不敬。不敬之事多矣。胡獨注意於此。固別含深。

意也。特其故不可明言耳。

漢時之褲

玉篇。褲襥衣說文襥私服。言私處所服也。急就篇注合檔謂之褲。釋名。褲貫也。貫兩腳上繫腰中也。余嘗詳攷之。急就篇所言既云有檔。則犢鼻褲也。釋名所言。則一直筒無檔。故貫兩腳上繫於腰。而兩股則承以袴也。皆周時所無。以下證明之。

犢鼻褲

史記司馬相如傳。相如身自著犢鼻褲。共傭保雜作。劉奉世曰。犢鼻穴在膝上。爲褲財令至膝。習俗因以爲名。非以其形似也。余按劉說非也。鼻者。褲檔。急就篇所謂合檔者也。鼻之旁有兩孔。兩股穿之。短而在膝上。與當中之褲檔齊。以便動作。形正與犢鼻相似。胡言非乎。試觀今日學生運動時所著之褲。忿音正其制也不過古肥今瘦耳。

貫腳褲與袴不連非若今日之爲一

若釋名所謂貫兩腳上繫腰中之褲。亦有一事可證明其形象。攷魏志裴潛傳注。黃初中。韓宣爲尚書郎。嘗以職事當受罰於殿前。已束縛杖未行。文帝輦過。問此爲誰。特原之。遂解其縛。時天大寒。宣前以當受杖。豫脫袴纏褲面縛。及其原。褲腰未下。乃趨而去。按小袴若今之套褲而長。以礙於受杖。故脫之。而褲則。

上繫於腰下。覆乎臀。受杖仍礙。故纏向上使臀露可受杖。故不須脫。以是知尋常褲無檔。禪有襠鼻爲一直筒故能貫兩腳。上繫腰中。如有檔則不能纏向上矣。惟能纏向上故既原宥乃曰褲腰不下而去也。其形大概如今之褲腰特垂下者長不與袴連以便私溺耳。

漢時袍大行

按袍之見於經者皆爲裏衣。禮玉藻縕爲袍喪大記。袍必有表。注云襲衣在內爲襲衣。故以縕爲之。縕者敗絮也。論語衣敝縕袍是也是袍在周時雖有其名。純爲內衣。與襦無異。至漢時則著於外。後漢李忠傳注。上使忠潛長襦。忠更作新袍小單衣以上之。則爲長袍也。故釋名云。袍丈夫著之至跗者也。跗者據鄭士喪禮注。足上也。袍長而至足。則爲外衣矣。釋名又云。袍者苞也。苞內衣也。尤爲外衣之證。是袍之名與周同。實則異也。釋名爲漢人劉熙作。則當時所尚也。

漢禁賈人衣錦

高帝紀詔曰。賈人不得衣錦繡綺縠絲綺。按賈人惟利是視。漢初重農。故爲是苛禁。以抑末。令財多無所用之。

魏晉時之裙

魏志管甯傳。常著布襦袴布裙。世說王子敬爲人書練裙。按裙卽下裳。蓋襦之下接以裙。取美觀。若袍則

連衣裳爲一矣。

魏晉時袴褶

吳志裴注呂範釋韻著袴褶詣闕下。按韻者史記張耳傳趙王祖韻蔽自上食注臂捍也以縛左右手於事便也。褶喪大記注祫也。又急就篇注褶謂重衣之在最上者也。其形若袍短身而廣袖類篇云袴褶戎服夫短身而廣袖則便於騎射故曰騎服晉書輿服志弓弩隊各五十人黑袴褶然則範之著袴褶詣闕下是以戎服見也。又以證其時戎服皆短身而廣袖也其形大概如今馬褂。

晉時單衣夾衣

世說晉孝武年十二時不著複衣但著單練衫五六重是晉時天雖寒不著綿衣殆以綿衣不如單衣之飄揚適體且美觀不然以天子尙不能挾纊哉。

晉時之複禪複襦

世說韓康伯數歲家酷貧大寒祇得襦母殷夫人自成之令康伯捉熨斗謂康伯曰且著襦尋作複禪也兒云已足不須複禪也母問其故答曰火在熨斗中而柄熱今旣着襦下亦當煖故不須禪耳按母曰尋作複禪知襦亦複襦也大寒祇得複衣取煖知當時貧家得絮衣之難。

六朝時衣服寬博

顏氏家訓。梁世士大夫皆尚褒衣博帶。大冠高屐。出則輿馬。入則扶持。按周時祇儒者褒衣博帶。梁則士大夫無不然。此又文之過也。

六朝時尚白衣冠

南齊豫章文獻王傳。宋元嘉時諸王出入得白衣幕帽。見人主上與嶷友想令依元嘉。嶷固辭不奉勅。唯上幸第乃白服烏紗帽以侍宴焉。又程大昌演繁露曰。隋志宋齊之間天子燕私著白高帽。太子在永福省則白紗帽。隋時以白帽通爲慶弔之服。國子生亦服白紗巾也。晉著白接離接離巾也。南齊桓崇祖守壽春著白紗帽肩輿上城。今人必以爲怪。古未有以白色爲忌也。郭林宗遇雨墊巾。李賢注云。巾以葛爲之。本居士野人所服。魏武造帽其巾乃廢。今國子學生服焉。以白紗爲之。是其制皆不忌白也。今世人麗妝。必不肯以白綺爲衣。古今之變不同如此。

由是證之。宋齊時燕服必白色者多。故帝特令白服。依元嘉故事。是六朝燕居之服。尚白之證也。又觀程氏所述。宋齊天子燕居皆著白高帽。至隋以白幡通爲慶弔之服。是六朝迄隋士庶皆服白巾。天子燕居亦白帽之證也。至唐祇國子學生白紗。可見唐時雖不忌白而服白帽者已少。不與隋同也。程大昌宋人曰。古今之變不同如此。又以證伊時已忌白也。

唐官服顏色

隋唐嘉語舊官人所服惟黃紫二色貞觀中始令三品以上服紫五品以上朱六品七品綠八品九品青。

隋唐士庶白衣

隋書禮儀志隱居道素之士被召入見者白單衣又李泌外傳時號白衣宰相又獵狐記盧龍節度使張直方欲令秀才張知古同出獵時方雪知古有祁寒意直方出皂袍令服之知古乃加麻衣其上焉按麻衣者白衣也皂袍爲八品官服知古秀才不敢僭服故加麻衣其上又沈蕃夢遊錄顯宦三十年忽然夢覺仍著白衣亦其證也

唐皂袍短後

獵狐記知古脫麻衣露皂袍短後保姆曰豈有逢掖之士而服短後之衣乎蓋袍之短後原以便騎射武士所服故姆訝之也

唐宋以袍爲朝服

唐書天子袍衫皆用赤黃朝野雜記大臣奪情者服慘紫袍歸田錄陶穀爲學士常晚召對便殿穀望見上將前而郤者再太祖笑曰此措大索事顧左右取袍帶來上已束帶穀遽趨入是君臣皆以袍爲朝會之禮服也

漢庶人以索韋爲帶

後漢張霸傳。玄子自田廬被褐帶索。要說張溫。又周盤傳。乃解韋帶就學廉之舉。是士人常以索爲帶。父以韋爲帶也。索者麻繩。韋者熟皮。然此自庶人無常之服。若士夫以上之帶。自周以來。皆以帛爲之。以迄六朝。皆寬四寸朱裏。故有錦帶繡帶縞帶諸名。至唐而以堅韌之物爲帶。

唐宋有犀帶玉帶金帶

摭言裴晉公質小眇小。有相者云觀公形神不大貴則當餓死。一日遊香山寺。見一婦人致一緹縕於僧伽蘭楣上。祈祝良久。擲筭而去。少頃見緹縕在故處。知其遺忘。度追已不及。乃守至暮不至。次晨仍至其處俟之。俄見前婦人來。公問卽與之。蓋有玉帶二犀帶一。假於人。遺要津以救父。欲以一遺公。不顧而去。後見相者曰。公必有陰德及物。前程未可量。又五燈會元東坡留玉帶鎮山門。老學菴筆記靖康末括金賂虜詔羣臣服金帶者。權以通犀帶易之。按犀帶者以犀角製爲板。玉帶者上嵌以玉。金帶者鏤金爲之。陸游云執政正透從官倒透皆牆而堅。韌其約束皆在背後而前不垂紳。今戲劇所服者是也。

宋時猶以不束帶爲不敬

歸田錄陶穀夜召見却望不前者再。太宗笑曰。此措大索事。顧左右取袍帶來。上已束帶。穀遽趨入。是君不束帶則失見大臣之禮。故不敢進。老學菴筆記云。散腰則謂之不敬。蓋古人於袍之外不再加衣而袍。又寬博散腰則衣襟汗漫矣。故曰不敬也。

宋時裹肚今云兜兜

老學菴筆記云。往時執政簽判文書。衣盤領紫背子。又云冷則著。背心背子。背心蓋一物。今俗所謂坎肩。是也。盤領者卽圓領也。

宋時背心

老學菴筆記云。往時執政簽判文書。衣盤領紫背子。又云冷則著。背心背子。背心蓋一物。今俗所謂坎肩。是也。盤領者卽圓領也。

周以來服劍狀況

禮玉藻必佩劍。又少儀云。君子之衣服服劍弗賈。價同又左傳哀十六年。良夫袒裘不釋劍而食。是貴者皆服劍也。史記孟嘗君傳。馮先生甚貧。猶有一劍耳。又蒯縑裴駟曰。蒯茅類可爲繩。縑劍把。蒯縑者言其劍無物可裝飾。但以蒯繩纏其把也。是貧賤者亦服劍也。蓋古人尚武。必佩劍以防身。亦所以壯其威儀。故貴賤皆服之。

古佩劍在左

禮少儀執君之乘車則坐。僕者右帶劍。按古人立乘。僕居中。君居左右。佩劍則無妨於君。然由此可證佩劍者之皆左。左佩所以便右手拔劍也。

春秋時佩劍爲必須之禮飾

新序季札西聘晉帶寶劍以過徐君徐君不言而色欲之季札爲有上國之使未獻也使歸徐君已死乃以劍帶徐君墓樹而去夫以使上國未獻可知劍在當時爲威儀所必須與衣裳而並重矣

漢人仍帶劍成俗

史記蕭相國世家乃令蕭何賜帶劍履上殿入朝不趨又史記補傳魏相好武令諸吏帶劍前奏事或有不帶劍者至借劍而後敢入又蕭何傳當見者露索去刀兵雋不疑傳門下欲使解劍又龔遂傳民有帶劍者又後漢趙喜傳自王莽篡亂舊章不存皇太子與東海王等雜止同席憲章無序喜乃正色橫劍殿階扶下諸王以明尊卑是漢四百年無論官吏庶民皆佩劍也

晉佩木劍

晉書輿服志漢制自天子至百官無不佩劍其後惟朝帶劍晉世始代之以木六朝因之則純爲裝飾品矣於是古人帶劍之風從此遂絕

周以來揩笏狀況

禮玉藻凡有指畫於君前用笏造往受命於君前則書於笏又將適公所宿齋戒居外寢沐浴史進象笏書思對命是笏有二用一則受君命備遺忘暫書於笏一則將入朝有所敷奏亦書於笏備臨時遺漏也釋名云笏忽也備忽忘也

周時子事父母亦搢笏

禮內則子事父母鷄初鳴冠纓緩端釋紳搢笏搢者插也插於腰帶備受親命過時遺忘立書於笏

周笏等級以質爲差

禮玉藻笏天子以珠玉諸侯以象大夫以魚須文竹士竹本象可也竹本象者言以象牙飾竹也

周笏尺寸

禮玉藻笏度二尺有六寸其中博三寸其殼六分而去一然今所傳之古笏大概宋明物爲多實微作弧形以便搢而不墜禮但言其尺寸不知周制果如何也疑亦微弧

漢晉名手版謁長官用之

後漢范滂傳滂執公儀詣陳蕃蕃不止之滂懷恨投版棄官而去注版笏也又風俗通陳蕃上冢令劉子輿會其冢上蕃持版迎之長跪令徐下車坐不令去版辭意又不謙讓蕃深忿之又吳志凌統傳統將精兵萬餘人過本縣步入寺門見長吏懷三版恭敬盡禮是皆以長官禮待本縣吏故執版

漢時謁長官持版不許垂臂入門

三國志趙岐傳注常侍唐衡弟爲京兆虎牙都尉初之官不修敬於京兆尹入門不持版郡功曹趙息呵廊下曰虎牙儀如屬城何得放臂入府門促收其主簿衡弟顧促取版按不持版則垂臂故曰放臂入府

門若持版入門則以兩手奉版鼻間偃僂鞠躬狀至恭謹卽范滂傳所謂執公儀也滂嫌陳蕃不辭公儀示優禮故恚而去官

晉時笏頭有筆

晉書輿服志笏古者貴賤皆執笏有事則搢之於腰帶所謂搢紳之士者搢笏而垂紳帶也紳垂長三尺笏者有事則書之故常簪筆今之白筆是其遺象又手版卽古笏矣尙書令僕射尙書手版頭復有白筆以紫皮裹之按簪筆者以筆簪於頭也至晉不簪筆安筆於笏頭以便記事惟名曰白筆則不得其義也六朝皆如此

三國及晉時又名笏曰簿

蜀志秦宓見太守以簿擊頰注簿手版也版故能擊則爲笏明矣又左傳桓二年袁冕黻珽杜預注珽玉笏也若今吏之持簿是晉初亦謂笏爲簿也

晉時參謁長官仍以執笏爲公儀

世說趙王倫爲相國羊忱爲長吏乃版以參相國又桓溫止新亭大陳兵衛王入失厝倒執手版是晉時謁長官公儀仍與漢同也

唐時在家庭仍搢笏

韓愈曹成王碑出則囚服就辯入則擁笏垂魚坦坦施施是處家亦笏與周時同

五代時執笏有筆無筆之分

輿服雜事五代以來惟八座尙書執笏以筆綴手版頭紫囊裹之其餘王公卿士但執手版主於敬不執筆示非記事官也按此與六朝制正同惟裏筆用紫囊不用皮較六朝稍進然仍無今日之銅冒又王公貴人版而不筆唐以前亦未聞有此區別

宋外官亦執笏

宋史孔道輔傳爲泉州軍事推官有蛇出天慶觀真武殿中一郡以爲神州將率官屬往奠拜之欲上其事道輔逕前以笏擊蛇碎其首觀者初驚後莫不嘆服是不惟參謁持笏尋常出入亦笏也

明笏之等差

正字通明制笏四品以上用象牙五品以下用木以粉飾之歸有光項脊軒記云頃之持一象笏至曰此吾祖太常公宣德間執此以朝他日汝當用之按明太常寺卿正四品故用象笏然自元明以來似祇官吏用笏尋常已不執亦猶晉時佩木劍祇入朝佩之以爲禮節餘則否也至清雖入朝亦不用矣然參謁長官仍云執版其實遞紅紙手本耳非古手版也

周以來之重長爪

韓非子。韓昭侯握爪而佯亡其一爪。求之甚急。左右或割其爪而效之。昭侯以此察左右之臣不忠。據此是。候之。左。右。皆。長。爪。也。不。惟。昭。侯。如此。則。其。國。之。風。尙。可。想。矣。又。莊。子。爲。天。子。侍。御。不。剪。爪。是。亦。以。爪。長。爲。貴。也。

漢末仍重長爪

神仙傳。漢末仙人王方平降東海蔡經家。俄麻姑亦至。其爪甚長。經私念以麻姑爪搔背癢良佳。而方平已知大怒。命跪於庭。數而笞之。夫蔡經爲仙人弟子。乃猶羨長爪。而至於受笞。其重爲何如。

周以來婦女衣服狀況

詩鄭風縞衣。綦巾。傳縞衣白色。綦巾蒼艾色。是庶女所服也。然則周庶民婦女盡白衣也。又衛風衣錦繫衣。裳錦繫裳。箋云繫襱也。中衣錦爲其文之太著。上加襱縠。庶人之嫁服也。然則庶民女嫁時亦可衣錦。但須加以縠耳。則周時婦女社會之服色可推想而可知。

周女衣表裏之色

詩邶風綠兮。衣兮。綠衣黃裏。綠兮衣兮。綠衣黃裳。傳美莊姜也。是周時貴婦人衣綠色裳黃色而衣之裏。亦黃也。與庶女異矣。

周士人妻服色

士儀禮。女次紺衣纁紳。注次首飾也。紺衣絲衣。紳緣也。纁玄色。士較庶人爲貴。故其妻可衣絲衣。且可以玄色緣飾其四周。而中仍縞色。不能如貴婦之衣黃綠衣也。

古婦人尙長袖

宋玉神女賦。奮長袖以正衽兮。立躡躅而不安。又史記貨殖傳。趙女鄭姬。揄長袂。袂袖末也。古深衣之袖。自腕下餘尺餘。想女衣亦然也。

古袿衣以肩瘦爲美

宋玉神女賦。振繡衣。被袿裳。又漢書元后傳。是時政君坐近太子。又獨衣絳緣諸于師古曰。諸于大腋衣卽袿衣。又後漢皇后紀。簪珥光采。袿裳鮮明。釋名云。婦人上服曰袿。其下垂者。上廣下狹。如刀圭也。按劉熙說。非也。曹子建洛神賦云。肩若削成。唐畫訣曰。美人莫畫肩蓋。古婦人以無肩爲娟秀。圭正上狹下廣。故袿字從衣。從圭。純以形似。且衣亦無下狹於上之理。今戲劇所衣宮衣。猶彷彿近之。故知釋名誤也。

西漢時貴婦衣曳地

史記。文帝常衣綈衣。所幸慎夫人。令衣不得曳地。是可證妃嬪衣皆曳地也。又漢書王莽傳。莽母病。公卿列侯遣夫人問疾。莽妻迎之。衣不曳地。布蔽膝。見之者以爲儻。是可證公卿列侯之夫人衣皆曳地。故見莽妻不識。以爲儻婢。近法國前數十年。侯伯爵夫人衣皆曳地。長丈餘。正與我漢代同也。

漢婦衣尙緣飾

漢書賈誼傳今民賣僮者爲之繡衣絲履偏諸緣是古天子后服而庶人得以衣婢妾服虔曰偏諸緣者加牙條以爲緣也按牙條者卽今日婦女所用之縫帶俗所謂縫子也而漢卽有之想見當時女飾之大備已。

唐宋婦人著裙之風盛於古

李娃傳容貌妍麗宛若生平著舊石榴裙紫襴襠紅綠帳子又張泌小金傳云有婦人年四十餘著瑟瑟裙又唐人雜句紅裙妬殺石榴花新換霓裳月色裙白妝素袖碧紗裙又宋蘇軾詩從來不解醉紅裙以紅裙爲娼妓之代名詞是宋時婦人殆無不服裙者沿至明清更以裙爲禮服於是蝶蝶裙九霞裙柳絲裙百褶裙等名不可勝數矣自裙行而袴衣遂廢此婦女衣服沿革之大略也。

周以來婦人下體之裏衣

周之時男女衣無甚區別男下體裏衣不全旣詳於前矣女亦然也故衣服不得不寬博不寬博則護下體不密也彼夫桑間濮上野田草露之詠時有者勢使然也誠以其時下體祇有脰衣兩股間無內衣故外衣不可褰舉禮以爲戒晉平公以蒺藜布地師曠步則刺足伏則刺膝刖則不袴其故可想也。

唐女袴仍開檔如今日小兒

漢書上官皇后傳雖宮人使令皆窮袴多其帶師古曰窮袴卽今之緄襠按詩秦風竹閉緄縢毛傳緄繩也說文繡帶也集韻緄縫也是唐之緄襠中有縫但結以帶使不開張以便私溺若漢則兩襠雖合尙開拆如今日小兒故多其帶以防強暴若唐則平時皆如此也故曰緄襠今俗語縛物猶曰緄物緄襠者卽將襠縫結以繩使不開露唐以後何時成今制則不可攷也

卷六

行唐尚秉和著

足部

周時足衣種類

周禮天官履人掌王后之服履爲赤舄黑舄素屨葛屨注複下曰舄禪下曰屨夏則用葛冬則用皮按古今注云複下曰舄以木置備行禮久立地泥溼故複其下使乾臘也據是是舄者屨下爲薄木板兩層中空四圍有牆故泥濕不能及是若夫屨或曰屨或曰韁同韁或曰屨均禪下與舄異禪者單也詩所謂糾葛屨可以履霜公孫碩膚赤舄九九者是也

周時登堂卽脫屨戶外

曲禮戶外有二人屨言聞則入言不聞則不入又侍於長者屨不上于堂又莊子脫屨戶外膝行而前列子無幾何而往則戶外之屨滿矣又說苑晉平公謂師曠曰安有屨而上堂者乎按古人席地而坐登堂則就席故屨則不恭今日本朝鮮皆如此仍周制不變茲可謂真守舊矣

不脫屨則可得大禍

左傳哀二十五年衛侯與諸大夫飲酒。褚師聲子韁而登席。公怒戟其手曰必斷而足。呂氏春秋齊王疾瘡。使人之宋迎文摯。文摯至不解屨登牀。問王之疾。王叱而起。將生烹文摯。夫因不脫屨而至於斷足。遭烹古人之重視爲何如哉。

周時處室內皆跣足

左傳宣十四年楚子聞之投袂而起。屨及於窒皇。注寢門也。古人處室皆跣足。言王出不及屨。屨人追及於窒皇始進屨也。又襄三年公讀其書跣而出。注恐絳死故不及屨。又列子賓者以告列子。列子提履跣而走。是古人燕居無不赤足也。

周無襪之證

說苑晉平公不悅於師曠。置酒祁虎臺。使郎中馬章布蒺藜於階上。令人召師曠。曠至而上堂。平公曰。安有履而上堂者乎。師曠解屨刺足。伏刺膝。仰天而歎。夫惟無襪故刺足難忍。又左傳哀二十五年衛侯爲靈臺於藉圃。與諸大夫飲酒焉。褚師聲子韁而登席。公怒解屨曰。臣有疾。足異於人。若見之。君將殼之。是以不敢。不敢解韁者仍履褚師之足。時有惡創。潰爛汚穢。解屨則全露矣。故云不敢。是益可證。解屨則赤足也。或者謂周人於威儀最尚恭敬。赤足不襪乎。豈知古人衣服寬博。下垂及地。坐作皆不露足。無不敬也。或又謂冬月不寒乎。豈知人手常外露。雖冬月不寒。足亦如此耳。況覆衣於上乎。

古戶外解履著履狀況

曲禮解履不敢當階防後升就也。履跪而舉之。屏於側。又君賜爵卒飲退則坐取履隱辟避同而後履坐左納右坐右納左。按古人之坐皆跪而坐於足雖納履亦如此。若兩股前伸而納履則箕踞矣。古最忌之。

古履有綦束縛取固

今謂鞋帶

禮內則云履著綦。鄭玄曰綦履繫。又冠禮云黑履青鉤。鄭云鉤之言拘也。以爲行戒狀如刀衣鼻在履頭疏卽用物穿履頭爲鉤相連爲行戒也。又曲禮解履注云卽解繫也。古者履頭鼻綦繩相連結之將升堂解之也。又莊子盜跖篇丘得幸於季願望見履綦。按古人履狀大概如今日皮鞋於腳面用繩連結之使固而不墜故鄭云以爲行戒也。韓非子文王伐崇至鳳黃虛履繫解因自結。又晉文公與楚戰履繫解自結之是其證也。

古人飾履之侈

晏子春秋景公爲履黃金之綦飾以銀連以珠良玉之鉤其長尺冰月服之以聽朝晏子朝公迎之履重僅能舉足。又史記春申君傳其上客皆躡珠履。按後世女子常以珠飾履。男則無有。然其狀可想像得之。至於黃金爲綦。良玉爲鉤。則頗不得其真狀。或曰黃金可爲索。纏婦女纏足時常以小連環。金索爲鞋絆。景公之綦或亦如之。而玉鉤訖不能得其彷彿也。

秦時脫履狀況

新序。秦二世胡亥之爲公子也。昆弟數人。詔置酒饗羣臣。諸子賜食先罷。胡亥下堦。視羣臣陳履狀善者。因踐敗而去。見者莫不太息。是秦時解履於階下也。

西漢時仍脫履戶外

漢書雋不疑傳。勝之蹣履出迎。師古曰。履不著跟曰蹣。蹣謂納履未正。曳之而行。言其遽也。按暴勝之時爲直指使。居傳舍中。而不疑有盛名。故見不疑來。曳履而出。惶遽不及著跟也。是雖居傳舍室中。仍脫履也。

西漢時仍無襪脫履後卽赤足

史記滑稽傳。東郭先生貧困。衣敝履不完。行雪中。履有上無下。足盡踐地。道中人笑之。東郭先生應之曰。誰能履行雪中。令人視之。其上履也。其履下處。乃似人足者乎。按履無底。又無襪。趾印雪中。足跡宛然。與履印異。故曰似人足。是可證西漢仍赤足著履與周同也。

西漢多以革爲履

漢書貢禹傳。孝文皇帝衣綿革履。又鄭崇傳。每見曳革履。上曰吾識鄭尙書履聲。按師古注。革生皮。不用柔革。示儉。生皮堅韌。故有履聲。

西漢履仍有係

漢書張釋之傳。王生老人曰。吾韁解。願謂釋之爲我結韁。釋之跪而係之。既退或讓生曰。奈何廷辱張廷尉。使跪係韁乎。又哀帝紀。成帝令中山王誦尙書。又廢及賜食於前。後飽起下韁解。又王莽傳。受句同綄履禮。鄭注。綄之言拘也。是自漢初至漢末。履皆有係也。

西漢有罪則徒跣不履

漢書匡衡傳。衡免冠徒跣待罪。天子使謁者詔衡冠履。又董賢傳。詣闈免冠徒跣謝。是可證漢罪人不履。故待罪者皆跣足。

西漢有絨履如今之毛繩鞋

漢書翟方進傳。方進辭後母。至京師受經。母憐其幼。隨之長安。絨履以給方進。按後世之履。皆裁布帛爲之。卽漢時有革履。韋履。皆不用絨。茲言絨履必以絲繩爲之。周禮所謂絲履也。疑與今日冬月所服之毛繩鞋相類。或曰草履亦繩。

東漢末有鞋

劉熙釋名。鞋解也。著時縮其上如履然。解其上則舒解也。按既曰縮。約曰解。則鞋亦有係也。卽文義揣之似鞋。之制較履爲輕便。故曰舒解。然著之者不數見也。

東漢末男女皆著木屐

王褒僮約云。若殘當作俎。機木屐及彘盤。是以殘木屑爲屐。其賤可知。蓋祇麤人服之。至後漢戴良傳。初良五女並賢。有求姻者。便許嫁。疏裳布被。竹笥木屐。以遺之。又高士傳袁閑身無單衣。足著木屐。按木屐見中國人服者少。惟日本人服之前後有齒。行則托托有聲。而婦人尤多。其狀殊不莊。故自東漢以前。服之者皆窮寒下士。富貴則否也。

魏晉仍入室脫履赤足

魏書曹真傳。賜劍履上殿。是可證上殿者皆脫履也。又邴原傳注。太祖北征歸原至通謁。太祖大驚喜。擊履而起。遠出迎原。是旅行亦入室脫履。世說王子猷子敬兄弟共坐一室。上忽發火。子猷遽走避。不惶取履。子敬徐扶侍者出。又謝遏夏月嘗仰臥。謝公清晨卒來。不暇著衣。跣出戶外。方躡履。夫曰。戶外方躡履。是入室時卽脫履戶外也。曰。不惶取履。是入室必跣足也。又會稽典錄。賀循與人交久而敬。在官常著蠶人鮮見其足。是尤爲脫履赤足之證。

晉時屐大行

世說。王子敬兄弟見鄒公。舊也。室內。是不在甚修外生禮。及嘉賓死。皆着高屐。儀容輕慢。命坐皆云有事不暇坐。又阮遙集好屐。或有詣阮。見自吹火蠶屐。因歎曰。未知一生當着幾兩屐。又謝公聞淮上捷報。

面無喜色。惟入室屐齒忽折。又謝家賓客登山。則去屐前齒。下山則去後齒。是晉時亦以屐爲不莊。而高屐。則尤輕慢。然當時卿大夫盡著之者。則以晉時風俗輕佻。人物高曠。故獨喜之也。

劉宋時尚著赤舄

宋書輿服志。絳袴赤舄。是舄之制。至六朝。尚存。唐以後。則不見矣。

自南北齊始有長靿鞚古履制一變

南齊書。豫章文獻王傳。性汎愛不樂。聞人過失。有投書相告。置鞚中。竟不視。取火焚之。夫鞚若無靿。胡能置書。又夢溪筆談。中國衣冠自北齊以來。全國窄袖紺綠。短衣長靿鞚。按周秦以來。祇有履。履有係。無靿。據釋名。趙武靈王好着短靿鞚。蓋武靈胡服。胡服之履有靿。並脰裝入。名曰鞚。不用係。一可取暖。一自然穩。固然。武靈之鞚。短甚。且偶爲之。歿則已。當時未行。北齊之祖高歡。亦胡種。故有長靿鞚。靿長益煖。益不用係。然至隋。仍不通行。隋書輿服志云。長靿鞚。田獵豫遊。則服之可知。非田獵。仍不長靿也。豈非以其違古制而不莊雅哉。然後世遂因而不改矣。

隋唐鞋始大行然非官服且有帶

隋書輿服志。紫絲鞋。田獵服之。田本遊戲。故可服。鞋。隋唐嘉話。鄭愔爲吏部侍郎。贓汚狼籍。有選人係百錢於鞋帶上。愔問其故。答曰。當今之選。非錢不行。愔默然不語。又杜甫詩。青鞋布襪。從此始是唐時常著。

者。盡鞋也。惟鞋有帶以爲固似今日小兒式也。

唐時仍登堂脫履

國史補。韋陟有疾。房尚書琯使子弟問之。延入臥內。行步悉藉茵毯。房氏子韁而登階。侍婢皆笑之。是笑其不脫履也。又西陽雜俎。明皇於便殿召見李白。時白方醉。因召納履。白遂展足與高力士曰。脫韁。力士失勢。遽爲脫之。是白醉不知脫韁履上故召之也。白著官服入見。明皇令去韁而納履耳。

唐以長靿韁爲官服

唐書韋斌傳。朝會常大雪。在廷者皆振裾更立。斌不徙足。雪甚。幾至韁。按有靿方謂韁。幾至韁者。言幾至韁。靿口也。謂雪深也。不然。韁已著地。履雪矣。胡云。幾至。又唐書李光弼傳。將戰。納刀於韁。曰。戰危事也。吾位三公。不可辱於賊。夫靿不長。那能容刀。又西陽雜俎。張誣事。摸韁得銀一鋌。是可見唐時無論朝服軍服。凡官家皆著長靿韁。已與清時同。清時固常裝置雜物於韁內也。

唐韁皆黑色

摭言。會高力士終。以爲李翰林脫烏皮六縫爲恥。因譖之於貴妃。又唐人詩。趁朝把笏著烏韁。又靈鬼志。韶自外入。著黑介幘。幽履是韁。純爲黑色。自唐而已然也。

唐時製韁狀況

顏真卿詩縫韃蠟線油塗錐急逢龍背須且騎。夫線蠟則滑而易抽。以油塗錐亦取其滑而易入。以今日視之似爲迂拙。然古人工藝之堅實可想。

唐時避雨濕不用鳥用釘鞋

通鑑德宗出幸奉天天大雨從者皆著釘鞋。按釘鞋今日尚有之一則不滑一則底高遇泥水不畏。惟皆以桐油敷布上使水不能侵入故名曰油鞋茲名曰釘鞋似尙未知以油浸也。

唐木屐仍大行

唐撫言京師長者皆著木屐夫長者皆著少年可知想見長安街上橐橐之聲盈耳也。

五代及宋以鞢爲朝服鞋爲便服鞋仍有帶

歸田錄馮道與和凝同在中書一日和問馮曰公靴新買其值幾何馮舉左足曰九百和性褊急遽回顧小吏曰我鞢何得一千八百因詬責久之馮徐舉右足曰此亦九百於是烘堂大笑又老學菴筆記淳熙己酉車駕幸潮門從駕臣僚皆攢帶子著靴是自五代至南宋皆以靴爲朝服又歸田錄往時學士循唐故事見宰相不具靴笏繫鞋坐玉堂上是言惟學士清貴可著鞋坐玉堂見宰相他人須具靴笏也是以鞋爲便服靴爲禮服自宋初而已然至清不改又宋陶穀詩云短靿鞢兒末厥兵是宋靴之有靿益明又鞋而曰繫是宋鞋之有帶殆與唐同。

周以前足無裏衣有之自漢始。周以前不履則跣。前已詳之矣。至漢初履之內復加裏衣。淮南子說林訓鈞之縞也。一端以爲冠。一端以爲綵。冠則戴致之。綵則屨音展之。又後漢禮儀志絳袴綵按集韻綵所以束衣也。類篇綵足衣也。依兩訓詁之。綵亦有約束意似卽急就篇注所謂裏足之巾也是爲足上裏衣之創始。

至後漢而有襪仍之至今。

後漢書李忠傳注光武衣垢使忠解澣忠更作新袍小單衣襪以上之。又蔡文姬傳時且寒賜以頭巾履襪。又宋書輿服志絳袴絳襪。唐人李娃傳特爲生製新履襪。又靈鬼志韶自外入著白襪。幽履又杜甫詩青鞋布襪從此始。蓋至是而足之裏外衣皆備。

周以來婦女足服

周之時男女履舄蓋無殊異。是以周官履人所掌。王及后之赤舄黑舄素履葛屨句繩皆同。卽下至命夫命婦之命屨功屨散屨亦同。其他經傳言及婦足服者甚少也。

古婦女仍上堂脫屨跣足

淮南子古者家老異飯而食殊器而享。子婦跣足上堂跪而斟羹。是周時婦女入室亦脫屨也。

秦漢時婦女履始有銳形

史記貨殖傳。今夫趙女鄭姬。揄長袂。躡利屣。目挑心招。出不遠千里者。爲富厚也。說者謂利屣爲婦人纏足之始。此不然。自古女體弱於男體。而女子服飾貴輕纖。忌重拙。惟履亦然。利屣者。不過較方形之男履。稍狹以期妍媚耳。與後世之錐形異也。

六朝時男女靴可換著

北齊書任城王湝爲并州刺史。有婦人臨汾水浣衣。有乘馬人。換其新靴而去。婦人持故靴詣州言之。湝召城外諸嫗。以靴示之。給曰。有乘馬人於路被刦。遺此靴。一嫗撫膺哭曰。兒昨著此靴。向妻家。如其語捕獲時稱明察。據此則男子與婦人靴可換著也。是六朝時男女履尙無異。亦何怪魏武賜蔡文姬履襪。不以爲襪哉。

六朝時之女皮履

南齊書高帝令宮人著紫皮履。

唐時女著木屐皮屐

摭言京師婦女始嫁。作漆畫屐。五色采爲系。又張泌小金傳。蓬髮曳漆履。夫可漆可畫。則木屐也。雲溪友誼崔涯吳楚狂士。與張祜齊名。每題詩倡肆。舉之則車馬盈門。毀之則杯盤失措。常嘲一妓云。布袍皮襖。火燒氈紙補箜篌接弦。更著一雙皮屐子。紇梯紇榻到門前。今日日本婦女在街上行。隔數十武。卽聞。

紇梯紇榻聲者木屐子也豈知其爲唐制哉讀此詩唐時婦女步履音聲如耳聞目睹

宋時婦人鞋底已成尖形與清無異

老學菴筆記宣和末婦人鞋底尖以二色合成名錯到底夫鞋而有尖非纏足不如此也是確證已又劉改之詠美人足云襯玉羅慳銷金樣窄載不起盈盈一段春又有時自度歌聲悄不覺微尖點拍頻又知何似似一鉤新月淺碧籠雲味此詞是宋時女子形已與清時無異蓋自隋唐以來婦女妝飾以纖厲爲尙變本加麗至宋而已極必謂纏足起於某時者固執之論也袁子才隨園隨筆辨之甚詳茲從略

卷七

行唐尙秉和著

飲食部

周時製造食物之法

炮豚

禮內則炮取豚若將羊也。同群牡。剗之剗之。實棗於其腹中。編萑以苴之。苴裏也。塗之以墐塗。炮之。塗皆乾。擘之。灌手以摩之。去其皺。音展膜也。爲稻粉糲。音修汁也。溲浸也。之以爲酏。粥也。以付豚。糊之也。煎諸膏膏必滅之。深油也。鉅鑊湯以小鼎薌肺於其中。使其湯毋滅鼎。三日三夜毋滅火。而後調之以醯醢。按說文。炮毛炙肉也。廣韻裏物燒也。經言造炮肉。先取豚若羊殺之。實棗於腹肉。再裹之以葦。塗之以泥。炮之使乾。擘而摩去其油膜。再以稻米粉爲糊。糊豚四周。煎於油鑊中。使乾。置小鼎中。再將小鼎置大鑊沸湯中。湯毋滅鼎者。懼水浸入小鼎敗肉味也。煮三日三夜而后調醯醢食之。可謂費矣。然不知發明若干年。而後能製法繁複若此也。

周製雜肉糜法

名擣珍

禮內則擣珍。取牛羊麋鹿膚之肉。必豚。注夾脊肉也。今所謂裏脊也。每物與牛若一捶反側之。去其餌。注筋健也。孰出之去。

其皺柔其肉。按擣珍者。擣取牛羊等肉使爛必厭者。厭肉肥美也。每物與牛若一者。言四者肉之多寡與牛等也。反側捶之。其筋可去。筋去則肉和熟而去其膜。調以醯醢則肉柔矣。此製法甚奇。不用刀切。椎擣使爛。和五種肉爲一。且筋膜盡去。均勻和合調而食之。其有異味可知也。

周食生牛肉法

古名曰漬

禮內則漬。取牛肉必新殺者。薄切之必絕其理。湛同沈諸美酒。期朝而食之。以醯若醯醢。按必絕其理者。言切肉時。橫斷其文理也。橫斷則生肉易嚼。漬以美酒。至明朝方食。則美味生而膻味去矣。更調以梅醬。鹽。適口可知。

周製乾肉糜法

古名熬

爲熬。捶之去其皺。編萑布牛肉焉。屑薑與桂以灑諸上而鹽之。乾而食之。施羊亦如之。施麋施鹿施麇皆如牛羊。欲濡溼也。肉則釋以鹽水潤釋。而煎之以鹽。欲乾肉則捶而食之。按說文乾煎曰熬。爲熬者。言爲熬肉之法也。亦不刀切。擣之使爛。晾於葦簿之上。諸者菹也。洒以薑桂鹽菹俟其乾。煎食之。然亦可濡食。煎以醯則潤而釋矣。此種食法有類於今日之醃肉。可久存。不過古人擣肉使爛。今則塊醃。古較今尤精耳。

周煎肉餅法

名穆

禮內則穆。說文。以米和羹也。取牛羊豕之肉。三如一小切之。與稻米。稻米二肉一合。以爲餌。煎之。按今日用麥粉

和肉煎爲餅。餅卽餌也。見說文。茲用稻米必煮米使極爛然後能和肉爲餌。惟今日煎時用油。古則無之。是今較古勝也。

周製炙肝法

名肝營

禮內則肝營取狗肝一幘之以其營脂膏^即濡炙之。舉燶其營不蓼。按燶之者覆之也。言覆肝於鑄再以油^即濡炙之。舉燶其營不蓼。按燶之者覆之也。言覆肝於鑄再以脂油炙之。舉者皆也。皆焦然後食之。蓼者辛菜。不蓼者不用辛也。經不言用醯醢且不刀切或食時割之和醬食也。

周製薄粥法

禮內則黍酏。又曰饘酏。注禮厚粥。酏薄粥。賈逵曰。酏爲粥清者粥而去米也。又曰取稻米舉糁溲之小切狼臍^{胸臆}膏以與稻米爲酏。是又於薄粥內加狼膏以益其味。其製法大概與今之牛油茶相類也。

周人拌飯之香料

名淳熬淳母

禮內則淳熬。煎醢加於陸稻上沃之以膏。曰淳熬淳母。煎醢加於黍食上沃之以膏。曰淳母。是蓋以稻米黍米爲飯。旣加以煎醢復以膏沃之。味厚極矣。故曰淳。

周配置食味之法

禮內則膾說文細切肉爲膾。春用葱秋用芥。芥醬豚春用韭秋用蓼。辛菜脂用葱膏用薤和用醯獸用梅鶉羹鷄

羹鴛釀之蓼。鯈鰐蒸雛燒雉。薌無蓼者。言食雉但可投以薌。不可和以辛菜也。其配置之法。有用之。至今者在當時亦可謂精矣。

周食物所忌

禮內則不食雛。狼去腸。狗去腎。狸去正脊。兔去尻。狐去首。豚去腦。魚去乙。腮形鼈去魂。竅也牛夜鳴則厲。局齧羊冷毛而毳。膻。狗赤股而躁。臊。鳥臙色而沙鳴。鬱。臭也豕望視而交睫。腥。馬黑脊而般臂漏。觀以上之研究。亦可謂精細矣。不過狗。兔。狐狸等物。自隋唐以來已不食。而馬尤爲粗品。然周時人皆食之。似不如後人檢擇之精也。

周人製酸菜泡菜之法

名菹

周禮天官醯人掌四豆之實。韭菹。菁菹。注蔓菁。茆菹。注即莧。葵菹。即白菜。芹菹。落菹。注水中菜。筍菹。注竹萌或稱蒲。按侯鯖錄細切曰。蘿全物曰菹。又釋名菹阻也。生釀之。遂使阻於寒溫之間。不得爛也。卽今之泡菜。鹹菜也。又今之酸菜也。觀醯人掌七菹。醯者醋也。故知菹亦爲酸菜也。詩小雅疆場有爪是剥是菹是也。

周時肉醬種類之多

今祇遺蝦醬一法

禮曲禮母獸醯疏肉醬也。周官醯人掌四豆之實。酰醯。注肉醤。嬴醯。注蠶蠶醤。蛤蜃醯。大蛤。蚘醯。魚鹽漬以美酒塗置瓶中百日而成有骨爲蚌無。

骨爲醢。按周醢共有八種。之多。其見於詩者。大雅云。酰醢以薦是也。醢尙充祭品。其珍貴可知。蓋古人食肉淡煮者多。穀蒸是也。故食時醬最需要。孔子所以不徹也。今祇有蝦醬。是其遺法。餘則不數見矣。

周時純以豆米所爲之餅餌

周官籩人掌籩之實。糗餌粉餈。注糗豆米所爲。餌餈皆餅也。按是三物。蓋皆以豆米之粉爲之。如今日之小米麵餅。雜花麵餅。皆蒸熟食之。

周專置調和食味之官名曰食醫

周禮天官食醫掌和王之六食六飲六膳百羞百醬八珍之齊。同劑凡和春多酸夏多苦秋多辛冬則鹹。調以滑甘。凡會膳食之宜。牛宜稌。羊宜黍。豕宜稷。犬宜梁。雁宜麥。魚宜菰。注食醫和其劑者。酌天時與王體氣之宜也。然則周時調和五味。皆有專門之學。以爲之宜。其精矣。

周時製造糖菓之法

禮內則棗栗飴蜜以甘之。堇萱粉榆兔羹。兔新生而乾者。滑瀝以滑之。按今日製糖菓之法。皆漬以水糖及蜜。無庸再沃以松榆等汁。周時不爾者。水糖沙糖等物。皆尙未有。取甘之法。祇用飴飴者。餽也。黍汁。造今臘月之糖瓜是也。

周時置食次序

曲禮。凡進食之禮。左殼。帶骨曰。右載。切肉食。音俟飯。居人之左。羹居人之右。膾。細切肉會。炙處外。醯醬處內。葱潔。蒸葱音。峙。處末酒漿處。右古人尚右。故取食皆以右手。其數取者置在右。爲便也。而醯醬每食必用。故置在內。俾尤近。以便霑濡。

古弟子尚食侍食徹食禮節

管子弟子職。先生將食。弟子饌饋。注饋謂選具其食。攝衽盥漱。跪而坐饋。置醬錯食。陳膳毋悖。凡置彼食。鳥獸魚鼈。必先菜羹。注先菜後肉。羹載中別。愚按別疑列之訛。載在醬前。注遠載近醬。其食要方。注陳設食器要令成方。飯是爲卒。左酒右漿。告具備也。而退奉手而立。按載在醬前者。卽曲禮膾炙處外。醯醬處內之意也。陳設食器要方者。貴整齊也。飯是爲卒者。言最後具飯也。注言既飯而食。則卒者誤也。此皆言陳設食物先後次序。至陳設既畢。故下云告具也。告具者。言食品具備。請先生食也。故知注非也。此尚食之禮節也。

又云三飯二斗。注三食飯二毀斗。吳云。方葉當爲汁。卽所謂殼。左執虛豆。右執挾匕。注挾匕以載肉。周還而貳。再益。云惟嗛之視。同嗛以齒。注類也。周則有始。柄尺不跪。是謂貳紀。注豆有柄。長尺則立而進。此是再益之綱紀也。先生已食。弟子乃徹。趨走進。拚前板祭。按前三句。謂侍食者應備之器。二斗者。備既飯而汙。更替取潔。猶今之食番菜。必易器也。左手執虛豆者。豆有柄。左手執之。而中空。備食時。承接淋漓也。右執挾匕者。言以二匕載殼肉。右手所執侍食者。須預置二斗。並置虛豆挾匕於左右也。周還而貳。惟嗛之視者。嗛者盡也。盡則益之。同嗛以齒者。齒者序。

也。言數食若同時並盡，則按次序益之也。拏掃也。前板祭者，板者斂食之器。公羊傳所謂賤而刻其板者是也。古食必祭，食罷則以板斂其祭，掃而清潔之。此侍食徹食之禮節也。

周賓主食時禮節

曲禮侍食於長者，主人親饋，進食則拜而食。主人不親饋，則不拜而食。

曲禮客若降等。注：大夫食於卿則等卑。執食興辭。注：欲食於堂下。主人興辭於客，然後客坐。注：主人阻客客復坐也。主人延客祭。注：古食必祭先農廷導也。祭食祭所先進，殼之序偏祭之三飯。注：三食也。禮食三殼而告飽。須勸乃更食。主人延客食哉，然後辯殼。注：凡食殼初脊辯子乃飽也。至肩。

若君賜食則禮節益謹

禮玉藻豆去席尺。注：恐汙席。若賜之食而君客之，則命之祭然後祭。注：祭敵體方得。先飯辯嘗羞飲。啜飲以利喉，非飲酒以俟。

若有嘗羞者，則俟君之食然後食。飯飲而俟君命之羞，羞近者命之品。注：偏也。嘗之然後唯所欲，凡嘗遠食必順近食。

按今日會食，食遠者主人必推致之。不然，客不遠取，又初尚一羹。主人不導客，客輒不先嘗，猶古禮之遺。

侍食於尊長禮節

禮玉藻，侍食於先生。異爵者後祭先飯。注：若爲尊者嘗食。客祭，主人辭曰：「不足祭也。」注：主人之饌盛。客殮，主人辭以

疏。

古將食罷最重殮禮

禮玉藻侍食於君。君未覆手不敢殮。按覆手者。注云以手循口邊殼粒。恐汙着也。殮者謂用飲澆飯於器中也。禮食竟更作三殮。以勸助令飽。實使不虛也。又玉藻侍食於先生。客殮疏云。殮是已食飽。猶美食。故作三殮。示仍欲食也。飽仍欲食。則食之美可知。由前解則殮助腹內飽實。由後解則兼以悅主人。是殮有爲己爲人二義也。

若食於敵體者主人失禮客可不食而殮

禮雜記。孔子食於少施氏而飽。少施氏食我以禮。吾祭作而辭曰。疏食不足祭也。吾殮作而辭曰。疏食不敢以傷吾子。玉藻。孔子食於季氏。不辭。不食肉而殮。疏凡禮食先食殼。次食殼。乃至肩。至肩則飽。乃殮。不食肉而殮。由主人不辭。故也不辭。則失禮。家語云。從主人也。主人不以禮。客不敢盡禮。主人盡禮。客不敢不盡禮也。按今日食罷。恆對主人言食太飽。猶有殮之遺意。而祭禮之亡。則久矣。

古食罷以酒漱口禮節

曲禮。主人未辯。食殼未畢。客不虛口。注。虛口謂醋也。疏。食罷以酒盪口曰醋。敵以上可不俟主人。主人恆讓客。不自先飽。故客須俟主人辯。乃漱口也。又儀禮公食大夫禮。賓卒食會飯三飲。注。三飯漿也。食竟漱口。

也。按曲禮客不虛口疏云。謂食竟飲酒盪口使清潔及安居也。用漿曰漱。用酒曰醕。然公食雖設酒優賓。不得用爲醕。但以漿漱口而止也。若私客則可用酒醕。按今日食罷漱口用清水而略溫。太寒則漱齒。不惟不以酒亦不以漿。而古人不爾者。今則漱而吐之。古似漱而下之也。古蓋以吐爲不敬。

古食罷徹饌情景

曲禮卒食客自前跪徹飲齊。注齊醬屬也。卑以授相者。主人簪饌者。主人興起也。辭於客。微不聽自然後客坐。是食於尊者之前。主人不聽自徹可復坐也。玉藻云君旣食又飯殮。飯殮者三飯也。君旣徹執飯與醬乃出授從者。注授己之從者食於尊者之前。當親徹也是。主人益尊聽自徹出授己之從者也。又玉藻主人自置其醬。則客自徹之。注敬主人也。徹奠於序端。是食於敵平等者之家。主人敬客自尙食故客亦自徹。以敬主人所謂禮。因地異也。

古極重禮食不能食

左傳宣十六年王享有體薦宴有折俎。注半解其體而薦之所以示儉。折俎者體解節折升之於俎。物皆可食所以示慈也。按古者饗同享禮最盛宴禮次之。示儉示慈卽左傳所謂饗以訓恭儉。宴以示慈惠也。示惠故可食示儉不可食猶大羹不調用以祭神禮益恭也。

古燕食共器以手取飯

曲禮。共食不飽。注・共羹飯之大器。共飯不澤手。注・古禮・飯以手不用箸。毋搏飯。注・共器若以飯作搏・則多得不謙。毋放飯。疏・手就器中取飯若粘着・不得拂放。

本器。毋反魚肉。注・同器食已・齧殘不然。燕食如此。若禮食則不共器也。

古食時所忌犯則不恭

曲禮毋流歎。注・飲也・大歎若流水嫌疾。毋咤食。注・若嫌薄。毋齧骨。毋授與狗骨。毋固獲。毋揚飯。揚之使涼。飯黍毋以箸。嫌連

當以七。毋啜。音蹠不嚼也。亦嫌速。羹毋絜羹。加鹽爲嫌。梅。毋歎醢。淡。客絜羹。主人辭以不能烹。客歎醢。主人辭以宴。

古食須釋劍

左傳哀十六年。衛君召渾良夫食。至。袒裘不釋劍而食。太子數以三罪而殺之。按古者劍不去身。獨食時。不脫。則不敬。况又袒裘乎。然以此爲罪。可見古威儀關係之重。

古禮食不共器器之多少以爵秩而分

禮。禮器上大夫八豆。下大夫六豆。又鄉飲酒六十者三豆。七十者四豆。八十者五豆。九十者六豆。又左傳昭五年。季孫宿如晉。晉侯享之。有加籩。武子退使行人告曰。得貺不過三獻。今豆有加。下臣弗敢是古禮。專器而食。故器有多寡。因年爵而異也。

古貴人燕食每食奏樂

禮檀弓。知悼子卒未葬。平公飲酒。師曠李調侍鼓鐘。注・君食是國君食時必奏樂也。又左傳哀十四年。左

師每食擊鐘。聞鐘聲。公曰。夫子將食。既食。又奏。是大臣食。亦奏樂也。不惟食時奏罷。食亦奏清時。督撫提鎮署外。輒有鐘鼓樓。峙列東西。然日久成具文。祇督撫出時。鳴炮吹笛。食時無奏樂者。而邊荒提鎮衙署。建樹威嚴。食時輒吹笛三聲。擂鼓三聲。俾市民聞知。俗所謂三吹三打。豈知仍成周遺意哉。

春秋時貴人盡肉食

左傳襄二十八年。公膳日雙鷄。饔人更以鷄子。雅子尾怒。注謂公家供卿大夫之常膳。是不宴會常食亦肉也。又左傳莊十年。齊人伐我。公將戰。曹劌請見。其鄉人曰。肉食者謀之。又何間焉。劌曰。肉食者鄙。未能遠謀。又昭四年。肉食之祿。水皆與焉。又說苑晉獻公時。有祖朝者上書。公使告之曰。肉食者已慮之矣。是可見。公家皆肉食。故以肉食爲代表公卿之名詞也。

食時祭先禮節

禮內則君賜食。命之祭然後祭。王藻後祭先飯。論語雖蔬食菜羹。必祭必齊如也。左傳襄二十八年。叔孫穆子食慶封。慶封祀穆子不悅。注食有祭示有所先也。祀遠散所祭不共。故穆子惡之。然則祭亦有禮節。遠散所祭則失禮。似將祭品置於食案。不以器盛。今農家餉南畝食於野者。將食必先以勺酌飯灑之。猶周禮之遺。而士大夫則否。孔子曰。禮失求諸野。豈不然歟。

古食器類別 載食器 造食器 取食器 簪尙不重

周禮天官籩人掌四籩之實。醢人掌四豆之實。又左傳染指於鼎論語一簞食一瓢飲說苑魯有儉者瓦鬲煮食而美盛之土鉶以進孔子。孔子如受大牢之禮。弟子曰瓦陋陋器也。煮食薄膳也。先生何喜如是乎。又攷工記夫人享諸侯案十有二寸。是皆載食之器也。籩與簾皆竹製。豆則木製。鼎則金瓢則瓠。以鼎爲最貴。子路所謂吾親歿之後。南仕於楚。累茵而坐。列鼎而食也。以瓢爲最儉。莊子所謂剖之以爲瓢也。又禮運疏中古之時。雖有火化。未有釜甑。釜甑與鬲皆造食之器。又曲禮飯黍毋以箸。易不喪匕鬯。攷工記梓人爲飲器。勺一升。漢書禮樂志。勺椒漿。勺者酌漿而飲之也。匕者載食箸者。挾食皆取食之器也。又曲禮羹之有菜者用挾。挾無菜者不用挾。挾者箸也。是周時箸尙不要也。

周時以魚稻黍爲美食

論語食夫稻衣夫錦於汝安乎。孟子曰魚我所欲也。熊掌亦我所欲也。失以魚與熊掌並稱其貴重可知。又漢書地理志吳楚之民食魚稻。蓋魚稻皆產於水鄉。而中原少水。雖有而不多。然吳楚之民皆食之。志之正異之也。又詩小雅其饋伊黍注云。豐年雖農人亦得食黍。可見黍之貴重。田家不常食。

周窮民至食藜蕎實

說苑由侍二親之時。常食藜藿之實。又晉獻公謂東郭民祖朝曰。食肉者已慮之矣。藿食者尙何與焉。又莊子孔子窮於陳蔡之間。七日不火食。藜蕎不糁。按糁者說文以米和羹也。不糁者言祇有羹而無米也。

又按說苑。晉平公布蒺藜於庭。師曠行則刺足。伏則刺膝。仰天歎曰。夫殿庭非生蒺藜之地。由此證之。舊食蒺藜。皆以蒺藜實爲之。子路所食者是也。但以蒺藜爲米。煮食之乎。抑春其實爲粉。和粟米食之。因後世久不食此。故其詳亦無從揣測也。

又按蒺藜皆旅生。無藝之者。性惡雨喜旱。旱年五穀焦枯。獨蒺藜益肥茂。沿阡陌蔓生。實繁堅實。有粉固可食也。古荒地多此物。益盛。窮民值歉歲。多收食之。故晉公以藿食爲窮民之代名詞。今則視爲惡草。雖遇荒年。無知其可食者。故備論之。

周時已普食百菜

詩幽風七月烹葵及菽。又儀禮士虞禮夏秋用生葵。又列女傳漆室女曰。昔晉客舍吾家。繫馬園中。馬佚馳走踐吾葵。使我終歲不食葵。按王禎農書。葵爲百菜之主。備四時之饌。又左傳成十七年鮑莊子之知不如葵。葵猶能衛其足。夫葉能衛足。又四時可食。則今日之百菜也。或名曰菘。所謂秋末晚菘也。

古食鹽種類之多而以虎形爲尤奇

周禮天官鹽人祭祀供其苦鹽。散鹽賓客供其形鹽。王之膳羞供其飴鹽。注苦鹽出於池。鹽爲顆。不凍治味苦。散鹽卽末鹽。又天官籩人朝事之籩。其實形鹽。注形鹽築鹽爲虎形也。按苦鹽出於鹽池。今河東鹽池所出者是也。散鹽者。今海鹽或井鹽碎爲粉者是也。形鹽者。卽左傳僖三十年所謂鹽虎形者是也。原

以供賓客禮場用之。取其美觀，今則無矣。

周時男女及小兒食鹽量數

管子凡食鹽之數。一月丈夫五升少半。婦人三升少半。嬰兒二升少半。按小兒食鹽少於大人宜也。至婦人少於男子，則不可解。豈古婦人食量較男子減少幾及半乎？不然胡食鹽量數相差若是。

古食鹽防身腫

管子無鹽則腫。又民惡食而無鹽則腫。按五味辛苦酸甘皆可不食。獨不食鹽則身腫生毛。至今猶然。故中國古人於食鹽法發明最早。說文云宿沙初作煮海爲鹽。致宿沙尙在五帝前。至春秋已數千年。管子治齊煮海爲鹽。富擅天下。故窮究鹽之利害。俾民知不食則腫。而惡食者腫尤甚也。

周食狗之劇 且以祭神

月令天子乃以犬嘗稻。以犬嘗麻。先薦寢廟。周禮供其犬牲。又禮內則狗去腎。狗赤股無毛而躁臊。音騷又史記荳政傳。家貧客游。以爲狗屠。可以旦夕得甘毳。又荆軻傳。愛燕之狗屠。及善擊筑者高漸離。夫至以屠狗爲專業。則當時社會食狗之風尙可知矣。

漢時食麥飯以葱爲菜

後漢馮異傳。倉猝蕪亭麥飯。又高士傳。陰就請井丹。設麥飯葱菜。按今日爲麥飯者。皆取將熟之麥。而

實未堅實者。煮以爲飯。香嫩可口。無以乾麥爲之者。光武過滹沱時。當十月。則無鮮麥。而亦爲之者。可見。古人常以麥實爲飯。與粟等也。葱菜者。鹹葱爲菜。以下飯也。

漢時仍貴黍常炊黍餉客

周時黍稷。用以祀神。論語子路拱而立。穀鷄爲黍而食之。是以黍餉客也。後漢龐公傳注。司馬德操嘗詣龐公。值上墓。德操便登堂。呼德公妻子。速作黍。又三國志注。鍾茂嘗詣姊。姊爲穀鷄炊黍。而不留也。是至漢時。仍以黍餉客。則黍之貴於常食可知。

漢時燒餅販子

三國志注。趙岐遭家禍。詣北海。販胡餅。孫賓碩過市。疑其非常人。問曰。自有餅耶。販之耶。岐曰。販之。按胡餅者。卽今日之燒餅。販餅卽叫賣於市者也。漢已與今同。

漢時食品繁於古

漢書孔光傳。太師入省中。用杖賜餐十七物。師古曰。食具有十七種物。按周時雖大宴饗。食品不過數種。茲有十七種之多。較周時已進步矣。

漢時食器箸最要

其盛食之器。據漢書主父偃傳。丈夫生不五鼎食。死則五鼎烹耳。張宴日。五鼎牛羊豕魚麋也。又霍后傳。

許后五日一朝皇太后於長樂宮。親奉案上食。又史記張耳傳。教自持案上食。禮恭甚。又後漢梁鴻傳。妻爲具視。不敢仰視。舉案齊眉。三國魏武傳。及懽悅大笑。至以頭沒杯案中。肴膳沾污巾幘。按杯者。椀也。案者。上食所用。四邊有矮牆。下有矮足。公羊傳。賊而刻其板。板卽案也。用以斂食器。今朝鮮人。款客席地坐。食時賓主各一案。猶古制也。今中國人上食之案。有牆無足。祇上食用之食時。則否。因不席地坐也。其取食之器。史記張良傳。臣請借前箸籌之。又周亞夫傳。上召亞夫賜食。獨置大胾。無切肉。又不置箸。亞夫心不平。顧謂尚食取箸。又三國志劉先主傳。先主方食失匕箸。按周時食用箸甚少。至以手奉飯。漢則無不用箸。觀亞夫。顧尚食不索他器。獨索箸可知其重矣。若今日則箸尤要也。

漢食時忌後飽

漢書哀帝紀。及賜食於前。後飽起下。韞係解。帝由此以中山王爲不能。按今日子弟赴宴。父母亦輒以後飽爲戒。後飽令人疑貪食。古人尤重。

漢時炊飯已用筭蒸

世說。賓客詣陳太丘宿。太丘使元方季方炊客。與太丘論議。二人俱委而竊聽。炊忘著筭。飯落釜中。太丘問飯何不餚。元方季方長跪曰。大人與客語。乃俱竊聽。炊忘著筭。今飯成糜。按說文。餚。溜氣。卽蒸也。由此可證。漢時炊飯之法。與今時同。卽以米置釜。煮之。再以笊籬撈出。置筭上蒸之。元方等忘著筭。及既覺。知。

已成糜矣。糜與粥不同。粥米少而稀。糜則濃厚也。

漢魏晉之豆粥粟粥

後漢馮異傳。光武至饒陽蕪蕘亭。異上豆粥。漢書公孫弘傳。食一肉脫粟之飯。世說石崇爲客作豆粥。咄嗟便辨。許允爲魏明帝見收。舉家號哭。允婦曰。勿憂。作粟粥待。頃之允至。按北方少稻。人常食者曰穀。卽粟。脫粟者言去壳不精鑿也。卽今之小米也。

晉時仍不共器食

世說顧榮在洛陽。嘗應人請。覺行炙尚食者人有欲炙之色。因輟已施焉。夫輟己而與他人。則不共器可知。否則不便專主如此也。

六朝時食飯多用漆器

六朝時已有瓷器。齊民要術合面脂法云。以綿瀝著瓷漆盞中。是其證。然瓷器蓋甚寡。多用漆器。齊民要術種漆云。凡漆器送客之後。須以水淨洗。置牀薄上。於日中晒之使乾。則堅牢耐久。若不卽洗。鹽醋浸潤。氣徹則皺。器便壞矣。觀此是六朝時食飯皆用漆器也。又種榆云。十年之後。鍛作魁椀瓶榼器皿。又以證漆器皆以榆木鍛成也。

晉時貴人以五盤盌爲儉食

世說。殷仲堪旣爲荊州。值水儉食。嘗五盤。盤外無餘肴。夫肴至五盤。五盤下飯亦足矣。而猶以爲儉。甚矣。晉人之奢。

晉人已食韭菜花

世說。石崇飯客。恆冬天得韭莖。按此卽今日之鹹韭花也。七月採之。加以薑。瓜。擣爲泥。漬以鹽。過秋開。瓮。馨香撲鼻。而晉人則食新製者。觀其合麥苗。韭根。擣之。因冬月韭無葉。而麥則有苗。可僞。韭菜加韭根。復有韭味。純食鮮者。與今法異矣。

唐貴人猶以鼎食

明皇雜錄。李適之旣貴且豪。常列鼎於前。以備膳羞。一日庭中鼎躍出相鬪。耳足皆落。明日適之罷知政事。

唐人鬻餅狀況

任氏傳。行及里門。門扁未發。旁有胡人鬻餅之舍。方張炭熾爐。暫往棲止。按此卽今日之燒餅。張炭熾爐。卽今日燒餅爐之狀況也。

唐時已不食狗

漢書樊噲傳。以屠狗爲事。師古曰。時人食狗。亦與羊豕同。故噲專屠以賣。按自六朝以來。不見有以屠狗

爲業者，然不敢確定其無有。獨師古此注，懼讀者不明，故曰：時食狗與羊豕同云云，可見唐時已不屠狗而食矣。至鄉曲偷狗盜鷄，私鬻狗肉者，雖至今不免也。

宋時食品之種類

老學庵筆記集英殿宴金國人使九蓋第一肉鹹豉第二燥肉雙下角子第三蓮花肉油餅骨頭第四白肉胡餅第五羣仙餠太平畢羅第六假團魚第七奈花索粉第八假沙魚第九水餅鹹豉旋鮓瓜薑看食棗餳子臘餅白胡餅饅餅按今去南宋時七百年耳其饅品無一與今同者而假團魚假沙魚尤不可解既無其物何必假者且宴外使必係盛饅而只九蓋今普通朋友宴會尚不祇此亦足以觀世變矣。

周以來飲酒狀況 造酒之法

周禮天官酒正掌酒之政令以式法受酒材又月令孟冬乃命大酋秫稻必齊麴蘖必時湛餳必潔水泉必香陶器必良火齊杜云同染必得皆所謂酒材授者以其法授酒人也按秫者今之高粱北方以其米釀自酒俗所謂燒酒也餳者黍與黏稻湛餳者煮稻黍爲糜俟涼再加麴蘖盛以甌而釀之也今南方用稻北方用黍黍酒色黃俗曰黃酒而其法周時皆有之。

古釀酒未熟既熟之識別

周禮天官酒正辨五齊漢杜子春讀同染鄭司農讀若劑之名一曰泛齊二曰醴齊三曰盎齊四曰緹齊五曰沈齊按此

齊應依杜讀爲粢。粢者黍米言。始釀米泛起繼而滓汁相將有若醴然繼而益然大泛成緹色矣。緹者黃赤相間也。終而齊沈汁清酒成熟矣。五者皆釀酒之識驗。舊注謂祭祀不尚味貴多品。若五齊爲五種酒者誤也。

周時酒名

天官酒正辨三酒之物。一曰事酒。二曰昔酒。三曰清酒。按事酒者有事於祭祀執事者得飲之。常用之酒也。昔者久也。今所謂陳酒也。清者藏之過久無幾微滓。滓色愈澄味愈烈也。

周時無燒酒

按五齊之試驗及所謂湛饁皆今時以黍爲糜加麴蘖釀酒法故屢以清濁及滓汁浮沈爲辨。若燒酒則全恃蒸氣故其色白。唐李白詩云呼童烹鷄酌白酒是唐時已有燒酒也。惟不知始於何時。致吳志韋曜傳或密賜茶荈以當酒。茶色黃故可當酒。是三國時仍無白酒也。

周時飲料之多

天官漿人共王之六飲水漿醴涼醫酏。按漿者以水煮米米汁相載即俗所謂米湯也。醴者甜酒以黍糜釀之少加麴蘖釀數日榨出即味甘今所謂甜黃酒即古之醴涼者冰水醫者梅漿二者即今之酸梅湯而鎮以冰塊也。酏者飴也即今所謂餳和以水而飲之也。五者醴與涼醫今皆有漿與飴專作爲飲料者。

少也。

周以氷保持食味狀況

周禮天官凌人春始治鑑。凡內外饔之膳羞鑑焉。凡酒漿之酒醴亦如之。按鑑者注云如甌大口以盛水。貯食物以禦溫氣使不腐也。今都會夏日有氷之地仍如此而開始於周可謂久矣。

周時賣漿者獨多

莊子吾嘗食於十餐而五饋先饋。又信陵君傳薛公藏於賣漿家。按十漿者注云十家並賣漿也。先饋者皆先饋進於己。今所謂競賣也。周時載記不見有賣他食物者。而賣漿者獨多。漿者飲料古無茶似以此供過客行旅之用也。

周時以酒爲刑 至晉猶然

周禮地官閭胥凡事掌其比皺撻罰之事。注鄉飲酒有失禮者則罰以觶酒。重則撻之。按觶者盛酒之器。輕則飲以酒。重則撻以鞭。然則罰飲亦刑之一也。又世說謝奕作剡令有一老翁犯法以醇酒罰之。是晉時亦以酒爲罰也。

古君臣有過皆可罰以酒

檀弓知悼子卒未葬平公飲酒師曠李調侍鼓鐘杜蕡自外來。開鐘聲曰安在。曰在寢。杜蕡入寢。歷階而

升酌曰曠飲斯。又酌曰調飲斯。又酌堂上北面坐飲之。降趨而出。平公呼而進之曰賣。曩者爾心或開余是以不與爾言。爾飲曠何也。曰子卯不樂知悼子在堂。斯爲子卯也大矣。曠也太師也。不以詔。告也是以飲之也。爾飲調何也。曰調也。君之喪臣也爲一飲一食亡君之疾是以飲之也。爾飲何也。曰蕡也。宰夫也。非刀匕是供。又敢知防。是以飲之也。平公曰寡人亦有過焉。酌而飲寡人杜蕡洗而揚鱗。公謂侍者曰。如我死則必勿廢斯爵也。又晏子春秋。景公慙焉舉觴自罰。又淮南子。魏文侯觴諸大夫於陽曲。飲酒酣。文侯喟然歎曰。吾獨無豫讓爲臣乎。蹇車舉白而進之曰。請浮君。罰也是君有過可罰。以酒也。又晏子春秋。景公飲酒。田桓子侍。望見晏子復於公曰。晏子衣縕布之衣。麋鹿之喪。乘棧軫之車。而駕駑馬。是隱君賜也。請浮晏子。公曰諾。晏子坐。酌者奉觴而進之曰。君命浮子。是臣有過。亦以酒爲罰也。夫酒者人所喜飲而以是爲罰。且以酒代刑。倘遇嗜飲者。不愈得意乎。然其風至今未已。此等習慣殊不可解已。

周時賣酒卽懸旗幟而量酒則以升概

韓非子。宋人有酤酒。賣酒者。升概甚平。遇客甚謹。爲酒甚美。懸幟甚高。然不售。怪其故。問長者楊倩。倩曰。汝狗猛也。人畏焉。或令孺子懷錢挈壺甕而往酤。而狗迓而訖之。此所以不售也。按懸幟甚高者。欲使人望而知爲酒家也。升者。所以量酒。概者。橫木過升口。卽知酒滿與否也。今以斗量豆米者。猶用之謂之斗。概而古之量酒者。亦用之。今則否矣。

古禮酒必和以水

禮玉藻。凡尊必尚玄尊。惟饗野人皆酒。注尊尚玄酒。不忘古也。野人不得依古禮。故有酒無水。按此亦猶大羹不和之意。敬之至也。對野人無所用其敬。反得飲醇酒。此等古禮。於人情不適。故自漢以後。無行之者。

古飲時安放尊壺規矩

禮少儀。尊壺者面其鼻。又玉藻。惟君面尊。注面尊者。尊鼻向君。君宴臣專其恩惠。若兩楹相見。尊鼻向兩楹間。在賓主之間夾之。不得專向君也。按兩楹相見者。兩國之君見於兩楹之間堂之正中也。旣有兩君。故樽鼻不得專向國君。

古酒尊多以角製

詩曰。酌彼兕觥。左傳觴曲沃人禮。揚禪皆酒尊也。而皆從角。今角尊猶有存者。底斂口。侈徑約三寸。餘上有華紋。其遺製也。

古盛酒多用皮壺

揚雄酒箴。自用如此。不如鷗夷。鷗夷滑稽。腹大如壺。晝日盛酒。人復夜酤。常爲國器。託於屬車。又史記夫差怒。盛以鷗夷。投之江中。按鷗夷製以皮。腹大口小形扁。用以盛酒。旅行携之。結於車箱。無震宕。撞碎失。

酒之患。今出行携酒者仍用之。故子雲云。託於屬車也。至夫差以鴟夷盛子胥尸。不過形較大耳。殆如今之酒簍矣。

漢人之賽酒多少須平均

史記灌夫傳。夫與長樂衛尉竇甫飲。輕重不得。不平夫醉搏甫。按此必衛尉飲少。不肯再飲。而灌夫飲多。故云不得其平。恚而搏之也。今飲者猶然。俗名曰對鍾。其黠者騙他人先飲。己則不飲。灌夫之用武。想亦如此也。

漢時貴人恃勢不肯多飲

史記魏其侯傳。灌夫起行酒至武安。武安膝席曰。不能滿觴。夫怒因嘻笑曰。將軍貴人也。畢之時。武安不肯。按古人跪坐以臀壓足。故兩膝外向。若致敬於人身。直豎則膝著席。故謂之膝席。然人爲我酌酒。應避席。伏武安恃勢。祇膝席。又聲言不能滿觴。傲極矣。故夫不悅而責其畢飲也。

漢人行酒時禮節

史記魏其傳。武安起爲壽。坐皆避席。伏已。魏其侯爲壽。獨故人避席。餘皆半膝席。灌夫不悅。按是時武安爲相。起爲壽者爲斟酒畢飲。以祝壽爲名。今所謂敬酒也。避席伏者。言離席而伏於地也。今爲人行酒。人起立。離坐致敬。古人不爾者。因席地坐。起立反不恭也。人以丞相故。皆避席伏示不敢當。魏其亦曾爲

丞相則避席者少。膝席者多。膝席較避席傲多矣。夫感世態炎涼。故不悅也。細讀此文。漢時士夫酣醉狀。况有如目覩。

古飲酒一飲須一桮不盡則有罰

漢書敍傳。趙李諸侍中皆飲滿舉。白孟康云。舉白者見驗飲酒盡不也。卽今日飲罷倒桮示人以見其盡也。師古曰。一說白者罰爵之名也。飲有不盡者。則以此桮罰之。魏文帝與大夫飲酒。令曰。不音離酌盡也飲酒者浮以大白。然則古飲酒一飲須盡一桮。否則受罰。自周末已然。不似今人之可徐飲也。

古少者與長者飲亦一飲一桮。但有後先禮曲禮。長者舉未音離酌。少者不敢飲。按此益足證古人飲酒一飲須盡一桮不然。長者尊未盡。少者先盡。則不恭矣。若如今日習慣。可徐徐飲之。則長者之盡爵須時。少者永俟之。不敢飲。則不合矣。酌說文云飲酒盡也。

唐時仍一飲一杯故有酒巡

張說虬髯客傳。酒旣巡。博異記食畢命酒才一巡。王建詩勸酒不依巡。黃輝詩玉燭抽看記飲巡。巡者徧也。依次盡爵。徧飲爲一巡。蓋一人飲訖再及一人。非若今日之一齊乾杯。是以靈應傳云。酒至貴主集異記云。酒至溪神。摭異記云。上爲臨淄王時遊昆明池會諸豪家子飲酒及於上。夫日至日及則依次也。依

次則一飲一杯。非若今日之可任意也。後又讀任蕃夢遊錄。見五六人方宴飲酒至紫衣。至白面年少。至黑衣。至綠衣。至黑衣胡人。至張妻。敍飲狀尤悉。愈足證前說之不謬。

漢魏人之鬧酒與今同

史記游俠傳。郭解姊子負解之勢。與人飲使之酬。非其任。強灌之。又陳遵招人飲。投轄井中。不使去。至登堂拜太夫人而逃。又吳志韋曜傳。皓每宴饗。坐無能否。率以七升爲限。雖不悉入口。皆澆灌取盡。觀此。則漢時。酌酒之風。比今尤烈也。

唐凡宴飲皆設酒糾掌罰籌

玉泉子。昨日坡下郎官集。送某官出牧湖州。飲餞郵亭。人客甚衆。有倉部白員外。末至。崔駢郎中作錄事。下籌。自以卑秩。人乘凌競。更固辭。上次酌四大器。白連飲三器。又崔郢爲京兆尹。三司使在永達亭子宴。丞郎崔乘醉突飲。衆人皆延之。時譙公夏侯孜爲戶部使。問曰。尹曾任給舍否。崔曰。無。公曰。若不曾歷給舍。尹不合衝丞郎宴。命酒糾來。要下籌。且喫罰爵。取三大器物。引滿飲之。按杜詩云。罰籌如蝟毛。籌蓋酒糾掌之酒糾。卽錄事專司觴政。凡遇應罰者。皆酒糾執行。故皇甫嵩醉鄉日月云。懼之徵有十三錄事。貌毅而法峻。八也。此尤足徵。凡宴飲必設錄事。以司觴政。錄事貌莊。罰嚴。不徇私。故懼樂也。又鄭哲才鬼記。翹翹時爲錄事。獨下一籌。罰蔡家娘子。是雖女郎宴會。亦有錄事司罰籌也。

漢行酒不用侍從

史記魏其武安傳。魏其侯爲壽。又武安起爲壽灌夫起行酒。按爲壽者特敬人酒。宜自斟灌夫亦客。乃自行酒。又後漢馬武傳。世祖見之甚悅。每勞饗諸將。武輒起斟酌於前世祖以爲歡。是君臣宴會亦自起行酒也。

古至尊亦行酒

吳志虞翻傳。權既爲吳王。歡宴之末。自起行酒。翻伏地陽醉不持權去。翻起坐。權於是大怒。持刀擬翻。時權爲吳君已二十餘年。以如是尊位。君臣宴會。猶自起行酒。可見古人酒禮。至爲鄭重。故虞翻陽醉。伺權去。而又起坐。以示不醉。致權怒也。

漢時禁三人以上飲酒

漢書文帝紀。賜大酺五日。如淳曰。漢律三人以上無故羣飲酒。罰金四兩。文帝施恩於民。使民得酤酒。五日以內可羣飲也。

宋時主人勸酒必冠帶

老學菴筆記。前輩置酒飲客。終席不褫帶。後稍廢。然猶以冠帶勸酬。按勸酒歡謔事耳。而猶必冠帶。趙宋時士夫威儀猶敦謹如此。

古皇帝臨幸臣家必爲君具酒食至唐猶然

史記衛皇后傳上被霸上還過平陽公主既飲餽者進又東方朔傳帝過館陶公主主親上食奉觴又世說晉武帝嘗降王武子家武子供饌并用琉璃器食蒸肫肥美異於常味又大唐新語房玄齡避位歸第時大旱太宗將幸芙蓉園觀風俗玄齡勅其子亟洒掃具饌曰乘輿必至旣而帝果幸其第載入宮按後世人主過臣第旣無宿設倉卒具饌必儉而不恭矣卽能豐美而非飯時猶不敬也而古人不爾者似當時以飲饌爲一定禮節不然玄齡胡爲亟勅其子哉此等習慣宋以後卽不見蓋君威日尊上下之情日益懸隔此亦其一端也

晉時遷官往賀者皆款以酒食

世說羊曼拜丹陽尹客來早者並得佳設日晏漸罄不復及精隨客早晚不問貴賤羊固拜臨海竟日皆美供雖晚至亦獲盛饌按今日賀人遷擢無有具食者祇婚嫁有之疑晉時賀人遷官其周旋禮節與今賀婚嫁同也

古食時不飲酒食後飲酒唐宋猶然

今日宴會皆先飲酒後食古則與今正相反觀曲禮及弟子職魏晉傳記載食事甚多而皆不及酒其飲酒者皆非食時如世說晉武帝幸王武子家武子設蒸豚盛饌而不言飲何酒又如王恭請江盧奴爲長

史晨往詣江。江猶在帳中。王坐不敢卽言。良久乃及。江不應。直喚人取酒自飲一盃。王笑曰。那得獨飲。江曰。卿亦復須耶。他紀飲酒事尙多。而皆非食時。

此等習慣至唐宋。猶然段成式諾皋記。許漢陽傳。食訖命酒。又虬髯客傳。公訪虬髯。對饌訖。陳女樂二十人。列奏於前。食畢行酒。又宣室志。旣設饌共食。食竟飲酒。靈鬼志。食畢命酒。又徐凝物怪錄。六七人共食。食畢命酒。歡飲。又段成式異疾志。烹鷄設食。食畢。貰酒欲飲。是唐時宴會皆食後飲酒。若今之食後飲茶。老學菴筆記。記政和時宴北使。共九盞。每盞盛何食。皆一一詳載。而亦無酒。夫宴外國使必盛設矣。倘有酒。必與饌名並詳。而竟不及以是證。宋時飲食次序。仍不與今同也。

歷代飲食時席地用牀用桌之狀況

此等狀況可分三期。自漢以前席地坐卽席地食。如弟子職所謂坐必盡席者。因不盡席則去食太遠也。又曰亦有據膝。毋有隱肘。注隱肘則身太伏。太伏則失儀矣。凡此皆席地食之證。此一期也。自漢末至五代。多坐牀。食時卽置飲食於牀。段成式劍俠傳。遂揖客入宴。升牀當席而坐。二少年列坐兩旁。陳列品味。又虬髯客傳。行次靈石旅舍。旣設牀。烹羊肉且熟。遂環坐食羊肉。又墨崑崙傳。附記彭博通嘗會飲日暝。獨持兩牀。降階就月酒俎之類。略無傾瀉。又孫頤幻異志。板橋三娘子先起點燈。置新作燒餅於食牀上。又五燈會元奉化趣倒餐牀。蓋自唐以前。卽置食物於坐牀上。唐末五代時別有食牀。略如今之矮方桌。

此一期也。至北宋高座行有倚子杌子。因又有卓子。

俱見後

其飲食時置列狀況。遂與今同。此又一期也。

卷八

行唐尙秉和著

車馬部一

周馬車箱及輪廣衡長尺寸

今人讀古書至車馬往往不能解由不明其車馬形象也明其形象則谿然矣按攷工記兵車之輪六尺有六寸乘車如之又輿人云輪崇車廣衡長三如一注衡者轅端橫木所以扼馬領使不得脫三如一者言三者皆六尺六寸也又參分車廣去一以爲隧注輿深也疏隧謂輿之縱輿橫六尺六寸三分取二得四尺四寸以爲縱卽車箱廣六尺六寸長四尺四寸與今制正相反也

周車式高矮寬廣尺寸

周禮輿人參分其隧一在前二在後以揉其式以其廣之半爲式崇注式深尺四寸餘高三尺三寸按車隧箱長四尺四寸三分一則一尺四寸餘也以是爲式之寬度車廣六尺六寸半之則三尺三寸式者憑也高三尺三寸然後可憑然古人立乘必致敬於人方憑式其尋常則憑較輿人又云以其隧之半爲之較崇注較兩輪上出式者式高三尺三寸加較高二尺二寸共高五尺五寸轎者方望溪云植於輿之兩

旁者爲轔。橫於轔間。當車前而爲人所憑者爲式。轔陷於隧間。式關於轔間。而不可動搖。故亦曰揉。按較者亦橫木高於式二尺餘。立乘憑之。高矮方適宜。故詩云。倚重較兮。惟較在式上。故云重也。詩疏云。較高於轔。同式。轔是兩旁植木較橫輪上。古者立乘平常立則憑較及應爲敬。乃俯憑轔。吳淑和云。車箱長四尺四寸。以三分之前一後二橫設一木去車床即車底三尺三寸。謂之式。又於式上二尺二寸。橫設一木。謂之較。古人立乘平常憑較。敬則落手下。憑式而頭得俯由。以上諸說攷之。古馬車制度如目覩矣。

周馬車一轔尺寸及形狀與馬駕車之法

攷工記。輶人爲輶。軌前十尺而策半之。按兩轔之間爲軌。軌前十尺者。言車轔即轉伸。出隧外。當軌者。長十尺也。又云任正者。十分其輶之長。以其一爲之圍。按任正者。古馬車祇一轔。在正中。其後端與後軫齊。下托車床。車床長四尺四寸。合隧前之轔。十尺共長一丈四尺四寸。十分一。即一尺四寸四分。轔周圍之度也。又衡任者五分其長。以其一爲之圍。注衡任謂兩轔之間。疏服馬有二。一馬有一轔。轔者厄馬領使。不得出。則當輶頸之處。費力之所也。故其圍加倍。否則易毀。按服馬者。一轔居正中。轔之兩旁各駕一馬。負衡引轔。車始能行。詩所謂兩服上襄也。若駕四馬。則兩服馬之外。各有一馬。謂之驂。詩所謂兩驂雁行。兩驂如舞也。左傳哀十七年。良夫乘衷。同中旬。同乘兩牧。注兵車一轔。二馬夾之。其外更有二驂。是謂駟馬。今止兩牧。蓋以四馬爲上乘。兩馬爲中乘。又家語孔子一車兩馬。此皆止有兩服。而無兩驂。頸者轔之。

前端向上作微弧形。有若頸。車行之力全在此。圍若與前等。恐折也。

周車蓋狀況

攷工記。輪人爲蓋。達常圍三寸。注。達常斗柄。下入杠中者。杠也。柱也。圍倍之六寸。以含達常。信其程圍。以爲部斗。廣部廣六寸。徑六寸。備四面。部長二尺。程長倍之。四尺者二。八尺。十分寸之一。謂之枚。所以支弓鑿孔以納弓。上用小力。上欲尊而宇。蓋已太也。尊則難爲門也。蓋已卑是蔽目也。是故蓋崇十尺。良蓋弗冒。弗紜。冒覆布。蓋。所以騰。蓋常小於程。程小於部。非部無以納弓。於其旁。非程無以含達常於其中。蓋古車蓋。豎於車中。其柄分爲三部。在下者爲檻。中爲達常。達常圍三寸。檻圍六寸。而有孔。故可含達常於其中。在上者爲部。部徑六寸。長二尺。其上端鑿孔。以納弓。以爲蓋骨。其下端鑿孔。以納枚。以支蓋弓。而含達常於其中。以爲張弛。部二尺。檻八尺。故知蓋高一丈。蓋原以避日雨。故曰上尊宇卑則吐水疾而雷遠。

蓋已崇則難爲門者。門字注疏皆不詳。吾疑卽車板上納檻之穴也。穴之上必更有關以爲固。太高則障風。關則毀矣。故曰難乎其爲門。

古車蓋可解下至漢猶然

周禮夏官道右王下則以蓋從注蓋以表尊疏車蓋有二一禦雨一表尊此則表尊也按古車蓋櫛之下端插於車中而中含達常故可持下以達常爲柄持覆尊者非貴人不許御故後世以冠蓋爲卿士之代稱班孟堅西都賦所謂冠蓋如雲也又漢書上官皇后傳天大風車不得行解蓋授桀桀奉蓋雖風常屬車雨下蓋輒御上奇其材勇觀是則漢時車蓋仍能解下制與周同也

周車輪狀況 澤行輪如刃

攷工記輪人凡爲輪行澤者欲杼杼以行澤則是刀以割塗也是故塗不附侔以行山則是搏以行石也是故輪雖敝不類於鑿按杼者注云削薄其踐也侔上下等也輪之踐地者薄故泥不附而行速輪上下等則堅故石雖撞而不敝不類於鑿者謂不動於鑿中也

周車輞用火彎之無鋸故也

攷工記輪人凡揉牙車輞外不廉而內不挫輞絕也挫折也旁不腫負起謂之用火之善是故規之以眡其圓按輪之外圍古謂之牙今謂之輞用以安輻今製輞之法用至堅之棗木鋸解爲片裁作彎形銜接爲規古無鋸以火烤棘木使彎晏子春秋今夫車輪山之直木也良匠揉之其圓中規是其證烤失火候則外面易崩絕內易傷折而旁虞腫起復恐其不圓度之以規今仍如此則輪成矣夫鋸者木作之不可離者而古無之至以火彎鉢木成輪此古木器之所以難歟

周輪不敷鐵輪末以木爲齒

攷工記輪人眠其縷欲其蚤同爪之正也。又六尺有六寸之輪。縷三分寸之二。謂之輪之固。注縷者輪算也。疏凡造車輪皆向外算。謂輻末出牙外向外算則車不掉。震動正者謂爪入牙中。鑿孔必正直不隨邪也。三分寸之二者。注謂出於輻股鑿之數也。按出於輻股鑿之數者。謂輻末穿出轄外三分寸之二。使轄不親地。用以護轄故謂之固。且車行穩故曰不掉。若今世則以鐵敷輪固於古遠矣。而山西所產車輪且以鐵爲齒。護於四周殆仍周筭之遺意也。

又按縷在輪外周。注謂輪算曰縷。其形狀至不明了。今釋經義及孔疏知縷者並非別一物敷於輪周。如今世之輪鐵乃輻之末端。卽爪出牙外三分寸之二也。故曰眠其縷欲其蚤同爪之正明蚤與縷非二物。卽輻股末端之牙者爲爪。爪穿出牙外者爲縷。故眠縷則知蚤正然鄭注算之義仍不明了。按說文云算者蔽也。所以蔽餕底蓋隔飯使不親餕今輻末外出六分餘間一鑿凸出一縷而牙上未鑿孔之處則凹六分餘凹相間有若算形算著地使牙不親地故輪安而固方望溪謂今時車牙外今謂以鐵葉裹之縷之制疑類此。於注疏之義全不合蓋誤以縷與輻爪爲二物若爲二物則眠縷與爪正有何關哉。

周牛車兩轅狀況

攷工記車人柏車山車轂長一柯大車任載平地之車崇三柯羊車鄭云羊善也有疑二柯徹廣六尺鬲長六尺注鬲轂

端厭牛領者疏牛車兩轅一牛在轅內故鬲狹按徹廣六尺者言比馬車皆狹六寸也車狹六寸因而牛鬲比馬衡亦皆短六寸明三者皆牛車也柯者斧柄三尺爲柯馬車輪崇六尺六寸牛車大則輪崇九尺羊則輪崇六尺柏車由渠二柯者三計之則輪亦崇六尺也鄭說羊爲善似有安穩之意鄭恐人不明云若今之定張車而未詳說至孔作疏又隔數百年復不能詳定張之義故羊車之詰訖不能無疑也

牛車箱縱長橫狹與馬車相反

攷工記大車崇三柯。綆寸。牝服。車箱。二柯有同又三分柯之二。縱八尺。羊車二柯有三分柯之一。縱箱七尺。柏車二柯。箱縱六尺。方望溪云乘車崇六尺有六寸。綆三分寸之二。大車輪加崇九尺。故綆加廣乘車之軫六尺有六寸。又三分去一以爲隧者御與左右並乘。橫排三人必橫廣乃能容六尺而縱不必長也。四寸。大車徹廣六尺而牝服則八尺者橫狹而縱長然後載物多而車行安也。按牛車之箱與馬車廣狹正相反所以然者馬車載人牛車載物也方云綆加廣廣字誤綆爲爪穿出者耳。綆寸者乃長一寸也。

牛車之轅長於馬車

攷工記車人凡爲轅三其輪崇三分其長二在前一在後以鑿其鉤按三其輪崇者柏車羊車輪崇六尺而轅長則一丈八尺也。大車輪崇九尺而轅則二丈七尺。若馬車輪崇六尺六寸轅止一丈四尺四寸較牛車則短也。一在後以鑿其鉤者疏云言以一分託輿板鉤者轅之鉤心也就轅鑿孔納杙以鉤車箱也。

按疏說非也。牛車既兩轍，每轍設孔納兩杖下垂以夾車軸而激輪行。非上鉤車箱因車箱兩邊盡託於兩轍之上，轍動箱卽行，不須鉤心。此其誤皆由富貴人未親覩其物，故說每不合也。

牛車轍前端亦曲

攷工記輶人凡揉以火燭之使曲或使直輶轍也欲其孫而無弧深。今夫大車之輶摯同直其登又難。既克其登，其覆車也必易。此无故，轍直且無橈也。曲也是故大車平地既節軒摯之任。前後輕重，相稱及其登阤，阪也不伏其轍。抑之使必縕其牛。此无故，轍直且無橈也。按必縕其牛者因不伏轍則車後仰後仰則牛吭受羈絆之縕。不能用力矣。轍曲則无是。又故登阤者倍任者也。猶能以登。言任雖重猶能登。及下阤也，不援其邸。同底必縕其牛後者，因下阤時車下行速，故以手援車底之前端以緩。其行，否則崩奔而下牛後爲左傳注。左傳注在所縕而仆矣。轍曲則免。

按古牛車兩轍，牛居中以鬲被牛領引車使行，與今同。而轍曲則與今異也。又觀文義似當時民多有爲直轍者，故經再三言之。然曲轍難爲且不堅，故今無曲轍者。

周時立乘執綏

論語升車必正立執綏。惟立乘故易墮。史記張儀傳張儀至秦詳同伴失綏墮車不朝。按綏者升車用之。曲禮所謂并轡授綏也。此云正立執綏失綏墮車則乘車時亦手不釋綏也。釋綏則傾跌隨之。是綏有二

用一登車爲引。一乘時恃以爲安也。

惟立乘故須有驂乘

古御者居中。尊者居左右。則驂乘。驂乘者所以護持尊者。防其危險。故亦名車右。曲禮云。至于大門。命車右就車門閭溝渠必步是也。又左傳逢丑父命公齊頃公下取飲。因丑父先與公易乘。公爲車右。故僞命公取飲。因以逃也。又襄二十三年。鞅請驂乘持帶。遂超乘。右撫劍。左援帶。是范鞅意。雖刼魏獻子而持帶。援帶。皆所以護尊者。使不跌。則驂乘之職務也。又公羊傳。陽虎囚季孫。將出而殺之。以其弟陽越爲右。至於孟衢。臨南投策而墜之。陽越下取策。臨南駛。捶馬銜走焉。季孫竟免。以此證車右之職。不惟護持尊者。卽御者。有事亦車右下車爲役。故得遣陽越。監季孫而免季孫也。

周國君登車時狀況

曲禮。君車將駕。則僕執策。立於馬前。已駕。僕展視也。輶車闌。效駕。自已奮衣由右上。取貳綏跪乘。執策分轡馳之。五步而立。先試之。君出就車。則僕并轡授綏。左右攘辟。車驅而騁。至于大門。君撫僕之手。而顧命車右就車。按并轡授綏者。并六轡。及策於右手。以左手轉身向後。授君正綏。使上也。辟者。辟行人。攘者。攘臂。指揮至大門。始命驂乘。登也。

古爲婦人御禮節

曲禮。僕御婦人則進左手。後右手。坊記亦云。御婦人進左手。疏僕在中央。婦人在左。僕御之時。進左手持轡。使形勢相背。若進右手。則近相嚮。不能別嫌。

古乘車尚左

史記。信陵君傳。公子從車騎。虛左自迎侯生。又戰國策及說苑。秦王乃自駕千乘萬騎。虛左方自迎太后。薺陽宮。按古人尚右。獨乘車尚左。所以然者。古乘車橫長而立乘。故尊者須人護持。而御者立於當中。尊者居左。驂乘從右。扶持之其勢順。易置則不順也。若兵車則御者居左。元帥居中。詳見後。

古車蓋朱色可傾仄用之

韓非子。管仲出。朱蓋青衣。置鼓而歸。又晏子春秋。擁大蓋。策駟馬。又說苑。孔子將行無蓋。弟子曰。子貢有蓋。又家語。孔子遇程子於途。傾蓋而語。志林云。傾蓋者。道行相遇。駢車對語。兩蓋相切。小語之義。故傾蓋也。按東坡釋。傾蓋較他書得之矣。而仍不詳。古車蓋可豎可解。此必程子車上無蓋。孔子與駢車對語。解蓋使傾仄。並以蔭程子也。若兩蓋相切。胡云傾哉。

古登車時有乘名

周禮夏官隸僕。王行洗乘石。注王所登上車之石也。又詩小雅云。有扁斯石。履之卑兮。又淮南子。周公踐東宮。履乘石。是不惟君登車履石。臣亦然也。

古在車上行式禮狀況

周禮夏官齊右掌祭祀會同賓客前齊車王乘則持馬行則陪乘凡有牲事則前馬又曲禮國君下宗廟式齊牛按牲事者卽式齊牛也古者祭祀最重牛牲故國君在車上遇齊牛則致敬而式凡式視馬尾當須端拱拱手不持綏斯時最易傾跌故齊右下車前馬使郤行以免驚奔

古乘車遇人多亦式

魏文侯式段干木之廬是敬其人而式其廬也又韓詩外傳荆伐陳陳西門壞因其降民使修之孔子過而不式子貢執轡問曰禮過三人則下二人則式今陳之修門者衆矣夫子不爲式何也是可證遇稠人廣衆亦式也

周婦人車有衣又不立乘故不外露

曲禮婦人不立乘疏婦人質弱不能立乘須坐乘也又詩衛風翟茀以朝又淇水湯湯漸車帷裳又左傳定九年載蕙靈寢於中以逃按翟者羽也注婦人乘車不露見車之前後設障以自蔽謂之茀蕙靈者注云輜車名也說文輜輶衣車也是皆婦人之車也惟不外露故可託婦人寢於中以逃婦人車有衣又不立乘故男有車右婦人無驂乘也左傳閔二年歸夫人魚軒魚軒者以魚皮爲飾亦婦車也

古爲國君及婦人御儀式

曲禮僕御婦人則進左手後右手御國君則進右手後左手按進左手者以左手持轡也婦人在左左手持轡則形相背可別嫌御國君則反是又以面君爲敬也由此證之婦人不必盡乘衣車也

古御者鞭策之端有鍼

淮南子道應訓白公慮亂罷朝而立倒杖策鍼音注鍼也上貫頤血流至地而弗知也又今有良馬不待策鍼而行驚馬雖策鍼之不能進爲此不用策鍼而御則異矣又韓非子延陵卓子乘蒼龍與翟文之乘前則有錯飾後則有利鍼又孔叢子左手執轡右手運策按策者馬捶端有鍼曰鍼倒杖策故鍼貫頤流血至地也蓋古御者以策捶馬並以策端之鍼刺馬使速行虐亦甚矣左手執轡右手運策者左司靜職右司動職古與今同也

古以脂膏車

詩衛風載脂載翬旋車言邁又小雅爾之亟行遑脂爾車箋翬車軸頭金也古者車不用則脫其翬又史記齊世家淳于髡曰豨膏棘軸所以爲滑也然而不能運方穿按翬者以鐵杙插於軸頭使輪不外脫也軸與轂相摩處皆金得脂則滑古無植物油皆用獸油棘木者棗木也性堅今北人猶以爲軸

古棧車飾車寬狹之不同

攷工記棧車欲弇飾車欲侈注棧車無革輶易壞飾車謂革輶車也弇者車箱微向內侈者微向外革輶

者以革覆輿及轂。再加漆畫。堅而美觀。故曰飾車。按巾車職云。大夫以上乘飾車。士乘棧車。棧車者柴車也。晏子常乘以朝。不顯君賜。景公欲浮以酒者是也。棧車不堅。故箱欲狹。飾車堅。故箱宜闊。亦各因其材也。

周時已有僱車

新序甯戚欲干齊桓公。窮困無以自進。於是爲商旅貨車以適齊。暮宿於郭門之外。桓公郊迎客。夜開門。辟貨車者執火甚盛。從者甚重。甯戚飯牛於車下。望桓公而悲。擊牛角而歌。按貨者借傭也。史記范睢傳。爲人傭貨是也。今謂之僱。爲商旅貨車者。言以租貨牛車爲業。爲人載重也。周時無客店。故宿於門外衢旁。公出使辟也。呂氏春秋亦載此事。作將任車。高誘注云。任亦將也。後儒駁之。訓任爲載。皆非是。任者貨之省字。集韻云。貨或作任。是任貨同義也。

周時車箱內鋪席馬身上被衣

韓非子簡主謂左右車席大美。吾將何屬以履之。又左傳或濡馬褐以救之。注馬衣也。按馬出汗弛駕時。懼傷風步馬者。因被以衣。左傳襄二十六年。左師見夫人之步馬者。正茲時所用也。步馬者恐馬過勞。弛御後。遽與芻秣。飽食致病。乃牽行空處。徐徐往還。以調其氣。今謂之溜馬。而杜注解步馬爲習馬。失其義矣。

周時非命民不得乘飾車駢馬

說苑古者必有命民。民有能敬長憐孤。取士好讓居止方者。命於其君。然後得乘飾車駢馬。未得命者不得乘。乘者有罰。故其民雖有餘財侈物。而無仁義。則無所用之。故其民皆興仁義。

古驚車狀況

荀子定公問於顏淵曰。東海子之善馭乎。對曰。善則善矣。雖然其馬將失。定公不悅。入謂左右曰。君子固讒人乎。三日而校來謁曰。東海畢之馬失兩驂同裂列。兩服入廄。注兩服馬在中。兩驂馬在外。擘裂中馬。牽引而入於廄也。

周末貴人車從之多。因是證明數事

說苑子路曰。吾親歿之後。南仕於楚。從車百乘。韓詩外傳田子方之魏。魏太子從車百乘迎於郊。呂民春秋。匡章謂惠子於惠王之前。曰。蝗螟農夫得而殺之。爲其害稼也。今公行多者數百乘。步者數百人。少者數十乘。步者數十人。其害稼亦甚矣。孟子從車數十乘。按古從車若是之多者。一以表威。一因古無售食。物之商店。凡旅行皆自持米糧。釜鬲自造食物。而庖人之屬。亦須追隨。故須多車載之。然亦無須數百乘。每轄雷殷。行列數里。其狀甚怪。而訖不解其義。之所在。然因是又證出當時社會二事。一燃料易隨處皆有。人雖多。造食不艱。一芻秣賤馬。雖衆易養也。

戰國時賞賚恆以車

莊子。宋人有曹商者爲宋王使秦。其往也得車數乘。王說之。益車百乘。反於宋見莊子曰。夫處窮閭阤巷。困窘織席槁項黃馘者。商之所短也。一悟百乘之主而從車百乘者。商之所長也。莊子曰。秦王有病。召醫破癰潰瘻者得車一乘。舐痔者得車五乘。所治愈下得車愈多。子豈治其痔耶。又有見宋王者。錫車十乘。以其十乘驕稱莊子。此以今社會觀之。以一寒士乍得車數十乘。其夫馬何以養之。又何所用之。售於人乎。則君賜也。置於家乎。則虛耗也。而得之者反喜。而驕人。則不得當時社會之真情況矣。

古兵車狀況

古兵車皆以革輶之。使堅。所謂革車三千乘也。而無蓋。尊者則籩人執笠。依轂而立。以禦寒暑。左傳宣三年。又射汰輶以貫笠轂是也。而有局。局者兵闌。排置兵器。左傳宣十三年。晉人或以廣隊不能進。楚人惎之脫局。是也。局脫則車輕。有旆。旆者帥旗。豎於車上。進居前。退殿後。左傳少進馬旋。楚人又惎之拔旆投衡是也。拔旆臥衡上。則不帆風。車行速。而馬亦被甲。左傳成元年。齊侯曰。余姑翦滅此。而後朝食。不介馬而馳之。注介甲也。其車制廣狹。皆與尋常乘車同。

古兵車尊者居中

左傳成二年。韓厥代御居中。杜注云。自非元帥。御者皆在中。將在左可證。兵車元帥及君皆在中也。又詩

左旋右抽。鄭箋左左人謂御者。右車右也。中軍謂將也。兵車之法。將居鼓下。故御者在左。

古兵車有樓車

左傳宣十五年。登諸樓車。使呼宋人而告之。樓車高。登之可與城上人語。否則不聞也。又成十六年。楚子登巢車而望晉軍。巢車蓋亦上有樓。若鳥巢然。登之則敵人動靜虛實皆在望中。其高蓋有數丈。不然晉人夷竈塞井設幕。不得清晰如是。惟其高如是。其廣若干。輓以馬乎。推以人乎。如何而後免傾危之患。其詳制則不可攷矣。

兵車上建旗狀況

周禮春官司常交龍爲旂。釋名旂倚也。畫作兩龍相依倚也。又爾雅有鈴曰旂。注懸鈴於竿頭。又說文旂有衆鈴以合衆也。是旂者。畫兩龍於上。復於竿頭懸鈴以爲號令也。又春官司常熊虎爲旟。注畫熊虎者。言其猛。莫敢犯。又釋名熊虎爲旟。軍將所建。象其猛如虎。與衆期其下。是旟者。期也。畫虎以象威。與衆期其下。以聽誓約也。而旗之末曰旛。博雅天子十二旂至地。曲柄者曰旂。而軍帥所建者曰旟。進則居前。左傳桓二十八年。子元御彊鬪梧耿之不比爲旟。注子元自與三子持建旟以居前。疏行軍之次。旟最居前是也。退則殿。後左傳宣十二年。令尹南轍返旆。旆者旛之末。郭璞云。旛帛全幅長八尺。旟帛續旛末爲燕尾。釋名云。魚蛇爲旛。建之於後。所以察事宜之兆者是也。

旗之長度有等差

新序司馬子期獵於雲夢載旗之長拖地。天子方至地芋尹文拔劍齊諸軫而斷之。子期曰吾有罪於夫子乎對曰臣以君旗拽地故也。國君之旗齊於軫大夫之旗齊於軾。

古國君旅行以車爲宮轅爲門

周禮天官掌舍掌王會同之舍設檼柂再重設車宮轅門注凡會同必於野故以車爲宮以轅爲門而於其中設帷幕按以車爲宮者將車環列四周以爲垣以轅爲門者將兩轅豎起於左右上建旗幟中出入以爲門也而今之衙署兩邊出入之門仍名轅門豈不誤哉。

卷九

行唐尙秉和著

車馬部二

西漢時車馬狀況

西漢時車馬大致與周同而漸異。周時惟王后得坐乘，雖天子皆立乘。漢則大車立乘，安車坐乘。周時車無有帷者，漢則男子乘輜車有襜帷。周時馬車一轍，至少駕二馬；漢則可駕一馬。是漢時乘車亦雙轍，與周牛車同也。此其大略也。若東漢末則更異矣。以次述之。

西漢仍立乘

周亞夫傳：天子爲動，改容式車。師古曰：古者立乘。凡言式車者，謂俛身撫式，以禮敬人也。又漢書成帝紀：升車正立，不內顧。又韓安國傳：安國行丞相事，引墮車塞如淳曰：爲天子導引而墮車跛也。按：惟立乘則式車，惟立乘則危而易墮。後漢輿服志：所謂立車，徐廣所謂高車者是也。若周時皆立乘，則無立車之名。立車者所以別於安車也。

西漢初已乘輜輶車

張良傳上雖病彊載輜車臥而護之師古曰輜車衣車也。又後漢輿服志舊典傳車驂駕乘赤帷裳惟郭賀爲冀州勑去襜帷。又昌邑王傳使大奴以衣車載女子。又後漢劉盆子傳乘屏泥絳襜絡注車上施帷以爲屏蔽交絡以爲飾是自西漢初男子已乘帷車後遂衍成風俗矣。

漢時乘車兩轅漸改周制

漢書鮑宣傳宣行部乘傳去法駕。駕一馬爲衆所非。坐免。按周時乘車一轅居中。至少兩馬在轅左右。駕之若一馬則衡偏而難用力。茲云駕一馬必雙轅車而馬居中也。與周載重之牛車正同。又後漢江革傳革以母老不欲搖動。自在轅中輓車不用牛馬。夫旣曰轅中則兩轅之間矣可證一轅立乘車在漢時惟法駕及禮車或有之。尋常乘車皆雙轅矣。

漢時坐乘之安車開周所未有

漢書申公傳於是上使使束帛加璧安車以蒲裹輪駕駟迎申公。又枚乘傳始以蒲輪迎枚生。又杜延年傳賈安車駟馬罷就第。按後漢輿服志安車立車徐廣曰立乘曰高車坐乘曰安車。又按晉書輿服志云按周禮惟王后有安車。王亦無之。自漢乃有之。有青黃赤白黑五種。是安車創自漢。漢以前無有也。人情好逸而惡勞。自是以後歷魏晉至齊梁立車遂絕迹。無不安車矣。

漢安車上有幕有憑

漢書甯成傳俱在二千石列同車未嘗敢均茵憑又世說汲黯與周陽由共車未嘗敢均茵憑又丙吉傳西曹第忍之此不過漢丞相車茵耳又五行傳或乘小車御者在茵上師古曰車小不得迴避而在天子茵上也蘇林曰在茵上坐也此皆坐乘之安車也若立乘之車則茵憑無所謂均惟安車亦廣故能容二人並坐其謙抑自下者歛身幅處占地遂狹故曰不敢均然安車仍有憑者以古人車上亦跪坐非若今世之箕踞得憑以爲扶則安穩不倚仄見人亦可式惟無重較耳

漢時貴人皆朱輪

漢書楊惲傳惲家盛時乘朱輪者十餘人又翟方進傳遣使者以朱輪授孫賢又李尋傳將軍門九侯十二朱輪按後漢輿服志云公列侯安車朱斑輪是朱之中尚有斑文以爲美此制相沿最久自西漢訖清末二千餘年皆如是惟後世輪朱而不斑耳

漢時較軾益華美

後漢輿服志安車倚鹿較伏熊軾皂蓋注倚鹿較者畫立鹿於車之前兩藩外也伏熊軾者車前橫軾爲伏熊之形也按畫立鹿於兩藩外者因安車無須較故祇畫其形以爲美觀而軾則仍舊軾卽憑也前謂安車無重較者以此證明也

漢時駟馬須一色

漢書食貨志。自天子不能具醇駟。師古曰。謂駟馬雜色也。按此言與匈奴大戰後。馬多物故。雖天子駟馬亦雜色。不能醇一。是可證。未戰前。凡乘駟馬者。皆四馬一色也。

西漢時仍有驂乘

史記袁盎傳。上朝東宮。趙談驂乘。又衛綰傳。詔中郎將驂乘還而問曰。君知所以得驂乘乎。又漢書霍光傳。宣帝始立。謁見高廟。大將軍光從驂乘。上內嚴憚之。若芒刺在背。後車騎將軍驂乘。天子從容肆體。凡此皆禮車立乘。故仍有驂乘以爲護持也。

漢時對尊者登車爲不敬

漢書佞倖傳。莽求見太后。具言淳于長驕佚。欲代曲陽侯。對莽母上車。師古曰。上車當於異處。便於前上。言不敬。按今日登車時。如長者在前。須迴避。長者登之。猶漢之遺俗也。

西漢士夫因貧始乘牛車

漢書食貨志。自天子不能具醇駟。而將相或乘牛車。朱家傳。乘不過駒牛。晉灼曰。駒牛小牛也。蔡義傳。以明經給事大將軍幕府。家貧常步行。門下好事者相合。爲買犢車乘之。朱義傳。常居鄴田。乘牛車。又史記五宗世家。其後諸侯貧者。或乘牛車也。是皆因貧而乘。蓋自武帝征匈奴後。馬少。貧者不能置。故乘牛車。而諸侯王尤國之貴族。亦乘牛車。於是社會慕之。乘者漸多。演爲風俗。至魏晉時。雖極富貴人家。亦無不。

犢車矣。

西漢時官吏法駕皆馬

漢書朱買臣傳。買臣旣爲會稽太守。有頃長安廐吏乘駟馬來迎。張宴曰。故事大夫乘官車駕駟。按駕駟者。駕四馬。相並。仍兩服。兩驂也。立車也。東海子公令高大門闔。能容高車駟馬。誠以門不廣。四馬不能並入。不高亦不能容立車也。

漢官吏不法駕則免官

漢書鮑宣傳。宣行部乘傳去。法駕一馬。舍宿鄉亭。坐免歸。又韋玄成傳。祀孝惠廟。天雨淖。不駕駟馬而騎。至廟下。有司劾奏。削爵爲關內侯。又後漢謝夷吾傳。遷鉅鹿太守。後以行春乘柴車。從兩吏刺史。上其儀序失中。有損國典。左轉下邳令按。古時官威甚肅。蓋以爲人旣爲官。旣有官之威儀。若放棄定制。以平民自列。卽爲蔑視法令。故須免官。至於騎行。自周以來。無之。至漢時。非行陣而騎者。乃驂從耳。若以大官而騎。則有失官儀。况祭廟重禮。尤不可乎。

漢初隨從車乘仍多

漢書蒯通傳。武臣以車百乘。騎二百。迎徐公。是仍有戰國豪侈之餘習。以騎兵二百迎人。以爲行列威武。雖至今有之。而車百乘。則不得其義矣。

漢賈人不得乘馬車騎馬

漢書高帝紀。賈人不得乘騎馬。言不得乘馬車並騎馬也。又輿服志。賈人不得乘馬車除吏。古以商賈不耕不織。惟利是圖。故抑之使不得列於良民。然百貨之流通。商賈是賴。便民利用莫大於是。故先王特創市廩。以居商賈。秦漢以來。蓋逐末者漸多。恐其傷農。故爲是虐政。若成周則無是也。

漢車蓋顏色物質

景帝紀中六年詔三百石以上皂布蓋。千石以上皂繪覆蓋。二百石以上白布蓋。按繪者帛也。官尊以帛。卑以布。色則皂爲貴。白爲卑。

後漢時車上羽蓋

後漢虞延傳。光武到魯還。經封丘城門。門下小不容羽蓋。帝怒。使撻侍御史。按羽蓋者。蓋上飾以羽爲美觀。門下不能入。按前漢黃霸傳。賜車蓋特高一丈。天子之蓋。蓋亦高一丈。車高四尺。共高一丈四尺。故縣城門不能入。然解下。則無以表尊。故帝怒。

後漢時男子皆乘帷車而賤輶車

後漢書楚王英傳。遣大鴻臚護送。得乘輶輶。蒼頡篇曰。衣車也。又袁紹傳。士無貴賤。與之抗禮。輶輶柴轂。填接街巷。又趙岐傳。岐逃難賣餅。北海市中。時安丘孫嵩遊市。察岐非常人。呼與共載。岐懼失色。嵩乃下

帷。按帷車在前漢時有故或乘之而不數見。至後漢無論貴賤除法駕外盡用帷車。故晉書輿服志云。漢世貴輜輶而賤轎車。晉貴轎車而賤輜輶。轎者說文小車也。釋名轎者遙也可。四向遙望也。前漢平帝紀徵天下能知逸書古記者。在所爲封一轎傳。遣詣京師。注以一馬轎車而乘傳也。蓋轎車甚小而輕。故可一馬駕之。又轎車牝服淺而無帷。其形略如今火車上之有頂敞車。故乘之可遠望。尤足證漢世車皆雙轅已。

漢輜輶車以平頂圓頂分貴賤

東觀漢紀。梁冀僭侈作平上轎車。按平上者平頂也。平上而僭可知。皇帝車平上臣下皆圓頂也。

漢末犢車風行自是貴人無乘露車者

魏略。孫賓碩乘犢車過市。世說。漢末盧充三月三日臨水戲。忽見一犢車。是城市出入皆犢車也。又後漢書單超傳。其僕從皆乘牛車而從列騎。是更以牛車爲貴。謂超家雖僕從亦乘也。較西漢之因貧而乘者。風尚異矣。蓋自漢魏以來。貴人車皆有屋。金樓子云。劉義宣就民間僦露車自載。露車無屋。義宣戰敗亡命。始乘之。是其證。

漢末車有後戶。旁戶爲西漢所未有

三國志注引魏略。孫賓碩乘犢車從騎過市。見趙岐販胡餅。疑其非常人。乃開車後戶。顧所將兩騎令下

馬扶上之時岐以爲是唐氏耳目也。甚怖失色。賓碩閉車後戶。下前襜。車帷謂之曰。終不相負。又世說。漢盧充三月三日臨水戲。忽見一犢車。乍沈乍浮。旣上岸。充往開車後戶。又說文戾音泰。輜車旁推戶也。按車之有戶。不惟西漢無之。卽東漢初亦不見也。漢末始盛行。至晉遂以有戶無戶爲定制矣。

魏晉已無驂乘之名。車特大可容四五人。

世說。晉文帝與二陳同車。過喚鍾會同載。又桓宣武與簡文太宰同載。是一車可乘三人。並御者共四人。而無驂乘之名。蓋皆乘安車。無須驂乘。以爲護持。而晉文帝旣與二陳同載。又喚鍾會。並御者爲五人。是其車特大。不惟與周異。與後代亦異也。

晉時同車並坐之證

世說。晉武帝時荀勗爲中書監。和嶠爲令。故事監令共車。嶠性雅正。常疾勗讒諛。後公車來。嶠便登。正向。前坐。不復容勗。勗更覓車。然後得去。按此時同車坐。乃並坐。非若今世之有前後也。故漢書甯成傳曰。不敢均茵憑嶠坐。正中太不均矣。故不能容。勗足徵車隧。猶廣非止容一人。

漢魏六朝上下車仍在車後

周時上下車皆由後。至六朝不改。世說范宣未嘗入公門。韓康伯與同載。遂誘俱入郡。范便於車後趨下。按此時之車有后門。故從後下。又梁元帝金樓子云。齊武帝微時。與劉惔不相識。嘗附人車載。至惔門。同

乘者與撫善造撫言畢辭退。撫怪之曰：與蕭侍郎同車，撫即至車後請焉，是亦有後門之證也。

晉世因尙牛車故貴人賽牛

世說石季倫牛形狀氣力不勝王愷牛而與愷出遊極晚爭入城崇牛數十步後迅若飛禽。愷牛絕走不能及。又王武子有牛名八百駿。又彭城王有快牛至愛惜之。又王丞相曹夫人妬禁丞相有侍御久之丞相不能堪乃密營別館衆妾羅列兒女成行會夫人登平臺見數兒甚白皙謂左右曰是誰家兒玉雪可念左右以實告乃將黃門及諸婢持食刀自出尋討丞相亦命駕飛轡出門猶患牛遲乃以左手攀車闌右手捉麈尾以柄助御者打牛狼狽奔馳劣得先至按晉書輿服志云古貴者不乘牛車漢末諸侯寡弱貧者至乘牛車自靈獻以來天子至士遂以爲常乘夫既以牛爲常乘則乘馬者必絕迹矣於是富貴家之賽牛亦猶周時之賽馬馬有千里牛亦有八百里豈非異聞哉。

牛車之貴至隋男子仍乘之

宋書陳顯達傳當時快牛稱陳世子青牛王三郎烏牛呂文顯折角牛可見宋齊之時士夫之貴牛車仍與昔同至隋騎風雖盛然猶有牛車牛宏弟射殺其車牛是其證是自西漢迄隋士夫皆乘牛車至唐宋始易以婦女也。

晉非法駕禮車不立乘

晉書輿服志。自二千石以上。郊廟明堂法出。皆大車立乘。駕駒。他出乘安車。致仕告老賜安車。元帝時太子釋奠制曰。今草創未有高車。可乘安車。按元帝初渡江。禮制未備。故無高車。高車卽大車也。是行大禮時。且或不立乘。他可知矣。而臣民益可知矣。

晉時車有耳

晉書輿服志。諸公給安車黑耳。駕三。其非持節督都者。給安車黑耳。駕二。又尚書令。輶車黑耳。有後戶。僕射。但有後戶。無耳。尚書及四品將軍。則無後戶。并皂輪。按此。則晉世官吏所乘者。盡。輶。車。也。輶。車。小。輕。便。不。施。帷。可。遠。望。而。不。見。有。乘。輶。輶。者。志。所。謂。晉。世。重。輶。車。而。輕。輶。輶。者。信。然。矣。然。旣。有。戶。則。四。周。有。牆。也。特。淺。耳。故。可。遙。望。惟。所。謂。耳。者。爲。漢。世。所。無。志。亦。不。詳。其。制。無。從。臆。說。也。

晉士大夫偶游戲騎馬

世說。庾小征西。當出未還。婦母阮。與女共上城樓。俄而翼歸。阮云。聞庾郎能騎。我何由得見。婦告翼。便於道盤馬。始兩轉墜地。是可證士夫騎者絕少。故欲觀也。又王湛停墓所。兄子濟來拜墓。與語極惋愕。自視缺然。濟去。叔送至門。濟從騎有一馬。絕難乘。濟問叔好騎否。叔便馳騁。濟益歎其難測。又杜預之荊州。朝士悉祖楊濟。不坐而去。須臾和長輿來。曰。必大夏門下盤馬往。果然。長輿抱內車。共載歸。是可證習騎爲偶然遊戲也。

南北朝時南朝多乘車不能騎北朝多騎馬少乘車

顏氏家訓。梁世士大夫尙褒衣博帶。大冠高履。出則車輿。入則扶侍。郊郭之內。無乘馬者。周宏正爲宣城王所愛。給一里下馬。常服御之。舉朝以爲曠達。至乃尙書郎乘馬。則糾劾之。及侯景之亂。膚脆骨弱。不堪行步。不耐寒暑。坐死倉卒者。往往而然。按北朝托跋氏本胡人。胡人自匈奴以來。皆善騎馬。托跋氏起撫有中原。於是卿士大夫皆能騎馬。北齊北周。又皆胡種。至於隋。因中原之勢。混一南北。於是士大夫乘車之習。尙漸微。騎風大盛。至於唐。中外官吏。遂無不騎馬。惟婦女始乘牛車。此一變也。

唐京官上朝騎馬

朝野愈載。周張衡位四品。退朝見路旁蒸餅新熟。遂市一校。馬上食之。被御史彈劾。降勅流外。又摭言薛逢晚年厄於宦途。常策羸赴朝。值新進士綴行而出。團司所由輩斥令迴避。逢遣一介曰。報道莫乞相阿婆三五年少時。也曾東塗西抹來。夫官至四品。在唐時亦尊甚矣。而騎馬赴朝。可見當時朝臣殆無不騎馬也。又王昌齡詩。虢國夫人承主恩。平明騎馬入金門。是婦人入朝亦騎馬也。可見當時之風尙矣。

唐外官亦騎馬

開元天寶遺事。姚崇牧荊州三年。代日民遮道不使去。所乘馬鞭鎧皆留之。以表瞻戀。夫旣曰鞭鎧。則非乘車所用。而騎馬所用也。又韓愈曹成王碑。王卽假爲使者。從一騎。踔五百里。抵良壁。鞭其門。大呼曰。我

曹王來受良降。良今安在。是在外大官亦皆騎馬也。

唐京官貧者無馬至騎驢上朝

杜甫幅仄行。自從官馬送還官。行路難。行澀如棘。我貧無乘非無足。昔者相過今不得。實不是愛微軀。又非關足無力。徒步翻愁長。官怒此心炯炯君應識。曉來急雨春風顛。睡美不聞鐘鼓傳。東家蹇驢許借我。泥滑不敢騎。朝天是因泥滑。不敢騎。驢入朝。若非雨後。則騎驢矣。又繹詩意。承平時。凡京官所騎之馬。皆官馬也。亂後馬少收。還官故難得騎。是詩本敍與畢君闊絕之故。然所以闊絕者。非關足無力。實恐徒步訪友。爲長官所見。謂失官體而觸怒也。是又可證唐時京官雖閒暇。與朋友過從。亦不可徒步自輕。否則被劾。也是皆史所不載。而其風尚習慣。盡於詩中見之。故後人謂杜詩爲詩史也。又隋唐嘉話。則天稱周。心不安。多置裏行拾遺補闕御史。至有車載斗量之詠。有御史臺令史將入門。值裏行御史數十。聚立門內。令史下驢衝過。諸御史大怒。將杖之。令史云。今日之過在驢。請先數之。然後受罰。御史許之。謂驢曰。汝技藝可知。精神極鈍。何物驢畜。敢於御史裏行。乃羞而止。以是證京官貧者寧騎驢不徒步也。唐盛時已如此也。

唐京官暇日出門必騎

北里志。楚兒傳。字潤娘。往往有詩句可傳。近以退暮爲萬年捕賊官郭鍛所納。嘗一日自曲江歸。與鍛行。

相去數十步。鄭光業時爲補袞。道與之遇。楚兒遂出簾招之。光業亦使人傳語。鍛知之。曳至中衢。擊以馬笞。聲甚冤楚。觀者如堵。光業心甚悔。且慮其不任矣。明日特過其居。偵之。則楚兒已在臨街牕下。弄琵琶矣。駐馬使人傳語。潤娘持彩箋送光業詩。光業取筆於馬上答之。是鍛與光業皆騎馬遊行。而鍛之眷屬則乘車也。又神女傳梁警善吟詠。每公卿宴集。則遣騎邀之。是送迎朋友。亦以騎也。又撫言彭伉與湛賁俱宜春人。伉先舉進士及第。湛往賀。不使與官人名士同席。二人有連。其妻甚憤之。未數載。湛一舉登第。時伉方跨驢。縱遊郊郭。忽有家僮馳報。伉聞失聲而墜。是出遊郊外。亦必騎也。

唐人遠行亦騎馬

宣室志。元和中。青齊計真。西遊長安。至陝。陝從事留飲酒。至暮。方別。僮僕前去。行未十里。兀然墜馬。及寐已曛。黑馬亦失去。又撫言。熊執誼赴舉次潼關。秋霖月餘。滯於逆旅。俄聞鄰舍吁嗟聲。則前堯山令樊澤應制科。至此。馬斃囊空。莫能自進。執誼遽輟所騎馬。倒囊濟之。澤遂登科。又雲溪友誼。廖有方。元和末。下第遊蜀。至寶雞。適公館。忽聞呻吟之聲。潛聽之。見閨室之內。一貧病兒郎。問其疾苦。行止彊而對曰。辛勤數舉。未遇知音。盼睞叩頭。惟以殘骸相託。擬求疹救。是人已逝。有方遂賤鬻所乘鞍馬於村豪。備棺瘞之。恨未知其姓字。題爲金門同人。又撫言。咸通末。執政病舉人僕馬之盛。奏請進士咸乘驢。按進士應舉。皆數千里赴京師。而皆騎馬。且必有僕人隨之。僕亦乘馬。而少乘車者。蓋唐人尚武。其精神如此。而鬻騎救。

友其顧全同類俠義又如此。

唐女子亦乘馬

徐凝物怪錄從二女奴皆乘白馬又自行簡李娃傳忽有人控大宛來迎娃又沈旣濟任氏傳刁緬使蒼頭控青驥以迓任氏又王昌齡詩虢國夫人承主恩平明騎馬入金門是女子出門常騎行也又虬髯客傳紅拂女旣夜奔衛公乃雄服乘馬將歸太原又任氏傳任氏不得已遂行豈以馬借之任氏乘馬居其前鄭子乘而居後是長途遠行女子亦騎馬也

唐時惟婦女專乘牛車車上有簾

明皇雜錄玄宗將幸清華宮貴妃姊妹競飾犢車飾以金翠間以珠玉費數百萬貫旣而甚重牛不能引又幽怪錄隴西李璣暇遊長安東市見一犢車侍婢數人潛目車中有白衣姝絕代色也遂尾犢車而行又徐凝物怪錄乃遇一車子駕白牛從二女奴又章臺柳傳翊至京師已失柳氏所在歎想不已偶於龍首崗見蒼頭以駁牛駕輜輶從兩女奴掀簾招之則柳氏也是京師風尚凡婦女皆乘犢車亦猶魏晉時男子之乘牛車且車上必有簾蓋其制已與今略同矣又劉無雙傳郎君可假作理橋官車子過橋時近車子立無雙若認得必開簾子仙客如其言至第三車果開簾子窺見真無雙也是宮車亦有簾也

唐時婦女下車以幃擁入不使人見

唐物怪錄。犢車入中門。白衣姝一人下車。侍者以帷擁之而入。按周時乘車皆露乘。惟婦人乘帷車。然出入尚無以幃壅蔽之舉。至晉時有步幃。石崇作錦步幃。長四十里。見世說茲所謂幃蓋亦步幃之類也。

唐車有門有鎖

霍小玉傳。李生勒馬欲迴。豪士遽命奴僕數人抱持而進。急走推入車門。便令鎖却。按此男子車也。既有門可鎖。必成屋形。否則雖鎖仍可逃也。惟門在前在後抑在旁。是否與漢晉同制。無從詳攷耳。

宋時婦女仍乘犢車

老學菴筆記。京師承平時。宗室戚里歲時入禁中。婦女上犢車。皆令二小鬟持香球在旁。而袖中又自持兩小香球。車過塵土皆香。又成都諸名族婦女出入皆乘犢車。是京師及外郡婦女乘犢車。仍與唐時同也。

宋時士夫仍騎馬與唐同

詞苑叢談。東坡春夜行。蘄水中過酒家飲醉。乘月至一溪橋上。卸鞍曲肱少休。及覺已曉。又東坡與子由別。鄭州西門外。馬上賦詩寄子由云。登高迴首坡隴隔。惟見烏帽出復沒。苦寒念爾衣衾薄。獨騎瘦馬踏殘月。又宿南山詩。橫槎晚渡碧澗口。騎馬夜入山谷。是旅行皆騎馬也。又扈駕詩。病馬羸驂只自塵。是京師卿士出入亦騎馬也。視漢韋玄成因雨淖捨法駕而騎。卽被劾失侯。梁士夫偶騎馬。卽目爲放達。或

被劾者異矣。

宋婦女仍騎馬

嬪真子云文樞密知成都回姬侍皆騎馬錦繡蘭麝溢人眼鼻是可證宋時婦人仍騎馬也。

宋時轎子

老學庵筆記徽宗南幸御棕頂轎子蓋轎之上覆以棕可禦雨也又童貫旣誅傳死士有欲奪其首者張御史乃置首函於竹轎中自坐之按童貫誅於路中執法者張御史也竹轎者以竹爲之懼失貫首故坐於轎底凡轎皆用人舁或二人或四人或八人故亦曰肩輿蘇軾賀朱壽昌得母詩所謂白簾肩輿簾蹙繡是也。

轎之歷史

古有步輦不用馬用人後漢猶然後漢井丹傳就起左右進輦丹笑曰吾聞桀駕人車豈此邪夫曰駕則止推輓而已非舁使離地也至晉有肩輿世說謝中郎是王藍田女婿嘗著白綸巾肩輿徑至揚州聽事始用人舁然不數見至唐有兜輿始以人舁北里志有府吏李金者能制諸妓徑入曲追天水入兜輿中至則蓬頭垢面涕泗交下褰簾一視亟使舁回又劉無雙傳是夕更深聞叩門甚急及開門乃古生也領一兜子入謂仙客曰此無雙也今死矣後日當活又茅山使者暨舁兜人在野外處置訖門外有櫈子一

十人馬五匹。檐子者卽肩輿。新五代史盧程傳程拜命之日。肩輿導從喧呼道中。莊宗聞傳呼聲。左右曰。宰相檐子入門。莊宗登樓望之笑曰。此所謂似是而非者也。蓋譏檐子之不稱也。是可證肩輿而四周張檐卽名檐子。若兜子則無檐。惟在唐時無論兜子檐子皆婦人乘之。若男子不惟不乘轎。且少乘車。古抑衙所備之檐子爲異。無雙馬則備王仙客騎也。至後唐。男子始多乘轎者。新五代史宦者傳張承業曰。誤老奴矣。乃肩輿歸太原。不食而卒。及宰相檐子皆其證也。沿至宋則名轎子。明清以來。自縣令以上皆乘轎子。而以帷色分等差。祇武官有乘馬者。民氣之委靡去隋唐遠矣。

騎之歷史

管子書云。殷人之王立帛牢服牛馬。天下化之。蓋自黃帝以來。卽訓練牛馬使駕車。至夏殷始成功。風行天下也。然仍不能騎。是以春秋時有車戰。步卒而無騎兵。至趙武靈王改胡服。始招國人習騎射。是爲中國。有騎兵之始。是以秦始皇駕千乘萬騎。自迎太后於雍。武臣以騎二百迎徐公貴人。驂從始有騎卒。然卿士大夫除在行陣間。仍無乘馬者。趙廉頗一飯斗米。肉十斤。被甲上馬。以示可用。武人耳。文臣則否。漢高帝之自鴻門逃歸。捨車獨騎。樊噲等四人則持劍盾步走。而其敗彭城逃也。仍車而不騎。至推墮孝惠魯元公主。以減輕載任。是雖亡命。仍不肯騎。以故兩漢四百年。以迄魏晉六朝。卿士大夫皆乘車無騎者。是不惟畏勞。誠以威儀所關。不宜輕佻。若是。漢韋玄成祭太廟。以泥淖不能駕駒騎而往。坐失候。是其證。

至隋滅陳承北朝騎射之餘風於是卿士大夫又以騎馬爲能而以乘車爲恥自唐迄宋皆然此其大略也或謂左傳昭二十五年左師展將以公乘馬而歸是爲騎馬之始是說也本之劉炫炫謂此乘馬乃單騎而歸爲騎馬之漸而注疏皆不主之杜注云欲與公俱輕歸言輕車而歸孔疏古以馬駕車不單騎至六國蘇秦始有車千乘騎萬匹之語曲禮云前有車騎者禮記乃漢世書耳經無騎字也是亦不以劉炫之說爲然也又按論語乘肥馬衣輕裘皆謂其駕肥馬此乘馬與論語何以異炫疑爲單騎者殆以公潛走豈知古人最重威儀公國君何至騎且傳何以不言騎也

驢之歷史

春秋戰國無驢至漢初陸賈作新語始云夫驢驃駝犀象璫瑁琥珀珊瑚翠玉珠玉山生水藏擇地而居夫以驢與珠玉珊瑚並列則驢之在漢初其貴可知其少可知又漢書西域傳烏桓國有驢無牛又敦煌酒泉及南道八國往來人馬驢橐駔食皆苦之是西漢末中原雖無驢西方極邊之郡已漸有矣是以蜀王褒僮約有餒食馬牛驢之語也至東漢末中原已多世說王仲宣好驢鳴旣葬文帝臨其喪顧同遊曰王好驢鳴可各作一聲以送之客皆作驢鳴是可證驢在中原已習見三國志諸葛瑾面長孫權在驢面上書曰諸葛子瑜恪卽援筆續書之驢二字是江東亦有矣又世說晉明帝未嘗見驢謝公云陛下姑言其狀明帝以袖掩口曰吾以爲似豬是東晉江東仍未多也至隋唐則策蹇者之多不可勝數然東南

邊郡仍少。柳子厚云：黔無驥，有好事者船載以入，放之山下，虎見之，厖然大物也，以爲神。他日驥一鳴，虎大駭遠遁。是唐時黔尚少，至於今不惟騎之駕車曳磨，獸物遍中國矣。

贏之歷史

古中國亦無贏。呂氏春秋趙簡子有白驥，亟愛之。其臣陽城渠胥有疾，醫者曰：得白驥肝則生，不得則死。簡子曰：殺畜活人，不亦仁乎？遂殺而取其肝。正韻云：驥同贏。史載此者，見驥之可貴，簡主不愛惜以活人也。又楚辭九歎同駕贏與桀駟兮。是春秋及戰國時已有贏。然至漢初，仍甚貴。故陸賈新語以驢驥與珠玉並稱。又漢書衛青傳，薄暮單于遂乘六贏冒漢圍西北馳去。又常惠傳，烏孫貢驢贏橐駘至三國，已漸多。吳志諸葛恪傳注，驢驥無知，伏食如故。又晉諸公讚，劉禪乘驥車降鄧艾，蓋贏之爲物。驢父馬母或馬父驢母。漢初中國驢未多，故難孳訛。至六朝已嫋驢馬相配之法。齊民要術，驢覆馬生驥，馬覆驢亦生驥。是其證。至唐末，驥遂多。聞奇錄，聞羣驥撼鈴聲，李泌外傳所乘驥忽驚逸。傳信錄，益州進白驥，然唐時仍甚貴。摭言云：咸通中進士及第過堂後，便以驥從車服侈靡。時蔣泳擢第，家君戒之曰：爾門緒寒微，慎勿以驥從。是其證。至於清代滿蒙與中國混一，於是驥之多過於馬矣。

車輪敷鐵之歷史

歷周秦迄兩漢，車輪皆以爪外穿爲算，以障蔽輪牙。輞也。而不敷鐵，皆見前矣。晉書輿服志，輪皆朱斑重

牙夫旣曰重牙。則晉輪之無鐵可知。又拾遺記。因墀國在西域之北。送使者以鐵爲車輪。十年方至。及還輪皆絕銳。是益可證晉世車輪尙未敷鐵。

卷十

行唐尙秉和著

居室

取緩附籠附

夏宮室修廣丈尺

攷工記夏后氏世室堂修二七。

注十四步
步六尺

廣四修一。

注四分
修加一

五室三四步四三尺。

注云堂上爲五室
則南北三室十

步。四丈四角室各三步。

八丈則南北三室十

象五行也。三四步室深。

言有三步者
四步者

四三尺以益廣也。

方三步者
方四步

廣益三尺。木室於東北火室於東南金室

於西南水室於西北其方皆三步其廣益三尺土室於中央方四步其廣益四尺此五室居堂南北六丈

方四步
廣益四尺

東西七丈疏云中央之室大一尺者以其在中央號爲大室故多一尺此五室居堂南北六丈東西七丈

者以大室居中四角之室皆於大室外接四角爲之大室四步。

二丈

四步故六丈東西三室六丈外加兩三尺又四尺故七丈也按敵者爲堂隔者爲室堂修十四步共八丈四

尺南北除三室六丈尙餘二丈四尺以爲前後簷階堂廣十七步半爲十丈五尺東西除三室七丈外餘三丈五尺以爲堂之東西屋翼蓋堂之廣過於修故室所餘廣亦過於修也世室者宗廟也。

夏堂階室窗及塗牆之色

攷工記。九階四旁兩夾窗白盛。注九階者堂之南面三。三面各二窗助戶爲明。每室四戶。戶兩旁各有窗白盛者。注云。蜃炭盛之言成也。以蜃炭塈牆。所以使成宮室。古無石灰燒蜃殼爲灰色白。以塗牆取潔。凡三代王宮宗廟之牆皆塈。音惡。以白民不得用。周禮地官掌蜃共白盛之蜃。韓非子宮有塈器有滌則潔矣。是自周初至戰國皆以蜃塈牆也。

夏門堂廣修之度

攷工記。夏門堂三之二。室三之一。注三之二者言得正堂修廣三之二也。卽正堂修八丈四尺。門堂五丈六尺。正堂廣十丈五尺。門堂七丈也。室三之一者方望溪云。門之左右各隔其半以爲室。敞其半以爲堂也。

殷王宮高度修度

攷工記。殷人重屋。堂修七尋。八尺崇三尺。四阿重屋。注重屋者王宮正堂。若大寢也。阿棟也。四阿四面皆注雷也。重屋重簷也。按四面皆注雷者卽今所謂廊簷。凡宮殿皆四面廊也。

周明堂修廣崇度

攷工記。周人明堂度九尺之筵。東西九筵。南北七筵。堂崇一筵。五室。凡室二筵。注明堂者明政教之堂。周堂高九尺。殷三尺。則夏一尺矣。禹卑宮室。謂此一尺之堂歟。疏云。夏言宗廟。殷言王寢。周言明堂。皆舉一

以見其二皆同也。按殷未言廣。周南北七筵合六丈三尺爲修度。東西九筵合八丈一尺卽廣度也。由此證之。凡三代王宮。宗廟明堂同。堂上皆五室。中央一室。四隅各一室。其修廣雖不同。而規模則無異也。

周王宮門高五丈宮角樓高七丈城角樓高九丈

攷工記。王宮門阿之制五雉。長三丈。高一丈。曰雉。宮隅之制七雉。城隅之制九雉。注阿棟也。疏謂門之屋兩下爲之。其脊高五丈。宮隅城隅注云浮思也。疏云。按漢書東闕浮思災言災則浮思者小樓也。是可證周宮門高五丈。宮城角樓高七丈。如今紫禁城都城角樓高九丈也。

古宮室牆皆土築

攷工記。牆厚三尺。崇三之。按崇厚以是爲率。假令牆高二丈七尺。厚則九尺。周時尙不能以磚石作牆。雖王宮宗廟皆土築。故不得不厚。詩云縮版以載。作廟翼翼。縮者約也。言約版以築廟牆。是古宮室皆土牆之證也。

古屋脊坡度之率

攷工記。葺屋。草屋三分瓦屋四分注。謂屋南北深一丈二尺。三分者峻宜四尺。四分者峻宜三尺。方望溪云。三分屋之南北深。以其一爲屋脊高四分亦然。按古之所謂屋。專指屋脊兩邊下垂者而言。故注云深一丈二尺。三分者峻四尺。四分者峻三尺。以是爲率。倘屋更深。則峻宜更加也。茅屋與瓦屋所以不同者。

因茅去水遲故其坡度宜下降下降則去水速瓦去水疾故其坡度雖少嗇無妨專指屋脊言若今日之平頂房古謂之無屋也古幘亦然其平頂者雖上空不得謂之屋屋則有脊高起前後坡下矣禮云中屋履危史記魏世家使吏捕范增增因上屋騎危者屋脊故可騎然則今日之屋式仍與三代同可謂古矣

古廟堂亦以茅覆頂

記所謂葺屋者非必窮民廟堂亦然左傳云清廟茅屋大戴禮古明堂以茅蓋屋上圓下方是其證也

周庭中甬路高度

攷工記堂涂十有二分注云堂涂者令甓礎疏令甓者今之磚道也釋文云礎音階卽磚階也十有二分者言堂高九尺涂高一尺八寸也按爾雅堂涂謂之陳詩曰胡逝我陳註陳者堂下至門徑也卽今之甬路惟周堂有三階此正中階下之甬路其賓階階下是否有涂禮無明文又涂廣亦未說疑十有二分或兼崇廣言也

古築牆時狀況

詩小雅約之閣閣椓之橐橐又揅之揅揅之薨薨築之登登削屢憑憑百堵皆興箋云約縮版也椓椓土也言以杵築土而聲橐橐也削屢憑憑者言牆築成有凹凸不齊之處而削之使平也此宣王考室之

詩宗廟之牆。尙以土築。他可知矣。

古築牆以版計功

呂氏春秋。楚人以兩版垣也。吳起變之而見惡。注楚人以兩版築垣。起教之用四用四。則工省而築多。又韓非子。宋王築武宮。謳癸倡行者止觀築者不倦。王聞召而賜之。對曰。臣師射稽之謳。又善於癸。王召射稽使之謳。行者不止。築者知倦。王曰。其謳不如癸美何也。對曰。王試度其功。癸四板。射稽八版。撻其堅。癸五寸。射稽二寸。

春秋時有東西廂

左傳昭四年。豎牛曰。夫子疾病。不欲見人。使寘饋于个而退。注个者東西廂也。按公羊傳。路寢者何。正寢也。爾雅釋名。無東西廂。有室曰寢。然則凡言寢者皆無廂也。

周屋上加塗敷瓦者少

呂氏春秋。高陽應將爲室。家匠對曰。未可也。木尙生。加塗其上。必將橈。以生爲室。今雖善。後必敗。高陽應曰。木益枯。則勁。塗益乾。則輕。以益勁任益輕。則不敗。匠人無詞。後果敗。又韓非子。虞慶爲屋。謂匠人曰。屋太尊。匠人對曰。此新屋也。塗濡而椽生。是古人爲屋。先架椽。再以泥塗其上。而不言加瓦。蓋周時瓦尙貴。雖卿士家造屋。不盡用之也。

戰國時瓦屋漸多

古史攷夏昆吾作瓦史記龜策傳繫爲瓦屋蓋言其侈以故周詩狀宮室者至多而不及瓦蓋其時瓦屋實少至戰國時趙廉頗與秦兵戰秦兵鼓譟勒兵屋瓦皆震似其時瓦屋已多蓋陶業日益發達雖尋常百姓已力能爲矣。

周時已有平房

莊子孔子之楚舍于蟻邱之漿其鄰有夫妻臣妾登極者注極平頭屋也。

古貧民門戶狀況

左傳襄十年簞門圭竇之人而皆陵其上其難爲上矣注簞門柴門圭竇小戶穿壁爲戶上銳下方狀如圭也言微賤之人也又韓非子築十版之牆鑿八尺之牖蓋古人之牆皆以土築就壁穿戶上銳則不墮牖者助戶取明故亦就壁鑿取形圓賈誼過秦論所謂繩樞甕牖也。

周時屋內取暖之法

呂氏春秋衛靈公天寒鑿池宛春諫曰天寒傷民公曰天寒乎宛春曰公衣狐裘坐熊席陬隅有竈是以不寒新序同陳是於屋隅築竈燒以取暖也又左傳定三年邾子自投於牀廢櫬炭爛遂卒是裝炭於櫬近牀取暖可移徙也又昭年初元公惡寺人柳欲殺之及喪柳熾炭于位將至則去之是以炭溫地使元

公坐其處而煖也。

古竈突形狀

說苑。臣聞客有過主人者。見竈直突。橫平旁有積薪。謂主人曰。曲其突。遠其積薪。不者且有火患。曲突者使煙突曲而向上。火不旁溢。炊煙出易也。又按今日從漢魏墓中掘出瓦竈之模型。皆中置大釜。四隅安小釜。或四或二。而竈門上皆有牆隔。煙煤不使落釜內。而今竈皆無之。殊不如古人也。

古戶樞塗油

淮南子。人有少言者。猶不脂之戶也。注。不脂之戶難開閉也。按車軸塗以脂則輕。戶樞亦然。故曰難啓閉。

古庶人皆白屋

漢書。吾丘壽王傳。或由窮巷起白屋。裂地而封。又蕭望之傳。恐非周公致白屋之意。王莽傳。開門延士下及白屋。師古曰。白屋謂庶人以白茅覆屋也。然則漢時士庶盡居茅屋。無瓦屋者。故以白屋爲貧賤之代名。與白衣同也。

漢唐謂裏間屋爲箱

漢書。周昌傳。呂后側耳於東箱聽。金日磾傳。莽何羅。裹白刃從東箱上袁盎傳。臣所言人不得知。乃屏錯。錯趨避東箱。此天子正殿之箱也。楊敞傳。延年起至更衣敞夫人遽從東箱出。此卿士家正廳之箱也。師

古曰正寢之東西室皆曰箱。言似箱篋之形。按此卽今正廳之東西裏室。俗曰裏間屋。古人以其嚴密似箱故名。與廂異。廂者正廳前之東西房。唐會真記所謂待月西廂下者是也。又唐張說虬髯客傳引公入東廳廳之陳設窮極珍麗。箱中粧奩冠鏡首飾之盛。非人間所有。此箱中卽東廳之裏室也。若世說所云陸機兄弟住參佐廨中三間瓦屋。士龍住東頭。士衡住西頭。旣未云箱。是無裏室。又官廨故屋有瓦也。

後漢始以墼砌牆不純用版築

後漢周綱傳。糲廉潔無資。常築墼以自給。說文云。墼。音激。令適也。一曰土墼未燒。按今江北河北人砌牆多以墼法。以木模盛濕土。用石打使堅。晒乾用之下。藉磚石上。壘以墼。外塗以石灰。牆堅而觀美。惟極貧者始以土築牆。漢末殆已如此。故糲售墼以自給。說文云。瓴。瓴者甓也。詩曰。中唐有甓。陶侃所連者是也。陶後之物也。豈尙可築乎。證以糲傳其詰誤矣。許亦以未安。又曰未燒土墼。此詰近之而仍未允。查未燒之墼曰坯。若土墼則大於墼數倍。乾卽用以砌牆。非燒後始用。禮雜記三年之喪居堊室之中。鄭玄注云。堊室壘墼爲之。不塗壁。是其證。若如許說。墼似待燒始用者。此由古時士人與農分處。不悉農家事物。故雖以許重叔之通博詁此字不能真確。至宋劉邠注此傳云。墼非築所成。當作墼。是愈不知字義而強說矣。

自三代迄兩漢皆以蜃灰塗牆。至漢末蜃竭始代以石灰。

攷工記。夏后氏九階四旁兩夾窗白盛。周禮地官掌蜃。掌斂瓦物蜃物。以共白盛之蜃。鄭注云。白盛蜃灰也。謂飾牆使白。今東萊用蛤。謂之叉灰。蓋至漢時中原之水漸少。所產之蜃已用竭。故止。東萊沿海之地。用之而又雜以蛤。故謂之叉灰。叉者雜也。今匠人以土和石灰。仍謂之叉灰。疏謂蜃蛤在泥中。取以爲灰。故謂之叉灰。以叉爲叉。取之叉。誤之遠矣。

蜃灰既竭。至後漢乃代以石灰。後漢楊璇傳。特制馬車數十乘。以排囊盛石灰於車上。既與賊戰。乃順風鼓灰。賊不得視。遂敗。是可證當時建築用石灰。然魏晉時仍不多。張華博物志。燒白石作白灰。既訖著地。經日俱冷。遇雨及水澆。即便然煙焰起。云云。此可證晉時石灰尙少。故以爲異。

唐以麻和石灰泥壁販賣者益多

西陽雜俎。乃請後堂廳上掘地爲池。方丈深尺餘。泥以麻灰。汲水滿之。夫以麻和石灰泥池爲固。則以麻灰泥壁也。必矣。今名曰麻刀灰。然則泥壁之法。唐已與今同。又云寶歷中。荊州有廬山人。常販燒朴石灰。往來於白沃南草市。又五代史唐臣傳。安重誨常欲除潞王從珂。明宗曰。吾爲小校時。不能自足。此兒爲我擔石灰。拾馬糞。以相養活。此以證自唐以來。石灰民間已習用也。

唐住宅臨街有窗牖

北里志。楚兒傳。性狂逸。後以衰退。爲汾陽裔孫郭鍛所納。避正室。置於他所。每有舊識。過其所居。多於窗

牖相呼後以途中與大理司直鄭光業相語爲鋟所笞。光業深慮其不任。明日特過其居。偵之。則楚兒臨街牖下弄琵琶矣。又張住住少敏慧。與鄰兒龐佛奴相悅。有結髮之契。及住住將笄。其家拘管嚴。佛奴稀見其面。後因寒食爭球。故逼其窗下以伺之。忽聞住住語。又樂府雜錄。將軍韋青於街牖中聞其歌音寥亮。是無論貧富貴賤。臨街皆有窗也。若今日祇商家臨街有牕。住室皆面向內。無臨街有窗者。古今住室不同若是。

晉唐時屋梁皆可不梯而登

晉干寶搜神記。西江有一宅。住者皆不安。最後買於東鄰劉氏。劉持刀夜於屋梁伺之。唐任蕃夢遊錄。獨孤遐叔自蜀歸。距金光門尚有六七里。天已曛黑。乃宿於廢寺廊下。夜半忽有若貴人宴飲院中。遐叔懼爲所逐。乃潛伏屏氣於佛堂梁上。伺之。

按劉氏持刀登屋梁。或由梯登。若遐叔偶宿廢寺。何從得梯。乃亦登梁上。若以今日之屋梁論。不梯不能登也。乃古人不爾者。疑屋制與今異也。又北齊書蘇瓊傳。遷清河太守。部民趙穎送新瓜一雙。置於聽事梁上。夫梁上可置物。必便於取攜。若今日之梁。能置大瓜乎。又謝朓詩。杏梁賓未散。李嶠詩。嘉賓集杏梁。此詩若在今日。則成笑柄。以此見古屋制梁棟安排。與今大異。

卷十一

行唐尙秉和著

燈燭

周時以薪爲燭

禮少儀執燭抱熑注未爇曰熑又周禮春官董氏掌共熑契以待卜事注杜子春讀熑爲柴樵之樵是熑者樵也薪也薪之然甚速故親執其既然者復抱未然者以待續爇又毛詩巷伯傳云昔者顏叔子獨處於室鄰之釐婦又獨處夜暴風雨而室壞婦人趨而至顏叔子納之而使執燭放乎旦而蒸盡縮屋而繼之按蒸者細薪也縮束也言蒸盡束屋上茅然之又周禮司煊庭燎疏云若人所執之燭以荆熑爲之是皆以薪爲燭之確證也

故古亦謂燭爲火

左傳飲桓公酒樂公曰以火繼之又哀十六年良夫代執火者而言晏子春秋晏子飲景公酒日暮公呼具火史記孟嘗君傳夜食有一人蔽火光火者卽燭也因然薪爲燭其光甚大故亦謂曰火漢魏以後始以燈燭爲照夜之專名凡在屋內者無曰火矣

古學校弟子執燭之詳情

管子弟子職昏將舉火執燭隅坐錯總束之法橫於坐所櫛依禮記鄭注之遠近乃承厥火

注燭謂櫛當爲壘言盡燼同

察其燼之遠近以薪續其火也居句如炬蒸間容蒸然者處下

注薪蒸

捧椀以爲緒

注椀貯燭爐

右手執燭左手正櫛有墮代

燭交坐毋背尊者乃取厥櫛遂出是去

按古人執燭情形此文可謂詳盡矣居句如炬者言以新燭接然舊燭相交形如炬而以然者處下

則火易傳也捧椀以爲緒者言以椀承燼使不落地免危險也右手執燭左手正櫛正櫛二字殊不解後

閔檀弓夏后氏聖周鄭注引此文曰右手折聖釋文引則曰左手執燭右手折卽

同聖

孔疏引則曰左手執燭右手正櫛二字亦以形近之故訛作正櫛此櫛字爲訛

字餘櫛必皆爲訛字以至義意全不明了聖者燼也鄭以弟子職之折聖與聖周聖字同故引以釋禮文若爲櫛者鄭胡取乎又左右顛倒於理亦不適古今人動作左手常居靜職右手常居動職執燭有定故

左手爲之折聖常動故右手爲之今以形近之故左訛右右訛左義全鑿矣折聖者卽撥燼使落也燼落則燭明乃取厥聖遂出是去言弟子將退取燭燼出外棄之也櫛無訓燼者而管子原注訓櫛爲燼可證

房玄齡所見管子仍爲聖與陸孔同也

古宴客必至飲時始然燭

禮少儀。其未有燭而後至者。則以在者告。按此係召客夜飲而至有先後也。其後至者。日暮室闇。不能見人。故主人告以某在斯也。某在斯也。此以後世便利狀況例之。何至夜闇不能辨人室不然。燭古人不爾者。以其害甚多。暑月益熱一也。火大燼多。易有危險二也。費巨貧者不辦三也。不潔四也。須有人執五也。以故非客畢集。至飲食時不然。

古夜宴時主人執燭禮節

禮少儀。凡飲酒爲獻主者。執燭抱燭。客作而辭。然後以授人。注未爇曰燭。主人親執燭敬賓。示不倦也。疏既欲留客。又取未爇之炬抱之也。又曲禮燭不見跋。注跋本也。疏本把處也。火炬照夜易盡。盡則藏所然。殘本恐客見。殘本多知夜深。主人厭倦也。

古執燭者必在屋隅

弟子職。昏將舉火。執燭隅坐。又檀弓。曾子病童子執燭隅坐。按執燭必在屋隅者。古人席地坐而薪燭火甚大。屋隅閒曠。可不妨人。且防火害也。以故少儀云。執燭不讓不辭不歌誠以執燭而辭讓或歌易致火患也。

古人夜書須人執燭至宋猶然

韓非子。郢人有遺燕相書者。夜書火不明。因謂持燭者曰。舉燭。又韓愈毛穎傳。惟穎與執燭者常侍。又名

臣言行錄韓魏公帥定州時夜作書一侍兵執燭他顧燭然公鬚是古人夜間作事執燭者必在側欲密祕不得也。

古庭燭狀況

周官司烜氏凡邦之大事共其墳燭庭燎又燕禮甸人執火燭於庭注墳大也樹於門內曰庭燎於門外曰大燭皆所以照衆爲明郊特牲所謂庭燎之百由齊桓公始也然遍攷禮經無樹燭明文而甸人則明言執火燭於庭疑凡庭燎墳燭亦皆手執賈疏以鄭注樹燭與執火燭於庭不合乃謂諸侯之燕使人執庭燎天子則樹於庭似爲強說。

古大燭以葦製

周禮司烜庭燎疏云庭燎所作依慕容所爲以葦爲中心以布纏之飴蜜灌之若今蠟燭又闔人門燎釋文云其所作之狀蓋百根葦皆以布纏之以蜜塗其上若今蠟燭矣按蠟含蜂蜜中周時尙未解蜜與蠟分解之法故以布束葦灌蜜於中又塗蜜於外葦得蠟故質堅而奈久狀有類於唐之蠟燭也。

其手燭製法

釋文云對人手爇者爲手燭孔疏云用荆樵同樵爲之不惟不塗蜜且不纏布因小燭皆然於室中塗蜜纏布則臭惡人嫌故然甚速至抱樵以俟也。

至戰國始有油燈

莊子山木自寇也。膏火自煎也。楚辭蘭膏明燭華容備些。按膏者脂也。獸油也。蓋至此時始以盞盛動物油置炷於中。然以取明不用燭。燭然古無植物油。牛羊等油值昂。蓋非富者不辦。若蘭膏則加香料於其中。貧者尤不能爲。夫自唐虞三代數千年皆以薪束爲燭。煙餒迷人。動生危險。又專人手執乍易以膏。所患皆免其快可知矣。

漢時中國尚無蠟燭

西京雜記南粵王獻高帝石蜜五斛。蜜燭二百枚。按蜜燭者蠟燭也。古蜜與蠟不能分解。混合爲一。故亦曰蜜燭。可見漢初無此物。故南粵以爲貢。其珍可知。至鄭玄注三禮言燭者多矣。而無以蠟燭爲證者。玄東漢末人。可知伊時亦無淮南子云膏燭以明白爍。龔勝傳云膏以明白銷。益證當時盡油燭也。

晉初有蠟燭

世說石季倫以蠟燭作炊。又周仲智飲酒醉瞋目謂伯仁曰。君才不如弟。而橫得大名。須臾舉蠟燭火擲伯仁。伯仁曰。阿奴火攻固出下策耳。然石季倫以蠟燭作炊。原以競豪富。則當時蠟燭之貴可想而知。蓋世說又云。簡文集談士以致前客後客夜坐。每設白粥。唯然鐙二闋。輒更益炷。按說文主同炷火主也。今謂之鐙心。以細繩或絮捻成者。俗謂之鐙捻。簡文帝王仍然油燈。世說故特紀其儉。以是證東晉時。

蠟燭。仍貴也。自蠟燭行而油燈又不足貴。

自晉以後有蠟燭有油燈。蠟燭美而潔。便於提攜。油燈污而穢。難以攜帶。於是富貴之家用蠟燭。歸田錄。寇萊公自少年富貴。不點油燈。雖寢室亦然。燭達旦。廁溷間燭淚成堆是也。貧儉之家。然油燈。歸田錄。所謂杜祁公爲人清儉。在官未嘗然官燭。油燈一炷。熒然欲滅。是也。

六朝已然植物油

齊民要術種紅花收子。旣任車脂。亦堪爲燭。又麻子科大收此一實。足供美燭之用。唐孫僕唐韻榷字注云。側嫁切打油具也。夫旣曰打油。則是打植物子使出油。如今日之麻油豆油是也。植物油常賤於動物油。故自有植物油無再燃膏油者。是自六朝已不以動物油爲燈。可斷言矣。又唐本草柏字注陳藏器曰。子可壓油爲燈。極明。是其證已。

宋之省油燈蓋

老學菴筆記。宋文安公集中有省油燈蓋詩。今漢嘉有之。蓋夾燈蓋也。複爲二層。一端作小竈。注清冷水於其中。每夕一易之。尋常蓋爲火所灼。故易乾。此獨不然。其省油幾半。按油燈之制。大半以銅鐵錫爲之。下承以盤。使不欹仄。中有柱。蓋者盛油之器。則架於柱頭。置炷於中。然以取明。然時久則熱。灼油易乾。複蓋而注水於內。則蓋不熱。故省油。

古燈台之高度

西京雜記。咸陽宮有青玉五枝燈。高七尺五寸。作蟠螭以口銜燈。燈然鱗甲皆動。炳若列星。又宣帝上林有雁足燈。又北里志。裴晉公嘗遊妓院。爲惡少所窘。公陰遣介求救於胡造。尙書胡來。主人上燈。胡起取鐵燈台。摘去枝葉。而合其跗。足也。橫置膝上。令曰。凡三鍾引滿。三臺酒須盡。不得有滴瀝。犯令者一鉄躋。惡少長跪乞命。又東宮遺事。有銅馳燈。夕供油七升。又韓愈短燈檠歌。長檠架也。八尺空自長。短檠二尺便且光。裁衣寄遠淚眼暗。搔頭頻挑移近牀。太學儒生東魯客。二十解家來射策。夜書細字綴語言。兩目昏眵頭雪白。此時提攜當案前。看書到曉。那能眠。是漢唐油燈。皆置檠上。其高七八尺者。蓋不動。其高二尺者。可移徙。讀韓詩如目睹其狀矣。然後世之檠。皆尺餘。所以然者。隋唐以前。屋內器具不備。又皆席地坐。所謂案者。矮几也。故移置案前。不置案上。若宋以後。則案高而據椅。今日之坐。古謂之據。故短檠而置案上。視古尤便也。

古蠟燭皆蜜燭與今蠟燭異今蠟宋尙無

自宋以前。所謂蠟燭。皆蜂蜜中所含之蠟也。蓋自魏晉時始能將蜜蠟分解。專以蠟作燭。故亦曰蜜燭。唐人夜怪錄云。少頃有秉蜜炬自內出者。是唐仍以蜂蠟爲燭之證也。卽晉書阮孚傳。所謂蠟屐之蠟也。若今日之蠟燭。則產於四川瀘州各地之樹上。正月時。土人赴雲南。蒙自購蠟種。歸放於蠟樹上。而食其葉。

至五月葉盡萬樹皆枯枝幹皆生白衣遠望若雪將白膜刮下卽蠟油也自此蠟行作燭者遂不用蜂蠟惟不知始於何時攷海錄碎事云仙人燭木似梧桐以爲燭可延數刻此卽蠟樹也海錄爲宋葉廷珪作是宋時中國尙少樹蠟李時珍本草綱目曰蠟樹四時不凋五月開白花其蟲大如蟻蟲延緣樹枝食汁吐涎剝取其渣鍊化成蠟又水蠟樹葉微似榆及甜櫧樹皆可放虫產蠟時珍明人是明時樹蠟已風行至於清凡爲燭皆以樹蠟幾不知蜜蠟可爲燭矣

古婦人會燭夜績狀況

漢書食貨志冬民旣入婦人同巷相從夜績一月得四十五日必相從者所以省費燎火同巧拙而合習俗也男女有不得其所者因相與歌詠各言其傷按同巷必相從夜績者男女數十人萃於一室人多則夜不寒語言多則不倦互相倣效則巧拙同費省者按列女傳云齊女徐吾者齊東海上貧婦人也與鄰婦李吾之屬會燭相從夜績徐吾最貧而燭數不屬李吾謂其屬曰徐吾燭數不屬不能出請勿與夜也燭不爲闇損一人燭不爲明何愛東壁之餘光乎夫以數十人同績一室而會合出燭則一人所出者甚微故曰費省又拾遺記魏文帝所愛美人薛靈芸常山人也居生貧賤每聚鄰婦夜績以麻蒿自照按褪麻之梗白而潔細而長然之則明故古取以代燭以此證三國時貧民仍以柴爲燭不能晉燭也

按古無棉。所謂績者。皆績麻。宋人詩所謂晝出芸田夜績麻是也。自南宋後棉花入中國。所謂績者。皆績棉也。河北人家至冬糾合數十家掘地爲室。容數十人。共一燈。男女紡績於其中。夜半方罷。與食貨志列女傳所述正同。令人悠然想見周秦遺俗也。

卷十二

行唐尙秉和著

城郭

周王城高廣

攷工記。匠人營國。言築都城。方九里。是王城。每面長九里也。又曰。城隅之制九雉。注。長三丈高一丈爲雉。隅謂城角浮思也。疏。城隅高九丈。城身高七丈也。按宮門阿五雉。宮隅七雉。故知隅高二丈。今城隅角樓高九丈。除二丈卽城身高故疏云高七丈也。

王城十二門

攷工記。國方九里。旁三門。是每面三門。每三里開一門。四面十二門。今北平城爲元所築。亦每面三門。及明徐達入北京。以城大難守。自東西面北頭之門起。迤北全墮之。是以東西北三面祇有二門。合前三門共九門。有違周制矣。而鼓樓在元時居全城正中者。今偏在北城。殊不壯觀也。

周列國城高廣

攷工記。宮隅之制。以爲諸侯城制。按宮隅高七雉。除浮思二雉。高五雉。今以爲諸侯城制。是高五丈也。左

傳隱元年都城過百雉國之害也先王之制大都不過三之一注侯伯之城方五里徑三百雉按百雉恰足參之一過則爲害由此推知侯伯之都城爲三百雉三百雉合九百丈以每里一百八十丈計之正五里故注云侯伯之城方五里也

周城牆上女牆與今同

左傳宣十二年國人大臨注臨哭也守陴者皆哭注陴城上俾倪孔疏俾倪者看視之名釋名云城上垣曰陴於其孔中俾倪非常說文云城上女牆俾倪也按城上之短垣曰女牆中有孔守城者以牆爲蔽於孔中睥睨探望窺見敵情唐韓偓詩所謂宮雅猶戀女牆唏是也自周及漢唐以迄於今仍而不改可見古制之善矣

周城有縣門

左傳桓二十八年楚子元伐鄭衆車入自純門及達市縣門不發內城門又襄十年逼陽人啓門諸侯之士門焉縣門發聊人紇抉之以出門者孔疏縣門者編版廣長若門施機關以縣門上有寇則發機而下之服虔云抉擗也謂以木擗縣門令在門內者出也按自漢以來史所紀戰事多矣而從未有縣門則此制之廢棄已久故其詳亦不悉也

古保護城垣之法

公羊傳。晉人執宋仲幾於京師。仲幾之罪何不襄城也。何休注。若今以草衣城也。按古者城垣皆以土築。雨淋則土墮。故以草衣城有類於襄。觀何休注。漢魏時卽如此。又北平圖經。東城泡子河外。卽通惠河。元時常於此處以革衣城。是元時仍如此。蓋自周至元。凡城皆以土築。故至今無一存者。至明始以磚築城。可數百年不圯。今北平南城爲明嘉靖時築。城上之磚印記宛然。是其證也。

周都城內布置概況

攷工記。匠人營國方九里。旁三門。國中九經九緯。經涂九軌。左祖右社。面朝後市。按經涂九軌者。言路廣能容九車也。左祖者宗廟。言宗廟建於左。而社在右。今北平皇宮尙如此也。面朝後市者。言王宮前爲朝會之所。後爲市肆也。

周朝面積及位次

攷工記。市朝一夫。注市與二朝。占地各百畝。二朝者內朝外朝。按周一夫授田百畝。內朝外朝各占地百畝。故曰一夫又曲禮。天子當依。同辰狀如屏。斧文。高八尺。畫爲諸侯北面而見天子曰覲。天子當寧。注。門屏之間。而立諸公東面。諸侯西面曰朝。疏當依當寧皆南面。凡天子三朝。其一在路門內。謂之燕朝。太僕掌之。其二是路門外。謂之治朝。司士掌之。其三是阜門之內。庫門之外。謂之外朝。朝士掌之。燕朝。朝公族。治朝。每日視朝。治事之位。司士所謂王南面。三公北面。東上孤東面北上。卿大夫西面北上是也。外朝是詢衆庶之朝。卽朝

士所謂左九棘右九棘面三槐是也。

又秋官朝士掌建邦外朝之法。左九棘。孤卿大夫位焉。羣士在其後。右九棘。公侯伯子男位焉。羣吏在其後。面三槐。三公位焉。州長衆庶在其後。左嘉右平罷民焉。右肺石達窮民焉。帥其屬而以鞭呼趨且辟。禁慢怠也。朝錯立族談者。注樹棘者。取其赤心而外刺。錯立者立違其位。族談者聚談。按左傳昭十一年叔向曰。朝有著定。會有表注。著定者。朝內列位常處。錯立者。違著定之處而立也。古會盟必於野。故設表以爲位。異於朝也。

周正月國民至闕下觀象讀法

周禮天官正月之吉。縣治象之法於象魏。使萬民觀治象。挾日而斂之。注象魏闕也。從甲至甲謂之挾日。象者非惟書其事。且揭其圖。使觀者易辨而知警也。

卷十三

行唐尙秉和著

周都城街衢

攷工記。匠人國中九經九緯。經涂九軌。環涂七軌。野涂五軌。環涂以爲諸侯經涂。野涂以爲都經涂。按南北曰經。東西曰緯。九經九緯。言經緯路各有九。而其廣能容九軌也。還涂者達城道。野涂者國外道。爲諸侯經涂者。言諸侯城內道七軌。爲都經涂者。言諸侯所屬之都。道則五軌。以次遞降也。由是證之。周豐鎬及洛陽街衢。橫堅均有九。而其廣則皆九軌也。

周諸侯都城路廣亦九軌

九軌者諸侯之路。遜周王二軌。然左傳桓十四年。宋人以諸侯伐鄭。焚渠門入及大達。又宣十二年。入自皇門。至於達路。注云。涂方九軌。曰達夫。鄭最小國。尚皆九軌。則齊晉大國。更不待言。然則周制諸侯不必盡從也。

周時夜禁

周禮。秋官司寤。禦晨行者。禁宵行者。夜遊者。按黑夜遊行。一則恐其爲盜。一則恐其遇盜。故皆禁也。

周街衢行人秩序

禮王制道路男子由左婦人由右車從中央注道中三涂遠別也。

殷周時道路厲行清潔

韓非子殷之法刑棄灰於道者斷其手子貢疑其重夫子曰知治之道也又史記李斯傳商君之法刑棄灰於道者夫棄灰細故也然能使道路汗穢有礙觀瞻故嚴刑以防之由是證古人之厲行清潔講求衛生之過於後人也

漢長安之街衢概況

三輔皇圖云有香寶街夕陰街尚冠前街三輔舊事云長安城中八街九陌漢書劉屈釐妻梟首華陽街京兆尹張敞走馬章臺街陳湯斬郅支王首懸於藁街張衡西京賦云參塗夷庭街衢相經塵里端直甍宇齊平是也又張衡東京賦經途九軌是漢都街衢廣亦九軌也

秦仍刑棄灰

漢書五行志秦連相坐之法棄灰於道者黥是蓋仍沿商周之法世動謂秦法嚴然黥刑較斷手仍輕也

唐城門出入規程

隋唐嘉話諸街晨昏出入傳叫以警行者代之以鼓城門入由左出由右皆馬周發之

漢唐以來都會盜刦則鳴桴鼓

漢書尹賞傳長安城中薄暮塵起剽劫行者死傷橫道桴鼓不絕又張敞傳由是桴鼓稀鳴市無偷盜又唐杜甫詩殺人紅塵裏報答在斯須又隋唐嘉話諸街晨昏傳叫代之以鼓是在漢唐時都城街市以人煙繁盛故殺掠刦奪白晝不諱街吏聞警則鳴鼓以報也

漢禁夜行

史記李廣傳常從一騎出從人田間飲還至霸陵亭霸陵尉醉呵止廣廣騎曰故李將軍尉曰今將軍尚不得夜行何乃故也止廣宿亭下是可證不惟城內禁夜行卽四郊亦禁也又三國志魏武傳注武帝爲洛陽北部尉小黃門蹇硕叔父夜行卽棒殺之是其罪可至死也

晉時禁夜行

世說新語王安期作東海郡吏錄一犯夜人來又殷浩始作揚州劉尹行日欲小晚便使左右取朴人問其故曰刺史嚴不敢夜行是非都城而外郡亦禁夜且並官吏禁也

唐夜鼓一動卽禁夜行

自行簡李娃傳久之日暮鼓聲四動姆曰鼓已發矣當速歸勿犯禁又摭異記憲宗遷葬都人士畢至裴通遠家在崇賢里妻女輩亦往縱觀日暮歸至天門街夜鼓將動有白頭嫗亦忙遽而行裴家青衣謂嫗曰若步履不逮懼犯禁車中尙可通融觀是則唐時夜禁以鼓爲限鼓聲起則都市行人絕男子徒行固

禁卽婦女乘車馬者亦一律禁也。

古長途官道路政專官掌之

周禮秋官野廬氏掌國道路。至於四畿。注不通之處使人治之比國郊及野之道路宿息井樹宿止宿供飲食樹爲藩蔽凡有賓客則令守涂地之人聚而棟之。同析有相翔窺伺者誅之。凡道路之舟車鑿互者斂而行之。按古驛站客館均未備沿官路賓客往來則宿於野而又無售飲食者故設專官按道路遠近設止宿之處設畫憩之廬。今所謂打尖掘井以供賓客製飲食列樹以備行旅蔭涼而以爲遮衛又孤宿郊外恐夜有盜賊也則令土人擊柝以爲警車馬衆多恐其爭路也則令以次按敍而行此不能以今日沿大道村鎮稠密逆旅櫛比且到處皆有售飲食者之習慣窺測也。

古修長塗官道

晏子春秋景公築露寢之臺三年未成又爲鄒之長塗按鄒爲大都此長塗必由臨淄至鄒有數百里之遠發民築之民固病矣然古人之重視路政便利交通可見一斑矣。

古重視行旅死者

周禮秋官蜡氏若有死於道路者則令埋而置揭焉書其日月焉懸其衣服任器於有地之官以待其人。按此等惠政在清時夏日行官道每逢之埋於路側上插木標書其死之日月及衣服顏色以待尋者而

始於周官也。

古禁蒙布巾持兵仗行官道

周禮野廬氏掌凡道禁。鄭注：禁謂若今絕蒙布巾持兵仗之屬。按持兵仗恐其行刦。禁蒙布巾頗不得其義。得無以其駭衆歟。然至漢尙如此也。

又禁野之橫行徑踰者。禁行作不時者。不物者。按不由正道。橫行徑踰必有奸邪。不時者。注云：不夙早也。則莫同暮。不物者衣服非常故皆禁之。

自周以來列樹表道

左傳襄九年晉伐鄭。杞人鄉人從趙武魏絳斬行栗。注：表道樹也。孔疏：行道也。按周語云：列樹以表道。此行栗卽表道之樹。以其礙行軍。故斬之。

秦以松表道晉以槐表道

漢書：賈山上書曰：秦爲馳道。樹以青松。是秦以松表道也。左太冲吳都賦曰：馳道如砥。樹以青槐。亘以綠水。玄蔭耽耽。清流亹亹。是晉時官道兩旁皆樹槐也。

唐仍以槐表道

國史補：貞元中度支欲取西京槐樹爲薪。更栽小樹。又吳子華有題湖城縣西道中槐樹詩。皆官道槐樹。

也。

清官道多柳而雜以槐

清時官道寬數十丈。兩旁樹柳中雜以槐。余幼時自正定應舉赴京師。行官道六百餘里。兩旁古柳參天。綠陰幕地。策蹇而行可數里。不見烈日。柳陰下賣茶賣酒賣餅餌者絡繹不絕。疲則憩。熱則乘涼渴飲。食唯所欲。雖遠行而有閒逸之趣。自鐵路行而數百里。參天之古木盡燬。官道爲民地所蝕。祇容二軌。於

卷十四

行唐尙秉和著

都城市肆

周市在王宮後面積百畝

攷工記。匠人營國。左祖右社。面朝後市。注。後市者言在王宮後也。又云市朝一夫。古一夫授田百畝。是市在王宮後而地廣百畝也。

周時市朝之布置

司市所居

胥師賈師所居

正其肆

陳其貨賄

出其度量淳

幅廣

周禮天官內宰。凡建國佐后立市。設其次。置其敍。胥師賈師所居正其肆。陳其貨賄。出其度量淳。幅廣。制。匹長。祭之以陰禮。然市亦謂之朝。論語云。吾力猶能肆諸市朝。史記孟嘗君傳。獨不見夫朝趨市者乎。明日側肩爭門而入。日暮之後。過市朝者。掉臂而不顧。注云。言市之行列。有如朝位。故云市朝。然則古市內行列整齊。有市社。有官廳。而肆。塵。則列於兩旁。招商列居。甚整齊也。

周管理市政制度

一市官之嚴厲

周禮。地官司市。掌市之治教政刑。度量禁令。以次敍分地而經市。凡市入則胥執鞭度守門。市師于思。亭市

次聽大治大訟胥師賈師于介
市亭之屬 次聽小治小訟市刑小刑憲罰
以文書播于衆 中刑徇罰以其人示市 大刑
朴打也罰

一市貨以類陳列不許雜亂

司市云以陳肆辨物而平市又肆長陳其貨賄名相近者相遠也實相近者相爾同邇也按陳肆辨物者注云物同使列於一區則美惡易辨名相近者相遠也言名雖同而實不同不許同列以欺人也實相近者相遠也言貨之名與實相同可近列一處也皆所以防弊也

一嚴禁靡物與詐欺

司市以政令禁物靡而均市以賈古音民禁僞而除詐按物靡者鄭云侈靡也侈靡則悅目而售易價因以昂可使物價不平均又無用故禁之賈民者曾爲賈知物情僞故欺詐易去也又胥師察其詐僞飾行續慝者誅罰之賈民卽其屬也

一物有定價懸高處使人知

司市以度量成價而徵價同買羣吏平肆展整也成平也奠賈同價上旌于思次以令市又賈師展其成而奠其價按徵價者言按丈尺升斗定物價而高懸于市亭使買者有所徵信而不疑也

一嚴防盜賊與市民秩序

司市以刑罰禁競同暴而去盜。又司競禁其鬪毆者與其競亂者出入相陵犯者以屬遊飲食于市者若不可禁則搏而戮之。又司稽掌巡市而察其犯禁者與其不物者而搏之。掌執市之盜賊以徇且刑之胥各掌其所治之政執鞭度而巡其前掌其坐作出入之禁令。襲其不正者凡有罪者撻戮而罰之。按屬遊飲食者言聚而羣遊飲食也不物者言衣服視瞻奇異不經也。襲其不正者言掩捕犯禁之人也。

一遺物招領

司市凡得貨賄六畜者亦如之。言旌于敍也三日而舉之按市有遺物事之常也置於敍以待認領三日舉之者言過三日無人認領則沒入官也。

一設專官掌契券

質人掌成市之貨賄凡賣債者質劑焉大市以質小市以劑掌稽市之書契凡治質劑者國中一旬郊二旬野三旬都三月邦國朞期內聽期外不聽按此卽司市所謂以質劑結信而止訟也。註質劑券也先鄭云謂兩書一札而別之也。言保物要還也疏古未有紙故以札竹版書大小者言券有長短也治質劑者言聽質劑之訟也訟有期過期則不聽此訟也。

一貸民錢國息五厘

泉府凡民之貸者與其有司辨而授之以國服爲之息後鄭云以國服爲息者以其于國服事之稅爲息。

假令貸萬泉期息五百若是則五厘也。

古市一日三合

周禮地官司市大市旦廸同側而市百族爲主朝市朝時而市商賈爲主行爲商居爲賈夕市夕時而市販夫販婦爲主小販又禮郊特牲云大市於中朝市於東偏夕市於西偏按古市面積祇百畝除司市等官聽事之處疑太狹今一日分爲三時之市各有所主易期而入則無壅矣。

古以人民與牛馬同上市

質人掌成市之貨賄人民牛馬兵器珍異鄭云人民奴婢也疏以其在市平定其價故知非良人按古時必罪人方爲奴婢故云非良人非若後世良人亦爲奴婢也奴婢可買賣故與牲畜同上市議價也。

周時賣獸肉者懸獸首於門以爲識

晏子春秋君服之於內而禁之於外是何異懸牛首於門而賣馬肉於內也據此是當時賣何獸肉卽懸其首於門以爲標識也。

漢都城市場

三輔黃圖長安市有九各方二百六十六步六市在道西三市在道東凡四里爲一市致九州商人在突門夾橫橋大道市樓皆重屋有令署以察商賈貨財買賣之事三輔都尉掌之直市在富平西南二十五

里卽秦文公造物無二價故以直市爲名張衡西京賦云郭開九市通闢連闢旗亭市樓重立俯察百隧是也隧道也又按郡國志長安大俠黃子夏居柳市司馬季圭卜於東市晁錯朝衣斬於東市西市在醴泉坊

按周市在王宮後地祇百畝殊迫隘至秦漢都城規模較周大啓於是市肆亦異制六市在道西三市在道東必大街之東西不定在王宮後又四里爲一市較周制亦宏敞而各方六百六十六步可證市自爲院落有若今日特闢之商場沿承周制尙無臨街列肆售物若今日都市之雜亂而管理市政者爲三輔都尉張衡西京賦所謂周制大胥今也惟尉是也而市樓皆重屋市樓卽旗亭旗者商家所豎之招牌懸於樓頭故曰旗亭史記褚先生所謂臣爲郎時與方士會旗亭下者此也

漢酒市

漢書萬章傳長安熾盛街巷各有豪俠章在城西柳市又酒市趙君都按柳市已見前大俠黃子夏所居蓋以其地多柳而名酒市蓋又以其地多釀酒者而名也惟柳市酒市是否在九市之內抑在道東或道西則不詳也

周時商貨皆以璽節出入否則沒官

周禮地官司市凡通貨賄以璽節出入之又掌節貨賂用璽節皆有期以反節凡通達於天下者必有節

以傳輔之無節者有幾則不達。又司關掌國貨之節。凡貨不出於關者。舉其貨罰其人。按節者竹符也。持此爲憑。貨達則反節。然則古之經商者。運達禁品不易也。

右商賈之詐僞

新序魯有沈猶者。旦飲羊飽之。以欺市人。魯氏之鬻牛馬者。善豫賈。同價孔子將爲司寇。沈猶氏不敢朝飲其羊。魯氏之鬻牛馬者。不豫賈。按朝飲其羊。則腹大而似肥。豫賈者。蓋豫先宣傳其牛馬之美。而昂其值。其實不副也。

漢時已有在街上叫賣食物者

三國志注。趙岐遭家禍。詣北海販胡餅。孫賓碩過市。疑其非常人。問曰。自有餅耶。販之耶。岐曰。販之。賓碩曰。買幾錢。賣幾錢。曰。買三十。賣亦三十。是在市上叫賣也。

漢已有書肆

後漢王充傳。常遊洛陽市肆。閱所賣書。一見輒能誦憶。是漢已有書肆也。

漢晉時酒壚

史記司馬相如傳。乃俱之臨邛。盡賣其車騎。買一酒舍。酤酒。而令文君當壚。又世說新語。阮公鄰家婦有美色。當壚酤酒。阮與王安豐常從婦飲。阮醉便眠其側。又庾公爲尚書。令着公服。經黃公酒壚下。過。注壚

酒肆也。以土爲墮，四邊高似壚也。按說文，壚黑剛土也。呂覽凡耕之道，必始于壚，爲寡澤而後枯酒壚者，古陶器大者殊少，而又無種疑，卽以剛燥之土築使中空，四邊高起，俟乾用以盛酒而不滲也。抑或以陶器置當中，懼其毀壞，四周用此燥土培壅以爲固，且免滲酒，不然胡必以壚哉？後閱漢書，壚作盧。師古曰：累土爲盧，以居酒瓮，四邊隆起，形如鍛盧。俗學謂當盧爲對溫酒火盧，失其義矣。觀此則與余後說合也。

唐時鬻胡餅狀况

任氏傳：行及里門，門局未發，旁有胡人鬻餅之舍，方張炭熾爐，暫往棲止。按胡餅者，卽今之燒餅也。熾炭火爐中，而以餅置爐上灼之，食頃熟矣。其製法傳自胡人，故曰胡餅。

唐都市賣蒸餅狀況

朝野僉載：周張衡位四品，退朝見路旁蒸餅新熟，遂市一枚，馬上食之，被御史彈劾，降勅流外。據此，唐都城街上似已隨便設肆，與今無異。不必有定市也。若古則無是。晏子春秋云：晏子宅陋，景公欲易其宅。晏子曰：臣家貧而居近市，百物取給焉。若居與市遠，則朝夕不便。是可證臨淄雖繁盛，尙無臨街設肆之制，而市有定處，故去市遠，則購物難。漢時蓋尙如此，至唐則與今無異。

漢已有牛牙人

後漢逢萌傳：君公遭亂，獨不去，僧牛自隱，注謂平會兩家買賣之價。

唐馬牙人

集異記。寧王方集賓客。鬻馬牙人。麴神奴者。呈二馬。皆神駿精采。問價。牙人曰。此一千。此五百。座客皆不識其貴賤之由。

按牙人者。主介紹平會兩家。買賣價值。費唇舌牙齒。故曰牙人。今各物皆有牙人。不祇牛馬。想漢唐亦然。特不見於載記耳。若周制則無是。凡物價皆由市官酌定。以旌於市亭。賈師所謂展成奠定也。價以令於衆也。

唐各行有首

唐靈鬼志。吳太伯祠在蘇閶門西。人多獻牲牢以祈福。時乙丑春。有金銀行首。畫美人以獻。又虬髯客傳。某日午時訪我於馬行東酒樓下。又周禮地官肆長孔疏。一肆立一長。便檢校一肆之事。若今行頭是唐時。各行皆有行首。與今略同。

唐衣肆質肆當鋪書肆

任氏傳。鄭生不知是計。入西市衣肆。又李娃傳。生不知是計。乃質衣於肆。以備牢醴。又娃命出門。生騎而從。至旗亭南偏門鬻墳典之肆。生揀而市之。載以歸。總觀古市肆。概況周以前。市自市。街自街。凡列肆必於市。臨街無鬻物者。西漢蓋仍如此。故長安有九市。

之多至唐則街市已混爲一沿街設肆不必定在市以迄於今仍而不改故唐以後狀況可臆揣而知不必致也。

古契券周名質劑漢名下手書唐名畫指券

周禮司市以質劑結信而止訟又質人凡買賣者質劑焉大市以質小市以劑鄭注質劑謂兩書一札而別之也若今之下手書言保物要還也孔疏古未有紙故以札書漢之下手書卽今唐時畫指券與古質劑同也按札者竹簡也兩書一札而別之者謂甲乙各書於札上中分而各持其一以爲信漢時仍以竹爲之而名下手書東漢末雖有紙蓋貴甚仍無用者至唐則盡以紙矣然畫指之義仍不詳也。

古收債以合券爲憑

戰國策孟嘗君使馮谖收責於薛載契券而行使吏召諸民當償者悉來合券券徧合起矯命以責賜諸民因燒其券按此亦以竹爲券剖而分之各持其一故合之以爲信又漢書高帝紀及見怪歲竟此兩家常折券棄負按此亦以竹簡爲券旣不徵索故折毀也。

卷十五

行唐尚秉和著

閭里

周民居閭里概况

周禮地官鄉大夫今五家爲比使之相保五比爲閭二十五家使之相受四閭爲族百家使之相葬五族爲黨五百家使之相救五黨爲州二千五百家使之相賙五州爲鄉萬二十五百家使之相賓按注相保者奇裏相保也卽互保此五家無姦宄相受者後鄭云有故而寄託使之相受相葬者百家之財力贍互相助財相救者五百家勢衆故可相救相賙者祲札相賙祲札者或災荒或癟疫以二千餘戶之衆不能全被災可互賙恤也相賓者以萬二千之戶口秀民必多故由鄉校賓其賢者於國校使畢業而爲官吏也。

按王都百里以內爲鄉鄉有大夫主其治州有長黨有正族有師閭有胥比有長若百里以外則爲遂以鄰里鄧鄙縣組成五家爲鄰五鄰爲里五里爲鄧五鄧爲縣五縣爲遂其實遂之鄰里鄧鄙縣與鄉之比閭族黨州名異而實同必異名者備師田行役各以旗物率其衆便於識別耳。

按古之時民無郊居者如後世之鄉村祇夏日卽農郊居書所謂厥民析詩所謂中田有廬是也言廬於

井田之中及秋後農事畢則歸都邑詩云曰爲改歲入此室處言冬日農畢將改歲矣入居都邑之室也室在邑廬在野三代時截然不同不能如後世之混合稱之觀大司徒授民田以室數制之不以廬數注云留城郭之宅曰室是其證故夫比閭族黨鄰里之組合皆都邑之狀況也

至春秋以社爲里之代名

管子公子開方以書社七百下衛矣左傳書社五百商子里有書社史記索隱云古者二十五家爲里里各立社書社者書其社之人名於籍下衛者言以此七百社降衛也

漢閭里必有門門有監

史記酈食其傳爲里監門又張耳傳俱之陳爲里監門又萬石君傳內史慶醉歸入外門不下車萬石君聞之不食慶肉袒謝萬石君曰內史貴人入閭里里中長老皆走匿內史坐車中固當又漢書于定國傳始定國父于公其閭門壞父老方共治之于公謂曰少高大閭門令容駟馬高蓋按閭里皆二十五家此二十五家共一門出入又有門監以司啓閉稽奸邪使莠民無所容納古里政之整齊如是

漢長安里名

三輔黃圖長安閭里一百六十室居櫛比門巷修直直宣明建陽昌陰尙冠修城黃棘北煥等里漢書云萬石君奮徒居陵里又徙家長安咸里宣帝在民間時常在尙冠里劉向列女傳節女長安大昌里人也

戚里者所居皆皇家之姻戚故以名也。

漢仍有鄉名

史記陳平傳陽武戶牖鄉人也。注漢制十亭爲一鄉又陳勝傳行至蘄大澤鄉按周制五州爲鄉鄉大於州縣漢則爲州縣屬僅大於亭耳漢承秦制多與周異矣。

秦漢亭制

新序梁邊縣與楚鄰界梁之邊亭與楚之邊亭皆種瓜又高士傳始皇以金璧置阜鄉亭是六國時即有亭而不詳其制漢書高帝紀及壯試吏爲泗上亭長師古曰秦法十里一亭亭長者主亭之吏也亭謂停留行旅之館又求盜之薛治注云亭有兩卒一爲亭父掌開閉掃除一爲求盜掌逐捕盜賊是亭者有二義一以便行旅如劉寵傳嘗出京師欲宿亭舍亭吏止之日整頓洒掃以待劉公又王忳傳妾夫爲涪令過宿此亭又范式傳辟公府之京師道宿下亭又張式傳父業郡門下掾送太守妻子還鄉里至河內亭又高士傳桓帝以安車徵韓康康辭安車乘柴車先行至亭亭長以徵君當過發人牛修道橋及見康車以爲田叟也奪其牛是官吏過往及人民宿止皆亭長是賴一以防盜賊如朱博傳少給事縣爲亭長好客少年捕搏敢行稍遷爲功曹又高帝紀常求盜之薛是亭長逐捕盜賊保護行旅有功可升爲功曹也。

晉唐仍有亭

世說褚季野於章安令遷太尉記室參軍乘估客船送故吏數人投錢唐亭住適吳興縣令沈充送客亭吏驅公移牛屋下後縣令知鞭撻亭吏以謝又褚公嘗至金闕亭是晉時仍有亭亭吏卽漢之亭長其所掌蓋仍與漢同又唐人集異記安陽城南五里有一亭過客宿止輒死有一士人不信宿其中又摭異記靈壁縣東界有一亭旁有古樹參天是亭之制至唐仍存自秦漢訖唐千餘年不廢可謂久矣

秦漢鄉吏亭長以外之鄉官

史記三老五更遮說漢王又高帝紀舉民年五十以上有脩行能帥衆爲善置以爲三老鄉一人擇鄉三老一人爲縣三老與縣令丞尉以事相教正義曰百官表十里一亭十亭一鄉鄉有三老掌教化又文帝紀三老衆民之師也又以戶口率置三老孝悌力田常員又明帝紀賜三老孝悌力田人三級注皆鄉官名三老高帝置有秦卽孝弟力田高后置又武帝紀賜縣三老帛八匹鄉三老孝悌力田帛人三四是三老者有縣三老有鄉三老其責任在掌教化故詔云衆民之師民有不臧則可讓之司馬相如傳所謂讓責也三老孝悌以不教誨之過是也孝悌力田之識蓋與三老同而力田微異力田者蓋主以精勤農事爲率故相如讓孝悌而不及力田惟孝悌力田二官是否有縣鄉之分史無明文不敢臆說

鄉官之等級

漢書尹賞傳乃部戶曹掾史與鄉吏亭長里正父老伍人雜舉長安中輕薄少年惡子是縣令之下卽鄉

吏。鄉。吏。之。下。卽。亭。長。亭。長。之。下。卽。里。正。里。正。之。下。爲。父。老。伍。人。若。夫。功。曹。戶。曹。賦。曹。等。職。乃。佐。縣。令。治。事。者。鄉。吏。亭。長。有。功。雖。可。擢。爲。曹。掾。乃。縣。屬。而。非。鄉。官。史。記。陳。餘。爲。里。監。門。吏。常。以。過。咎。餘。此。所。謂。吏。卽。鄉。吏。也。

若夫三老孝悌力田三職。雖鄉官乃人民之表率。專司教導職。雖微而名甚榮。與鄉吏亭長截然不同。以故皇帝有恩賜時。每及三老孝悌力田。而不及鄉吏亭長。此外鄉官復有鄉嗇夫。後漢鄭弘傳。弘嘗爲鄉嗇夫。又鄭玄傳。少爲鄉嗇夫。注其鄉小者。縣署嗇夫一人。前書曰。鄉有嗇夫掌聽訟收賦稅而不言。縣有嗇夫。蓋此官爲縣所署。何鄉人卽佐縣官清理其鄉之訟獄收稅等事。不惟與三老等職異。與鄉吏等官亦異也。

六朝時鄉官

通考云。宋五家爲伍。伍長主之。二伍爲什。什長主之。什十爲里。里魁主之。十里爲亭。亭長主之。十亭爲鄉。鄉有鄉佐。三老。有秩。嗇夫。游繳各一人。所職與秦漢同。按秦漢時十里爲亭。二十五家爲里。十里二百五十家。茲百家爲里。十里卽千家。六朝之亭長與漢之鄉吏所轄正同。而十亭爲鄉。鄉佐所轄則萬家矣。又有三老。有秩。嗇夫。與鄉佐分司治化。甚美備也。至隋開皇十五年。罷州縣鄉官。唐初復置。凡百戶爲一里。里置正一人。五里爲鄉。置耆父一人。以耆年平謹者縣補之。亦曰父老。貞觀九年。鄉置長一人。佐二人。十

五年復省然耳目記云新昌令夏侯彪之初下車問里正曰又杜甫詩來時里正爲裏頭是皆天寶以後事仍有里正名意者鄉長省而里正仍存歟然自唐以來鄉官之制名雖存而實則廢凡里正等吏僅以供縣官驅役差徭奔走其猥賤與皂隸同凡士人無爲之者訖明清皆如此周官之美意破壞盡矣非若漢末以陳實之大賢亦可爲亭長也見三國志注

古鄉官之於風俗關係

周鄉官所謂州長黨正族師閭胥屬大夫鄙師鄴長里宰鄰長遂大夫等皆鄉官政教兼理主知民善惡爲役先後知民貧富爲賦多少考德行察道藝至三年則比而興起賢者能者賓禮之否則糾其過惡而戒之故教化易成至漢則以鄉吏亭長嗇夫分司其刑政錢賦各事而別舉三老孝悌力田專掌教化凡有孝子順孫貞女義婦讓財救患及學士爲民式者皆旌表其門以興善行故司馬相如至蜀則讓責也三老孝悌以不教誨又尹翁歸傳至令民有骨肉爭訟旣傷風化重使三老受其恥處民師之地專教導之責激揚風化興舉孝廉善者無不能者無不達訖至東漢社會風俗之淳良人民氣節之高尚遠非三代所能及人徒見漢末亂而忘之耳豈知政亂於上而風清於下無善行而不彰無文學而不達者則以此鄉官激揚褒舉之力也嗚呼盛哉

周因鄉制善盜賊姦宄逃亡無所容

韓非子溫人之周周不納客問之曰客也對曰主人問其巷人而不知也更因因之君使人問之曰子非周人也而自謂非客何也曰臣少嘗誦詩曰普天之下莫非王土率土之濱莫非王臣今君天子則我天子之臣也豈有爲人臣而又爲客哉君使出之又管子夫善牧民者非以城郭也輔之以什司之以伍伍無非其人人無非其里注謂無客寄里無非其家故奔亡者無所匿遷徙者無所容不求而約不召而來因亡故民無流亡之意更無備追之憂觀是則周時盜賊姦邪無所容身凡行旅而無保證者隨所至而立困而比閭族黨組織之尤要者二十五家之內必有總門以爲出入而門必有監以爲稽查人徒嘗商君法嚴無驗者逆旅不納而不知盛周卽如此也又周時社會奴僕待遇慘酷極矣而無一亡者誠以其時鄉制善逃亡無所入不待出境即可緝獲卽能出境亦旋卽被囚故不敢逃卽逃亦自歸也

卷十六

行唐尙秉和著

祠祭

郊天用牛須卜牛口傷卽不用

左傳宣三年春王正月郊牛之口傷改卜牛牛死乃不郊按郊者祭天也惟天子得郊天魯以周公之故亦得郊天而郊必用牛牛必卜祭義君召牛擇其毛而卜之吉然後養之是也而牛或微傷卽不用而改卜牛若死卽不郊一若天神惟牛是重牛口雖小傷天卽厭之者故寧不郊而不敢以有眚之牛祭也

牛角傷亦不敢郊

左傳成七年春王正月鼷鼠食郊牛角改卜牛鼷鼠又食其角乃免牛按鼷鼠極微細玉篇云螢毒食人及鳥獸皆不痛本草陳藏器曰極細卒不可見食人及牛馬成瘡不覺然則食郊牛角其傷極細微矣亦改卜不用其視牛之重如此

祭宗廟亦以牛爲重至衣以文繡

高士傳莊周曰子不見郊祭之牛乎衣以文繡食以芻菽又史記老莊列傳養食之數歲衣以文繡是旣

爲犧牛。平日養之。卽衣以文繡也。

牛入廟時爲牛歌舞

祭統。君迎牲。又周禮地官封人。凡祭祀歌舞牲。注君牽牲入廟。隨而歌舞之。言其肥香以歆神。是牲之入廟君須迎。牲迎而牽之。佐以歌舞。若曰牛肥香可愛。人見之而歌舞神見之。當亦愉悦如人也。

犧牛之尊貴

祭義。君式齊牛。曲禮。國君下齊牛。言君而卿大夫可知矣。意謂此爲祖宗所享之牛。故道遇之必式。以致敬也。

凡祭牲皆衣以文繡

周禮夏官羊人。凡祭祀飾羔。又小子職。凡沈祭川。辜磔祭。侯禳侯四時惡氣。禳去之。飾其牲。注飾者飾之以續。續者文繡也。是除牛牲外。凡豕牲。羊牲。犬牲。皆以文繡飾也。

古以牛爲質禱病

韓非子。秦昭王病。百里買牛而家爲王禱。按此係百姓聞王病。買牛質於里社。而爲王禱。病愈。殺牛以祀神也。

古以牛祭燕子

月令仲春玄鳥至。至之日以大牢祠于高祿。天子親往。注玄鳥燕也。高辛氏之出。玄鳥遺卵。簡狄吞之。因孕生契。詩所謂天命玄鳥降而生商是也。後王以爲媒官嘉祥而立其祠。大牢者牛祭也。

古以犬爲祭牲或伏瘞或磔

周禮大人掌犬牲。凡祭祀供犬牲。伏瘞亦如之。注。伏犬以王車轍之。卽轍祭也。又月令磔犬於城門。按犬肉後世人不食已久。誰復以祭神。而周時大祭皆用之。不惟大祭。凡尋常禳除不祥之舉。無不以犬較他牲用。尤多豈以其腥惡爲馨香歟。可見古今人食品之異。

古祭時以香草達馨香

周禮天官祭祀共蕭芳。按蕭者香草也。詩取蕭祭脂郊特牲蕭合黍稷臭陽達於屋壁亦以縮酒。

古祭先必以尸尸服亡者之服

祭統孫爲王父尸。周禮春官司服若將祭祀則各以其服授尸。曾子問祭必有尸乎。孔子曰祭成喪者必有尸。尸必以孫。孫幼則使人抱之。無孫則取於同姓可也。宋程顥曰古人祭祀用尸義極深。人之魂氣既散必求其類而依之人與人既爲類骨肉又爲一家之類。至誠相通以此求神宜其享之後世以尊卑之勢遂不肯行。按程子所說尸義極爲深至論語鄉人讎孔子朝服而立於阼階。讎者黃金四目狀極凶惡入人家室內驅逐疫鬼。孔子恐并驚廟神故立阼階俾祖宗來依。是其事與尸異而理則相通要其使鬼。

神以子孫爲憑依則一也。

戶之坐位

朱子曰。神主之位東嚮。戶在神主之北。又晏子春秋。戶坐堂上不席。以憂故也。據是。則戶坐於神主之左。以便神依以享祭。故憂惕而不席也。

爲戶之光榮

詩皇戶載起。鼓鐘送戶。又曾子問。戶弁冕而出。卿大夫皆下之。孟子敬叔父乎。敬弟乎。彼將曰敬叔父。曰弟爲戶則誰敬。彼將曰敬弟。是子孫而爲戶。凡祭者遇之。皆致敬也。

古以石函藏主

左傳哀十六年。及西門。使人反祏於西圃。注。祏藏主石函。孔悝去國。故載石祏而去。按。孔悝亡命去國。倉皇奔竄。而仍載石函。與主同去。古人視主之重如此。

古祭必以祝史致禱詞

周禮春官太祝。下大夫二人。上士四人。小祝中士八人。喪祝上士二人。又新序中行寅將亡。乃召其太祝而欲加罪焉。曰。子爲我祝。犧牲不肥澤耶。戒齋不敬耶。使吾國亡。又左傳桓六年。祝史正辭信也。
君美不虛稱

神豐而疾病。是祝史之罪也。諸侯不知其謂我不敬。君曷誅於祝。固史歸以辭賓。按杜注。詳稱功德。以欺鬼神曰矯舉。然則祭時祝詞皆太祝爲之。卽各項祭品亦皆祝史省視。然因亡國而罪太祝。病不愈而殺大祝。亦可謂迷信之甚矣。

古祭先齊戒之誠

禮祭義齊之日思其居處。思其笑語。思其志意。思其所樂。思其所嗜。齊三日乃見其所爲齊者。祭之日肅然聞乎其聲。出戶而聽。愾然必有聞乎其歎息之聲。按人鬼相通。誠而已矣。必如是而后精神通。神來享。否則神不接也。

古庶人不得立宗廟不能用牛羊豕祭服則尚黃

禮哀公問。待年而食者不得立宗廟。王制庶人祭於寢。春薦韭。夏薦麥。秋薦黍。韭以卵。麥以魚。黍以豚。稻以雁。按待年而食者農夫力田者也。古士以上始得立廟。庶人無廟。祭於家。且祭品亦不得用大牲。貴賤之界分如此。又王制黃衣黃冠而祭。息田夫也。又野夫黃冠。黃冠草服也。按野人應白衣而祭。則用黃殊不得其義。

周年終大蜡之盛況

周禮地官國索鬼神而祭祀。則以禮屬民而飲酒於序。以正齒位。又禮雜記子貢觀大蜡。孔子曰。賜也樂

乎。對曰：一國之人皆若狂。賜未知其樂也。子曰：百日之蜡。音乍一日之澤，非爾所知也。張而不弛，文武弗爲也。弛而不張，文武弗爲也。一張一弛，文武之道也。郊特牲云：蜡者索也。歲十二月合聚萬物而索饗之也。按歲終合萬神而祭之，以爲報賽。祭罷國人大饗而會飲於序。月令孟冬所謂大飲，悉是也。歡呼舞蹈之其狀若狂。百日蜡一日澤者，言勤勞稼穡有百日之久，而娛樂祇一日也。張弛者，以弓爲喻。用則張，不用則弛，喻民勞逸須相循環，不可偏。自文武以來，其道如是。然則周時每至歲終，大蜡之日，全國人歡欣鼓舞，如醉如狂。其盛狀可想矣。又詩豳風十月，滌場朋酒斯饗。曰殺羔羊，躋彼公堂。稱彼兕觥，亦大蜡。飲之况也。

秦仍年終大蜡

禮運孔子與于蜡賓。注夏曰：清祀。商曰：嘉平。周曰：蜡。秦曰：臘。又韓非子秦襄公有病，百姓爲之禱。病愈，殺牛塞禱。郎中闔遇公孫衍出見之曰：非社臘之時也。奚自殺牛而祠社？是可證秦至臘日卽殺牛索饗。百神與周之大蜡同也。

社祭

禮祭義王爲羣姓立社。如北平先農壇曰太社。王自爲立社。如中央公園社稷壇曰王社。諸侯爲百姓立社。曰國社。自立社曰侯社。大夫以下成羣立社。曰置社。注社所以祭后土先農也。

古二十五家必有社

左傳哀十五年書社五百。商子曰：里有書社。史記索隱古者二十五家爲里。里各立社。書社者書其社之人名於籍也。

古以叢木爲社外圍以垣中有門

今之社祇有壇。古社旣築壇必樹以叢木。故所謂社者實攢木也。大戴禮千乘篇教其書社脩其灌廟。按毛詩傳灌木叢木也。呂氏春秋問其叢社。叢社亦叢木。注古者皆以社爲叢。叢卽灌也。又墨子三代聖主其始建國營都必擇木之脩茂者立以爲叢位。注叢位卽叢社。又墨子季孫紹與孟伯常治魯國之政不能相信而祝於禁社。禁者叢字之訛。仍叢社也是以世說新語云阮宣子伐社樹有人止之。宣子曰：社而爲樹。伐樹則社亡。樹而爲社伐樹則社移矣。是社爲叢木之證也。惟周官鄭注云中攢木爲之外圍以垣。中有門。然則古社之概况與今同。祇多叢木耳。應璩書所謂虛社高木。梁元帝詩所謂叢林多古社者此也。

社樹必塗續采畫其實爲狐鼠之宅

韓非子桓公問管仲曰：治國災患曰社鼠。夫爲社者樹木而塗之。塗以文采鼠穿其間窟穴其中燻之則恐焚木灌之則恐塗弛。是社雖爲叢木木上必加塗續以爲飾也。弛者脫也。塗見水則脫。又世說謝幼輿謂

周侯曰。卿類社樹。遠望之峨峨拂青天。就而視之。其下則羣狐所託。下聚溷而已。然則社不惟爲鼠所穴。亦狐之窟宅也。

周時祭社之盛況

左傳公如齊觀社。韓非子非社臘之時也。奚自殺牛而祠社。是祭社必以牛也。又禮郊特牲。唯爲社事。單出里。注事祭也。單出里者。里人盡出祭也。是祭社之盛況。幾與大蜡同也。國民至是日。飲食歌舞。醉飽歡樂。其狀況可知矣。

祭社亦有戶

周禮士師職。若祭勝國之社。則爲之戶。按祭亡國之社。尙有戶。祭當代社。更有也。

古春秋兩季祭社

月令仲春擇元日。命民社。注元日者甲日也。天干甲爲首。故曰元。亦猶祓禊用己日也。無定日也。但祓用上己。茲未言上中。蓋視人事臨時擇定此春社也。周禮春官社之日。蒞卜來歲之稼。注云。卜來歲之稼。則社宜爲秋祭。按月令孟冬是月也。大飲烝。天子乃祁來年于天宗。大割祠于公社。是秋社在孟冬舉行。不曰冬而曰秋者。言秋事畢。百物斂藏。宜祭社以爲報也。月令天子祁來年於天宗。卽春官所謂蒞卜來歲之稼也。此秋社也。

社鳥不可犯

論語比考讖。子路子貢過社樹有鳥。子路搏鳥。社人牽子路。子貢說之乃止。是可見時人視社之重。雖社樹鳥亦不可犯也。

若亡國之社則上覆以屋不使見天陽

禮郊特牲。天子大社必受霜露風雨以達天地之氣也。是故喪國之社屋之不受天陽也。毫社北牖使陰明也。殷社又呂氏春秋狐援說齊宣王曰。殷之鼎陳於周之廷。其社蓋於周之屏。亡國之社不得見於天。王必勉之。無使太公之社蓋之屏。注屏障也。言屋其上也是亡國之社。上覆以屋而北其牖。不使見天日。變陽而爲陰。若現代之社。則暴露之使受霜露風雨也。然此皆爲國社。里社則私社也。私社則否。

凡盟必于社

墨子齊有二人訟者久不決。乃使之人共一羊。盟齊之神社。二子許諾。於是浊欲同搘。撫羊而灑其血。蓋古人以社爲明神所憑。依事不能決。雖官吏亦無如何。則使對神盟詛。以濟法律之窮。周禮秋官所以有司盟之職。專掌百姓盟詛之事也。

又聽陰不訟則在亡國舊社

周禮地官媒氏。凡男女之陰訟。聽之於勝國之社。注亡國之社。奄其上而棧其下。陰訟者中毒之事。不欲

暴其情。故於此聽之。按此最爲仁政。淫穢之事不暴其情。則廉恥可保。勝國社上皆屋而少牖。光陰晦而不明。於此聽陰訟。恰與事相應也。

漢社日分肉

史記陳平傳。里中社。平爲宰。分肉甚均。父老曰。善。陳孺子之爲宰。按此係祭罷而分其胙肉也。雖未言其情狀。然是日之爲社會佳節。無疑也。又眭弘傳。昌邑有枯社。臥木復生。又蔡邕集有陳留東昏庫上里社碑記。是必始築社成。請中郎記其事。其重可想。

漢仍春社秋社

漢書五行志。建昭五年。兗州刺史浩賞禁民私所自立社。張宴曰。民間三月九月立社。號曰私社。舊五家爲一社。而民或十家五家共爲田社。故禁之。

漢亦爲人立社

史記欒布傳。燕齊之間。皆爲立社。號曰欒公社。蓋西漢時除皇家外。尙無爲人立祠廟者。故曰社也。若後漢則有爲賢人君子立廟之事。如王喬傳。乃爲立廟。號葉君祠。是也。

六朝唐宋社日仍盛

魏書王修傳。毋以社日亡來。歲鄰里社修感念哀痛。鄰里聞之。爲之罷社。唐杜甫詩。今年大作社。拾遺能

住否。宋墨莊漫錄云：今人家閨房遇春秋社日，不可組紝，謂之忌作。故周美成秋蕊香詞云：聞知社日停鍼線。觀以上諸證，自六朝以迄唐宋，社日之盛況，仍與周秦兩漢同可謂久矣。至歷代詩人言社者尤多，不可枚舉。略而不書，其能爲社會狀況證者。

周以甲日社後代社日用戊巳日

月令擇元日令民社。是周秦用甲日社也。埤雅云：燕之往來避社，而嫌土不以戊巳日築口布翅支尾。是後代又以戊巳日社，惟不知始於何時耳。

卷十七

行唐尙秉和著

學校

歷代學校制度通攷等書紀之詳矣茲所欲知者乃學子在校起居飲食洒掃應對進退誦讀諸狀況而非其制也全書宗旨如此而學校尤甚

周時鄉校校規

管子弟弟子職少者之事夜寐蚤作既拚盥漱盥潔手漱滌口執事有恪攝衣共供同盥先生乃作沃盥徹盥既盥器汎拚正席謂汎水先生乃坐出入恭敬如見賓客危坐鄉同向師顏色毋怍此晨起侍先生盥漱洒掃及出入坐起之狀況也顏色毋怍者言幼年學子對先生常有羞縮不安之態於威儀不方雅視瞻太拘促蓋古人學規雖嚴肅絕不欲使弟子不活潑欠雍容故首舉以爲戒

授課規程及誦讀儀式

又云授業之紀必由長始注先從長者教一周則然其餘則否注一周之外不必從長始始誦必作起立其次則已

次誦則不作

按古人最重長幼故授業亦以長者爲先

言行坐作應對賓客及請業儀式

凡言與行思中以爲紀。注：和中。思合古之將興者必由此始。後至者則當起。後至者則當起。見若有賓客。弟子駿迅也。作對客無讓。應且遂行。趨進受命所求雖不在必以反命。注：言反白。言。反坐復業。若有所疑。捧手問之。師出皆起。按對客周旋。弟子與弟子不必遜讓。遜讓反慢客矣。應直且字。疑直之訛。遂逕行。古人講求威儀。詳密如是。

弟子餽食陳列食品儀式

至於食時。先生將食。弟子饌饋。注：選具攝粧盥漱。跪坐而饋。置醬錯食。陳膳毋悖。凡置彼食鳥獸魚鼈必先菜羹。
注：先菜後肉。食之次也。羹哉細切肉音恣。中別哉在醬前。其食要方。注：陳列食器。要令成方。飯是爲卒。言最後具飯。左酒右漿。告具而退。奉手而立。按告具而退者。具者備也。陳食既備。告先生食也。奉手而立者。侍食於旁也。

弟子侍食儀式及禮節

三飯二斗。左執虛豆。右執挾匕。周還而貳。惟嗛以齒。周則有始柄尺不跪。是謂貳紀。先生已食。弟子乃徹。趨走進漱。拚前板祭。按三飯二斗者。言飯畢即易斗以取潔。如今之食番菜。每菜易器也。虛豆者。備承接。淋漓挾者箸也。與七同爲取食之器。貳者再益。嗛者盡也。同盡再以次再益。柄尺不跪者。言豆有柄長尺。則立而進之。拚前板祭者。拚者掃也。板者斂食之器。板祭者。言以板斂祭品也。公羊傳。蛾而刻。

其板與此板同也。至此而弟子侍食之禮畢。

弟子會食禮節

先生反命。弟子乃食。以齒相要。坐必盡席。注・所謂食飯必捧擊羹不以手亦有據膝毋有隱肘。坐盡前。既食乃飽。循咡復手。注・咡・口也。覆手而循之。所以拭去不潔也。振衽掃席。已食者作摵衣而降。旋而嚮席。各徹其饋。如於賓客。旣徹。并器乃還而立。注・并謂藏去也。按。飯必捧擊者。曲禮云。共飯不澤手。注古禮。飯以手不以箸。故云捧擊也。有據膝。毋隱肘者。言食時態度。俯仰適中也。

洒掃儀式及規矩

凡拚掃也之道。實水於盤。注・備泛洒。攘臂衽及肘。注・恐濕袂。堂上則播洒。室中握手。注・堂上寬。故播散而洒。室中隘。故握手掬水洒。執箕膺搆。舌也。厥中有帚。注云・既洒水將掃。故執箕當舌。置帚於箕中也。入戶而立。其儀不忒。執帚下箕。倚於戶側。注・謂倚箕子。戶側也。凡拚之紀。必由奧始。西南隅。俯仰罄折。拚毋有徹。動也。不得觸動他物。拚前而退。聚於戶內。坐板排之。坐板者。臥板也。以葉以板。排出穢。是協是稽。按。坐板排之者。舊注謂板穢。時以手排之。以板爲除義似不協。余謂坐板者。非人坐。乃臥板於地。排穢其上而出之也。讀此文。古弟子洒掃細節。如目睹矣。

弟子在塾夜間執燭狀況

昏將舉火執燭隅坐錯總薪束之法橫於望所櫛據禮記注爲壘之遠近乃承厥火居句如矩蒸網薪間容蒸然者處下捧椀以爲緒燭灰右手執燭左手正櫛據禮記鄭注引有墮代燭交坐毋背尊者乃取厥櫛當爲折壘當爲遂出是去此節詳解皆在燈燭門聖者燼也交坐毋背尊者言毋蔽尊者明也

夜寢時弟子侍枕席禮節

先生將息弟子皆起敬奉枕席問何所趾始也衽則請有常則否改衽席問何趾先生既息各就其友相切相磋各長其儀周則復始是謂弟子之紀按紀者綱紀也今謂校規古謂之紀吳云是蓋周時通行全國之鄉校規程未必爲齊所獨有

按周秦文可以考求當時社會情狀者除曲禮內則昏禮諸篇外以此爲最詳矣真第一寶書也讀之若身遊成周時鄉校而參觀也

古學校之等級 學子按等遞升與今同

禮學記古之教者家有塾黨有庠術爲遂應有序國有學按五百家爲黨萬二千五百家爲遂是升學次敍由庠而序由序而國學也但黨之下爲閭閭亦有學孔疏云黨庠乃教閭中所升者但閭學何名禮無明文殆如今之小學也

禮學記。比年入學。中年考校。一年視離經辨志。向其企三年視敬業樂羣。五年視博習親師。七年視論學取友。謂之小成。九年視知類通達。強立而不反。謂之大成。夫然後足以化民易俗。按比年入學者。年年有來學之人也。中年考校。注中者間也。言於入學期間。常考其德行道藝也。離經者。謂離析經理。使章句斷絕。視其能解未也。辨志者。視其企向何經也。一年級之事也。若三年級則視其能敬業樂羣與否。視一年級有進矣。五年級則視其能博習羣經。親愛本師。與否。視三年級有進矣。七年則視其論學取友能合道與否。視五年又進矣。九年則視其能知類通達與否。果能於事類之通變洞達無遺。又能自立臨事而不惑。則學成矣。故可使化民成俗也。

三代大學小學之位置

禮王制。有虞氏養國老於上庠。養庶老於下庠。夏后氏養國老於東序。養庶老於西序。殷人養國老於右學。養庶老於左學。周人養國老於東膠。養庶老於虞序。虞序在國之西郊。注上庠。東序。右學。東膠。皆大學也。皆在國內。王宮東下庠。西序。左學。虞序。皆小學也。皆在西郊。惟殷人相反。大學在西郊。小學在王宮東也。

古學校亦爲鄉老飲酒游息習禮之地

左傳襄十三年。鄭人游於鄉校。以論執政。然明謂子產曰。毀鄉校何如。子產曰。何爲。夫人朝息退而游焉。

又周禮地官國索鬼神而祭祀則以禮屬民而飲酒於序以正齒位注正齒位者鄉飲酒義所謂六十者坐五十者立侍六十者三豆七十者四豆八十者五豆九十者六豆是也必正之者爲民三時務農將闕于禮至此農隙而教之尊長養老見孝悌之道也此以後世社會窺測於學校之中而養老而飲酒而父老游息且賓興於是鄉射於此似於校務有妨矣而不知古人所謂學非第講誦也凡長幼進退揖讓之節飲酒習射齒位尊卑俎豆多寡之分其禮式皆於學校舉行使弟子及國民得觀摩講習之益而國家養老又恆于校中則謂古學校爲公共習禮之場所可也

戰國時學宮仍以習禮爲重

列女傳孟母其舍近墓孟子之少也嬉遊爲墓間之事踴躍築埋孟母曰此非吾所居乃去舍市旁其嬉戲爲賈人街賣之事孟母又曰此非吾所以居處子也後徙舍學宮之旁其嬉遊乃設俎豆揖讓進退孟母曰真可以處吾子矣

漢師教授必居帳中

漢書董仲舒傳爲博士下帷講誦弟子傳以次相授業或不見其面又後漢馬融傳融才高博洽爲世通儒教養諸生常有千數常坐高堂施絳紗帳前授生徒後列女樂弟子以次相傳鮮有入其室者是兩漢經師教授者皆設帳也

漢時學校弟子賃人作食

漢書兒寬傳。詣博士受業孔安國。貧無資用。常爲弟子都養。時行貨作帶經而鉏。休息輒讀誦。按都養者。師古曰。都。凡衆也。養。主給烹炊者也。貧無資用。故供諸弟子烹炊。又世說服虔既善春秋。將爲注。欲參攷同異。聞崔烈集門生講傳。遂匿姓名爲烈門人。賃作食。每當至講時。輒竊聽戶壁間。蓋漢時經師門下。常有數百人。其貧者自炊。其富者賃人作炊。與今同也。

古入學必與師以資

拾遺記。賈逵來學。不遠萬里。或襁負子孫。舍於門側。皆口授經文。贈獻者積粟盈倉。世謂舌耕。魏志。邴原傳。注原十一而喪父。鄰有書舍。原過其旁而泣。師問曰。何悲。原曰。孤爲易傷。貧爲易感。夫書者必具有父兄者。一則羨其不孤。二則羨其得學。心中惻然而爲涕零也。師亦泣曰。欲書可耳。答曰。無資。師曰。童子苟有志。我徒相教。不求資也。原遂就書。是漢末就師求學者必與師以資以爲報。又北史賈思伯傳。初。思伯與弟思同。師事北海陰鳳。業竟。無資酬之。鳳遂質其物。時人爲之語曰。陰生讀書不免癡。不識陰鳳脫人衣。是六朝時學子仍以資酬師。與後世同也。

古弟子禮師須北面

漢書于定國傳。定國爲廷尉。乃迎師學春秋。身執經北面備弟子禮。

自唐虞三代以來。閭里以上皆有校。校弟子之優秀者。每年以次升學至大學而止。略如今日學制。由初級小學而高等。而初中。而高中。而大學也。而統名之曰庠序。里人習禮於此。游息於此。大和會於此。則今稍異。官校既多。無私人講學者。以故春秋以前之學人。無有師弟受授之說。至春秋末棄兵戎。興賦稅。視重鄉校。儻於是私人講學之風漸盛。孔子其首出者也。孔子之徒三千。身通六藝者七十二人。而七十二人之中。若曾子。有子。子張。子夏。子游。又各有徒黨傳業。訖於漢代。只明一經。即有弟子。其大師門下。恆數百人。或千餘人。自是以來。私塾益昌。其所謂官學者。形式而已。由兩漢至明清。二千餘年。形狀如一。可謂數二。久矣。至清末學校興。私塾廢。形式始變也。

卷十八

行唐尙秉和著

農田

三代井田狀況

韓詩外傳古者八家而井田方里爲井廣三百步長三百步六尺一步一里其田九百畝廣一步長百步爲一步一畝廣百步長百步爲百畝八家爲鄰家得百畝餘夫各得二十五畝十畝廣二十畝共爲廬舍各二畝半八家相保出入更守疾病相憂患難相救有無相貸飲食相召嫁娶相謀漁獵分得按經傳言井田者多矣無如韓詩之簡當明了井字形共爲九區區各百畝八家分占中央爲公田八家爲公家各種十畝共八十畝餘二十畝各得二畝半以爲田廬詩曰雨我公田遂及我私又曰中田有廬中田者公田也井字之中也

井與井間之水道溝洫

攷工記匠人九夫爲井井間廣四尺深四尺謂之溝方十里爲成成間廣八尺深八尺謂之洫方百里爲同同間廣二尋深二仞謂之澮專達於川各載其名注載其名識水所從出也按溝洫澮川皆由小水以

達于大水偶值水潦水易洩不至爲災。

井與井間之道路

周禮地官遂人凡治野夫間有遂遂上有徑注云二尺可容牛馬按夫間者百畝與百畝之間也徑二尺可容人與牛馬行也又十夫有溝廣深各四尺溝上有畛深廣各一尺畛上有涂容乘車百夫有洫容乘車八尺洫上有渠容三軌千夫有澗深廣各一尺澗上有道容二軌萬夫有川川上有路容三軌以達于畿按溝洫澗川卽匠人所營之水道而水道之上爲徑涂道路亦隨水道而遞廣以便行人車馬往來以達于王畿

按井田之制溝洫澗川一縱一橫其中阡陌亦一南一東十字相交一以防水潦一以限戎馬設險要故左傳成二年晉與齊平要齊之封內盡東其畝言使壘畝盡東西行晉伐齊循壘東行軍行甚易齊人所謂唯吾子戎車是利不顧土宜是也若南東其畝則戎車不利矣然溝洫之制不始于周書濬畎澗距川論語禹盡力乎溝洫觀是自夏后以來卽經營溝洫自禹至周非一人之力一時所成其壞也自周至秦其由來已久非一時之力觀左傳襄十年子駟爲田洫司氏堵氏侯氏皆喪田焉是井田之壞春秋中葉已然世謂始于商鞅開阡陌李悝盡地利者誤也然則三代時農田狀況與今迥殊讀周禮如目覩矣

古按都邑室數授田田下者可多授

周禮地官凡造都鄙制其地域而封溝之以其室數制之不易之地家百畝一易之地家二百畝再易之

地家三百畝。按古之人民盡居都邑。故按室數授田。而田有高下。上田授百畝。每年可種不易之田也。息一年一種者爲一易。息二年一種者爲再易。封溝者四境界上以溝洫爲封。樹木以爲阻固。蓋古者地廣人稀。而國與國鄰。必有疆界。封樹以爲標識。且以阻交通。限戎馬。至後代人口增多。而阡陌溝洫占地頗廣。故商鞅開阡陌以益田也。阡陌者溝洫上之道路也。

古農民夏日出而就田狀況

詩中田有廬。疆場有瓜。是剝是菹。正義云。古者宅在都邑。田於野外。農時則出而就田。須有廬舍。故言中田。謂於田中作廬。又於田畔種瓜也。按正義釋中田。誤中田者。公田居一井之中。故曰中田。言廬于井之正中也。

又漢書食貨志。春將出民里胥平旦坐於右塾。里門側之堂。鄰長坐於左塾。畢出然後歸。夕亦如之。注里胥鄰長坐於門側者。督促勸之。知其早宴防怠惰也。

古農畢歸都邑狀況

詩穹窒薰鼠。塞向墐戶。嗟我婦子。曰爲改歲。入此室處。鄭箋。穹窮室塞。向北出牖。墐塗。言旣窮塞。室內孔穴。薰鼠而出之。更塞北向牖。以備朔風也。按此言秋後農事畢。將由田廬而歸都邑。預先修治邑中住室。以爲歲莫禦寒計也。

牛耕攷

隨園隨筆云。賈公彥以爲古無牛耕。牛耕始于漢趙過。故周禮牛人之職。不言耕事。然山海經曰。后稷之孫叔均作牛耕。孔子弟子冉耕字伯牛。似乎三代時已有牛耕矣。嚴冬友曰。平原君云。秦以牛田之水通糧。當爲牛耕之始。故呂氏春秋季春出土牛示農耕早晚。此其國俗也。又史記律書牛者耕種萬物也。按以牛耕地。周以前載記實無明文。然冉耕字伯牛。實牛耕之確證。謂始於秦者。蓋不然也。後之人又謂始於漢趙過者。乃魏賈思勰之誤。思勰齊民要術序云。趙過始爲牛耕。唐賈公彥承其說。豈知漢書食貨志言趙過爲代田用耦犁二牛三人耕。蓋變通牛耕之法。非創始牛耕。又賈誼當文帝時。前於過遠矣。而有百姓煦牛以耕。曝背而耘之語。此又一確證也。又論語。犧牛之子辟且角。注犧雜色也。然犧字各字書皆訓耕。吾以爲犧牛卽耕牛。耕牛勞苦最爲下等。故以爲喻。又食貨志。民或苦少牛。無以趨澤。故平都令光教過以人輓犁。若過以先無牛耕。皆人輓犁焉。用教哉。此尤確證也。

古農婦餉耕狀況

詩幽風同我婦子。餩彼南畝。又其餩伊黍。又左傳僖三十三年初。臼冀使過冀。見冀缺耨。其妻餩之敬。相待如賓。按餩者餽也。男耕於野。婦往餽食。同我婦子者。言婦餩田。并携其幼子也。是蓋春初耕作。尙未移居于田廬時也。若已往田廬。則一井之地。距廬甚近。無庸餩也。

古灌園以桔槔

莊子子貢南遊楚見漢陰丈人抱甕而灌子貢曰有械於此一日浸百畦用力寡而見功多夫子不欲乎爲圃者印同仰而視之曰奈何曰鑿木爲機後重前輕挈水若抽數加沃湯其名曰槔又史記田單傳苦人求潛王子法章得之太史嬾之家爲人灌園又鄒陽傳於陵子仲爲人灌園

古鋤苗去留規矩

呂氏春秋凡禾之患不俱生而俱死是以先生者美米後生者爲粃是故其耨鋤也也長其兄而去其弟注殺小留大不知稼者則去其兄而養其弟不收其粟而收其粃按今日鋤苗者有諺語曰檢苗如上糞言鋤時檢擇大者留之其功效如益一次糞也不知古人於數千年前早有此研究又漢書食貨志苗生葉以上稍耨隴草因墳其土以附苗根故其詩曰或芸或耔黍稷儼儼芸除草也耔附根也言苗稍壯每耨輒附根比盛暑隴蓋而根深能耐也風與旱故儼儼而盛也此可見我國農業在上古時代講求已極精徒以儒家向不保存農學書籍至使三代農書盡歸散失至可慘痛茲呂氏所述乃千百之一周秦書所僅見者耳

古農家種苗不地不時不行之防備

呂氏春秋其爲晦畝同也高而危則奪澤陂則塉按爾雅山上有水脉疏云停泉陂則塉言低則停水也舊注非見風則僶仆也高培則

拔寒則雕。同凋。熱則脩。長也。一時而五六死。故不能爲不。不俱生而俱死。虛稼先死。虛根不實。衆盜乃竊望不粟。是不地害稼也。又所謂今之耕也。營而無獲者。其早者先時晚者不及時。寒暑不節。稼乃多蓄實。是不時害稼也。又四序參發。大畊小畝爲青魚肱去也。苗若直獵。地竊之也。既種而無行耕而不長。則苗相竊也。弗除則蕪。除之則虛。則草竊之也。故去此三盜者。而後粟可多也。是不行之害也。知其害則知防矣。

古窮民在田拾穗狀況

詩彼有不穡穧。此有不斂穧。彼有遺秉。此有滯穗。伊寡婦之利。注穧禾之鋪而未束者。秉把也。主人不暇取。寡婦得据拾之也。又列子林類年且百歲。拾遺穗於故畦。又魏略焦先不踐邪徑。必循阡陌。及其据拾。不取大穗。又後漢范冉傳。遂推鹿車載妻子。据拾自給。是窮民拾禾稼。自古有之。惟周時只云寡婦。不云男子。以其時民年二十卽授田。而寡婦則無田可耕。故拾穗也。若後世之窮者。則不惟寡婦。此亦社會之一小變態也。

周時農民之概況

盛周農民概況。經傳言之詳矣。而漢書食貨志。則總括經傳禮記等書。敍述尤明了。大哉班書。真千古第一良史也。志云。理民之道。地著爲本。故必建步立畝。正其經界。六尺爲步。步百爲畝。畝百爲夫。夫三爲屋。

屋三爲井，井方一里。是爲九夫，八家共之。各受私田百畝，公田十畝。是爲八百八十畝，餘二十畝以爲廬舍。出入相友，守望相助，疾病相救。民是以和睦而教化齊同，力役生產可得而平也。民授田上田夫百畝，中田夫二百畝，下田夫三百畝。歲耕種者爲不易，上田休一歲者爲一易。中田休二歲者爲再易，下田三歲更耕者自爰其處。農民戶人已受田，其家衆男爲餘夫，亦以口受田如此。士工商家受田五口乃當農夫一人。此謂平土可以爲法者也。若山林藪澤原陵淳鹵之地，各以肥磽多少爲差。民年二十受田六十歸田，七十以上上所養也。十歲以下上所長也。十二以上上所彊也。種穀必雜五種，以備災害。田中不得有樹，用妨五穀。力耕數耘，收穫如寇盜之至。懼天還同環。廬樹桑菜茹有畦，瓜瓠果蓏殖於疆易。鷄豚狗彘毋失其時。在墾曰廬，在邑曰里，五家爲鄰，五鄰爲里，四里爲族，五族爲黨，五黨爲州，五州爲鄉，鄉萬二千五百戶也。鄰長位下士，自此以上稍登一級，至鄉而爲卿也。於里有序而鄉有序，以明教庠則行禮而視化焉。春令民備出在墾，冬則畢入於邑。其詩曰：「四之日舉止。同趾同我婦子，饁彼南畝。又曰：十月蟋蟀入我牀下。嗟我婦子，聿爲改歲。入此室處，所以順陰陽，備寇賊，習禮文也。春將出民，里胥平旦坐於右塾，鄰長坐於左塾，畢出然後歸。夕亦如之。入者必持薪樵，輕重相分。可見春時尙不出居田廬。班白不提携，冬民旣入婦人同巷，相從夜績。女工一月得四十五日。半夜同半日必相從者，所以省費燎火，同巧拙而合習俗也。男女不得其所者，因相與歌詠，各言其傷。按經傳言，周時農民生活狀況者甚多，然皆散漫不具。此文於授田歸。

田之制。春出田廬農作。冬歸邑室度歲。及婦孺餽耕。南畝同巷。冬夜婦人績麻。各情狀。以次陳述。歷歷如繪。無一字不本於詩書禮經而源本詳悉。薈萃終始。讀之較經傳則爲明晰。故錄以爲殿。

若夫秦漢以來。田地爲民所私有。而可買賣。古民無鬻田者。趙馬服君之爲將。秦王翦之伐楚。皆先購良田。漢蕭何亦大購田。是其證也。田制既異。人口亦漸多。於是夏日出居田廬。冬日入居邑室之動作。亦漸不同。而野外邨居多矣。循是以來數千年間。不異其狀。故亦不再述焉。

卷十九

行唐尙秉和著

嫁娶

出妻禮節 再嫁妻妾當夕次敍附

周時有官媒

周禮地官媒氏掌萬民之判。注判半也。主合其半成夫婦。凡男女自成名以上皆書年月日名焉。令男三十而娶。女二十而嫁。凡娶判妻。出婦入子者。再嫁而攜其子。書之。以訟。以息爭。中春之月令會男女。于是時也。奔者不禁。司

男女之無夫家者而會之。又詩取妻如之何。非媒不得。又士昏禮。昏禮下達。注必使媒氏下通其言。昏必由媒交接。設介紹。皆所以養廉恥。蓋上古人祇知有母。不知有父。自伏羲定嫁娶之禮。以儼皮爲聘。人始有夫婦。有夫婦。然後有父子。始與禽獸殊。三代以來。更相沿飾。至周。遂有媒氏專官。于周未必始。專司判合之。事。凡男無家女無夫者。卽爲主婚。以王命會之。免其怨曠。一則保人廉恥。一則順民所欲。民有欲而爲廉恥。所拘不能自達者多矣。今媒氏以命令行之。俾鰥寡者各如其願。無私合之名。免淫奔之俗。於社會風化。所關甚大也。

春秋仍有官媒

管子凡國都皆有掌媒丈夫無妻曰鰥婦人無夫曰寡取鰥寡而和合之予田宅而家食之三年然後事之供國役此之謂合獨按掌媒卽周禮所謂媒氏也是春秋時仍有專官以理婚事也

婚期多於春日舉行

詩桃之夭夭灼灼其華之子于歸宜其室家又周禮地官中春之月令會男女于是時也奔者不禁按中春者仲春也夏歷二月也非周正周授民時仍用夏歷是時桃紅柳綠天氣和緩人民嫁娶多於是時其怨女曠夫則未免有情誰能遣此故雖奔而不禁此以證社會婚者皆于是時也

周議婚時禮節

古婚禮儀禮士昏禮言之詳矣而禮節太繁反不易參究茲擇經傳敍述簡括者明之

禮記昏義納采用雁問名生母納吉卜日納徵先納聘財請期期親迎皆主人几筵於廟而聽命於廟按今日定婚者男家須以財爲聘禮富貴人家祇衣服首飾而無現金貧者則以錢財多少爲爭議若周時則納財爲一定禮節又以婚姻爲人生第一大事故納采卜吉親迎無不告廟而行聽命于廟者凡卜必于廟卜得吉若祖宗所命也然後行之

古親迎必以夜衣服皆尚黑

儀禮士昏禮云昏禮下達鄭云士娶妻之禮以昏爲期因而名焉陽往而陰來日入三商爲昏疏三商者

刻漏之名。又云：主人爵弁縕裳縕衣，從者畢玄端乘墨車，從車二乘，執燭前馬，按下達者言陽下達於陰，古婚必男家先以媒妁求女家，必夜行者，言迎陰氣入家宜於夜，夜陰時也。車服皆尚黑，黑亦陰，正與時相稱。與今代嫁娶之尚紅者迥殊。又從車二乘，執燭前馬，惟以夜故，執燭輿前以爲導引。若今日白晝親迎，仍有綵燈執持行列，與告朔餚羊無以異，失其義矣。

親迎時禮節及新婦登輿時狀況

說苑諸侯以履二兩加琮，大夫士庶以履二兩加束脩二。曰：某國寡小君使寡人奉不珍之琮，不珍之履，禮夫人貞女。夫人曰：有幽室數辱之產，未諭于傳母之教，得承執衣裳之事，敢不敬拜祝，祝答拜。夫人受琮，取一兩履以履女，正笄衣裳而命之曰：往矣，善事爾舅姑，勿貳爾心，無敢回也。女拜乃親引其手，授夫乎戶，夫引手出戶，夫行女從，拜辭婦女母于堂，拜諸母於大門，夫先升輿執轡，女乃升輿，轂三轉，然後夫下先行，士大夫士庶稱其父曰：某之父某之師友，使某執不珍之履，不珍之束脩，敢不敬禮某氏貞女。母女母曰：有草茅之產，未習于織紝紡績之事，得奉執箕帚之事，敢不敬拜。是自諸侯至于士庶，親迎時所持禮物，或以玉或以束脩，可隨貴賤而差，獨履二兩，則無貴賤必具。且女臨登輿，其母卽以此履履女，亦無貴賤皆同。揆其用意，似此履爲男家所備女服，故將登輿，母必以此履履女，非若琮與束脩之純爲采禮也。然衣服首飾均不及而獨遺以履，意者新婦入門爲踐履之始，故獨重之歟。

古親迎時奠雁御車及新婦入門共牢合卺狀況

禮記昏義。父親醮注酌而無酬子。而命之迎。男先于女也。子承命以迎。主人几筵于廟。而拜迎于門外。女父醉曰醮。婿執雁入揖讓升堂。再拜奠雁。降出御婦車。而婿授綏。御輪三周。先俟於門外。三周即授。婦至婿揖婦以入。共牢而食合卺音謹以一瓠分爲兩瓢。名曰卺。各執其一。而醑食後以酒漱口。按古人以男女配陰陽。雁隨陽。故奠雁婿既爲婦御。又先馳歸備。迎婦於門外。牢者牲也。共牢者共食一牲也。古食罷以酒漱口。必以卺盛酒者。取合同之義也。今日婚者坐帳後飲交杯酒。蓋猶共牢合卺之遺意。而雁不易得。代之以鵝。亦曰奠雁。甚無謂也。

古入洞房將寢時男御女媵交換鋪陳臥席狀況

儀禮士昏禮。共牢合卺既徹。器饌主人說。同脫服于房。媵受婦說服于室。御受姆授巾。將寢清潔。御衽臥席于奥。媵衽良婿也。席在東。皆有枕北止。同趾。主人入。新增親說婦之纓。燭出。將寢故待者持燭出。媵餽主人之餘。御餽婦餘。贊酌外尊酙之。按夫婦將寢。故弛禮服。御者婿之侍者。媵則新婦侍者。婿衣媵受婦衣。御受示交接。有漸也。姆授巾。俾女備拂拭潔清也。良者良人。卽婿也。御爲婦鋪臥席。媵爲婿鋪臥席。仍交接之義。北趾者。足北嚮。至新婿爲新婦。脫纓。則晚妝俱卸矣。故侍者持燭出也。餽者食餘饌也。媵餽男。餘御餽婦。餘無一事。不以交接爲義。此等禮節。後世未見有行者。蓋亡已久矣。

天明新婦謁見舅姑儀式

古以夜昏。故婦不及見舅姑。至天明行之。禮記昏義云。夙興。婦沐浴以俟見。質明贊見婦於舅姑。執筭棗栗。脰脩以見。贊醴婦。婦祭脯醢。成婦禮也。舅姑入室。婦以特豚餽。明婦順也。按贊者。贊行禮之人也。古初見必以贊。婦人贊棗栗。筭者盛棗栗之器也。以豚餽者。新婦初爲舅姑上食也。婦道如是也。

第三日舅姑享新婦儀式

禮記昏義。厥明注又次日。舅姑共饗婦以一獻之禮。奠酬。舅姑先降自西階。婦降至阼階。以著代也。按昏之次日。婦旣見舅姑。舅姑於第三日卽饗婦。西階者。賓位。阼階者。主位。新婦居阼階。示自此授以室代爲家政也。故曰著代。又按韓詩外傳。厥明見舅姑。舅姑降自西階。婦升自阼階。授之室也。以降爲升。義尤明。當從外傳。

古嫁女後三夜不息燭。娶亦不賀。

禮記曾子問。嫁女之家。三夜不息燭。思相離也。取婦之家。三日不舉樂。思嗣親也。郊特牲。昏禮不賀。人之序也。是古不以嫁娶爲喜事。故不賀。而嫁女之家。尤相思念。有遠別之悲。趙太后。至持踵而泣。然取婦究爲喜事。曲禮已有賀。取妻之文。後代賀者。成爲風俗。不能以古禮繩。惟古時賀娶者有之。賀嫁者絕無。今則嫁女已賀矣。序者代也。

古新婦入門之眼波視態羞媚狀況

呂氏春秋白圭新與惠子相見。惠子說之以強。白圭無以應。惠子出自。白圭告人曰。人有新娶婦者。婦至。宜安。矜。煙。視。媚。行。暨。子。操。蕉。火。而。鉅。新。婦。曰。蕉。火。太。鉅。入。於。門。之。中。有。斂。陷。新。婦。曰。塞。之。將。傷。人。之。足。此。非。不。便。之。家。氏。也。然。而。有。大。甚。者。今。惠。子。之。遇。我。尙。新。其。說。有。大。甚。者。將。毋。類。是。按。安。矜。煙。視。媚。行。形。容。新。婦。之。狀。態。可。謂。入。微。矣。然。可。意。會。難。以。言。詮。安。者。從。容。矜。者。謹。慎。煙。視。者。眼。波。流。動。不。直。睨。媚。行。者。動。止。羞。縮。柔。媚。安。徐。也。是。皆。新。婦。初。入。門。之。狀。態。反。是。則。失。身。分。白。圭。所。言。者。是。也。

漢初女過期不嫁則有罰

漢書惠帝紀。女子年十五以上至三十不嫁。五算。應劭曰。欲人民繁息。漢律人出一算。算百二十錢。唯賈人與奴婢倍算。今使五算罪之甚也。按女子失時不嫁。不惟與生息有關。準之人情。亦大背盜。漢律五算之罰。殊不爲苛。以於風俗所關甚大也。

漢時賀婚成俗

漢書宣帝紀。五鳳二年詔曰。夫婚姻之禮。人倫之大者也。酒食之會。所以行禮樂也。今郡國二千石。或擅爲苛禁。禁民嫁娶。不得具酒食相賀。召令民無所樂。非所以導民也。按漢律三人以上。無故羣飲。罰銀四兩。吏因並嫁娶而禁之。故詔不許也。是可見民嫁娶具酒食相賀。召已成風俗。與周異。觀陳平傳。張負以

女孫與平爲平貧乃假貸幣以聘予酒肉之資以內婦是其證也

漢時新婚夜聽房狀況

後漢書袁隗妻傳初成禮。隗問之曰：南郡君馬融之父學窮道奧文爲詞宗而所在以財貨爲損何也。倫對曰：孔子大聖不免武叔之毀。子路至賢猶有伯遼之憩。家君獲此固其宜耳。隗又曰：弟先兄舉世爲笑。令姊未適先行可乎？對曰：妾姊高行殊邈未遭良匹不似鄙薄苟而已。隗默然不能屈帳外聽者爲慙據是新婚之夕於窗外竊聽新婦語及其動作以爲笑樂自漢時而已然也。

春秋時已有回門禮

今人嫁女彌月後與婿歸來號回門始于公羊傳高固及子叔姬來曰：何諸爲其雙雙而俱至者歟。是周時已有回門禮說見隨園隨筆。

漢時婚用青廬

世說魏武少時嘗與袁紹好爲游俠觀人新婚因潛入主人園中夜呼叫云有偷兒賊青廬中人皆出觀魏武乃抽刀刲新婦與紹還是新婚居青廬與周之用黑色車服爲義同也。

看新婦

隨園隨筆云：今人新婚親友看新婦按世說謝尚書娶諸葛恢之小女恢在時不允恢亡乃婚于是王右

軍往謝家看新婦。容服光整。猶有恢之遺風。是晉時已有此禮。

六朝時男家催妝及回門時女家打壻之惡習

西陽雜俎。北朝婚禮。青布幔爲屋。在門內外。謂之青廬。於此交拜。迎婦夫家領百餘人。或十數人。隨其奢儉。挾車俱呼新婦子。催出來。至新婦登車乃止。是男家之催新婦上妝。登輿甚暴戾也。又云壻拜閤日。謂回門。婦家新賓。婦女畢集。各以杖打聳即壻字。爲戲。至有大委頓者。是婚後壻往婦家。婦家亦戲虐新壻。以爲報也。然至打以杖謔亦甚矣。

隋唐時娶婦之詳禮

西陽雜俎。近代婚禮。富迎婦以粟三升。填白席一枚。以覆井。枲麻也。三斤以塞竈。箭三隻置戶上。婦上車聳騎而環車三匝。女將上車。以蔽膝覆面。婦入門。舅姑以下從便門出。更從門入。言當躡新婦迹。又婦入門先拜猪穀。概也。及竈。娶婦夫婦并拜。或共結鏡紐。又娶婦之家弄新婦。臘月娶婦。不見姑。又新婦乘鞍。讀此隋唐時娶婦禮節。如目睹矣。而其禮今無一存。惟交拜及弄新婦。尚不免耳。

唐婚時用曉

西陽雜俎。禮婚禮必用昏。以其陽往而陰來也。今行禮於曉。是唐時婚禮已不以夜。若今日則竟在日中矣。

六朝時南北重娶不重娶之異

顏氏家訓。江右不諱庶孽。喪室之後。多以妾媵終家事。癬疥蚊蟲。或未能免。限以大義。故稀聞鬪鬭之聲。河北鄙於側出。不預人流。是以必須重娶。至於三四母年。有少於子者。後母之弟。與前婦之兄。衣服飲食。爰及昏宦。至于士庶貴賤之隔。俗以爲常。按重娶之風。自周以來。有之凡爲後母所虐者。皆其父重娶者也。而非爲其子側出而不納妾。抑或六朝時。河北風俗如此乎。

宋時婚禮令婿坐馬鞍爲樂

歸田錄。今之士族。當婚之夕。以兩椅相背。置一馬鞍。反令婿坐其上。飲以三爵。女家遣人三請。而後下。乃高婚禮。謂之上高坐。凡婚家舉族。內外姻親。與其男女賓客。堂上堂下。竦立而視者。惟婿上高座爲盛禮。按今日河北人家。新婦下轎時。恆當門置一馬鞍。令從鞍上過。謂之登高。以取吉。宋時則施之于婿。且置於椅上。令婿上高座。座誠高矣。危亦甚矣。古今婚禮之有趣者。當以此爲第一。六朝之打聳。次之。周時之御媵。交換服侍。男女以爲交接之導引。又次之也。

漢時嫁女之早爲前後所未有

後漢書陰瑜妻傳。年十七適陰氏。班昭傳。年十有四。執箕帚於曹氏。漢書上官皇后傳。月餘遂立爲皇后。年甫六歲。按年十七出嫁者。今世亦有之。十四歲則罕矣。若六歲者。則古今未有也。

古人之輕于出妻 年五十無子必被出

儀禮士昏禮。姆鄭注云。姆婦人五十無子。出而不復嫁。能以婦道教人者。若今乳母矣。按婦人無子。豈其願哉。年五十將老矣。而被出。復何所歸。祇有爲傳之一途耳。古男子對於婦人。無情若是。苛薄若是。輕視人道。若此而不聞。聖人有所糾正。此一失也。

古箕踞出妻生子不類亦出妻因口舌或一聚栗而出妻

韓詩外傳。孟子之妻獨居踞。孟子入戶視之。白其母曰。婦無禮。請去之。母曰。將上堂。聲必揚。獨入戶。視必下。汝於燕私之處。入戶不有聲。令人踞而視之。是汝無禮。汝婦無禮。是因妻箕踞。非欲出妻也。又孔叢子。尹文子。生子不類。怒而杖之。告子思曰。此非吾子也。吾婦殆不婦。言失婦道吾將黜之。子思曰。若子之妻。則堯、舜之妻。復可疑也。此二帝聖者之英。而丹朱商均。不及匹夫。生可類乎。是因生子貌不類已。而欲出妻。其罪狀尤爲莫須有也。又史記。陳平世家。有叔如此。不如無有。伯聞之。逐其妻棄之。是因口舌出也。又漢書王吉傳。少時學問居長安。東家有棗樹。垂吉庭中。吉婦取棗以啖吉。後知之。乃去婦。是因食一聚而出婦也。以是證古男子對婦之無情。待遇苛薄。匪夷所思。

惟常被出故必預先蓄積以備養老

韓非子。衛人嫁其子而教之曰。必私積聚。爲人婦而出常也。其成居幸也。此可見婦而被出不必有大惡。

故於嫁時卽刻刻防此。觀史記陳軫傳云。故出婦嫁于鄉曲者。良婦也是。良婦而亦被出。禮記檀弓。伯魚之母死期而猶哭。夫子曰。嘻其甚也。伯魚聞之遂除之疏。伯魚母出期而猶哭。故夫子以爲甚是大聖。亦出妻。又子上之母死而不喪。死・被出而門人問諸子思曰。昔者子之先君子喪出母乎。曰然。子之不使白也喪之何也。子思曰。昔者吾先君子無所失道。道隆則從而隆。道汙則從而汙。伋則安能爲伋也。妻者是爲白也。母不爲伋也。妻者是不爲白也。母故孔氏之不喪出母。自子思始也。是大賢亦出妻而皆莫詳其故。恐亦無大過也。

古出妻禮節

禮雜記。諸侯出夫人。夫人比至其國。以夫人之禮行。仍待以夫人之禮義未絕。至以夫人入。使者將命曰。寡君不敏。不能從而事宗廟社稷。使使臣某敢告於執事。女家主主人對曰。寡人固前辭不教矣。言納采時答詞寡君敢不敬辭以俟命。有司官陳器皿。主人有司亦官受之。注器皿。女本所齋物也。律棄妻界所齋。卽返其嫁妝也。是國君棄妻之禮節也。又妻出。士庶出妻夫使人致之曰。某不敏不能從而共粢盛。使某也敢告於侍者。謙語主人對曰。某之子不肖。不敢辟誅。避罰敢不敬須以俟命。使者退。主人拜送之。不言返所齋。想亦與諸侯同也。是士庶出妻之禮節也。所異者。旣出妻。則必宣布其罪過。而使者僅曰。不能從而事宗廟。不能從而共粢盛。若女仍無過。而過在男子者。含意不露。弗與女家以難堪。而使者將去。主人仍拜送之。真

可謂彬彬有禮矣。又最異者，無論貴賤，只男家棄女，女家卽順受，既無若今日之賠償以錢財，亦無罪過。有無之爭議，所以然者，以當時社會風俗，出女再嫁不難，非若後世之以再醮爲恥，又自古女子以從人爲義，男女不平等視爲固然，故被棄雖不當罪而不辭也。

自周迄宋婦女皆不諱再嫁

貞女不再嫁，操守清潔，自古義之。然在周時，殊無特別旌表之舉。蓋王道本乎人情，禮緣義起，女而守固爲義，卽再嫁亦不違禮。其見於載記者，自周迄宋，皆如是也。自明以來，士族搢紳之家，皆恥於再醮，以守節爲高，以改嫁爲不義，不驗人情，但崇虛矯，致使社會男女受無形之拘束，及其潰決，遂并廉恥而胥捐放佚，狂蕩不可制止。斯非古聖人之過，乃宋明以來腐儒客氣不衷之談，之有以致之也。茲將歷代改嫁之見於載記者述之如左。

聖人家婦改嫁

禮檀弓伯魚死，其妻嫁於衛，又子思之母死於衛，赴于子思。子思哭於廟門，人至曰：「庶氏之母死。」何爲哭于孔氏之廟乎？子思曰：「吾過矣。吾過矣，乃哭于他室。夫孔子在春秋爲第一講禮之家矣，乃其子死，子婦不免於嫁，何況其他？誠以矯而守不如順而去，且以防矯守之流弊也。」

春秋人視異姓同母兄弟如親兄弟

嫁于庶氏，乃其子。

左傳成十一年聲伯之母不聘穆姜曰吾不以爲姪生聲伯而出之嫁于齊管子奚生二子而寡以歸聲伯聲伯以其外弟即管氏子爲大夫而嫁其外妹於施孝叔是視其異姓兄弟如親兄弟可見當時士大夫不以再嫁爲諱也

春秋士人妻中道改適他姓及再歸本夫仍可再受

左傳成十一年聲伯旣嫁其外妹同母女于施孝叔晉郤離來聘求婦於聲伯聲伯奪施氏婦而與之婦人曰鳥獸猶不失儺子將若何曰吾不能死亡婦人遂行生二子於郤氏郤氏亡晉人歸之施氏施氏逆諸河是娶妻而見奪數年而又歸本夫仍承受無異詞益可見當時社會不以改適爲病也

春秋時女守寡其家卽亟爲擇配

左傳閔二年衛惠公之卽位也少齊人使昭伯蒸于宣姜不可昭伯不可強之生齊子戴公文公宋桓夫人許穆夫人宣姜者惠公之母昭伯者惠公之庶兄是齊人憐其女寡以勢力強使再嫁于昭伯兼植黨也又僖二十三年公子重耳至秦秦伯納女五人懷嬴與焉懷嬴者懷公之夫人懷公死嬴寡故復使嫁于重耳也是可見當時社會寧害義不使女守寡也

漢時仍重視同母兄弟仍寡則再嫁

史記武帝母王太后母曰臧兒臧兒嫁槐里王仲生信與兩女仲死更嫁長陵田氏生男蚡勝臧兒長女

母・即武帝
嫁爲金王孫婦。生一女矣。後納太子宮生武帝。武帝卽位。聞太后有女在長陵。乃自往迎取。攜見
太后曰。臣得姊與俱來。賜錢千萬。是不以異姓同母姊爲嫌也。且以田蚡爲丞相。田蚡者。太后之異姓。同
母兄弟。太后視之等於同母兄弟。故帝以蚡爲丞相也。是當時不鄙視再嫁。故皆不諱其事也。觀太史公
直書不隱。其風尙可知矣。又平陽公主夫曹壽有惡疾歸國。公主守寡。卽再嫁衛青。又鄂邑長公主寡。與
丁外人通。旋謀封外人真嫁之。皆不鄙再嫁之證也。

又後漢書陰瑜妻名采。荀爽之女也。十九而寡。采時尙豐少。後同郡郭奕喪妻。父爽以采許之。因詐稱病
篤。召采不得已歸。懷刃自誓。是女本不願再嫁。而父強之也。爽爲當代名流望族。猶强迫女嫁他。可知矣。
如不再嫁而私奔。則以爲恥。

早寡再嫁。原不爲非。倘私奔。則於德有累。史記司馬相如傳。文君旣私奔相如。卓王孫大怒曰。女至不才。
吾不忍殺。不與一錢也。是以私奔爲恥。非怒其再嫁。先聖制禮。不閑再嫁者。卽懼有此也。

魏晉時名族女再嫁

吳志步夫人傳。生二女。長字大虎。前配周瑜子循。後配全琮。少曰小虎。前配朱據。後配劉纂。又世說。諸葛
恢女適庾亮兒。後爲蘇峻所害。將改適江勲。與亮書及之。亮答曰。賢女尙少。故宜是。皆名族而改嫁也。

唐宋名族女再嫁

隨園隨筆云。唐時公主再嫁者二十三。三嫁者四。詳見新唐書公主傳。宋秦國大長公主初嫁米福德。再適高懷德。韓昌黎之女。先適李漢。後適樊宗懿。宋范文正公之子婦。先嫁純禮。後適王陶。陶公之門生。公尙居相位。而公所立義莊。有孀婦改嫁之費。公母謝氏亦改嫁者也。得封吳國太夫人。又王荊公爲相時。以子雱顛改嫁雱婦。是唐宋貴人皆不以再嫁爲恥。世俗可知。至明王端肅公。恕娶陳郎中妻。於服中封一品夫人。士林爭指目之。至清則絕迹矣。

古出婦改嫁後再見前夫。前後夫皆不避。

漢書朱買臣傳。妻旣去。其後買臣負薪墓間。故妻與夫家俱上冢。見買臣飢寒。呼飯飲之。又發辛雜識。放翁原配唐氏。爲姑所出。改適宗室趙士程。後先生遊沈園。遇唐氏夫婦。唐言於趙。以酒餌餽先生。先生卽題釵頭鳳。一闋於壁而去。此以今日社會狀況揆之。必兩相迴避。不暇矣。不惟前夫恥見後夫。後夫亦不願見前夫。且婦人更無介紹兩夫之理。而宋時不爾者。可見視再嫁爲甚尋常也。

古妻妾當夕次序 諸侯每夜御二人五日而偏

內則妾雖年老未滿五十。必與五日之御。注諸侯九女。姪娣兩兩而御。則三日也。次兩媵則四日也。次夫人專夜。則五日也。疏夫人及兩媵。各有姪娣。凡六人。兩兩而御。故三日也。是諸侯每夜御二人五日而偏也。

天子十五日而徧

周禮九嬪注云女御八十一人當九夕世婦二十七人當三夕九嬪九人當一夕是天子最多每夜御九人三夫人當一夕后當一夕十五日而徧是至少每夜三人或一人當夕

王后當夕次敍望前與望後不同

內則必與五日之御鄭注望前卑者在前尊者在後望後乃反之按卑者在前諸侯則姪娣先當夕最後夫人天子則女御先當夕至十五日后專夕十六日仍后專夕最後乃及女御故云反之也

卿大夫三日妻妾徧當夕士二日而徧

內則妻不在妾御莫敢當夕疏此謂卿大夫士以下大夫一妻二妾則三日御徧士一妻一妾則二日御徧妾恆避女君御日女君御日固不敢當夕縱令自當御日女君不在猶不敢當夕也

月辰避夕

內則妻及月辰居側室按月辰者天癸至也惟禮祇言妻而不及妾御者妻居正室故也惟妻雖避夕妾亦不敢當夕也

卷二十

行唐尙秉和著

喪事

古人將死時以生綿覆口上以候絕氣

禮喪大記屬纊以俟絕氣注纊新綿易動搖置口上以爲候如纊不動卽氣絕也

古人初死必登屋招魂大呼死者名字使歸至唐猶然

禮運及其死也升屋而號告曰臯某復然後飯腥而苴孰按臯者疏云臯臯引聲之言某者死者姓名復者返也言北而長呼告天使某返也又喪大記復注招魂也有林麓則虞人設階凡復男子稱名婦人稱字按設階者設升屋之階也又墨子其親死列尸弗斂登屋窺井挑鼠穴探滌器諸狀況乃民間無識者相在則憲愚甚矣知其亡也必求焉僞已甚矣按墨子所言窺井挑鼠穴探滌器諸狀況乃民間無識者相在之陋俗王制無是也王制祇登屋招魂耳而墨子以是攻儒者儒豈有此鄙猥之舉哉然因是可得周時社會人死時之狀况矣漢牟融曰人臨死其家上屋呼之又段成式金剛經鳩異及明已聞對門復魂聲問其故子昨宵暴卒又補闕孫董善占夢有人夢棗生屋上孫曰重來重來呼魄之象其人果卒重來者

棗字形呼魄卽復魂是可證漢唐人初死皆叫魂也。

斂前先浴尸沐頭

喪大記管人汲不說同脫繻井繩屈之盡階不升堂授御者小臣四人抗舉也衾御者二人浴浴水用盆沃水用料浴用繩布搘音振拭也用浴衣如它日平日小臣爪足翦足此浴身之禮節也又浴者差沐于堂上君沐梁大夫沐稷士沐梁稻爲管人受沐乃煮之授浴者沐沐用瓦盤搘用巾如它日小臣爪手翦須此沐頭之禮節也沐浴既已而後斂又曾子之喪浴于爨室蓋貴人皆浴于正寢曾子以士故浴于爨室也。

古斂衣左衽結絞不紐

死結難解

喪大記凡斂衣皆左衽結絞不紐注衽衣襟也生嚮右左手解抽帶便也死則襟嚮左示不復解也結絞不紐者生時帶並爲曲紐使易抽解若死則不復解故畢結不爲紐也。

古斂時口須含飯

禮雜記古者鑿巾以飯注飯含也鑿巾者大夫以上貴使賓爲其親含恐尸爲賓所憎穢故以巾覆尸當口鑿穿之使含得入口也。

古未斂前以冒覆尸

禮雜記。冒者所以掩形也。注掩尸形恐人惡之。按冒者蓋亦巾之類而大于巾。覆尸全不露。故謂之冒。愚謂掩形不惟恐人惡陳尸。未斂亦不宜暴露也。

古必三日始斂

禮問喪死三日而後斂何也。曰孝子親死悲哀志瀆故匍匐而哭之。若將復生然安可得奪而斂之也。三日而不生亦不生矣。家室之計衣服之具亦可以成矣。親戚之遠者亦可以至矣。故以三日爲之禮制。按今日鄉間或有三日斂者。都邑則絕無也。鄉間衣服棺槨需遠市。都邑則立具。又夏日斂尤速。

三代入斂時晨莫不同

檀弓夏后氏尚黑。大事斂用昏。殷人尚白。大事斂用日中。周人尚赤。大事斂用日出。按今時斂者用昏者多。仍夏道歟。

古斂以衾裹尸以布束尸

禮喪服大記。小斂布絞縮者一橫者三。君錦衾。大夫縗衾。士縕衾。皆一衣十有九稱。疏布絞者以布爲絞。縮從也。謂從者一副。監置於尸下。橫者三副。亦在尸下。從者在橫者之上。每幅之末析爲三片。以結束爲便也。又云衣布於衾上。然後舉尸於衣上屈衣裏。又屈衾裹之。然後以絞束之。由是證古之斂近尸者。衣之外裏。以衾。再以布束之。以爲固也。此雖是小斂。然大斂亦如此。不過布絞加多耳。今江南尚有行之。

者餘則少也。

初遭喪卽袒括髮

檀弓。袒括髮去飾去美也。又去飾之甚也。又士喪禮。主人髽髮袒。注髽髮者去笄纓而紩。按紩者結也。髽也。蓋以麻約髮而爲髻。示毀容盡也。

喪服袖特寬至三尺三寸

禮雜記。弁經其衰侈袂。注常服袂二尺二寸。侈則三尺三寸。按服斬衰正以志哀。侈袂示哀之甚也。

服斬縗麻帶草履杖行

左傳襄十六年晏桓子卒。晏嬰廬斬縗苴絰帶。

曰苴有子

杖菅履。按今日喪者猶以粗麻絞爲帶杖行。獨

草履無用者皆白布鞋。蓋以平日亦常草履不足表哀痛。

又按自清至民國服制皆變古。獨喪服不變。無一不與古同。鮮遵當代服制者。此可見孝親之事不與他同。故國家亦不干涉也。

古孝子之居處飲食

左傳襄十六年晏桓子卒。晏嬰食鬻同粥。居倚廬。寢苦。枕草。又檀弓。悼公之喪。季昭子問于孟敬子曰。爲君何食。敬子曰。食粥。天下之通義也。孟子曰。三年之喪。齊疏之服。齊衣下縫也。不綴。飭粥之食。自天子達

於庶人三代共之。是居倚廬食薄粥。無貴賤皆行之。古事事尙等級。獨此平等也。

古處喪之瘠弱飢寒狀況

墨子上士之操喪也。必扶而能起。杖而能行。又哭泣不秩聲。言無次翁縗經。言雙垂涕處倚廬。寢苦枕塊。又相率強不食而爲飢。薄衣以爲寒。面目陷隕。顏色黧黑。耳目不聰明。是周時社會遭喪者之普通狀況也。

古孝子處倚廬非謁母不入內寡言語

禮雜記三年之喪言而不語。對而不問。廬塋室之中不與人坐焉。在塋室之中。非時見乎母不入內。按倚廬在中門外。不入門者。不入中門。至內寢也。

倚廬架木爲屋壘擊_激爲牆

禮大記父母之喪居倚廬。注倚木爲廬於中門外之東不塗。以草夾障不以泥塗寢苦草也。枕凶君之廬宮之。如宮以帷障之大夫士檀之。露而不障既葬柱楣塗廬不於顯者。不塗廬外顯處既練居塋室十二月小祥以既祥黝塋。又雜記三年之喪。居塋室之中。鄭玄云。壘擊爲之。不塗塋。按倚木爲廬者。卽架木爲室。而以壘砌牆。擊者打土晒乾爲之。不陶。不燒。卽以此砌牆而不塗塋。塋以爲飾。檀者袒也。言露而不障。柱楣者使廬高起而受光。至小祥則塋室使白。且黝地使黑。以爲飾也。

古哭必辟踊若僵者跛者則否

禮檀弓有子與子游立見孺子慕者有子謂子游曰子壹不知夫喪之踊也予欲去之久矣情在于斯其是也夫子游曰人慪斯戚戚斯歎歎斯辟辟撫心斯踊又辟踊哀之至也有算爲之節文也疏男踊女辟哀痛之至若無節限恐傷其性故辟踊有算算者數也每一踊（三跳三踊九跳爲一節十三踊初死日一踊小斂一踊）大斂一踊凡三日一踊大夫五踊諸侯七踊王九踊又婦人倡踊注倡先也是婦人亦踊不惟撫心痛哭也又問喪僵者不袒跛者不踊誠以僵則不能露胸跛則不能跳起也

古哭君亦踊

左傳宣十八年子家使晉還既復命袒括髮注以麻約髮卽位哭三踊而出時公薨又晏子春秋遂袒免約首布坐枕君尸而哭興三踊而出杜注九跳爲一節禮所謂辟踊有節按踊必三者當時定制少則簡多則過故以九跳爲節然自漢以來卽不見有行此禮者殆亡已久矣

喪拜之不同

檀弓孔子曰拜而後稽頰頰乎其順也注殷喪拜言主人拜賓也稽頰首觸地無容稽頰而後拜順乎其至也按拜而後稽頰者先合手屈膝以首觸地也稽頰而後拜者先屈膝以首觸地起而合手也皆所謂喪拜也喪拜無容以遭喪痛悼皇遽不能爲容今孝子見賓卽稽頰而不合手皆不拜猶周之遺俗

同時遭喪父斬衰母齊衰男免女髽

禮喪服小記。斬衰括髮以麻疏。主人爲父之服也。又爲母括髮以麻。免音問而以布。齊衰惡笄以終喪。注母服輕可以布代麻也。齊者衣下縫不緝曰斬衰。緝曰齊衰。是可證爲父服。斬衰爲母服。齊衰括髮以麻者。鄭注喪服云。自項以前交於額郤。繞紺若以布代麻則名免。是括髮與免形式如一。只用麻用布不同耳。至去笄纊而紺。同髻使髮露則同也。又云。男子免而婦人髽。免者鄭注以布廣一寸。自項交於額郤繞也。髽者鄭注云。形與括髮如一。卽露髽然則免也。髽也括髮也。名異而形實同也。

女髽以棟爲笄

禮檀弓。南宮韜之妻之姑喪。孔子誨之髽曰。爾勿從從爾。爾勿扈扈爾。蓋棟以爲笄。長尺而總八寸。注去縱而紺曰髽。縱所以韜髮。今遭喪但露紺而已。紺者髽也。益證髽卽括髮也。

古以白布纏髻故秃者不免

禮問喪。禿者不免。注免音問者以白布廣一寸。從項中交於額郤。向後繞於髻也。然禿則不免。是可證古只以白布約髻。若禿則無髻可約。非若今世之祇約白布條於額也。

古鄉里助喪詳情 鄰里代爲糜粥

禮問喪。親始死。水漿不入口。三日不舉火。故鄰里爲之糜粥以飲食之。又曾子問。昔者吾從老聃助喪於

巷黨又檀弓孔子之故人原壤母死夫子助之沐櫛皆鄰里助喪之證也。

古喪事必有主喪者代主人負責治事

禮檀弓孔子之喪公西赤爲志焉子張之喪公明儀爲志焉注志謂章識又荀子修士之喪動一鄉屬朋友庶人之喪合族黨動州里注屬者謂付託之使主喪也又史記項羽本紀每吳中有大徭役及喪項梁嘗爲主辦陰以兵法部勒賓客及子弟又陳平傳邑中有大喪平貧侍喪以先往後罷爲助是自周迄漢皆有鄰里助理喪事並由主人特請人付託之以爲主辦無一不與今同也。

居喪期限殷周皆三年至戰國已不行

論語高宗諒闇三年不言禮王制父母之喪三年不從政是殷周皆三年喪也至春秋時蓋已不守此制論語鑽燧改火期斯可矣是必已有喪父母而期服者故宰予敢如是昌言而墨子之徒只服三月深以久喪爲非又孟子然友反命定爲三年之喪父兄百官皆不欲曰吾宗國魯先君莫之行是至戰國三年之喪舉世莫有行者惟儒者行之韓詩外傳齊宣王謂田過曰吾聞儒者親喪三年是其證也。

前漢仍短喪

古君父喪同而文帝臨終詔三十六日除服自是爲定例於是宰相翟方進後母死以爲身備漢相不敢踰制既葬三十六日除服又薛宣傳後母病死弟脩爲臨淄令去官持服宣爲丞相謂三年服少能行之

者兄弟相駁脩遂免服由是不和

有喪三年者則名譽特起

公孫弘傳後母死服喪三年遂舉孝廉原涉傳時少行三年喪者及涉父死廬墓三年哀帝紀河間王良喪太后三年爲宗室儀表益封萬戶蓋當時無行三年喪者偶有之卽交口稱道也

然親死不奔喪則有罰

漢書陳湯傳湯待遷父死不奔喪司隸奏湯無循行張勃坐選舉不實削戶二百

至後漢遭喪無不去官守制且有以弟喪師喪去官者

後漢承光武明帝提倡禮教之後凡父母喪無不去官守制者而趙苞以伯父喪去官陳重以姊憂去官譙玄遷太常寺丞以弟服去職劉焉拜中郎以師祝公喪去官以是證後漢之社會風俗雖三代不能及爲中國風俗第一淳美之時期

漢時喪服皆縗素

高帝紀寡人親發喪兵皆縗素蘇武傳雲中生口言太守以下吏民皆白服言上崩翟方進傳方進薨少府供張柱檻皆衣素按自周時親死服斬衰皆以素布爲衣又荆軻傳白衣送至易水上凶事服白其來已久至漢猶然也

古賄喪成俗至今不改

禮檀弓。孔子之衛。遇舊館人之喪。入而哭之哀。出使子貢說。同脫驂而賄之。注。驂。馬。鬻。以爲喪費也。又史記朱建傳。建母死。貧。未有以發表。方假貸服具。陸賈爲說辟陽侯。奉百金爲祝。注。衣被。列侯貴人以辟陽侯故。往賄凡五百金。又原涉傳。所知母死。涉入弔。問以喪事。家無所有。乃卽與賓客市買衣被棺具等物。載至喪家。是自周迄漢。凡貧者遇喪。無不賴朋友資助。後世因之。至今不更述。

漢時官吏死可因賄致富

何並傳。吾生素餐日久。死雖當得法賄。勿受。又後漢羊續傳。二千石卒官賄百萬。按法。賄者官家例。賄不論貧富。又原涉傳。哀帝時。天下殷富。大郡二千石死。官賦斂送葬。皆千萬以上。妻子通共受之。以定產業。是於法。賄外。又賦斂同僚。以爲亡者妻子生活費資。至千萬。則鉅富矣。唐宋以來。官吏卒遠方。朋友資助。經紀其喪事者。不可勝數。然無有因喪醞資致富者。是以風俗醇樸。莫過於兩漢。

歷代弔喪者之禮節

論語。裘羔玄冠。不以弔。禮內則。行弔之日。不飲酒食肉。按。羔。裘。玄。冠。皆吉服。華美飲酒食肉。違哀戚之義。故皆不宜於弔。禮檀弓。曾子襲裘而弔。子游裼裘而弔。曾子指子游示人曰。夫夫也。爲習於禮者。如之何。其裼裘而弔也。主人旣小斂。以衣衾。袒括髮。子游趨而出。襲裘帶絰。武上。以布條加。而入。曾子曰。我過矣。我過。

矣夫夫是也。

按喪者注充美也。言掩抑其美使不見也。卽以單衣護於裘外。裼者注云裘上加裼衣。裼衣雖加他服。猶開露見美以爲敬也。曾子以弔主哀。故掩裘美而襲裘。豈知主人未斂。猶吉服弔者不宜凶服。故子游仍裼裘以見美。及主人小斂而易服。子游乃襲裘加絰於武冠梁以弔也。

晉時弔喪須執孝子手

世說新語顧彥先生平好琴。及喪張季鷹往哭之。不勝其慟。遂徑上牀撫琴作數曲。撫琴曰。顧彥先頗復賞此。不因又大慟。遂不執孝子手而出。又王東亭與謝公交惡。王在東聞謝喪。便出都往哭。督師刁約不令前。曰官生平不見此客。王亦不與語。直前哭甚慟。不執末婢手而出。謝琰小名是可證當時弔哭已須執孝子手。安慰之爲一定禮節。清時士大夫弔喪已必掀帳至孝子處。唁慰數語。蓋猶古之遺俗。惟不執孝子手爲小異耳。

晉時弔喪必主人先哭客乃哭

世說新語阮步兵喪母。裴令公往弔之。阮方醉坐牀。箕踞不哭。裴至下席於地。哭弔。啜畢便去。或問裴凡弔主人哭。客乃爲禮。阮旣不哭。君何爲哭。又王右軍與王述不睦。後述喪母。右軍屢言出弔。而卒不果。後詣門自通。主人旣哭。不前而去。以陵辱之。按古弔喪無不哭者。至晉時。須主人哭。乃哭。主人若不哭。客卽

不哭。故主人聞客至必先哭以爲禮也。

唐人弔喪須服白衣須哭泣

大唐傳載。唐臨性寬仁多恕。常欲弔喪。令家僮取白衣。僮乃誤持餘衣。懼未敢進。臨覺察。謂曰。今日氣逆。不宜哀泣。向取白衣且止。是可證唐人弔喪不白衣。則不弔且弔必哭泣。不似昔人之必俟主人哭也。

六朝時哭有詞

顏氏家訓。禮以哭無言者爲號。然則哭亦有詞也。江南哭喪時。有哀訴之言。山東重喪則呼蒼天。期功以下則但呼痛。按今日男子哭皆號無有言者。惟婦人乃有之。風氣又與古異也。

六朝時不弔則怨

顏氏家訓。江南凡遭重喪。若相知者同在城邑。三日不弔。則絕之。除喪雖相遇。則避之。怨其不憫己也。有故及道遙者。致書可也。無書亦如之。北俗則不爾。按此必赴而不弔也。不然。雖同都邑。三日之間。未必盡聞。知安得怨其不弔。

南北朝年節時對喪家之異

顏氏家訓。南人冬至歲首。不詣喪家。若不修書。則過節束帶以申慰。北人至歲之日。重行弔禮。禮無明文。則吾不取。按古人視冬至節極重。與元旦同。至時人皆賀節歡忭。不詣喪家。宜矣。至重行弔禮。甚無謂也。

凡禮之不合人情者必不能久唐宋以來不見有此蓋此俗之革除久矣

六朝時年節見孤子則泣

顏氏家訓已孤而履歲及長至之節無父拜母祖父母世叔父母姑兄子則皆泣無母拜外祖父母舅姨兄子亦如之此人情也按無父過年節拜父族時父族以其無父可拜慄然而泣無母拜母族時母族以其無母可拜故亦泣蓋皆幼子初喪父母一二年事也今世外甥初喪母新年至外家仍有此感

六朝時初釋服見君必泣否則見薄於人

顏氏家訓江左朝臣子孫初釋服朝見二宮皆當泣涕二宮爲之改容頗有膚色充澤無哀感容者梁武帝薄其爲人多被抑退裴政出服問訊武帝貶瘦枯槁涕泗滂沱武帝目之曰裴三禮不死也按此已釋服矣尙有此習慣齊梁時禮教過東西晉遠矣

歷代忌日之重

禮祭義君子有終身之喪忌日之謂也忌日不用事不作非不祥也言夫志有所至而不敢盡其私也按父母死日今謂之忌辰至忌辰則哀戚思慕無論年遠近皆如此故曰終身之喪古禮至今不變者惟此耳

六朝時忌日仍與周同

顏氏家訓忌日不接外賓不理衆務魏王脩母以社日亡來歲有社脩感念哀思鄰里爲之罷社按不接外賓不理衆務卽祭義所謂忌日不作也然鄰里因忌而罷社蓋脩之哀有逾於衆人者故感動如此

唐忌日狀況

耳目記周武則左領軍權龍褒不識忌日問府吏曰何名私忌對曰父母亡日請假獨坐房中不出褒至忌日於房中靜坐有青狗突入褒大怒曰衝破我忌更陳牒文書改明日作忌按獨坐不出仍不接外賓不理衆務之義述此者以見忌禮自周迄唐豪未變更以迄於今故唐後不更述

卷二十一

行唐尙秉和著

葬

周時以獨木板棺爲最貴

莊子宋有荆氏者宜楸柏桑其株把而上者求狙猴之杙者斬之三圍四圍求高名者斬之七圍八圍貴人富商之家求檼傍者斬之故未終其天年注檼傍棺也棺之全一邊者謂之檼傍按全一邊者謂棺之四牆皆一板所成非數板湊成故非大木不辨今世仍重之謂之獨傍獨蓋又曰四獨卽檼傍之義也

周製棺以檼木爲最貴

左傳襄三年初穆姜使擇美檼以自爲櫬又襄三年季孫爲己樹六檼於蒲圃東門之外。注欲爲己櫬定姻薨匠慶用蒲圃之檼爲櫬按說文檼楸也木性堅而文理甚美故古人喜以爲櫬猶今之尙黃柏楠木也然周時亦有用柏者左傳定元年魏舒卒范獻子去其柏椁是也

周人飾棺之麗

禮喪記周人牆置翫又檀弓孔子之喪公西赤爲志焉

注志謂章識飾棺牆置翫子張之喪公明儀爲志焉褚

幕丹質。蟻結於四隅。注盧植曰。牆載棺車箱也。牆之障柩猶垣之障家。三禮圖曰。翫以竹爲之。高二尺四寸。廣三尺。衣以白布。柄長五尺。葬時令人執之於柩車傍。褚幕丹質者。注云。以丹布幕爲褚。按玉篇褚者囊也。言以丹布爲幕而覆棺也。蟻結於四隅者。注云。畫褚之四角。其紋如蟻行往來交錯。又按翫者疏云。在旁曰帷。在上曰荒。凡飾棺總曰柳。史記樂布傳所謂置廣柳車中者是也。

又按今富貴人家入斂後即以紅帛幄冒棺使不露。卽褚幕丹質也。今出殯時之棺罩。卽古之棺牆帷荒之屬。特今柩昇行者多古則輓行。故牆翫之屬亦微異耳。

周出殯運柩之法及護喪者之衆

禮內則弔於葬者必執引。若從柩及壙必執繩。又曲禮助葬必執繩。注車曰。引棺曰繩。疏引柩車索也。繩引棺索也。凡執引用人貴賤有數。若其數足。則引人不得遙行。皆從柩也。何東山曰。天子千人。諸侯五百人。大夫三百人。士五十人。從柩者是執引所餘。繩是撥動之義。人無定數。故執繩以示助力。由此證之。古靈車之行。以引牽輓引之。多寡視貴賤而分有定數。人執一索引車前行。不用牛馬。若繩則大於引。攷爾雅。繩也。繩音律。大索也。蓋靈車至葬所。牽繩以移柩入冢也。

又今日皆昇柩而行。昇柩人數最少十六人。或三十二人。最富貴之家六十四人而止。惟天子乃用百二十人。若古則大夫尙三百人。天子則千人。其威儀之侈麗十倍於今。無怪墨翟之以爲非也。

周引柩索用麻

左傳宣八年冬葬敬姜。旱無麻。用葛茀。即紺。注茀所以引柩。然因旱無麻。卽不能用麻索。亦可見葬儀之侈。用索之多矣。

周葬時先以槨布冢內再以鹿盧繫棺入冢

禮檀弓季康子之母死。公輸若方小斂。般請以機封。將從之。公肩假曰。不可。夫魯有初。公室視豐碑三冢。視桓楹般爾。以人之母嘗巧乎。注豐碑斲大木爲之形。若石碑於槨前後四角。樹之穿中於間爲鹿盧。下棺以縛繞。天子六縛四碑。前後各重鹿盧。桓楹者斲木如大楹。四植謂之桓。

按天子用石碑下棺。諸侯不敢用石。以木斲爲碑。樹於槨之四角。碑上有孔。各安鹿盧。棺到時將紺。繞於鹿盧之上。徐徐下之。此天子諸侯之禮也。公輸般巧。請以機械下棺。有類於諸侯之禮。故公肩假以爲不可。桓楹者。但將木斲之若楹。不爲碑形。植四隅以下棺而已。夫曰。樹於槨之四角。是棺未到而預將槨置於冢內也。用碑繫棺。是天子亦懸柩下葬也。惟左傳僖二十五年晉侯請隧。弗許。杜注。闢地通路曰隧。天子葬禮也。諸侯皆懸棺而下。據杜說。是天子不懸棺葬也。鄭與杜孰是。不敢定。疑杜非也。

古貧賤者之出殯及下葬狀況

古以引卽索輓靈車。士用五十人。下而至於庶民。當更少於士。然亦較今日爲多。葬用碑縛。乃富貴之家。

至庶民則不用禮檀弓懸棺而封人豈有非之者哉注貴者用碑縗貧但手懸棺而下然則古貧民下葬與今日同也

古窓內保護棺之法以蜃炭爲最貴

禮檀弓有虞氏瓦棺始不用薪夏后氏堲周殷人棺槧周以蜃灰聖周者注云火熟曰聖治土成磚以周於棺之四週坎也釋文云堲燭頭爐卽木爐蜃灰者按周禮掌蜃掌斂互物蜃物以供闔墻之用注互物者蚌蛤之屬闔塞也墻穿中也將葬先塞蜃灰以禦濕使棺不朽然則夏后氏之堲周依鄭詁治土成磚圍於棺之四周依釋文以木爐塞於棺之四周詁雖微異要其禦濕之意則相同至周以蜃灰禦濕又視夏進步耳特夏尚無槧周承殷旣以槧護棺復於槧外塞以蜃灰法益密耳蜃灰之力與今之石灰同周無石灰用蜃灰塗牆使白者是也

然蜃炭在周時蓋甚貴觀左傳成二年宋文公卒始厚葬用蜃炭則貧賤者之不能用可知矣

注燒蛤爲炭以塗葬夫以諸侯用之尚曰厚葬

周時從葬之物品 一明器

荀子薦器則冠有鍪而無縕甕廡虛而不實木器不成斲陶器不成物簿竹也器不成內注薦器明器也鍪冠捲如兜鍪也縕韜髮者也冠明器之冠也甕廡所以盛醯醢人器實明器虛按明器者冥中所用之

器也。皆象其形而不必盛以物。故曰人器實。鬼器虛。檀弓所謂夏后氏用明器。示民無知。孔子所謂備物而不可用。知喪道者也。

又以草束爲人馬車物。以木製爲偶人。檀弓云。塗車芻靈。自古有之。明器之道也。孔子謂爲芻靈者善。謂爲俑者不仁。殆於用人乎哉。按塗車者。以泥爲車。芻者。草芻靈者。言束草爲人馬。俑者。偶人。有面目機能。似乎生人。孟子曰。始作俑者。其無後乎。爲其象人而用之也。淮南子。魯以偶人葬而孔子歎。孔子之所以歎。謂此爲用生人之漸也。觀此。自夏以來。凡生人所用之物。皆一一製爲冥器。送之墓中。以備死者之用。而祇有其形實。不能用。聊以盡心焉而已。故孔子美之。

又以寶物從葬

檀弓云。殷人用祭器。示民有知也。按殷人尚鬼。不忍死其親。故以真祭器送葬。又禮檀弓。宋襄公葬其夫人。醯醢百甕。曾子曰。旣曰明器。而又實之。按明器宜虛。今置醯醢於中。則實矣。故曾子非之。

又按西京雜記。漢廣川王發掘戰國時魏王墓。其中鼎孟琴瑟刀劍几杖諸物皆備。又墨子節葬篇。死者虛府庫。然後金玉珠璣比乎身。綸組節約車馬。藏乎壙。又必多爲屋幕。鼎鼓几挺壺。濫戈劍羽旄。齒革寢而埋之。是皆以真物從葬之證也。濫浴器也

甚至以生人從葬

秦穆公以三良從葬。國人作黃鳥詩以誌哀。又左傳宣十五年初魏武子有嬖妾無子及疾病謂顆曰必以殉。又成二年宋文公卒始厚葬用殉。又昭十二年楚王縊於芋尹申亥氏申亥以其二女殉而葬之。又哀三年季孫有疾命正常曰勿死。又禮檀弓陳乾寢疾屬其兄與其子曰如我死必大爲棺使吾之婢子夾我又墨子天子殺殉衆者數百寡者數十將軍大夫殺殉衆者數十寡者數人。又西京雜記廣川王去疾掘幽王墓其中僵人有立者有臥者有伏於几上者共百餘尸皆當時殉葬者也。此等慘酷不仁之事不知起於何時然幽厲以前絕無之。至春秋戰國尤甚直至西漢此風始已然亦不敢謂其必無干寶之母以其妾從葬而竟不死于寶感之因作搜神記是至晉尚偶有此非人之事也。嗚呼慘已。

未葬前方相氏以戈擊墳

周禮方相氏狂夫四人大喪先匱及墓入墳以戈擊四隅。歐方良注方良者罔兩也。土怪也。方相氏黃金四目形狀極可畏怖儻時用以驅疫鬼此又用以驅土怪也。

周時卽有挽歌

莊子繫謳所生必於斥苦司馬彪注曰繫引柩索斥疏緩若用力也引繫所以有謳歌者爲人用力不齊故促急之也然則挽歌者所以齊人力猶今日築牆棹船者之喊號非所以助哀若後世之薤露歌則純爲哀挽矣。

漢魏時以白布纏棺

世說白布纏棺豎旐旒按今日運柩遠行者皆以紅布衣棺內緒以棉無用白布者茲所謂豎旐旒蓋亦運柩遠行故以旒旒爲識卽銘旌也

漢時仍以紩引柩以牆翫飾棺

後漢范式傳式因執紩而引柩於是乃前史記欒布傳乃置之廣柳車中後漢趙咨傳復重以牆翫之禮按紩者大索也輓車用引引柩用紩凡棺飾總曰柳卽牆翫之屬翫柄長五尺上衣以白布葬時令人執之於柩車之傍翼棺使不露然則漢時出殯儀式無一不與周同

漢冢內以炭葦保護棺櫬

漢書田延年傳茂陵富人焦氏賈氏以數千萬陰積貯炭葦諸下里物又魏志文帝紀勿施葦炭勿藏金銀銅鐵一以瓦器按夏用冶土周用蜃炭皆以禦濕至漢則加以葦葦中空亦能禦濕惟所謂炭不言其名然蜃炭至漢時惟沿海地有之中原已絕蓋石灰也石灰禦濕之力與蜃炭等惟葦炭二物皆不貴重魏文帝至與金銀並稱遺囑不許用則不得其解抑茲二物在漢時亦貴重乎

漢仍以偶車馬及諸明器送葬而加以銅錢

漢書尹翁歸傳百姓遵用其教賣偶車馬下里僞物者棄之市道師古曰偶謂土木爲之象真車馬之形

張晏曰。下里地下蒿里僞物也。又孔光傳。翟方進傳。賜乘輿秘器。張禹傳。賜東園秘器。秘器者。卽周之明器。皇室所造。較民間略工耳。故賜大臣用之。此可證。上自天子。下至百姓。皆以偶物送葬。卽今洛陽北邙山古墓。掘出者是也。又張湯傳。會有人盜發孝文園瘞錢。如淳曰。埋錢於園陵以送死。是可見當時風俗。埋錢送葬。必百姓亦爲之。若周則無是也。

漢送葬者人多至數千。雖車馬亦白兼奏樂。

漢書爰盎傳。劇孟雖博徒。然母死送葬車千餘乘。又後漢范式傳。乃見有素車白馬。號哭而來會葬者千人。咸爲揮涕。又郭太傳。四方之士千餘人。皆來會葬。又周勃傳。常爲人吹簫給喪事。

按周時大夫之喪。祇引車者卽三百人。加以其他送葬者。必千餘人矣。是以高柴葬其妻。犯人之禾。犯蹋也。申詳請庚償也。之是可證送葬者之衆。有如社會。然後能將所過之禾稼。全行踏平。不然不至賠償也。見事。檀弓。此等遺俗。兩漢猶盛。至送葬者。皆素車白馬。惟東漢禮盛之時。如此。他則不見吹簫樂喪。則更周所無。然其俗至今不改。今門有弔客。則吹樂致敬。又靈柩出門臨窓。皆奏樂。非俱娛賓。並禮死者爲一定儀節。

唐運靈柩仍以車。仍挽而不昇。及槨房形狀

唐自行簡李娃傳。由是凶肆日給鄭生。令執總帷。獲值以自給。無何能挽歌曲。盡其妙。初二肆之傭。

賈也

凶器者互爭勝負其東肆車輶皆奇麗殆不敵惟哀挽劣焉其東肆長知生絕妙乃醵錢二萬索僱焉其黨耆舊共較其所能者無能及生夫曰肆曰備凶器則唐已有橫房曰車輶則唐時仍挽靈車而非若今日之抬槓曰其黨耆舊則是挽靈輿執總帷形若傘又類佛幢吹簫唱挽歌之人有專業者遇事則凶肆召集之無事則散游手好閒與凶肆二而一而二一切均與今日同惟尙未昇柩耳

古柩前有銘旌書官爵於上

唐杜牧詩云粉書空換舊銘旌銘旌者以帛爲之今世用紅色或金書或墨書茲云粉書則書白字於上也書白字則旌或紅或綠或黃非素帛可知空換舊銘旌者因李使君沒後十日授處州太守之命始到李原池州刺史今授新官銘旌上換書處州太守銜稱而不及見故曰空換由是可證古銘旌備書死者官銜於上於柩前執之俾人一望而知也今富貴之家仍用之

漢墳之特高

周禮春官冢人注引漢律列侯墳高四丈關內侯以下至庶人各有差按周天子之墳高三仞八尺曰仞則兩丈四尺也漢仍律尺列侯之墳過周天子矣若天子則不曰墳而曰山陵誠以其高大若山也

卷二十二

行唐尚秉和著

墳墓

自殷以前不封
無墳不樹

禮檀弓。國子高曰。葬者藏也。藏也者。欲人之弗得見也。是故衣足以飾身。棺周於衣。椁周於棺。土周於椁。反壞樹之哉。又荀子。葬田不妨田。注言所葬之地。不妨農耕也。殷以前平葬。無邱隴之識也。又檀弓。孔子旣得合葬於防。曰吾聞之。古者墓而不墳。注言殷時不墳也。由是證之。自殷以前。葬皆不起墳。今輒有殷以前名人墓者。不足據也。

周貴人有公葬地不家自爲墓

周禮。冢人掌公墓之地。辨其兆域。而爲之圖。先王之葬居中。以昭穆爲左右。凡諸侯居左右以前。
卿大夫居後。各以其族。凡死於兵者。不入兆域。凡有功者居前。按此所掌爲天子及公卿大夫之墓地。王居中。諸侯居左右。卿大夫居王墓後。可見古有爵者。亦有公葬地。雖天子亦與卿大夫同兆域。不似後人之家有墓地。昭穆者。父子也。父爲昭。子爲穆。昭列左。穆列右。

謂畿內諸侯

周庶民有公葬地有墓官掌之不許異地

周禮大夫掌凡邦墓之地域爲之圖令國民族葬而掌其禁令正其位掌其度數使皆有私地域凡爭墓地者聽其獄訟帥其屬而巡墓屬居其中之室以守之注屬者塋限遮列處居中者官寺署也在其中按古者民無私田年二十授井田百畝六十歸田故無葬地公家爲擇一公葬地使民叢葬其處而公葬之中復有各族私域畫分遮列王制云墓地不請誠以墓地爲公家所給不得請求餘地有所檢擇也

周始爲墳墳高有制若庶人則不得起墳

周禮冢人疏引春秋緯云天子墳高三仞諸侯半之大夫八尺士四尺庶人無墳又檀弓云庶人縣封葬不爲雨止不封起墳不樹按八尺曰仞三仞兩丈四周律尺合今營造尺八寸二分然則周天子墳合今二丈尙微弱至漢諸侯尙高四丈天子則益高若士祔四尺雖今庶民尙過之蓋時益後則益侈然觀檀弓孔子旣得合葬於防曰丘東西南北之人也不可不識封之崇四尺正與周制合又吳季札葬其子封高可隱季札大夫正與周制八尺合是緯書可據也

周墓樹之等差

周禮冢人疏引春秋緯曰天子樹以松諸侯樹以柏大夫樹以藥草士以槐庶人以楊柳據此是庶人許樹也而檀弓云庶人不封不樹則不許也又左傳吳子胥曰樹吾墓檻檻可材也吳其亡乎是卿大夫之

所樹不定依周制疑庶人亦許樹也。

周墓形狀種種之不同

今墳概作圓形古則異是禮檀弓孔子之喪有自燕來觀者子夏曰夫子言之曰吾見封之若堂者矣見若坊者矣見若覆夏屋者矣見若斧者矣從若斧者焉馬鬣封之謂也按馬鬣注疏無確詁愚按文義從若斧者焉馬鬣封之謂也是馬鬣卽斧形爲一式馬鬣者馬領上之毛向上直豎與斧形相類蓋卽築墳頭使形銳而長與斧相似子夏恐人不解更以馬鬣釋之馬鬣封蓋俗語若曰斧形者卽俗所謂馬鬣封也。

周已祭墓

周禮家人凡祭墓爲戶孟子蚤起施從良人之所之遍國中無與立談者卒之東郭墦冢也間之祭者乞其餘不足又顧而之他由是證之周貴人祭廟時多祭墓時少非不祭也祭廟必以其子孫爲戶祭墓則外人可爲戶是祭墓禮輕於祭廟也若庶人則無廟可祭尤須祭墓墓者先人體魄所寄託神主則人爲以人爲之神主與體魄比孰爲親切乎故有廟者亦不忘祭墓良心之所不能已也先儒必謂周人輕墓者亦不然也

周以來之重墓哭墓

左傳僖二十八年晉侯圍曹門焉多死。曹人尸諸城上。晉侯患之。聽輿人之謀曰：稱舍於墓。師遷焉。曹人兇懼。是居其墓上。並未掘墓也。而懼若是。又曲禮適墓不登墻。墻也爲宮室不斬丘木。是墓樹尙愛之。見墓則敬也。又檀弓顏淵曰：吾聞之。去國則哭于墓而后行。反國不哭。展墓而后入。是出入皆告墓而后爲也。又孔子過泰山。有婦人哭于墓而哀。淮南子譬若遺腹子之上墻。以禮哭泣之。而無所歸心。言不識父面是。有事則哭墓。尋常展墓亦哭也。是皆古人重墓之確證也。

古侯王墓內陳設精美及其寬廣狀況

西京雜記廣川王去疾好聚無賴少年發掘國內冢墓述古墓內形狀甚悉。

魏襄王冢皆以文石爲椁。高八尺許。廣狹容四十人。中有石牀石屏風。不見棺柩明器蹤跡。但牀上有玉唾壺一枚。銅劍二枚。金玉雜具。皆如新物。按魏襄王卽孟子內之梁襄王也。惠王之子。而廣川王乃景帝孫。其掘墓當在武帝時。計自襄王至武帝時不過二百年。故墓內器物尙如新也。

魏哀王冢以鐵灌其上。穿鑿三日乃開。有黃氣如霧觸人鼻目。七日乃歇。初至一戶無局鑰。方牀方四尺。牀上有石几。左右各三石人立侍。皆武冠帶劍。復入戶。石屏有關鑰。叩開見棺柩。黑光煥人。刀斫不入。燒鋸截之。乃漆雜兕兕角爲棺。厚數十寸。累積十餘重。力不能開。乃止。復入戶。亦石屏關鑰。得石牀方七尺。石屏風銅帳鏽一具。或在牀上。或在牀下。或在地下。似是帳糜朽而銅鏽墜落。牀上石枕一塵埃朏朏甚。

高似是衣服牀左右石婦人各二十悉皆立侍或有執巾櫛鏡鑷之象或有執盤捧食之形無餘異物但有鐵鏡數百枚按石人而能刻出執鏡鑷巾櫛之象古雕工之精細可想而知而以兕角雜漆爲棺雖刀鋸不能開此等藝術亦後世所無惜今皆不存耳

幽王冢甚高壯羨門既開皆是石堊撥除丈餘深乃得雲母深尺餘見百餘尸縱橫相枕籍殉者皆不朽惟一男子餘皆女子或坐或臥衣服顏色不異生人按羨者墓道也史記衛世家共伯入釐侯羨自殺者是也羨門者墓道之門也石堊者卽周禮與左傳所謂蜃炭也燒蜃爲炭藉以禦濕而厚至丈餘故殉葬之尸雖僵而不腐衣服顏色歷數百年不變以蜃炭遮護空氣不能入故也古人葬術之精如此

晉靈公冢甚瑰壯四角皆以石爲犧犬捧燭石人男女四十餘皆立侍棺器無復形兆尸猶不爛孔竈中皆有金玉其餘器物皆朽爛不可別按棺椁器皿堅於人身矣然皆腐朽而尸獨不朽祇孔竈塞金玉似不能保全身不壞疑別有善法又棺椁皆朽爛不存者以無蜃炭禦濕故也

又按周幽王魏無幽爲犬戎所殺甫經大亂百姓瘡痍未復而其葬至用蜃炭厚丈餘雲母石至尺餘且殺殉百餘人墓宮宏侈若是晉靈公爲趙穿所殺葬疑率矣而石人一項至有四十餘他明器想稱是也以是見古貴人之奢侈非後人所能夢想而石人雕刻之精工及漆棺之堅固其工藝亦突過後人也

秦始皇墓內狀況

賈山至言云秦始皇死葬乎驪山采金石治銅錫其內漆塗其外中成觀游上成山林又劉向諫起昌陵疏云秦始皇葬驪山之阿下銅三泉上崇山墳高五十餘丈石椁爲游館人膏爲燈燭水銀爲江海黃金爲鳬雁棺椁之麗宮觀之盛不可勝原是墓內有池沼有游館池沼以水銀爲水水內復作爲鳬雁統古今帝王葬雍之侈蓋無過始皇者矣然未十年卽爲項羽發掘也

漢士夫墳上起祠堂

自周以來士大夫有宗祠祭先雖天子無在墓上建祠堂者自叔孫通說漢惠帝爲高祖立原廟久之卿士大夫亦在墓上爲祠堂霍光傳其後光妻顯改光所自造禁制而侈大之築神道盛飾祠堂又龔勝傳勅子孫勿隨俗動吾家種柏作祠堂張禹傳禹年老自治冢塋作祠室原涉傳令先人儉約非孝也乃大治起冢舍周閭重門鹽鐵論今富者積土成山列樹成林臺榭連閣中者祠堂屏閣闕罘罳是西漢時冢上起祠成爲風俗祇富卽爲之不必貴人且於祠堂之外築高闕之隅築罘罳以壯觀瞻此等情況在今日祇明清皇陵有之皇陵外親王冢間有之餘雖卿相不如是也然則古人之奢侈勝今多矣

晉人已迷信墳墓風水

世說新語人有相羊祜父墓後應出受命君祜惡其言遂掘斷墓後以壞其勢相者立視之曰猶應出折臂三公俄而祜墜馬折臂位果至公又晉明帝解占冢宅聞郭璞爲人葬帝微服往看因問主人何以葬

龍角。主人曰。郭云此葬龍耳。不出三年。當致天子。帝問爲是出天子邪。答曰。非出天子。乃致天子間耳。按相墓之法。蓋自古有之。詩曰。相其陰陽。觀其流泉。卜宅如是。卜墓亦如是。而其書皆佚。至晉郭璞著有青囊經。是爲相墓最古之書。今尚存。

漢時墓上已有石馬

西京雜記。陳縞入終南山採薪還。晚趨舍。至張丞相墓前。石馬以爲鹿也。以斧撾之。按後世墓上有石人石馬石羊。以爲陳列。茲只云石馬。想不止此一物也。

古盜墓狀況

呂覽高誘注云。有人自關中來者。言姦人掘墓。率於古冢旁。相距數百步外。爲屋以居。即於屋中穿地道。達葬所。自其外觀之。冢未掘也。而藏已空矣。按今北平貴人墓。無一不被掘者。棺內寶玉。葬後數月必出。墓而盜取之法。與此盡同。此道行之可謂久矣。

西漢始有墓誌埋銘後則墓上亦有碑

葬者藏也。故自古無誌墓者。有之自西漢始。西京雜記。杜子夏杜鄴。臨終。自作文。及死。命刊石埋於墓側。墓前種松柏五株。按此實埋銘之始。後之墓誌。皆埋於地下者也。若墓碑。若墓表。若墓碣。則樹於墓上。若神道碑。則樹於墓門者也。

卷二十三

行唐尚秉和著

坐席

牀榻椅子附

周坐席狀況

古器用不備皆坐於地上而藉以席周禮春官司几筵下士二人注筵亦席也鋪陳曰筵藉之曰席筵鋪於下席鋪於上所以爲位也按筵大於席蓋鋪地上使無隙地以爲潔筵之上再鋪以席而人坐之也故古人入室卽脫履

一席容四人

禮曲禮羣居五人長者必異席注席以四人爲節疏古者地敷橫席而容四人四人則推長者居席端若有五人應一人別席因推長者一人於異席也是席以坐四人爲度故曲禮又云並坐不橫肱橫肱則妨他人此亦一席坐數人之證也

若有喪則可專席

曲禮有喪者專席而坐按有喪則身著凶服衣凶服與人共席恐人嫌故專席

坐席規矩

曲禮侍坐於所尊敬毋餘席注必盡其所近尊者之端爲有後來者疏所以然者欲得親近先生備顧問似若扶持然且使下端有空處俾後者得坐是不餘席有二義一近先生問業便奉侍便一盡席則下端有餘使後來者空也又內則讀書食則齊豆去席尺注讀書聲當聞於長者食恐汙席故坐與席齊豆去席尺者亦恐汙席也

登席禮節

禮內則登席不由前爲躡席徒坐不盡席尺注升席必由下由前則躡席徒坐者非飲食非講問時故不盡席

跪坐容態之同異

古之坐自膝以下向後屈而以尻坐於足上曲禮坐左足則著右坐右足則著左是其證故儀禮士相見云坐則視膝夫必以尻坐於足上身向後而後向前而後能視膝史記索隱云古人跪坐由儀禮視膝之言證之跪與坐相近而微不同釋名跪者危也兩膝隱地勢危倪也正字通伸腰及股而勢危者爲跪因跪而益致其恭然則跪者兩膝屈而身股直豎胡能視膝乎但後世皆曰古跪坐義雖不同亦不能改也

若兩脚向前則爲箕踞不恭

韓詩外傳。孟子妻獨居踞。孟子入室視之。白其母曰。婦無禮。漢書張耳傳。高祖箕踞罵詈。陸賈傳。佗魋結箕踞見賈。師古曰。箕踞謂伸其兩脚而坐。形似箕。正今日平坐之式也。

故古之跪禮並不重略示敬於人。在今日而言跪其禮甚重。古則坐時略示敬於人耳。史記范睢傳。秦王跪跪也而請曰。枚乘傳。長君跪曰。幸甚。是皆坐時身略豎起致敬於人。故以秦王之尊亦行之於臣下也。

古因下衣不全屈身之事皆跪行之以妨露體。

古者下衣不全。故時時妨露體。曾於身服部詳之矣。箕踞或露下體。故不論男女。以爲大不敬。屈膝坐。則永無露體之嫌。不惟此也。凡俯身之動作。屈身之動作。無不跪爲之。史記張釋之傳。跪爲王生結韁。張良傳。跪爲老人納履。夫結韁納履。足可蹲地爲之。而不爾者。以蹲則兩股開張。有暴下體之勢。故必坐爲之。

跪者坐而豎身也。

周賓主席向

左傳昭二十五年。叔孫婼聘于宋。宴飲酒樂。宋公使昭子右坐。注云。改禮坐疏。燕禮司宮筵賓於戶西東上。小臣設公席于阼階上。西嚮。是禮坐主。西嚮賓南嚮也。云云。按周時賓升自西階。主升自阼階。其揖讓皆賓東嚮。主西嚮。又史記郭隗謂燕昭王曰。今王將東向坐。目指氣使以求臣。則廁役之人至是周時以

東嚮爲尊也。

漢仍坐席仍一席坐數人

漢書賈誼傳文帝與語不自知膝之前於席是皇帝亦席地坐雋不疑傳登堂坐定不疑據地曰惟席地故坐可據地史記任安傳衛將軍從此兩人過平陽主主家令兩人與騎奴同席而食此二子拔刀斷席別坐世說管寧與華歆共席讀書有乘軒過門者歆廢書出看寧割席分坐曰子非吾友也是自西漢初迄東漢末仍共席坐也。

漢坐席以東嚮爲尊

史記淮陰侯傳得廣武君令東向坐而已西向事之武安侯傳嘗召客飲坐其兄南鄉自坐東鄉以爲漢相尊不可以兄故私橈是東鄉尊於南鄉南越傳使者皆東鄉太后南鄉王北鄉蓋寬饒傳從西階上東鄉特坐樓護傳坐者百數皆離席伏護獨東鄉正坐是客皆以東鄉爲尊後漢鄧禹傳進見東鄉甚見尊寵桓榮傳乘輿常幸太常府令榮坐東面設几杖會百官是天子特以東面尊元老也。

漢宴飲食時坐席之禮節

史記魏其傳飲酒酣武安起爲壽坐皆避席伏已魏其起爲壽獨故人避席耳餘半膝席灌夫不悅起行酒至武安武安膝席曰不能滿觴按避席者下席也示不敢當離席而伏於地也膝席者言方坐而示敬

于人兩股豎起因而兩膝著席故曰膝席卽跪也若坐則兩膝向前不著席也蘇林謂下席而膝半在席上者誤也儀禮坐則祝膝爲古坐足確證

又按謝罪者皆避席吳志張昭傳昭避席謝後漢皇甫嵩傳坐者感動皆離席請之離席者仍避席下席也

古有憂則不正席坐以見意

漢書原涉傳聞友人喪側席而坐谷永訟陳湯疏曰臣聞楚有子玉得臣文公爲之側席萬石君傳子孫有過失不誚讓爲便坐師古曰坐於便側之處不正坐也按此卽側席也

古席甚薄一人可坐五十重

後漢戴憑傳光武召公卿大會說經羣臣皆就席憑獨立光武問其意憑曰諸博士說經皆不如臣而坐居臣上是以不得就席會元旦朝賀百僚畢會帝令羣臣能說經者更相難詰義不通者輒奪其席以益通者憑遂重坐五十餘席可證古坐席薄甚不然五十重席高不能坐矣

後漢兼坐牀然仍跪坐

向栩傳常於竈北坐板牀上如是積久板乃有膝踝足指之處又魏志管寧傳寧常坐一木榻上積五年未嘗箕踞榻上當膝處皆穿夫必跪坐牀上積久乃有膝踝足指之痕若如今日之垂腿坐則無是矣

按魏晉時雖有襪而仍多赤足。前於足服部述之詳矣。茲又於上二事證之。膝雖隔袴。用力重。尚可日久。有痕。若足指隔襪。雖日久於木上亦不能有跡。茲竟有指痕者。以古人常赤足也。

東漢坐牀者雖多。然牀上尙無茵席。

東漢坐牀者記載不可勝數。然牀上無鋪藉。蓋古人席地坐。而席又薄。其苦可知。乍得牀以爲甚適。故無藉也。後漢袁術傳。六月坐賓牀而歎。注賓第也。謂無茵席也。夫以術之僭侈。尙無茵席。他更可知。彼向榻管寧牀上之有膝踝痕者。亦無席之證也。

魏晉時皆坐牀榻。不席地而有獨榻坐連榻坐之分。

蜀志簡雍傳。性簡傲。獨擅一榻坐。世說杜預拜征南將軍。朝士悉至。皆在連榻坐。裴叔則羊穉舒後至。曰。杜元凱乃復連榻坐人。不坐便去。按玉篇。榻者牀之狹而長者也。人多則連坐一榻。勢使然也。又世說謝公領中書監。王東亭後至。坐促。王謝雖不通。太傅猶斂膝容之。按連榻而跪坐。擁擠不堪。故裴羊不悅。謝公能斂膝容王稱盛德也。

晉時不席地之證

世說裴遐在周馥所。馥設主人。遐與人圍棋。馥司馬行酒。遐正戲不時飲。司馬恚曳遐墜地。遐還坐。舉止如常。又支道林還東時。賢並送。蔡子升坐近林。公謝萬石後來。坐少遠。蔡暫起。謝移就其處。蔡還見謝在。

因合襪舉謝擲地。是皆不言坐牀而質不席地。如席地則不言墜地擲地矣。於是數千年之席地制至是遂改革無餘。此亦起居史上之一大紀念也。

魏晉牀上始鋪簾褥及草

魏書焦先傳。自作一瓜牛廬。營木爲牀。布草蓐其上。世說王恭從會稽還。王大造之。見其坐六尺簾。因語恭卿從東來。故應有此物。可以一領及我。恭無言。大去卽舉所坐者送之。旣無餘席。便坐薦上。又陶侃母因家貧。剗諸薦以爲馬草。是皆於牀上藉以草蓐。其富者於草蓐之上。再加以簾。以爲潔清。視漢人之坐必親牀者。進矣。

若今日之坐古人皆曰據

箕踞者。席地坐足伸向前也。據者垂腿坐榻上也。漢書帝據廁見大將軍。世說新語。庾公夜登黃鶴樓。僚屬皆散。庾公徐曰。老子於此興復不淺。便據胡牀與諸人詠謳。又謝萬詣王恬。良久。恬沐頭散髮而出。亦不坐。仍據胡牀。在中庭晒髮。又陸機還洛。輜重甚盛。戴淵使少年掠刦。淵在岸上。據胡牀指揮。又王子猷中途求桓子野奏笛。子野便回車下。據胡牀作三弄。按廁者遺器。卽今之馬桶。胡牀者兩橫木相交。中連以繩。可合可張。便於行旅。此二物皆不能跪坐。故據之。據者垂腿向前。卽今之坐也。又張說虬髯客傳。司空楊素驕貴。凡公卿上謁。皆踞牀而見。衛公李靖獻奇策。素亦踞見。按踞牀卽垂脚坐牀與據同。

若今日之著鞋垂脚坐始見於梁侯景

南史侯景傳牀上常設胡牀及筌蹄著韃垂脚坐按古人雖坐牀亦脫履侯景著韃不合一也垂脚坐牀不合二也史書之所以紀異按此亦據也正今日之坐式

然至唐坐牀仍跪坐不垂脚

唐人靈應傳遂升階相見登榻而坐又李泌外傳泌方寢肅宗入院不令人驚之登牀捧泌首置於膝夫旣曰登榻登牀則不垂脚可知如垂脚則不登矣登則跪坐也故古有榻登以爲級

榻登

自漢魏迄唐皆坐牀榻席地者漸少然古人跪坐必先登牀而後能坐惟牀高二尺登頗不易則有榻登以爲階梯釋名云榻登施大牀之前小榻之上所以登牀也

胡牀攷

自漢末有胡牀集異記漢靈帝好胡牀胡坐即今坐式是也胡牀今名馬架亦名麻櫈因以麻繩連綴木上可合可張取携最便故出門者恒携之庾公登黃鶴樓據胡牀戴淵在岸上據胡牀指揮桓子野據胡牀作三弄王恬出不坐仍據胡牀皆見前章又南齊書劉憲傳遊諸故人惟一門生持胡牀隨後南唐書劉仁瞻傳世宗在城下據胡牀督攻城蓋胡牀中綴一繩用則張之不用則合或佩於鞍馬或挂於車轄且

可挂於壁。李商隱爲濮陽公陳情表云：黃牘留官，胡牘挂壁。是其證。故或疑胡牘爲矮凳者非也。矮凳如何能挂乎？惟此物在宋以前祇能據而不能坐。故古無曰坐胡牘者。

卓子攷

卓子之名始見於楊億談苑。談苑云：咸平景德中，主家造檀香倚卓，言卓然而高可倚也。五燈會元張九成傳公推翻桌子觀談苑記其名兼釋其義，可見宋以前無此物爲主家所新創也。故其字談苑從卓五燈會元作桌。五燈會元爲南宋沙門濟川作用卓既久，遂以意造爲桌字。

椅子攷

此名亦見於宋初默記云：徐鉉謁李煜，久之老卒取椅子相對。鉉止之曰：但正衙一椅足矣。又老學菴筆記：高宗在徽宗服中用白木椅子。錢大主入覲見之曰：是檀香椅子耶？其在宋初惟皇后得坐金漆椅。宋史后妃傳：劉貴妃與孟后朝太后，孟后坐金漆椅。妃亦設此椅左右不服迺呼太后出矣。妃起立暗撤之。妃再坐而仆。是其證。

兀子攷

此物亦至宋始見。宋史丁謂傳云：謂已罷相知鄆州，私自寅緣復許留京。次日早朝賜坐，左右爲設墩。謂曰：有旨復平章矣。乃更以兀子進。是在宋初，非宰相不能坐。兀子相以下則僭其貴若此。

以上三物定其興於宋初又有一證聞見錄宋太祖雪夜叩趙普門設重茵地上熾炭燒肉是可證棹椅等物在宋初雖趙普家尙無有故席地坐也

卓椅兀至南宋遂大興

老學菴筆記往時士大夫家婦女坐椅子兀子則人皆笑其無法度是可證至放翁時雖婦女已坐椅子兀子與今日等也蓋在宋初物以創始而見貴至南宋又百餘年雖士庶之家無不有也又放翁之所謂坐仍據也可見南宋時不跪坐已久雖以放翁之博雅亦從俗以據爲坐與今日同卽宋史所謂坐亦皆據也

蓋席地之風歷三代兩漢至晉而更跪坐之容歷三代兩漢以訖於唐約數千年至宋而革迄於今惟日本高麗仍席地跪坐合中國無有也且高座旣興高几高案亦相因以起凡讀書習字諸動作亦相因以變更曩侯景垂脚坐牀羣以爲異史官特筆書之者後無不如此此中國起居史上之一大革命而載籍無詳者豈不異哉

几案攷

古所謂几矮甚攷工記所謂室中度以几書顧命玉几莊子隱几而臥皆爲席地時憑撫之器且多用於老人故几與杖恆連稱詩大雅或授之几後漢桓榮傳東面設几杖是其證至於書案曹操曾表進然古

時跪坐與几皆爲矮器。自宋時高坐興，於是几案亦相隨以高大，如今式。

卷二十四

行唐尙秉和著

拜跪

古拜屈膝頭與腰平

拜與揖異。揖可立爲拜。必屈膝。世說陶公旣救出梅驥。驥見陶公拜。陶公止之。驥曰梅仲直膝明日豈可復屈耶。是拜必屈膝之證也。然雖跪地而首不至地。苟子平衡曰拜。注平衡謂罄折頭與腰如衡之平。是跪地後身罄折使頭與腰相平如衡。卽古拜式也。

拜後稽首頓首禮節輕重之區分

拜式旣明。然後可究其輕重禮節。周禮春官大祝辨九拜。一曰稽首。二曰頓首。三曰空首。四曰振動。五曰吉拜。六曰凶拜。七曰奇拜。八曰褒拜。九曰肅拜。以享佑祭祀。

稽首之真象

按稽首者。注云拜頭至地也。蓋旣拜而頭俯至地。稍遲而後起。敬之至也。左傳哀七年。公會齊侯于蒙。孟武伯相。齊侯稽首。公拜。齊人怒。武伯曰。非天子。寡人無所稽首。又左傳孟獻子相魯。如晉公稽首。知武子

曰天子在而君辱稽首寡君懼矣是必拜天子而後稽首爲拜禮之至重者又按荀子云下衡曰稽首至地曰稽頰是稽首頭不至地但下衡而已與鄭注異然禮莫重於拜天子天子而不至地更何事可至地乎鄭故不從之

頓首之真象

頓首者鄭注云拜頭叩地也卽叩首也蓋稽首者俯首至地稍住而起頓首則以首叩地一叩卽起也疏云敵者頓首然則頓首之禮輕於稽首故列稽首之次段玉裁謂周禮之頓首卽他經之稽頰誤也稽頰者頭觸地無容甚迫急頓首則以首叩地而有容甚從容故疏云敵者用之又稽頰純爲凶禮

空首之真象

空首者注云拜頭至手所謂拜手也疏云君答臣下空手所謂拜手一拜答臣子再拜答神與尸觀疏意空首者卽拜也拜不至地至手而止卽荀子所謂平衡也又公羊傳趙盾北面再拜何休云頭至手曰拜手是也

吉拜之真象

吉拜者注云拜而后稽頰按尋常拜禮無稽頰者惟遭喪有之儀禮士喪禮主人哭拜稽頰注云頭觴地無容又檀弓拜而后稽頰頰乎其順也稽頰而后拜順乎其至也孔子曰三年之喪吾從其至者是稽頰

者倉皇哀泣見人卽以頭觸地而無容節純爲喪禮非吉禮鄭以稽頰釋吉拜殊不可解蓋拜而后稽頰者見人先拜豎身再俯而稽頰也稽頰而后拜者見人先以頭搶地然後再從容拜也由孔子之言觀之皆處喪之禮故吾疑吉拜者乃從容之義對上文振動而言不稽頰也振動拜卽恐懼而拜無別義故不詳也

凶拜之真象

凶拜者注云稽頰而后拜三年喪拜也愚按降臣俘虜見於紀傳者亦往往稽頰不專親喪故經曰凶拜凶拜之所包者廣也鄭注仍非也

奇拜寢拜之真象

奇拜者注云先屈一膝卽今之雅拜是也寢拜者注云再拜按漢之雅拜疏不言其義其狀不明清時見面一屈膝行問安禮卽古之打跔與注所謂先屈一膝者相類再拜者卽再起再俯惟首不至地至地則叩首矣

肅拜即揖之真象

肅拜者注云但俯下手今時揖是也疏肅拜但俯下手惟軍中有此所謂介胄不拜也按曲禮介者不拜爲其拜而夔音挫拜注夔拜則失容又左傳成十六年晉楚戰于鄢陵楚子使工尹襄問郤至以弓郤至

見客免胄承命曰以君之靈間蒙甲胄不敢拜命爲事之故敢肅使者而退注云肅使者肅手至地若今揖釋文云揖撟也許慎云揖舉首下手也由是證之古之揖與今異今揖上手至額自下而上古揖則下手至地自上而下古之揖今戲劇所行者是也

古男女拜之異

禮內則凡男拜尙左手女拜尙右手按尙者上也今拜則兩手相對古拜則兩手相交男尙左女尙右段玉裁云凡沓合也手右手在內左手在外是謂尙左手男拜如是男之吉拜如是喪拜反是左手在內右手在外是謂尙右手女拜如是女之吉拜如是喪拜反是喪服記祛尺二寸注祛袖口也尺二寸足以容中人之併兩手也按段說非也如以手內外分男女則當曰前曰外不當曰尙尙書序尙上也詩衛風上慎旃哉注上尙也又論語好仁者無以尙之注尙加也既曰尙左尙右則以此手加於彼手之上也

古小官見大官必拜

漢書汲黯傳黯見蚡未嘗拜田蚡爲丞相嘗揖之又自天子欲羣臣下大將軍人曰君不可不拜黯曰夫以大將軍有揖客反不重耶是西漢羣臣每見丞相見大將軍必拜也又晉書王祥傳及武帝爲晉王祥與荀顥往謁顥謂祥曰相王尊重今見便當拜也祥曰相國魏之宰相吾等魏之三公相去一階耳及入顥遂拜而祥獨長揖是晉時官爵差一階見則亦拜也

古拜謁須稱名

後漢周黨傳及見光武伏而不謁注。謁請也。告也。黨應伏地告某謁。按伏地告某謁者當伏地時應告臣某謁見也。伏而不謁者祇伏地下拜而不稱名違常例也。

南北朝送迎賓客捧手與揖之狀況

顏氏家訓南人賓至不迎相率捧手而不揖送客下席而已北人迎送並至門相見則揖皆古之道也。按捧手者拱手立而不俯揖則下手至地雖立而身罄折也。

古朋友幼者見長者必拜

世說宗承以忤魏武見疏位不配德文帝兄弟每造其門皆獨拜牀下又蜀志龐統傳注引襄陽記曰龐德公襄陽人孔明每至其家獨拜牀下德公初不令止司馬德操嘗造德公值德公渡汎祀先人墓德操直入其室呼德公妻子速作忝妻子皆羅拜堂下按獨拜者主人不答拜也不令止者每見必拜不止之也德操既令德公妻子作忝是德公妻子與德操非初見也而亦必羅拜者漢時賓客見面則拜俗使然也。

唐朋友仍見面則拜

張說虬髯客傳紅拂第長虬髯行三虬髯呼爲一妹張氏呼李郎來見三兄公驟拜之是雖於逆旅遇友

亦拜也。又人虎傳文豪李徵旣化爲虎路遇同年進士御史袁儻。儻聞草間哭聲之乃虎而能言。儻旣知其爲徵。乃曰：「儻素以兄事故人願展拜禮。」乃再拜。虎以妻子爲託。敍談甚久。告別。儻乃再拜上馬。是於路上對故人而事以兄禮亦再拜也。他若韓愈馬少監墓志云：愈以故人子拜北平王於馬前。白行簡李娃傳鄭生見娃母跪拜致詞。是皆以後輩見前輩而拜後世或有之不足以見當時之特俗也。

唐時雖男女相亂初見亦拜

虬髯客傳公歸逆旅。其夜五更初忽聞叩門而聲低者。公起問焉。乃紫衣帶帽人杖一囊。曰妾楊家之紅拂女也。公遽延入。脫去衣帽。乃十八九佳麗人也。素面青衣而拜。公驚答拜。是雖文君之私奔。相如初見亦拜。又皇甫枚非煙傳象乃躋梯而登。煙已令重榻於下。旣下見煙盛服立於花下。拜訖俱喜極不能言。是男女星夜幽會亦拜。夫黑夜私奔踰牆幽會淫褻極矣。而相見必拜。其他可知。

至宋雖後輩見前輩不盡拜矣

老學菴筆記前輩遇通家子弟初見請納拜者旣受之則設席望其家遙拜其父祖乃就坐先君尙行之觀放翁之言初見請納拜者可見不請者多矣。卽請拜有受有不受者如受之則須遙拜其父祖以爲答。若唐以前則見無不拜。拜無不受不必請納拜也。蓋拜跪之禮至宋一變與坐席同。所以然者古席地坐置身低下故視拜跪爲甚輕至宋則人擅一椅不惟席地之禮廢卽牀上跪坐之禮。

亦。廢。置。身。日。高。高。則。下。就。難。故。祝。拜。跪。爲。甚。重。拜。跪。與。坐。席。其。始。也。相。因。以。俱。興。其。末。也。相。因。以。俱。變。沿。革。變。遷。有。不。期。然。而。然。者。雖。大。賢。大。哲。亦。不。能。與。風。會。反。也。

唐宋見天子既拜而舞

明皇雜錄。玄宗既平內難。將欲草制書。甚難其人。顧謂蘇瓌曰。誰可爲詔。試爲思之。對曰。臣男甚敏捷。然嗜酒。幸免。酣醉。足了其事。遽命召來。時宿醒。猶未解粗備拜舞。又玄宗召李白。時寧王邀飲。已醉。拜舞頹然。又有黃門奉使交廣。歸拜舞於殿。下至宋。猶然。老學菴筆記。先君言。舊制朝參。拜舞而已。後增以喏。按拜舞者。蓋既起而舞。以示歡欣舞蹈之義。今戲劇天子升殿。羣臣拜起。輒揚臂舉足。掀袍作勢。迴旋者是也。喏者。唐代有之。朝賀則無。今戲劇拜起而長聲唱者。是也。

明皇之召蘇珽李白。皆一人燕見。雖拜舞而興趣索然。若大朝之時。百官拜起。揚袂舉足。迴旋殿廷。真盛事也。



卷二十一

行唐尚秉和著

訟獄

古欲訟先以財物爲抵。然民事與刑事不同。

周禮秋官以兩造禁民訟。入束矢于朝。然後聽之。注束矢者百矢。詩曰。其直如矢。不入束矢。是自服其不直也。疏云。不實則沒入官。

又兩劑禁民獄。入鈞金三日乃致于朝。然後聽之。注獄謂相告以罪名者。劑今券書也。疏券書謂獄訟之要辭三十斤曰鈞。按訟者蓋今所謂民事獄者。今所謂刑事也。訟輕故入束矢。獄重故入鈞金。然貧者胡以堪哉。

古訟兩造皆坐而無席。

左傳襄十年王叔之宰與伯輿之大夫坐獄于王庭。注坐獄者坐訟也。故晏子春秋云。晏子曰。獄訟不席。又嬰聞訟夫坐地。今嬰將與君訟。敢不坐地乎。是古訟獄者皆坐地之證也。

古命夫命婦不躬坐獄訟。

周禮秋官凡命夫命婦不躬坐獄訟。注使其屬與子弟代之也。按清時命夫命婦獄訟有報告今則無論何人皆可遣人代訟且可聘律師代也。

古立肺石以達民隱

周禮秋官以肺石達窮民。凡遠近惄獨老幼之欲有復于上而其長弗達者立于肺石三日。士聽其詞以告於王而罪其長。注肺石者赤石。窮民天民之窮而無告者立肺石三日言赤心不妄告也。愚按肺者肺腑也。有欲達其肺腑之意者立此所以示也。肺石至六朝仍有封氏聞見記云梁武帝詔于謗木肺石旁各置一函是其證。

訟不決則使兩造盟于社而使其鄉黨供酒牲以懼之

周禮秋官司盟有獄訟者則使之盟詛。凡盟詛各以其地域之衆庶供其牲與酒脯。注不信言理屈而詐者則不敢聽此盟詛所以省獄訟。按此法有數善。萬民獄訟無佐證可成其罪。欲赦之則受害者不甘欲罰之則爲惡者不服。對神盟詛理屈者恐而不敢卽敢勉強爲之必生愧怍可望色而知一也。凡獄訟曲直鄉黨必知其實。今忽累及鄉黨使供牲酒必有不欲而質證其曲直者二也。又爲變詐者懼不見直於鄉里而他日不相保受或者自服三也。此事初視之甚可笑繼思之有至理。供牲者注盟者書辭於策殺牲取血。坎其牲加書於上而埋之也。

古獄爲圓形

周禮秋官司寇以圜土聚教罷民凡害民者置之圜土而施職事焉其不能改而出圜土者殺注圜土獄城也罷民者夜在圜土晝役司空欲其勞則歸善故曰罷同疲按出圜土者卽今所謂越獄也故殺司馬遷報任安書云幽于圜牆之中圜牆卽圜土以此證漢獄仍與周同制也

古徒刑必赭衣

荀子殺赭衣不純說苑豫讓赭衣入繕宮史記張耳傳唯孟舒田叔等十餘人赭衣自髡鉗稱王家奴漢書楚交王傳衣之赭衣吾丘壽王傳赭衣塞路按徒刑者卽所謂晝役司空也赭者赤也衣赭衣所以使人知其爲罪人也此等衣制至清尙有沿歷數千年可謂久已

凡犯徒刑罪先坐嘉石以示衆

周禮秋官司寇以嘉石注文石樹外朝門左平罷民凡萬民之有罪過而未麗于法而害于州里者桎梏而坐諸嘉石役諸司空坐石期滿役于司空重罪旬有三日坐期役坐石十三日役一年次罪九日坐九月役其次七日坐七月役其次五日坐五月役其下罪三日坐三月役使州里任之則宥而舍之按梏在首桎在足役期長者坐石日亦長役期短者坐石日亦短也必先坐石者所以示衆任者保也期滿使州里保出不復爲非也

古防範囚犯之刑具

周禮掌囚。凡上罪梏。下罪桎。注梏者校也。即枷在首。猶牛之有牿。革兩手共一木。在足曰桎。按革者今之手拷。桎者今之脚镣。桎梏。上罪全有之中。罪去革。使手自由。下罪則祇刑其足。使不能逃走而已。

古遞解罪人膠目鄒手

呂氏春秋管仲吾仇也。願生得之。魯君許諾。乃使吏鄒其拳。膠其目。盛之以鴟夷。置之車中。至齊。按鄒革也。以革囊其手。使不能動作。膠目者以膠糊其目。使不能視。今賊刦人爲質者。猶用其法。鴟夷者大皮壺。既鄒手膠目。復將其全身裝入鴟夷中。卽夫差以鴟夷盛子胥尸沈之江中者是也。

周極輕之刑曰鑣罰酒。撻曰髡

周禮地官閭胥掌比鑣撻罰之事。注鄉飲酒有失禮者。則罰以鑣酒。重者撻之。又髡刑。剃人髮。不在五刑之內。蓋亦極輕刑也。

周時五刑之慘酷

周禮秋官司刑掌五刑之法。墨罪五百。劓罪五百。刖罪五百。殺罪五百。注夏刑大辟卽殺二百。臏辟三百。宮辟五百。劓墨各千。至漢文帝除墨劓刑三刑。疏宮刑至唐乃除。是周之五刑。沿自虞夏。仍而不改。夫殺刑至今不能廢。宜也。至其餘四刑。慘酷極矣。墨者黥也。先刻其額成文。以黑色涅之。終身不滅。

商鞅傳以黥徒二人夾之英布以常受黥刑人呼曰黥布是也劓者截鼻宮者去勢左傳襄十八年夙沙衛連大車塞隧而殿殖綽郭最以爲奄人殿師齊之大辱漢司馬遷被宮刑終身恥之以爲無顏上先人邱隴是也刖者去足卞和抱璞刖足孫臏刖足爲齊將齊踊貴履賤在春秋時此刑尤多夫人之罪既不至死則受刑於一時尙可遷善改過於後日而黥其面焉割其鼻焉去其勢斧其足焉使其終身殘廢不可以爲人則其酷甚於死矣乃歷三代而不改至漢文帝乃去其三至唐乃去其宮刑焉嗚呼何其晚哉

周處分殘廢人之法

周禮秋官墨者使守門劓者使守關宮者使守內刖者使守囿髡者使守積是以昭四年楚共王曰晉吾仇敵今其來者上卿大夫也若吾以韓起爲闔言劓使守門以羊舌肸爲司宮加宮刑其可乎又說苑齊景公被髮御婦人以出正閨刖跪擊其馬而反之是守內守門之證也又古之樂官必爲瞽者遇大祭祀百數十人排隊而出有眡瞭以爲相可見無一有目者故古之瞽者皆不失業無如今日之沿街乞食者此則古人因材利用之善也

古盜賊妻子入官爲奴

周禮秋官司厲掌盜賊之任器貨賄其奴男子入於罪隸女子入於春橐左傳襄二十三年初斐豹謂宣子曰苟焚丹書我殺督戎是男子入於罪隸著於丹書以丹書其罪變氏之力臣曰督戎國人懼之斐豹謂宣子曰苟焚丹書我殺督戎是男子入於罪隸

之證也。史記：楚交王世家，使杵臼碓春於市，卽春也。橐者，炊食也。女子質弱，故使爲之。

又罪人亡逸，其妻子亦爲奴。

新序：鍾子期夜聞擊磬聲而悲，召問之曰：「臣之父殺人而不得亡去，臣之母得爲公家隸，臣得爲公家擊磬。」臣不覩臣之母三年矣。昨日爲舍市而覩之，意欲贖之無財，是以悲也。子期爲贖其母，是有罪而逃者，則必奴其妻子，與盜賊同也。

漢唐犯重罪妻子皆沒爲官奴婢。

漢律：罪人妻子沒爲奴婢。魏志：毛玠傳：出見黥面反者，其妻子沒爲官奴婢。唐次柳氏舊聞：玄宗幸太子宮，見使用無妓女，令高力士選民間女五人進之。力士曰：「臣以爲掖庭中故衣冠以事沒入者不少，可備選。」又劉蕡傳：以父曾爲朱泚僞官，置大辟無雙沒入掖庭。又因話錄：肅宗謫宮中有女優綠衣秉簡爲參軍者，乃伏法蕃將阿布恩之妻也。是自漢迄唐，凡犯重罪者，其妻子無不沒爲官奴婢也。

古殺人狀況

古欲斬人，先使伏於鑑上，說苑：秦始皇旣囚太后，令曰：「敢諫者死。」茅焦旣諫，解衣伏質。史記：張蒼傳：犯死罪當斬，解衣伏質。漢書：王訢傳：訢已解衣伏質，師古曰：「質，鑑也。」欲斬人，使伏於鑑上，至斬人之器，則不以刀而以斧管子：至堂阜桓公親迎，祓而浴之。管仲詔纓捷衽，使人操斧而立其後，公辭斧三，然後退之。公

曰。垂纓下衽。寡人將見。按管仲曾射桓公中帶鈎。故自請死罪。使人操斧以備誅。而冠纓下垂。則於斬首時有礙。故屈纓於上。使不護項。又衣襟下垂。腰斬不便。故斂衽露體。俾無遮護。是皆就死時狀態。乃不持刀而持斧者。誠以古殺人。盡以斧也。

古殺人後必暴其尸三日

周禮秋官。凡殺人者。踣諸市肆之三日。左傳成十七年。晉厲公殺三郤。皆尸諸朝。襄二十三年。楚殺令尹子南。尸諸朝三日。昭二年。鄭子晳死。尸諸周氏之衢。加木焉。注書罪於木。加尸上也。卽論語所謂肆諸市朝也。又桓十五年。鄭祭仲殺雍糾。尸諸周氏之汙。注云。汙池也。是不朝不市而於野也。然自漢以來。不見有陳尸之事。祇王允殺董卓。肆之於市。卓尸肥。夜然燈於臍中。謂之卓蠟。他甚少也。

古有焚尸刑。有車裂刑

周禮。秋官。凡殺其親者。焚之。殺王之親者。辜之。鄭注。辜車裂也。左傳襄二十一年。轘觀起於四竟。杜注。轘車裂也。又史記商鞅傳。乃車裂之。至漢以後。則甚少矣。

古以金帛贖罪

虞書曰。金作贖刑。孔叢子顏讐由善侍親。子路義之後讐由以非罪執。子路請以金贖焉。新序鍾子期爲擊磬者贖其母。史記李廣傳。當斬贖爲庶人。后漢明帝紀。天下亡命殊死以下。聽得贖論。定也死罪入獄。

二十四右趾至髡鉗城旦春十四是自死罪以至最輕之春罪皆可以金帛贖故富者無所畏也城旦者戍邊塞晝伺寇虜夜築長城右趾者謂刖其右足也但自文帝時卽詔除肉刑謂右趾爲刖足疑注非也

漢女刑有顧山

平帝紀天下女徒言女應受徒刑者已論歸家月出顧山錢三百又光武紀女徒履山歸家如淳曰令甲女子犯徒罪遣歸家每月出錢雇人於山伐木名曰履山按此刑後世少見漢世重聚斂故有此刑也

漢死罪可改宮刑

景帝紀詔死罪欲腐者許之光武紀詔死罪募下蠶室按此可見宮刑之重觀詔語曰欲腐者蓋有寧就死不欲腐者矣故須募也蠶室常溫割勢後懼中風故居之

按周時王宮以奄人守內亦因材利用耳與劓刑同也故其時士大夫家亦常用奄人左傳襄二十八年崔子怒寺人御而出是其證也至漢時帝王宮嬪愈多須奄人愈衆自然之宮刑不敷用則募以致之矣故後漢郎顗傳臣聞古者本無宦官武帝末春秋高數遊後宮始置之

卷二十六

行唐尚秉和著

文具

成周以前皆以刀代筆

攷工記築氏爲削長尺博寸合六而成規鄭注今之書刀疏漢時蔡倫造紙蒙恬造筆古者未有紙筆則以削刻字至漢雖有紙筆仍有書刀是古之遺法也按削者刀也今日出土之龜甲文皆以刀劃字於上而皆爲殷物攷工記作於周初由是證成周以前皆以削刻字無所謂筆故至漢因名曰書刀言以刀作字也東觀漢記建初中以書刀賜馬嚴是也

春秋戰國以竹木爲筆而不廢刀

古今注古之筆不論以竹以木但能染墨成字卽謂之筆按曲禮云史載筆管子云於是令百有司削方墨筆莊子云衆史皆至舐筆和墨韓詩外傳墨筆操牘按茲所謂筆皆竹木之筆也先削成薄片成斜刃形而析其末使竹木之文理碎析蒙茸然後能染墨舐筆者舐其尖使潤受墨易也然仍不廢刀周末雖有帛書大多數用竹簡字訛則以刀削去史記孔子世家孔子爲春秋筆則筆削則削子夏之徒不能贊

一辭是其證。又拾遺記任末削荆爲筆。後漢時雖有毛筆。任末以家貧削荆爲之。亦古以竹木爲筆之證也。

古竹筆今木匠仍用之。宋嬪真子云古筆多以竹。如今木匠所用墨斗竹筆故字從竹。按今木匠所用竹筆長約五六寸。筆尖削成薄片。寬半寸餘。成斜刃形。以刀析其末。使刃碎能受墨。卽秦以前之筆。至所用墨斗。疑亦周舊也。

秦漢以獸毛爲筆

史記始皇令蒙恬與太子扶蘇築長城。恬取中山兔毫造筆。古今注秦蒙恬以枯木爲管。鹿毛爲柱。羊毛爲被。所謂蒼毫也。按竹木能染墨而不能含墨。作字甚艱。蒙恬以鹿毛爲心。更以羊毛被於四周。束於管中。鹿毛質勁。羊毛質柔。含墨多作字更速。後世精益求精。更益以兔毫束以竹管。西京雜記所謂天子筆管。以錯寶爲跗。毛皆以秋兔之毫。韓愈毛穎傳所謂封於管城者是也。

至漢仍刀筆並用

西漢時雖以帛書。東漢雖有紙。然多用竹簡。用竹簡卽不能廢刀。漢書郅都傳。臨江王欲得刀筆爲書。謝上原涉傳。削牘爲疏。朱博傳。與筆札使功。曹自疏姦減功。曹惶怖大小不敢隱。博知實。勅自改而已。投刀使削所記。孔光傳。時有所言。輒削草藁。皆刀筆並用之證也。故夫蕭何世家云。以秦時刀筆之吏。汲黯傳。

云人言刀筆吏不可爲公卿尹齊傳云以刀筆吏稍遷至御史周昌傳堯少年刀筆吏耳當時之稱刀筆吏似今日之稱書記生繕寫小吏也然就朱博傳觀之似刀自刀筆自筆刀專供筆誤刊削之用與周以前以削刻字所謂書刀者異矣

至晉祇用筆不用刀

刀筆與竹簡相因爲用者也晉時紙盛行竹簡遂廢竹簡廢而刀亦廢故自晉以來遂無刀筆之語

春秋戰國時以漆爲墨

論語比考識孔子讀易漆書三滅後漢杜林傳林於西州得漆書古文尙書一卷又呂疆傳至有行賂定蘭臺漆書經字以求合其私文者按古作字於簡竹簡光滑若施以今日之墨乾卽脫落故必以漆管子云有司削方墨筆莊子云舐筆和墨韓詩外傳周舍趙臣墨筆操牘凡所謂墨皆漆也然不曰漆而曰墨殆於漆之中加以黑色俾字易顯明也然摩挲久則仍滅故孔子讀易有漆書三滅之語也

至西漢始製墨成塊

西京雜記尙書令僕丞郎日給隃糜墨漢官儀尙書令僕丞郎日給隃糜墨二枚按地理志隃糜縣屬右扶風必其地有以製墨爲專業者所產最良故因以爲名然旣曰枚則已製墨成塊不專用漆

晉始廢漆墨用烟墨

東漢雖有紙仍用竹簡故漆墨仍不廢至晉盡用紙烟墨始行墨經云晉始燒黍爲烟和以松煤唐初高麗貢松烟墨宋張遇供御墨始用油烟入麝謂之龍劑以迄於今

古以竹帛爲紙

墨子殺其人民取其牛馬貨財則書於竹帛說文著之竹帛謂之書漢書諷誦詩書百家之言不可勝數著於竹帛是書字於竹帛之上也其以竹爲書者小則曰簡詩小雅畏此簡書毛傳簡書戒命也孔疏古者無紙有事書之於簡故曰簡書左傳閔元年請救邢以從簡書是也再小則曰札史記司馬相如傳上令尚書給筆札注札木簡之薄小者又與簡札名異而實同者曰牘曰畢史記補傳東方朔初入長安至公車上書凡用三千奏牘漢書許皇后傳書對牘背又周勃傳乃書牘背示之曰以公主爲證師古曰牘木簡又禮學記今之教者呻其佔畢疏佔視也畢簡也又爾雅釋器簡謂之畢蓋簡札牒畢同物而異名而牒之小與札同說文札木牘也漢書路溫舒傳編以爲牒師古曰小簡曰牒是畢與簡等牒與札等而札牒則更小於簡畢也

其大者則曰方曰策孟子曰吾於武成取二三策而已矣中庸曰文武之道布在方策蔡邕獨斷云策者簡也單執一札謂之爲簡連編諸簡謂之爲策凡書字有多有少一行可盡者書之於簡數行可盡者書之於方方所不容者乃書於策又杜預左氏序大事書之於策小事簡牘而已孔疏云策者冊也連編於

簡爲之。按儀禮聘禮云。不及百名書於方。鄭玄云。方板也。是方廣於簡。字在簡多不能容。乃書於方板上。方復不能容。乃接書於簡。簡多按次序連編之。乃名爲策。策者一文而聯多簡之總名。非策更大於方也。漢魏時校訂古書。常有脫簡錯簡諸事。脫者於策中少一簡。錯者倒置策簡之先後也。

故夫今日可以紙爲者。古無不以竹木一契券

周禮質人。凡買賣者質劑焉。鄭注質劑券也。疏古未有紙。故以札書。漢書高帝紀。此兩家常折券棄負。師古曰。以簡牘爲契券。既不徵索。故折毀之。是契券皆以竹木。

一名刺

史紀高帝紀。乃給爲謁曰。賀錢萬實不持一錢。注云。謂以札書姓名。若今通姓名。又酈食其傳。生瞋目。按劍叱使者曰。走入復言沛公吾高陽酒徒也。非儒人。使者懼而失謁。後漢郭泰傳。士爭歸之。載刺常盈車。補衡傳。乃陰懷一刺。旣而無所之適。至於刺字漫滅。凡所謂謁。皆竹札也。故懼而失謁。謁可盈車。懷謁久不用。字至磨滅也。

一書疏 須盛以囊

史記補傳。朔初入長安。至公車上書。凡用三千奏牘。公車令兩人共持舉其書。僅然能勝之。夫惟竹簡。故其重。若是而書疏。則盛以囊。漢書東方朔傳。文帝集上書囊。以爲殿帷。是可證羣臣凡有書奏。皆以囊盛。

不以囊則人見且簡札散亂無所收束由是推之凡朋友書問往還亦必皆以囊故後漢廣陵思王傳荆哭不哀而作飛書封以方底囊底方則容廣也

一書籍

莊子惠施多方其書五車夫惟竹簡故著書至有五車之多又論語比考讖孔子讀易韋編三絕鐵撾三折夫惟竹簡故貫之以韋讀畢一簡以鐵撾掀一簡也韓非子魏昭王讀法十餘簡而睡矣是亦編簡爲策之證也

東漢時以竹簡製書之法簡長二尺四寸

後漢吳祐傳欲殺青簡以寫經書注殺青者以火炙簡使青而易書且不蠹又周磐傳編二尺四寸簡寫堯典一篇并刀筆各一以置棺前又曹褒傳撰自天子至於庶人冠婚喪祭始終制度以爲百五十篇寫以二尺四寸簡是欲寫經書先將竹簡殺青而書之長則以二尺四寸爲度也

若法令之書則簡長三尺

左傳定八年鄭駟歐殺鄧析而用其竹刑杜注析私造刑書書於竹簡故曰竹刑而不言其尺寸漢書杜周傳君爲天下決平不循三尺法孟康曰以三尺竹簡書法律也又朱博傳廷尉治郡斷獄且二十年亦獨耳剽日久三尺法令人事出其中是漢時刑書竹簡長皆三尺比尋常書長六寸也

後漢始有紙

後漢蔡倫傳自古書契多編以竹簡其用縑帛者謂之爲紙縑貴而簡重並不便於人倫乃造意用竹屑麻頭及敝布魚網以爲紙紙之創造始於此然東漢至魏仍兼用竹簡魏張既傳常畜好刀筆及版奏是其證也。

古貧者得書難常寫於門牆衣服及股上

拾遺記蘇秦張儀同志好學遇見墳籍行路無所題記以墨書掌及股裏夜還而寫之折竹爲簡剝樹皮編以爲書帙又賈逵家貧削庭中桑皮以爲牒或題於扉屏又任末觀書合意者題其衣裳門徒更以淨衣易之河洛秘奧非正籍所載皆注記於柱壁及園林樹木好學者來輒寫之是可證古時紙固少卽竹簡貧者亦不易辦故任處寫書

至東晉紙大行始不用竹書而以卷計

世說庾仲初作揚都賦成以呈庾亮亮大爲其名價於是人人競寫都下爲之紙貴又庾子嵩讀莊子開卷一尺許便放下曰了不異人意又世說注褚陶曰聖賢備在黃卷中始不曰簡而曰卷矣

唐時書籍仍爲卷至宋裝爲冊而仍以卷計

唐韓退之王適墓誌得一卷書若告身者袖之按王適婦翁必嫁其女於官人適本秀才媒妁受賄給婦

翁謂適爲官人持一卷書作告身即誥封軸以爲證由是可證唐時書籍皆爲卷形史謂某人藏若干卷書者殊名與實符至宋印本書行皆裝成冊而仍以卷計則不合矣

漢人作書已用硯

自秦以前不見人用硯俗傳周武王有硯銘者僞也周初承殷皆以削刻字周末用漆書調漆時或用硯然諸子所記或曰和墨或曰墨筆而不及硯故吾謂今木匠所用墨斗爲周制至西漢製墨成塊用時須磨磨必以硯故漢書薛宣傳云下至材用筆研皆爲設方略後漢班超傳安能久事筆硯間乎似當時讀書者爲不可離之物至漢末而愈多矣

古傭書致富

拾遺記漢安帝時家貧不得仕乃挾竹簡插筆於洛陽市傭書美于形貌又多文辭來僦其書者丈夫贈其衣冠婦人遺其珠玉一日之中衣寶盈車而歸是可證漢時能書者少又士人能書恆恥而不爲故有傭書者業必發達也

古人作書不憑几

世說桓宣武北征袁虎宏小字時從被責免官會須露布文喚袁倚馬前令作手不輟筆俄得七紙又夏侯泰初嘗倚柱作書時大雨霹靂破所倚柱衣服焦然神色如故書亦如故按今人作書必憑案有能懸肘

懸腕者，則以爲能。若魏晉時尙無高几可憑，故隨地可作書，無不懸肘也。

古竹書易亡之故

後漢吳祐傳文恢爲南海太守，欲殺青簡以寫經書。祐曰：「此書若成，載以兼兩。按此時所謂經，五經耳。兼兩者數車也。」祇五經卽載數車，故五胡亂起，中原文物悉成灰燼。彼夫汲冢竹書有七十餘車，實書類亦不多也。

隋唐已有木板書

隨園隨筆云：按陸深河汾燕閒錄云：開皇十三年十二月八日上勅佛經雕板行世。唐柳玭家訓序言在獨時嘗閱書肆見字書小學率雕本。是自隋已有木板，但祇雕佛經。至唐末漸及於字書小學，尙未有雕本經書。

五代始刻九經及其他經籍

齊召南歷代帝王年表云：後唐明宗長興三年初刻九經板印賣之。至周廣順三年九經板始成。又五代史和凝傳文集百卷自鏤板行世。又宋史藝文志曰：周顯德時始有經籍刻板，學者無筆寫之勞。又歐陽修有蜀刻本韓集，是可證五代時不惟刻九經並刻其他書籍，不似唐末之祇刻小學也。

至宋刻板書始大備

五代時雖刻九經祇正文及注疏則畏難而不刻隨園隨筆云宋真宗幸國子監問邢昺經板幾何昺曰十餘萬臣少從師授經有疏者百無一二力不能傳抄今板本大備士庶家皆有之是刻板書至北宋已大備也

書籍變遷之歷史

自曹魏以前皆用竹簡寫書或以帛帛貴用者少皆簡書也至東漢有紙紙初發明漢魏時蓋仍貴其見於史者仍用簡書不廢刀筆至晉紙多簡書始廢此一變也晉以後雖有紙然書必手抄南史沈麟士年過八十猶手抄細字書數十篋梁袁峻自寫書日課五十紙至五代時雖有刻板書蓋甚不備仍不免手抄故蘇軾李氏山房藏書記言老儒先生自言少時史記漢書不可得幸得皆手抄讀之近年市人轉相摹刻日傳萬紙抄寫之勞始免此又一變也至清末影印行能將巨帙縮爲小帙攜帶尤易此又一變也

卷二十七

迷信禁忌

古救日食狀況

夏書胤征曰辰弗集於房。鼙奏鼓。嗇夫馳。庶人走。是自夏時逢日食。則舉國惶恐奔馳以救之也。周禮夏官大僕。凡軍旅田役贊王鼓。救日月亦如之。又地官鼓人。救日月則詔王鼓。又左傳昭十七年日有食之。昭子曰日有食之。天子不舉。不舉盛饌。伐鼓於社。責羣陰。諸侯用幣於社。伐鼓於朝。自責。大史曰三辰有災。百官降物。素服。君不舉。辟移時。樂奏鼓祝用幣。史用辭。

杜預云。集安房舍也。辰不集於房者。言不安於舍次也。蓋古人以日月食乃三辰之災。故舉國上下竭力救護。又桓十五年六月日食。文十五年四月日食。皆用幣伐鼓。與此同。此種救護禮節。至清仍有。每日食則百官素服。商民敲銅鐵器以爲救護。鏗鏘震天。又周禮女巫注魯人。因日食而哭。夫至於舉國皆哭。則由震恐以至於悲慘矣。然自三代至清沿之數千年。何其久哉。

古忌迎太歲動作

荀子武王之伐紂也行之以兵忌東面而迎太歲。謂逆歲星戶子武王伐紂魚辛諫曰歲在北方不北征武王不從按今日建築房屋俗避太歲所向謂犯之則凶古則動兵亦忌也。

周時忌子卯日

禮玉藻子卯稷食菜羹左傳辰在子卯謂之疾日君徹宴樂學人舍業爲疾故也禮檀弓晉平公謂杜蕡曰爾飲曠何也蕡曰子卯不樂注云紂以甲子死桀以乙卯亡謂之疾日又左傳昭十八年二月乙卯周毛得殺毛伯過而代之萇弘曰毛得必亡是昆吾稔之日也注昆吾以乙卯日與桀同誅稔熟也言其侈惡積熟故誅按此等禁忌殊不可解桀紂罪惡貫盈以子卯日誅宜也胡爲反忌是日學人至於舍業哉抑以帝王死於是日是日必大凶然昭王南征死於江幽王死於驪山皆凶死胡後人不忌其死日吾疑其尙有說也。

古忌晦日

左傳成十六年郤至曰陳不違晦注月終陰之盡故兵家忌之以犯天忌我必克之。

漢忌癸亥日

後漢鄧禹傳明日癸亥匡等以六甲窮日不出禹因得更理兵勒衆按癸爲十干末亥居十二支末癸亥日居六十甲子之末故曰窮日不出兵。

古忌五月五日生

史記。孟嘗君傳。田嬰有賤妾。有子名文。文以五月五日生。嬰告其母勿舉。其母竊生之。及長。其母因兄弟見其子於嬰。嬰怒。文頓首曰。君所以不舉五月子者何故。嬰曰。五月子者。長與戶齊。不利其父母。文曰。人生受命於天乎。受命於戶乎。必受命於戶。則可高其戶耳。誰能至者。又西京雜記。王鳳以五月五日生。其父欲不舉。曰。俗諺舉五日子長及戶則自害。不則害其父母。其叔父曰。昔田文以此日生爲薛公。以古事推之。非不詳也。遂舉之。又世說。胡廣本姓黃。以五月五日生。其父母置甕中流於江湖。胡公取之。養爲己子。後登台司。又宋書。王鎮惡以五月五日生。父母欲棄之。祖猛曰。昔田文以此日生爲齊相。此兒必興吾宗。遂舉之。又孝子傳。紀邁以五月五日生。父母棄之。是此禁忌。自周至六朝而未已。迄唐始漸衰。唐書崔信明傳。以五月五日正中時生。其父請太史令占之。是仍有所疑也。特不殺耳。又癸辛雜識。宋徽宗以五月五日生。以俗忌改作十月十日爲天寧節。是宋時尙以是爲忌也。

漢及六朝人忌辰日哭喪

顏氏家訓。陰陽說云。辰爲水墓。又爲土墓。故不得哭。王充論衡云。辰日不哭。哭則重喪。今無教者。辰日有喪。不問輕重。舉家清謚。不敢發聲。以辭弔客。按此等禁忌之無理。殆與五月五日生子同也。

春秋時忌見科雉及兩頭蛇

說苑。楚莊王獵雲夢。射科雉得之。申公子倍攻而奪之。王將殺之。大夫諫曰。爭雉必有說。子姑察之。不出三日。子倍病而死。邲之戰。楚勝。晉歸而賞功。申公子倍之弟請賞於王曰。臣之兄讀故記曰。射科雉者不出三月必死。臣之兄爭而得之。故天死也。王命發府而視之。於記果有焉。遂賞之。按科雉不知爲何物。康熙字典云。科雉獸名。而不言其本。胡得之而必死哉。然古載記卽有之。怪甚矣。

新序。孫叔敖爲兒時。出遊見兩頭蛇。殺而埋之。歸而泣。其母問其故。對曰。聞見蛇兩頭者死。嚮者吾見之。恐人復見之也。殺而埋之。母曰。如是存心必不死。旣而果不死。按此亦與得科雉者存心同耳。彼何以死此。何以不死。蓋事出偶然。無關休咎也。

古以女爲不祥

左傳襄二十五年。鄭伐陳。入之。陳侯奔。遇賈獲。載其母妻下。而授公車。公曰。舍爾母。辭曰。不祥。是以母爲不祥。弗與共車也。又列女傳。趙簡子伐楚。至河津。吏醉不能渡。欲殺之。津吏女娟。旣說簡子。而免其父。且請操械而渡。簡子曰。吾將行。選士大夫。齋戒沐浴。義不與婦人同舟而渡也。是亦以女爲不祥。恐同舟敗事也。又漢書李陵傳。吾士氣少衰。鼓之不起者何也。軍中豈有女子乎。乃搜得盡。斬之。明日斬首三千級。

是軍中尤忌有婦人也。

古忌東益宅

新序哀公問孔子曰寡人聞之東益宅不祥有之乎孔子曰不祥有五而東益不與焉按此事淮南子亦載之謂哀公欲西益宅史爭之以爲不祥哀公怒問其傅宰折睢蓋一事而傳聞異詞然或曰東或曰西亦足證其無正理而純爲習慣之迷信矣

周及漢皆惡梟鳴唐以梟爲報喜

說苑齊景公爲露寢之臺成而不通焉柏常騫曰爲臺甚急臺成君何爲不通公曰然梟昔者鳴其聲無不爲吾惡之甚故不通焉又漢書霍光傳鴟數鳴殿前樹上大怪之按梟晝伏夜動純爲陰物俗謂其夜見鬼始鳴必自三代時有是說不然何惡之甚哉然至唐時又以梟爲報喜

劇談錄韋顥舉進士未放榜擁爐愁歎忽檐際有梟怪鳴疑有殃咎忽禁鼓一鳴報顥及第又隋唐嘉話有梟鳴於張率更庭樹其妻以爲不祥連唾之率更云急洒掃當遷官言未畢賀客盈門

古人迷信蛇妖

左傳文十五年有蛇自泉臺出入於國如先君之數秋八月聲姜薨毀泉臺又韓非子滴澤蛇將徙有小蛇謂大蛇曰子行而我隨之人以爲蛇之行者耳必將殺子不如相衡負我以行人以我爲神君也乃相衡負以越公道人皆避之曰神君也按韓非子雖寓言然當時人心理實如是也

古以狗矢浴不祥

韓非子燕人無惑。言祛惑注皆誤故浴狗矢。燕人其妻有私通於士。其夫早自外而來。士適出。夫曰何客也。其妻曰無客。問左右。左右言無有。如出一口。其妻曰公惑易也。因浴之以狗矢。又燕人李季好遠出。其妻私有通於士。季突之。士在內中。妻患之。其室婦曰。令公子裸而解髮。直出門。吾屬佯不見也。於是公子從其計。疾走出門。季曰是何人也。家人皆曰無有。季曰吾見鬼乎。婦人曰然爲之奈何。曰取五牲之矢浴之。按牲矢避鬼魅。古所未聞。迷信至此。祇有捧腹而已。

古以芻狗禱病

莊子天道篇。夫芻狗盛以篋衍。筭也巾以文繡。尸祝齋戒以將之。及其已陳也。行者踐其首脊。蘇者取而爨之而已。按淮南子。疾疫時行。則芻狗爲帝。是芻狗者。束草爲狗。被以文繡。供於神用。以禱病。病愈多芻狗。愈貴。然禱寵則以車轍之踐踏之。復爲薪矣。觀魏志周宣傳。人嘗三夢芻狗。三占皆不同。而皆應人間其故。宣曰。芻狗者。祭神之物。故始夢當得飲食。祭祀既訖。則爲車所轍。故中夢當折脚。芻狗旣車轍之後。必載以爲薪。故後夢憂失火也。是芻狗之用。自周迄三國。仍相同也。至唐則代以紙馬。博異記王昌齡舟行至馬當山。禱神祈風。具酒脯紙馬。是其證。

古以桃木避不祥

左傳襄二十九年。楚人使公視隧。乃使巫以桃荔先祓塗。楚人弗禁。既而廢之。杜注荔黍穫。孔疏荔是帚。

蓋桃爲棒也。按左傳昭十二年。楚王曰。唯是桃弧棘矢。以共禦王事。杜注。桃弧棘矢。以禦不祥。又莊子插桃枝於戶。連灰其下。童子入不畏。而鬼畏之。是鬼智不如童子也。惟鬼畏桃木。故魯人先以桃荔祓亡鬼。後楚人知其故。故悔悔。先靈被祓也。又禮記。君臨臣喪。以巫祝桃荔執戈。是魯又以楚子爲臣也。

又漢書。廣川惠王傳。今欲糜爛望卿。使不能神。取桃灰毒藥。與支體雜煮之。又王莽傳。莽感高廟神靈。遣虎賁虎士入高廟。拔劍四面提擊。斧壞門牖。桃湯赭鞭。鞭洒屋壁。是又煮桃木爲湯以避鬼也。又宋史五行志。西川孟昶每歲除日。命翰林爲詞。題桃符。又李時珍本草集解曰。桃味辛氣惡。故能厭伏邪氣。今人門上用桃符辟邪。以此也。又元好問詩云。十九桃符傍門戶。是可證刻桃爲符。至新年則懸門上以辟邪也。又古今載記。以桃木避鬼之事。難更僕數。他迷信事。或古有今無。獨此事歷周迄今不改。胡其久如此哉。

周以來夢之迷信

周禮春官占夢。中士二人注專占夢之吉凶。詩小雅乃寢乃興。乃占我夢。又大人占之。衆維魚矣。又正月篇。訊之占夢。又左傳成十年。晉侯夢大厲。又史記趙世家。趙盾在時。夢叔帶持要而哭。卜之。兆絕而後好。又簡子夢之帝所甚樂。又史記佞倖列傳。文帝夢欲上天不能。有一黃頭郎從後推之上天。後陰求推者郎。即見鄧通。尊幸之。是周及漢皆重視夢。而周且有掌夢專官也。至三國魏周宣以占夢著大名。而占無

不驗事尤奇也。

古夢棺者必得官

世說新語人問殷中軍何以將得位而夢棺將得財而夢矢穢殷曰官本是臭腐所以將得而夢棺屍財本糞土所以將得而夢穢汗又晉書索統傳索充初夢天上有二棺落充前統曰棺者職也當有京師貴人舉君二官者俄而果然又因話錄李逢吉未掌綸誥前家有老婢好言夢後多有應李公久望除官因訪於婢一日婢至慘然公問故曰昨夜與郎君作夢不好意欲不說公強之曰夢有人昇棺至堂後云且置在此不久即移入堂中此夢恐非佳也公聞甚喜俄除中書舍人後知貢舉未畢而入相又雜家小說紀此等事亦甚多不勝錄也

古詛祝所惡之人使神加殃

左傳隱五年鄭伯使卒百人出緇行二十五人出鷄犬以詛射穎考叔者注鄭前伐許穎考叔執鄭伯之旗
蝥弧以先登子都射之顛故鄭伯使巫祝詛之按書無逸厥口詛祝疏詛祝謂告神明令加殃咎也以言
告神謂之祝請神加殃謂之詛又周禮春官詛祝掌盟詛之祝號鄭司農云詛謂祝之使沮敗也然則詛
射穎考叔者卽請神加以殃咎也故漢書班婕妤傳飛燕諺婕妤祝詛考問辭曰若鬼神有知不受邪佞
之訴若其無知訴之何益是其證也

古盟誓歃血狀況

晏子春秋。崔杼旣殺莊公而立景公。杼與慶封相之。刲諸將軍大夫及顯士庶人於太公之坎上。令無得不盟者。以甲干列環其內外。盟者皆脫劍而入。戟拘其頸。劍承其心。令自盟曰。書詞不與崔慶而與公室者。受此不祥。言不疾。指不至血者死。以指抹血所殺七人。次及晏子。奉杯血仰天歎曰。嗚呼崔子爲無道而弑其君。不與公室而與崔慶者。受此不祥。俛而飲血。按歃者飲也。左傳僖二十五年。宵坎血加書。僞與子儀子邊盟者。注掘地爲坎。瀝牲血坎中。加盟書其上。又周禮秋官司盟掌盟載之法。注盟者書詞於策。殺牲取血。坎其牲加書於上而埋之。謂之載書。卽左傳昭十二年所謂歃用牲加書也。茲言太公之坎上者。言於太公廟爲坎也。指不至血者。言以指抹血歃於口也。此所謂刲盟。與哀十五年太子與五人介與。羣從之。追孔悝於廁。强盟之。十六年太子使五人與豬從己。刲公而強盟之。性質同也。夫旣知爲人所不欲。而猶強使之盟似一盟。卽永不敢背者。則當時人之心理忠厚實過後人也。

若天子之同盟及列國會盟。則執牛耳不以殺。

周禮天官玉府。若合諸侯。共其珠槃玉敦。注珠槃以盛牛耳。戶盟者執之。敦盛血。又夏官戎右。盟則贊牛耳桃荔。疏戶盟者。旣以珠槃盛牛耳。更以玉敦盛耳血。使歃戎右執桃與荔。祓除不祥。此天子合諸侯之盟也。夫以天子之尊。儘可命令諸侯。使從其令。而必以盟。是盟更重於天子之命可知也。

天子合諸侯而盟其執牛耳者自爲天子之屬若諸侯與諸侯盟則以尊者執牛耳是以常有爭執故哀十七年武伯問於高柴曰諸侯盟誰執牛耳又定八年晨師將盟衛侯於鄆澤趙簡子曰羣臣誰敢盟衛君者涉佗成何曰吾能盟之衛人請執牛耳成何曰衛吾溫原也焉得視諸侯將歃何援衛侯之手及擁衛侯怒按注云盟禮尊者蒞牛耳主次盟者衛君與晉大夫盟臣當執牛耳晉人恃其強背禮侮衛君也然無論天子合諸侯諸侯與諸侯凡盟必歃血於口左傳襄九年鄭子孔曰與大國盟口血未乾而背之可乎又史記平原君傳毛遂謂楚王左右曰取鷄狗馬之血來遂奉銅盤跪進楚王曰王當歃血而定從既畢歃左手持盤血右手招十九人曰公等相與歃此血於堂下卽盟時尸盟者以次以手抹血於口也

古重視卜筮

卜用龜以火灼龜視其兆而定吉凶說文兆龜坼也蓋以火灼龜板上現坼文卽以此坼文定吉凶史記趙世家所謂兆絕而後好文帝紀兆得大橫是也在夏商時卜蓋重于筮周時卜筮並重其卜詞有千二百之多然左傳云筮短龜長似周人心理亦以卜爲重故凡得大龜者謂之寶檀以玄纁藏于太廟論語藏文仲居蔡山節藻棁甚貴重也有大事則啓之漢以後用者少唐或用之唐以後載籍則不見蓋失傳久矣

筮用蓍草枚長二尺或五尺七尺筮時用五十枚去一四十九枚三揲成一爻十八揲成六爻周易卽其

筮詞又有連山易歸藏易先儒謂爲夏殷易今不傳

周設卜筮專官

周禮春官大卜下大夫卜師上士二人卜人中士八人又筮人中士二人夫掌卜之官尊至大夫其重視爲何如是以周時凡事必卜冠婚喪祭祭牛皆卜而後定大事更可知其見于儀禮春秋傳國語者不可勝數至戰國已少秦漢尤少以此見迷信心理愈古愈甚也

至戰國遂有賣卜爲業者以迄於今

莊子支離疏者鼓筴播精足食十人注鼓筴音策揲蓍也足食十人言賣卜可養十人也又高士傳嚴君平垂簾賣卜成都市日得百錢自給卜訖則閉肆下簾又史記日者傳司馬季主卜於長安東市又漢書張禹傳禹爲兒至市喜觀於卜相者前久之頗曉其別蓍布卦意是皆以卜相爲業開肆得錢以自給爲春秋以前所未有又前定錄宣平坊王生善易筮李相國揆往問之王生每以五百錢決一局而來者雲集是卜資之昂爲唐以前所未有也

古相術

春秋時以威儀音聲相人即可決其休咎其見於左傳者如鬪伯比謂屈瑕舉趾高心不固必敗後果敗死又晉侯見魯成公不敬李文子曰晉侯必不免果陷廁卒又晉士貞伯謂鄭伯視流而行速必不能久

果死。又叔向謂單子視下言徐無守氣矣。決其將死是以威儀相也。又楚子上謂商臣蠶目而豺聲必爲亂。魯臧文仲謂齊君語偷必死。楚子文謂越椒熊虎之狀而豺狼之聲必滅。若敖氏叔向母聞伯石啼聲曰是豺狼之聲也必喪羊舌氏後皆驗是以聲音相也而皆惡徵而善徵先見者如文元年王使叔服來會葬公孫敖聞其能相人也見其二子曰穀也豐下必有後於魯國後果驗。又韓詩外傳衛姑布子卿善相迎孔子而視之五十步從而望之五十步謂子貢曰得堯之頸舜之目禹之頸皋陶之喙必聖人也從前視之盎盎乎似有土從後視之高肩弱脊此惟不及四聖也此又以行步時左右前後氣象相也。

至戰國秦漢相術能以紋理知休咎

春秋時之相皆按理而決。至戰國則益進。戰國之時最著者爲梁唐舉。荀子相人古有姑布子卿。子孔子。注相趙襄子。今之世梁唐舉注相李兌。觀人形狀顏色知其吉凶妖祥此仍有理可憑也。至韓非子云今戰勝攻取之士不賞而卜筮視手理者日賜。又周勃傳有縱理入口法當餓死後亞夫竟餓死。夫祇以文理相則古所無也。又後漢班超傳祭酒虎頭燕頸有飛而食肉相當封侯萬里外後果然是其術較春秋益進矣。他若竇廣國衛青等相者皆預知其封侯而史失其詞凡此皆不錄錄其有相法者數則以見其變遷自此以後以相人爲業者益多與垂簾賣卜等故不備錄。

古有巫官

周禮春官司巫中士二人府一人史一人男巫無數女巫無數注巫能制神之處位次主者疏巫與神通掌三辰之位次又凡以神仕者無數以其藝爲之貴賤之等按國語云古者民之精爽不攜貳者而又能齊肅中正則神明降之在男曰覲在女曰巫聖人用之使制神之處位次主是巫之來已久其可考見者世本云巫咸始作巫是自殷已有也

古巫有事時之盛況

周禮春官司巫掌羣巫之政令若國大旱則帥巫而舞雩注雩旱祭也魯僖公欲焚巫庭以其舞雩不得雨疏引春秋緯云雩者呼嗟求雨之祭按左傳僖二十一年夏大旱公欲焚巫庭又檀弓云魯穆公曰吾欲焚庭而奚若又云吾欲暴巫而奚若鄭注云庭者面向天冀天哀而雨之又女巫云旱嘆則舞雩凡邦之大裁歌哭而請注崇陰也又按論語云風乎舞雩是舞雩在郊外值天旱男巫則呼嗟向天女巫則舞雩哭覬天哀而有雨苟天不雨則或置巫日中而暴之甚或並巫庭而焚之若天之不雨其咎端在巫者在後世人君值天不雨或下詔罪己意尙不失爲正大古則歸咎於巫其心理甚不可解然當天旱男女巫舞雩於郊外歌哭舞蹈其盛況爲後世所未有矣

古巫能下神視神鬼

周禮司巫凡喪事掌巫降之禮鄭注降下也巫下神之禮今世或死既斂就巫下禡音傷其遺禮疏禡當

家之鬼。蓋既斂使巫降死者之神也。是下神之事。自周至東漢未革。又左傳成十年晉侯夢大厲壞大門及寢門而入。公覺召桑田巫。巫言如夢。又曰不食新矣。後竟如言。又莊子小巫見大巫。拔茅而棄。又吳志張紘傳陳琳曰足下與子布在彼所謂小巫見大巫。神氣盡矣。又酉陽雜俎明皇東封歸至華山見金天王道旁迎駕。明皇令巫視之。所言衣服處所皆同。又宣室志。韋皋爲西川節度使。張延賞壻未達時依延賞頗遭白眼。有巫謂張夫人曰。韋郎有神護之。祿位過令公。是古巫能視神鬼。又古籍記載類此者甚多。未必盡妄。疑古巫實有一種學理相傳授。故周爲設專官。後代失其傳授。而山野鄉僻之巫。遂羣起爲驅矣。見今尤多。故不再述。

唐宰相堂飯常人食之卽死

中朝故事。宰相堂飯。常人多不敢食。鄭延昌在相位。一日其弟延濟來值食次。遂同食。其弟一夕而卒。

以紙錢爲冥資之歷史

唐陳鴻睦仁蒨傳。仁蒨邯鄲人大業初江陵岑之象爲邯鄲令。延仁蒨教其子文本。仁蒨夙與冥官成景善。成景朝太山府君過邯鄲。仁蒨令文本爲具食。並贈以金帛。仁本問是何等物。仁蒨曰。鬼與人異。真不如假。可以黃色塗大錫作金。以紙爲絹帛。云云可證。隋末尚無以紙爲冥資之事故。仁蒨教之。至唐則漸多。摭言王勃在馬當山遇老人曰。吾有債十萬。可爲吾償之。後勃買冥資十萬焚之。段成式支諾皋云。乃

貨衣具鑿楮如期焚之。又具酒脯紙錢乘昏焚于道。又再生記王捨妻夢捨已死求錢三十貫。卽取紙剪爲錢。召巫者焚之。又五代史寒食野祭焚紙錢。宋史外戚傳李用和少窮困居京師鑿紙錢爲業。

按鑿紙錢者卽諾皋記所謂鑿楮。蓋以圓鐵管中含鐵柱打疊紙上卽成錢形。今猶用此法。但皆雜貨店爲之。無專以此爲業者。而宋時有之。想見古人之焚化多於今日也。

墓俑之歷史

孔子曰始作俑者其無後乎。以其象人而用之也是自周時以木刻人殉葬。至晉六朝隋唐則以泥塑人馬及各項什物殉葬以便死者。今發掘者是也。至明清盡易以紙所糊人馬什物大小與真者無異。視古之泥塑物小不盈尺者異矣。此外又糊院宇居室重樓傑閣焚之。則古所無也。

卷二十八

行唐尙秉和著

廁溷便旋

古廁溷制度 周制與洋茅廁同

周禮天官宮人掌王六寢之修爲其井匱除其不鍤去其惡臭鄭玄云井漏井所以受水潦鍤猶絜也詩云吉鍤爲餧鄭司農云匱路廁也玄謂匱豬謂雷下之池受蓄水而流之者疏云謂於宮中爲漏井以受穢又爲匱豬使四面流水入焉井匱二者皆所以除其不鍤潔又去臭惡之物

按此等排穢之法頗與今日之洋茅廁相類漏井者卽上面受穢之管也水潦者漫溺也言爲井以受漫溺之穢而漏之於下也豬同漏者蓄水鄭謂匱豬爲雷下之池者卽上漏井之穢落於池中也受蓄水而流之者卽便旋已放蓄水盪穢使流出也其用意純與今之洋茅廁相同

周路上有官廁

周禮宮人爲其井匱鄭司農云匱路廁也後鄭雖不從其詁然可證古時路上皆有官廁與今正同

周廁有池坎

左傳成十年晉侯將食張如廁陷而卒。按此文杜注不詳釋。張者腹漲故如廁遺。據周禮井匱注廁上有井下有雷池。是凡廁皆下有極深之坑坎也。晉侯病甚。蓋跌於坎陷之中而卒也。又說文械竈。賈逵注周官械虎子也。廁行清竈則行清內之空中者也。卽廁內下掘之坎也。故晉侯陷其中而卒。金樓子云漢燕王旦將敗。廁中豕羣出。夫廁內有豕必爲深坑。豕不得出。豕出所以記異也。

又按今山西各處之廁皆下掘坎深約六七尺。廣如之而橫兩板於坎上。履之以溲溺板卽史記萬石君傳所謂廁牕也。下望黝然深可沒頂。疑晉時遺制。故晉侯陷其中可致死。因誤倒入坎內頭必向下也。

古不共廁

隨園隨筆云士喪禮隸人涅廁。注古人不共廁。涅者填之也。是亦廁爲土坑之證也。

古廁有垣牆爲蔽又有馬桶

史記萬石君傳建爲郎中令。洗沐歸謁親入子舍竊問侍者取親中裙廁牕身自洗濯。注徐廣曰牕築垣短板晉住謂廁穢垣牆隱於其側。據此是廁必有垣牆以爲隱蔽也。但自身自洗濯觀之。牕若爲垣牆於洗濯之義甚不合。原說文廣畱玉篇等字書皆訓牕爲築牆短版版橫坎上履以溲溺易霑汙故洗濯之似非垣牆也。

徐廣又云一讀牕爲竇。言自洗滌廁竇廁竇瀉除穢惡之穴也。呂靜曰穢竇穢器也。晉威豆又孟康曰廁

行清，竈行中受糞者也。東南人謂鑿木空中如曹，謂之廁。據此是廁者於地掘坎，小便於其中，喻者卽今之馬桶。故石建爲親洗濯。

由以上二說，廁輪雖未得確詁，然由漢魏晉宋人注可證明。古廁有垣牆爲隱蔽，又以證漢魏時鑿木空中如曹，卽今馬桶不過古時工拙不能如今製法，須鑿木爲之耳。

蓋廁者乃便旋之定所，故所在有之。左傳哀十五年，迫孔悝於廁，強盟之。又史記項羽本紀，沛公起如廁。高后紀，乃斷戚夫人手足，居之廁中，又逐產殺之郎中府吏廁中。是廁必有垣牆或屋，備遺時人不見，故曰廁中也。以上廁

古便器狀况

周禮天官玉府掌王之衣服衽席牀第及襲器，又內監執襲器以從。鄭注：「襲器清器虎子之屬。」按說文：械，襲器也。賈逵解周官：械虎子也。古之受大小溲者皆以虎子呼之。又按韓非子：趙襄子漆智伯頭爲溲杯，溲杯亦虎子也。且由說文觀之，凡今日之馬桶、小便壺皆名虎子。後人但以小便器爲虎子者誤也。以上便器

古謂小便器爲清。史記萬石君傳注：廁行清，竈行中受糞者也。又周禮內監執襲器以從。鄭注：襲器清器，清者小便，專於廁內行之。史記范睢爲魏齊笞擊，睢佯死，卽卷以簣置廁中，賓客飲者醉更溺睢，是其證。

久之遂謂小便器爲清漢應劭風俗通云扶風臧仲英家多怪有孫女三四歲亡求之不能得二三日乃於清中溺內啼又梁柳惲擣衣詩踟蹰理金翠容與納宵清宵清者溲器言擣衣罷將睡置清備遺也

古遺時先以棗塞鼻

世說王敦初尚主如廁見漆箱盛乾棗本以塞鼻王謂廁上亦下果食遂至盡按棗能禦臭乾烈尤佳故用以塞鼻

古大遺時先脫衣至宋猶如此

世說石崇廁常有十餘婢侍列皆麗服藻飾置甲煎粉沈香汁之屬無不畢備又與新衣著令出客多羞不能如廁王大將軍往脫故衣著新衣神色傲然按是必因遺時脫故衣遺罷謂故衣著臭不堪用俾著新衣出以示其富非入廁必易新衣方令遺也又玉泉子楊希古性潔淨內逼如廁必撤衣無所有然後高履以往又五燈會元湛堂傳師半夜特往登溷方脫衣悟卽提淨桶至師曰待我脫衣脫罷悟復到按湛堂北宋時人是可證自晉至唐宋凡大溲皆脫衣也蓋古人衣服寬博不脫長衣則大溲不能辨亦猶清時服大禮服之難以大遺也

更衣說

由世說及五燈會元攷之古人大遺時必脫衣因是而思及古所謂更衣更衣之名始見於史記衛皇后

傳云。武帝還過平陽。主飲酣起更衣。而注不釋其義。漢書灌夫傳。坐乃起更衣。稍稍去。師古云。坐謂坐上之人也。更改也。凡久坐者皆起更衣。以其寒煖變更也。又東方朔傳。後迺私置更衣師。古云。爲休息易衣之處。又楊敞傳。大將軍光欲廢立議既定。使大司農田延年報敞。唯唯而已。延年起至更衣。師古曰。古人延客必有更衣之處。據師古所釋。更衣之義。祇爲坐久寒煖變更。然田延年詣楊敞。並非宴飲久坐。而亦至更衣。吾深疑更衣者。乃備客便旋之私處。不必如師古所言。祇爲寒煖更衣而設。如純爲更衣。他侍御尚可隨侍。惟其爲便旋故。雖以武帝天子之尊。起更衣。祇子夫侍他侍御無入者。卽其證也。此有一確證。論衡四諱篇云。夫更衣之室。可謂臭矣。臭則爲廁無疑也。又田延年至楊敞家。起至更衣。亦便旋也。因便旋時須脫衣。久之遂名其處爲更衣。必如師古所詁似太拘也。

自六朝至宋大遺後以籌子拭穢並以水滌淨

大遺後以何物拭穢。古載記甚不詳。晉裴啓語林云。劉寔詣石崇如廁。見兩婢持錦囊。寔遽退笑謂崇曰。乃誤入卿室。崇曰。廁耳。寔更往向。乃守廁婢所進囊。是籌。北齊書文宣帝令楊愔進廁籌。以籌拭穢。始見於此。又五燈會元廣教院歸省禪師。僧問如何是清淨法身。師曰。廁坑頭籌子。按籌者木枚也。古蓋紙貴。或無粗紙。故以木枚撥落餘穢。又湛堂傳。師半夜特往登溷。方脫衣。悟卽提淨桶至。師曰。待我脫衣。脫罷悟復至。未幾悟供籌子。師滌淨已。召接淨桶去。是可證自六朝迄宋。大瀆訖先用籌子拭穢。再以淨水洗

濕脫衣著衣甚繁難也。

至元始以紙拭穢

元史后妃傳裕宗徽仁皇后事太后孝至溷廁所用紙亦以面擦令軟以進以紙拭穢始見於此若以前雖貴人亦用籌也今鄉里之民仍有用籌者餘則用紙者多

古不廁遺則有罰

左傳襄十年師慧過宋朝將私焉注小便相者曰朝也慧曰無人焉又定二年邾莊公與夷射姑飲酒射姑私出閹乞肉焉奪之杖以敲之二月邾子在門臺臨廷閹以瓶水沃廷邾子望見之怒閹曰夷射姑旋小便焉命執之又世說新語謝萬在兄前欲索便器阮思曠叱其無禮是可證便旋必於廁且須無人古今一也

漢魏時侍中爲皇帝執虎子

西京雜記漢朝以玉爲虎子以爲便器使侍中執之行幸以從是以魏志蘇則傳注舊儀侍中親省起居故俗謂之執虎子則爲侍中同郡吉茂謂則曰仕進不止執虎子夫所謂舊儀者卽漢官儀也

卷二十九

行唐尙秉和著

古取火法

古取火之法有三。一用木燧。二用金燧。三用石敲火。至清同治年尙如此。後秦西火柴入中國。敲火之法始廢。

鑽木取火法

自燧人氏見大鳥啄木出火。知木中藏火。因創鑽木取火之法。見卷一。後世因之。數千年不改。禮內則右佩木燧。注木燧鑽火也。左傳文十年。命夙駕載燧。又定二年。王使執燧象奔吳師。史記孫子傳。龐涓夜至研木下。見白書。乃鑽火燭之。是至周時鑽火之法仍大行。

然所鑽之木須隨時改易。是以論語云。鑽燧改火。改火者據馬融注。周書月令有更火之文。春取榆柳之火。夏取棗杏之火。季夏取桑柘之火。秋取柞楨之火。冬取槐檀之火。一年之中鑽火各異木。故曰改火。至必改之故。邢疏謂取木之色與四時相配而不言不改。不能得火。又周禮司烜掌行火之政令。四時變國火以救時疾。變亦改也。既曰救時疾似別有意義。非不改。不能得火也。又北史王劭傳。劭以上古有鑽燧改火之義。近代廢絕。上表請改火。是可證當時鑽火已不改木。又唐杜甫清明詩云。旅雁上雲歸紫塞。家

人鑽火用青楓是楓木春日亦出火。又崔元翰詩操舟衆工立檻岸濕櫓鑽火磨星紅是凡木皆可出火。又以證鑽火之法至唐仍不廢也。

鑽燧取火之巧法

淮南子若以燧取火疏之則弗得。遲也數之則弗中。疾也正在疏數之間注得其節火乃生按今日春時匠人鑽木急遽則出火茲云弗中似古人以燧取火之法今已不知。

至周時兼用金燧取火

周禮秋官司烜掌以夫燧取明火於日注夫燧陽燧也疏取火於日故名陽燧猶取火於木爲木燧也。又攷工記輶人金錫半謂之鑒燧之齊注鑒燧取水火於日月之器也。

按鑒燧卽夫燧亦曰金燧禮內則云左佩金燧注取火於日也卽以金錫爲鏡回其面向日取火故曰鑒燧。

漢末仍用金燧取火

魏志管輅傳注君不見陰陽燧在掌握之中形不出手乃上引太陽之火下引太陰之水噓吸之間烟景以集苟精氣相感縣象應乎二燧。

案陽燧卽周禮所謂夫燧鑒燧內則所謂金燧也陰燧卽秋官司烜所謂以鑒取明水於月也明水祭祀

用之非備人飲食故下略焉又案燧在掌握其物甚小故佩於腰以備用而引火之法各書不詳今竟失傳甚可惜也

金燧取火之詳情

夢溪筆談云陽燧面窪向日照之光皆聚向內離鏡一二寸光聚爲一點大如麻菽著物則火發夢溪筆談爲宋沈存中著是至宋仍有以陽燧取火者惟天陰或夜則不能用內則云左佩金燧右佩木燧蓋有日時以金燧取火甚易無日則以木燧也

按今日以凸面玻瓈鏡向日照之則光聚如豆以易然物置其下頃刻即得火古無玻瓈用金鏡蓋亦以易然物當焦點而得火也

魏晉後敲石取火

潘岳詩煩如敲石火劉勰新論人之短生猶如石火是可證魏晉六朝已以石敲火至唐時敲石取火者尤衆柳宗元詩夜發敲石火山林如晝明白居易詩深爐敲火煮新茶韓昌黎詩牧童敲火牛礪角是其證也

以石敲火之法

法以鐵片與石相撞下藉以火絨俾火星落於絨上再以取燈北方土名即發燭接引之即發燭火絨者以艾或紙

加以硝水揉之使軟。取燈者北方以褪皮麻楷破之，斷爲枚，長五六寸，塗硫磺於首，遇火即燃。當光緒初，火柴未盛行，取火之具有火鑊，縫皮爲包，安鐵爲刃，內裝火石一片，火絨一團，欲用火，取火絨豆許，放石上以刃撞之，頃刻即得火。爲吸旱烟者不可離之物。後火柴大行，火鑊、火石、火絨等物遂漸廢。

發燭之歷史

北方以麻梗頭塗硫磺，用以發火，名曰取燈。南方則以松木或杉木清高士奇天祿識餘云：杭人削松木爲小片，其薄如紙，鎔硫磺塗木片頭，分許，名曰發燭。史稱周建德六年，齊后妃貧者以發燭爲業。案發燭卽今之取燈，是自六朝時已有。又宋陶穀清異錄云：夜有急苦，作燈之緩，有知者披杉條染硫磺置之，待用。一與火遇，得燄，然旣神之呼引光奴，今遂有貨者易名火寸。按引光奴，卽齊之發燭，然宋時實亦名發燭。嬪真子云：司馬溫公鄉居，看書至夜分，乃自捲火滅燭而睡。至五更初，公卽自起，發燭點燈，著述是其證。惟北方之發燭，用麻梗或用杉木，則不可知。蓋自以石敲火之法興，發燭爲引火所必須，故古今重之。

古鑽燧時代家家皆藏火種

古因得火之難，家家藏火種備用。孟子踰門求水火，無弗與者。又韓詩外傳，客謂蒯通曰：臣里婦見疑盜肉，其姑去之，恨而告於里母。里母曰：安行今令姑呼汝，卽束蘆請火去。婦之家曰：吾犬爭肉相殺，請火治之。

之。又干寶搜神記。桂陽太守李叔堅家犬有人行。又於竈前畜火。叔堅云。兒婢皆在田中。狗助畜火。可不煩鄰里。此何足怪。據是則家家藏火種備用。不必以燧也。

古汲水用瓶公共置之瓶常在井旁供衆用至唐有木桶

周易井卦。羸其瓶凶。左傳襄十七年。衛孫蒯。田於曹隧。飲馬于重丘。毀其瓶。重丘人閉門而詬之。又揚子雲酒箴。子猶瓶矣。居井之湄。是可證。瓶爲公共物。常置井側。供衆用也。故孫蒯毀其瓶。重丘人皆詬之。又後漢鮑少君傳。拜舅姑禮畢。提甕出汲。又世說。魏文帝以毒置棗蒂中。令任城王食之。既中毒。太后索水救之。帝預勅左右。毀瓶罐。太后徒跣趨井。無以汲。須臾遂卒。是可證。自周迄漢魏。皆以陶器汲。尙無木桶也。陶器易毀。故揚子雲酒箴云。子猶瓶矣。居井之湄。一旦更同專礙。爲嘗所轄。身提黃泉骨肉爲泥。是其證。至唐有木桶。段成式劍俠傳。見老人方鑊桶。乃出桶板一片。以桶汲。雖轄而不碎。較古便多矣。

古村聚會汲狀況

高士傳。管寧所居村落。會井汲者。或男女雜錯。或爭井鬪鬭。寧患之。乃多買器。分置井傍。汲以待之。又不使知來者。得而怪之。問知寧所爲。乃各自責。不復鬭訟。按今日村落。仍多會井汲。晨暮炊前汲者。最多。惟用木桶汲。甚速。古用瓶。懼毀汲。甚緩。緩則易爭也。

古桔槔汲水狀況

莊子子獨不見桔槔者乎。引之則俯。舍之則仰。又天地篇子貢南遊楚見漢陰丈人抱甕而汲。子貢曰。有械於此。一日浸百畦。用力寡而見功多。夫子不欲乎。曰若何。曰鑿木爲機。後重前輕。挈水若抽。數加沃湯。其名曰槔。又說苑衛有五丈夫俱負缶而入井灌韭。終日一區。鄧析適下車爲教之曰。爲機重其後。輕其前。命曰矯。終日灌韭百區不倦。

按桔槔今日尙有。然井略深不能用也。用於河邊或有泉之池邊最宜。若井則須極淺也。惟古祇灌園用之。今則尋常汲亦用之。

宋時之水車

蘇東坡詠無錫道中水車云。翻翻聯聯銜尾鴉。犖犖確確蛻骨蛇。按此卽今日之水車也。銜聯不斷周而復始。有若蛇之蛻殼。讀此詩知今制與宋制無異。今北方以順德真定定州保定各屬爲最多。天旱時遍野皆是。

民取材木及燃料狀況

周以前凡山林藪澤皆爲官有。山中林木許民斬伐。然必以時至時民入山斬材而出入有期限。恐其盡物。若非時斬材則曰竊。故材木常足而山不童。終春秋世無買賣木材者。戰國以後此制遂壞。至漢有雇山之刑似材木伐取已無制限。自是北方之山先童材木漸感不足。且水泉因以枯竭。雨陽亦不時。至今

日。遂。受。其。大。病。自。大。河。南。北。太。行。東。西。縱。橫。數。千。里。之。山。岡。盡。屬。不。毛。殊。爲。可。惜。而。自。周。以。後。三。千。年。來。凡。爲。國。家。者。無。人。慮。及。其。如。之。何。哉。

周禮地官山虞掌山林之政令。令萬民時斬材。有期日。凡竊木者有刑罰。按孟子曰。斧斤以時入山林。不時則爲竊。故刑罰之。然至期入山亦非漫無限制也。林衡云。若斬木材則受法於山虞。受法者必核其爲何事。斬材材之大小多少及出入期限之細則也。禮王制云。草木零落然後入山林。注十月之中也。卽山虞所謂仲冬斬陽木也。然山虞尙有仲夏斬陰木之文。疑仲夏民無暇必官用也。

守護山林之法

林衡云。掌巡林麓之禁令。而平其守。注平守者。平其地之民。守林麓之部分。按林麓廣大。祇官吏守望。萬不敷用。竊仍不免。乃卽以林麓附近之居民。負守護林麓之責。平均其地與民區分部守。而巡查督責者林衡也。力省而功多矣。

古今然料之概况

時愈古。然料愈多。隨在取足。一因人少。一因山林爲官有。不許私入山取材木。故植物蕃衍。不竭其源。三代以後。山林之法不講。民任意入山取材。十山九童。人口蕃殖亦益多。用愈廣。故古之所棄者。今視爲珍。今之所珍者。古皆輕視也。

春秋時然料足常燒澤以裕租稅

管子齊之北澤燒光照射堂上管子入賀曰國不能無薪而炊北澤燒農夫賣其薪一束十倍此租稅所以九月而具也按古之都市亦買薪而炊北澤爲官有都市之薪所自出燒之則都市富人皆買於農夫故其價十倍而租稅速具也

又常燒澤獵獸

韓非子魯人燒積澤天北風火南倚恐燒國哀公懼自將衆救火左右盡逐獸而火不救按此專爲獵獸而燒也不燒則蒲葦蒹葭爲麌覆狐兔所宅不易得此以今日視之所得殊不償失而古不爾者以然料多無所用也

周已有木炭蓋皆富貴人用之

周禮天官宮人執燭供爐炭地官有掌炭官又禮記月令季秋之月草木黃落乃伐薪爲炭左傳邾子廢於爐炭爛遂卒又寺人柳熾炭於位按以炭取煖或炊飯簡潔而無烟勝於薪矣然見於傳記者皆富貴家用之蓋其值昂也

作炭須在山中

史記外戚傳竇廣國入山作炭晉時阮籍傳孫登常經宜陽山作炭人見之魏書刑罰志富民入山作炭

唐集異記王用入山作炭。按作炭之法伐薪燒之。燒透以土埋其爐。而山者薪之所自出。故恆入山。

六朝已發見石炭至隋漸有用者。

水經注。鄴縣冰井臺。井深十五丈。藏冰及石墨。石墨可書。又然之難盡。亦謂之石炭。至隋王劭上表請變火曰。今溫酒及炙肉。用石炭柴火竹火。味各不同。是至隋已有用石炭者。然唐段成式酉陽雜俎記無勞縣石墨。爨之彌年不銷。以爲物異。以是證唐燒石炭者仍少也。

至宋燒石炭者漸多。

老學庵筆記。北方多石炭。南方多木炭。而西蜀又多竹炭。東坡志林言。彭城東有石炭。然宋時雖有燒石炭者。並不重之。蓋其時然料尙易於今日也。

晉唐以來貴人用木炭之侈。

以草木作然料。烟煤塵汙。而炊飯烹茶。味又不美。於是古貴人皆用木炭。晉書羊琇傳。性豪侈。屑炭作獸形。以溫酒。洛下豪貴競慕效之。唐書德宗紀。罷九成宮貢立獸炭。又有鳳炭。開天遺事。楊國忠屑炭塑作鳳形。又有煉炭劇談錄。洛中豪貴子弟常饌必以炭炊。往往仍不愜意。僧聖剛者見而問之。曰。凡炭必先燒令熟。乃可入爨。謂之煉炭。不然有烟氣。至宋又有琴炭。老學庵筆記。承平時。炭皆斲作琴形。至於今山木皆盡。木炭之產漸少。強以樗材爲之。求如昔年之炭。身披白灰。擲地作銅聲者。幾絕迹矣。

至清末石炭爲民生不可離之物

自唐以來都邑燒木炭明清以來木炭漸乏稍稍用石炭初只都邑富人及食肆用之農人仍然柴草無用石炭者至清末民生愈蕃木植愈少祇禾麻草柴不敷炊爨於是農家亦用石炭雖貧民亦不能離然石炭之礦有時而盡更數百年必仍變易論者懸想謂必代以電氣不知果如何也

卷三十

行唐尙秉著

古官吏休沐

今日放假

受杖

佩印

多蟲

漢官吏五日一休沐

史記萬石君傳每五日洗沐歸謁親文穎曰郎官五日一下又鄭當時傳孝景時爲太子舍人每五日洗沐嘗置驛馬長安諸郊存諸故人請謝賓客又日者傳宋忠爲大夫賈誼爲博士同日俱出洗沐正義云漢官儀五日一假洗沐也

按官吏洗沐在周秦時不見然漢制多沿秦疑秦時卽有載籍失之耳洗沐亦名休沐借洗沐之名出署休息一日蓋古官吏與後世異旣入署則日夜寢食於其中至五日洗沐然後得出凡請賓訪友遊戲諸事皆於是日行之非若後世官吏散值卽歸私邸也

病則以沐償郎官富者可買沐

漢書楊惲傳郎官故事令郎出錢市財用給文書迺得出名曰山郎移文書即病盡一日輒償一沐或至歲餘不得沐其豪富郎日出游戲惲爲中郎將罷山郎師古曰貧者實病皆以休假償之也按豪富郎日

出游戲者出錢市沐故可常不在署其貧者病一日則償一沐故終歲不得休漢承秦制輒不如秦秦不聞賣官漢則入貲爲郎而賣官矣秦革封建制度官吏或有休沐然必不賣沐漢則竟可以財市矣此真古今之創聞故太史公六國表敍云學者見秦在帝位日淺不察其終始因舉而笑之不敢道此與以耳食無異悲夫太史公蓋深憤漢盡用秦法且事事不如秦而反詬秦也今觀賣沐事亦其一端已

然宰相亦休沐

史記張蒼傳王陵常救蒼不死及貴常父事王陵陵死後蒼爲丞相洗沐常先朝陵夫人上食然後敢歸家又漢書張安世傳休沐未嘗出上官皇后傳光霍光常休沐得出桀常代光入決事又孔光傳沐日歸休兄弟妻子燕語又唐李德裕傳因兵事竟不得休沐是自漢迄唐凡宰相亦休沐與郎吏同也

宦官武士郡吏亦休沐

後漢蔡倫傳每至休沐輒閉門絕賓魏志許褚傳從士須他謀爲逆憚褚不敢發伺褚休下日懷刃入是宦豎及武士皆有休沐也又華歆傳少爲郡吏高唐爲齊名都衣冠無不游行市里歆爲吏休沐出府則歸家闔門又梁習傳注劉類爲弘農太守吏二百餘人不與休假是外吏漢魏時亦例有休沐也

自六朝至唐宋官吏皆有休沐

宋鮑照詩三朝國慶畢休沐還舊京又梁劉孝綽有歸沐詩贈任昉是六朝時官吏仍休沐惟隔幾日方

沐不詳。至唐劉禹錫詩云：五日思歸沐，三春羨衆還。又孟浩然詩：共乘休沐暇，同醉菊花杯。是唐時官吏仍五日休沐，與漢同。想六朝亦爾也。至宋明清，此制寢微。蘇軾詩云：天風淅淅吹玉沙。詔恩歸沐休早衙，是龍興節休沐，非五日休沐也。

漢冬夏至放假

薛宣傳及日至休吏。賊曹掾張扶獨不休，坐曹治事。宣出教曰：日至吏以令休，所由來久。曹雖有公職事，家亦望私恩，意據宜從衆歸對妻子設酒殼，請鄰里一笑爲樂。師古曰：日至冬至夏至也。

宋節假多至七日

漢時節假觀薛宣傳只一日耳。至宋則多少不等。文昌雜錄云：祠部休假元日寒食冬至各七日，上元夏至中元臘各三日，餘立春清明等節各一日，歲共七十六日。

閱明清載記及所目覩，官吏以端陽中秋二節爲例假，又至十二月二十日封印，正月二十日開印。此一月中皆休沐之期也。然宰相仍每日視朝召對，清多沿明制。蓋官吏每日入衙，每日歸邸。與漢時官吏常駐署中者異矣。

魏郎官受杖須脫袴纏緞束縛

三國志注：黃初中韓宣爲尚書郎，常以職事當受罰於殿前。已束縛杖未行，文帝輦過問此爲誰，特原之。

遂解其縛。時天大寒。宣前以當受杖。豫脫袴纏緡面縛。及其原。憚腰不下。乃趨而去。按尚書郎爲清貴之官。乃在殿廷受罰。至脫袴露體。束縛手足。同於罪犯。受罰至此。亦云辱矣。然並未褫職。偶有過以此罰之耳。古云士可殺不可辱。茲所謂辱耶非耶。然當時官吏亦安之者似相沿已久。不足異也。

晉官吏受杖不脫袴

晉書王濬傳。濬補長山令。復爲司徒左西屬。濬以此職有譴。則應受杖。固辭。詔爲停罰。又世說桓公在荊州。欲以德被江漢。恥以威刑肅物。令史受杖。正從朱衣上過。桓式年少。從外來。云向從閣下過。見令史受杖。上捎雲根。下拂地足。意譏其不著。公云。我猶患其重。夫曰。杖從衣上過。是隔衣受杖。必不脫袴也。然必受縛。世說桓南郡好獵。麌兔偶騰逸。參佐無不被繫。束桓道恭時爲賊曹參軍。常自帶綿繩。著腰中。玄問此何爲。曰。公獵好縛人。士會當被縛。手不能堪芒也。是雖不脫袴露脣。而束縛仍不免也。又漢晉春秋云。向雄爲河內主簿。送犧牛。道渴死。太守吳奮召雄與杖。雄不受杖。曰。郡牛亦死。是理直亦可不受杖也。

北齊時仍杖參佐

北齊書。吳遵世爲大將軍墨曹參軍。從遊東山。有雲起。恐遇雨。使遵世與李業興筮之。曰。著賞絹十。不著罰杖十。遵世筮無雨。業興筮有雨。須臾雲散。二人各受賞罰。是雖戲亦杖也。

唐宋參軍簿尉判官仍受杖

杜甫送高三十五書記詩云。脫身簿尉閒。始與捶楚辭。宋蔡夢弼注云。適曾爲封丘尉。不得志。以謂唐時參軍簿尉受杖責也。又韓愈贈張功曹詩。判司卑官不堪說。未免捶楚塵埃間。是判官亦受杖也。又杜牧寄姪阿宣詩。一語不中治。鞭笞身滿瘡。是杖刑復兼鞭刑也。

曲渚紀聞。富丞相判汝州。黃山谷爲汝州葉縣尉。到官逾期杖之。今按山谷還家呈伯氏詩云。強趨手版汝陽城。更責愆期被訶詬。法官毒蠍草自搖。丞相霜威人避走。卽指此也。

然唐宋時京曹不見有受杖者。至元明外官固杖。京曹亦杖。元史趙子昂爲兵部郎中。桑哥早到六曹官後。到者笞之。斷事官引子昂受笞。有解之者始免。鄧文原傳。轉運司凡五品以下官皆杖。決州縣無如之何。明史海瑞以操江杖御史之演劇者。而魏璫之廷杖大官。更無論矣。至清則官吏有罪。須褫職方受刑。不似前代之以微過受杖也。

古官吏佩印狀況

今官吏之印。皆函於匣。古印皆佩於肘。刻刻不離。自戰國以迄魏晉皆然。由今思之。凡印皆金質。終日繫肘上。有妨動作。甚可笑也。

周之時官吏有符節。不見有印。至戰國始有之。史記。蔡澤傳。懷黃金之印。蘇秦傳。佩六國相印。張耳陳餘傳。乃脫解印綬。推予張耳。耳不受。陳餘如廁。耳乃佩其印。高后紀。祿乃解印屬典客。夫曰佩。曰解。可證印

無時不繫身也。此官吏也。又漢書霍光傳。迺持昌邑王手解脫其璽綬。扶王下殿。昌邑王故爲天子。由是可證天子亦常常佩印。此等習慣至晉而未已。世說周覬曰。今年殺諸賊。當取金印如斗大。繫肘後。是其證。至隋唐此等習慣遂已。

古拜某官卽與某官印以爲信不似後世受代始有印

會稽官吏至都住所

者飯食及拜太守買臣衣故衣懷印綬步歸郡

都值上計時。會稽吏方相與羣飲。不視買臣。買臣入室與共食。食且飽。少見其綬。守邸怪之前引其綬。印繫帶視其印。會稽太守章也。守邸驚出語上計掾吏。羣相驚駭。是可證甫拜官卽給與新印。到官後方收前太守印。繳京師或銷燬也。

古官吏多蟲

古士人衣服寬博。中衣蓋不常更換。而懶於沐浴。身垢與衣垢相接。故多蟲。習以爲常。視爲當然。不以爲穢。列子紀昌學射於飛衛。懸蟲牖南而望之。夫物之小者多矣。而獨懸蟲可證蟲之易得。又符子齊魯爭汝陽之田。周豐曰。臣嘗晝寢。有羣蟲共鬪乎衣中。此春秋士人之多蟲風俗通。趙仲讓爲大將軍梁冀從事中郎將。冬日坐庭中。向日解衣。裝捕蟲。齊東野語陳思王著論。得蟲者莫不剉之齒牙。而野老嚼蟲。此漢魏士夫之蟲。晉書王猛見桓溫。捫蟲而談。旁若無人。世說顧和爲揚州從事。月旦當朝。停車州門外。周

侯詣丞相。歷和車旁。和覓蟲。夷然不動。又嵇叔夜絕交書。性復多蟲。爬搔無已。南史邢邵傳。對客或解衣。覓蟲。北齊書。邢之才位中書監。對客或解衣。揜蟲。此西晉及六朝士夫之蟲。唐人志怪錄。揚州蘇隱夜臥。聞被下有人念阿房宮賦。掀被視之。無他物。唯有蟲十餘墨。客揮麈。王荊公召對時。蟲緣鬚上。上顧而笑。退朝王禹玉曰。屢遊相鬚。曾經御覽。夫蟲至沿緣鬚眉。則其多殆不可思議。此唐宋士夫之蟲。自宋以後。蟲之紀錄見於卿大夫者甚少。蓋漸以爲穢矣。

卷三十一

行唐尙秉和著

古貴賤之觀察

古官吏暴民之習慣

左傳昭五年。楚公子棄疾如晉過鄭。禁芻牧樵採。不入田。不樵樹。不採薪。不抽屋。不強匱。誓曰。有犯命者。君子廢。小人降。按芻所以食馬。樵所以炊飯。樵樹者斬樹爲薪。采薪者採民間蔬菜。抽屋者抽屋上椽爲薪。強匱者強乞假於民。蓋春秋卿大夫旅行從者之常態也。在異國民尚不敢抗。本國可知矣。而棄疾嚴禁之。故鄭人喜也。又昭十三年。叔鮒求貨於衛。淫葬者注縱使不法也。此皆適外國虐民之證也。

其在本國者。如說苑。楚文王伐鄧。使王子革王子靈共掘菜。二子出。採見老丈人載畚。乞焉。不與。搏而奪之。又檀弓。季子皋葬其妻。犯人之禾。申詳以告曰。請庚。償也之。子皋曰。以吾爲邑長於斯也。買道而葬。後難繼也。夫不與。則強奪。葬踐人稼。事過而不償。民豈欲哉。乃竟安之。此皆居國內恃貴爲暴也。

又韓詩外傳。梁山崩。晉君召大夫伯宗。道逢輦者。以其輦服行也。其道。伯宗使其右下欲鞭之。按輦者行路。豈預知遇大夫。及其既遇。或在狹途中。勢不能促避。乃遽欲鞭之。古官吏之賤視民若此。

漢百姓逢官吏不下車卽罪之

後漢鄧晨傳注引東觀漢記曰晨與上共載出逢使者不下車使者怒將至亭欲罪之新野潘叔爲請得免是可證古百姓逢官吏如乘車不惟避之且須下車致敬也如不下車卽將至郵亭付亭長杖責又韓康傳使者徵韓康康辭安車乘柴車先發至亭亭長以韓徵君過方修道橋及見康以爲田叟也奪其牛是小吏如亭長亦虐民如此也

唐時百姓逢官吏不避則予杖

劍俠錄黎幹爲京兆尹時曲江塗龍祁雨觀者數千黎至老人植杖不避幹怒杖之又隋唐嘉話賈島初赴舉京師一日於馬上得句云鳥宿池邊樹僧敲月下門初欲作推字練之未定不覺衝尹衝·時韓吏部權京尹左右擁至前島具告所以韓立馬良久曰作敲字佳矣又靈鬼志卿犯鹵簿罪應髡又諾皋記京宣平坊有官人夜歸入曲有賣油者張帽驅驢駄桶不避導者搏之是官人雖夜行坊曲中商民亦須避也

古官吏之威風

周禮秋官鄉士職三公若有邦事則爲之前驅而辟又遂士六卿若有邦事則爲之前驅而辟縣士若大夫有邦事則爲之前驅而辟注辟者令行人避也按秋官士師王燕出入則前驅而辟是以左傳成二年

齊侯自徐關入見保者曰勉之齊師敗矣辟女子注齊侯單身還婦人不及避是自國君下至大夫出皆辟人故韓詩外傳子路云入夫子之門內切磋仁義外爲陳王道心竊樂之出見羽蓋龍旛旛裘相隨心又樂之此以見官吏之榮寵雖賢者亦忻羨也

古官吏鹵簿卽今日出殯時道旁行列之儀仗

自漢唐以來官吏出門有鹵簿鹵簿者卽與前陳列之儀仗如旂幟刀矛棨戟之屬分占道路兩旁中不許人過過則衝鹵簿有罪是以賈島衝韓昌黎鹵簿被捕至宋猶如此宋歐陽修梅聖俞墓誌云聖俞得疾臥城東汴陽坊朝之賢士大夫往問疾者騶呼屬路不絕城東之人市者廢行者不得往來咸驚顧相語曰茲坊所居大人誰耶何致客之多耶夫曰騶呼則騶從傳呼辟市人也曰市者廢則儀仗分列道旁商賈不得陳列物品也曰行者不得往來則鹵簿過而行人斷絕也其狀況與今日北平出殯時陳列道旁之儀仗無以異至清時凡宰相尙侍入朝祇有三五騶從而無鹵簿惟九門提督出鞭板紛列兩旁傳呼警叫略與殯儀相類餘官雖京尹亦否也若外官督撫出入儀仗雖盛於京官然較古亦遜也

如失官儀則有罰

漢書景帝六年詔曰夫吏者民之師也車駕衣服宜稱亡度者或不吏服出入閭里與民亡異令長吏二千石車朱兩轓千石至六百石朱左旛車騎從者不稱其官服下吏出入閭巷亡吏體者二千石上其官

屬三輔舉不如法令者。

按朱買臣傳頃之傳舍吏駕駟馬來迎以太守應駕駟馬也鮑宣傳宣行部乘傳去法駕駕一馬舍宿郵亭坐免歸又後漢謝夷吾傳遷鉅鹿太守後以行春乘柴車從兩吏冀州刺史上其儀序失中左轉下邳令又韋玄成傳侍祀孝惠廟天雨淖不駕駟馬而騎至廟下削爵爲關內侯是皆因不法駕而降黜也。

漢至六朝時以騎馬爲失官儀被劾

顏氏家訓梁周宏正爲宣城王所愛給一黑下馬常服御之舉朝以爲放達至乃尚書郎乘馬則糾劾之蓋自周至齊梁官吏無騎者騎則以爲失儀祇驕從騎也。

唐宋官吏禁馬上食物禁入酒肆

朝野僉載周張衡位四品退朝見路旁蒸餅新熟遂市一枚馬上食之被御史彈劾降勅流外又歸田錄仁宗在東宮魯肅簡公宗道爲諭德偶私飲舍旁酒肆中會有急宣公至遲囑中使以實對真宗曰卿何故私入酒家公謝曰臣家貧無器皿酒肆百物俱備賓至如歸適有鄉里親客自遠來遂與之飲然臣旣易服市人不能識也上笑曰卿爲宮官恐爲御史所彈又歸田錄言事者奏李庶幾與舉子於餅肆中作賦

按馬上食物固失官儀若易服而入酒肆則誰識之是以自行簡汎國夫人傳云二肆陳列車輦觀者甚

衆時生父由常州刺史入覲與同列易服章潛往觀焉易服則人不知其爲官故雖出入里巷無所忌彼魯宗道李庶幾皆易服入市乃亦遭彈劾以是見自漢以來之重視官儀至宋而未已也

此等官威至清中葉以後外官仍舊京官則漸漸打破除步軍統領外雖親王宰相入朝路上無呵殿傳呼者驕從之外繖蓋俱無官再卑者更無論已揆其用意似以法定儀仗爲最俗出入用之有傷大雅此亦人心自然之革命已至入酒肆會飲凡翰詹科道曹司無不爲之二品以上者則寡至民國則一切解放回想前代之官威有如戲劇已

古重視貴人之醜態

周禮地官一命齒於鄉里再命齒於父族三命而不齒注凡農隙飲酒鄉民雖卿大夫必來觀禮齒于鄉里者以年與衆賓相次也齒于父族者異姓雖有老得居其上也父族尚不敢不齒者席于賓東所謂僎也按荀子云一命齒于鄉再命齒于族三命族人雖七十不敢先不敢先卽周禮所謂不齒徑居父族之上也夫所謂父族者有世父叔父焉有伯叔祖父焉有長於我之兄焉官雖益高親族長幼之序自若也乃以爵尊之故凡親族皆不能與之齒此在朝廷之上誠無如何乃鄉飲亦如此焉則古之重視人爵爲何如哉

貴則親畏

史記蘇秦傳佩六國相印行過洛陽車騎輜重擬於王者周顯王除道使人郊勞蘇秦之昆弟妻嫂側目不敢仰視俯伏侍取食此以後世習慣例之秦雖貴昆弟妻嫂何至如是而不知周秦社會習慣實如是也

漢雖家庭亦親不敵貴

史記高祖紀高祖五日一朝太公太公家令說太公曰皇帝雖子人主也太公雖父人臣也奈何令人主拜人臣後高祖朝太公擁篲迎門卻行高祖大驚下扶太公按史紀此蓋深譏帝之不學無術後世且引以爲笑談然身爲帝王而有父於古實無前例可引爲法則若以古貴貴之心理律之則家令之言未爲盡非高祖賞之亦未爲不當也

又史記武安侯傳常召客飲坐其兄南嚮自坐東嚮謂漢相尊不可以兄故私橈史記此亦所以深譏武安然以周官三命父族不齒之說例之周正如此也蓋至漢時學者已漸漸打破崇拜人爵之迷夢知貴貴之不踰親親長長而有此微詞特俗人如武安輩尙不知耳

古以官視爲榮

後漢光武紀光武爲舂陵侯家訟逋租於嚴尤時宛人朱福亦訟租於尤尤止車獨與光武語不視福光武歸戲福曰嚴公寧視卿耶按光武創業爲帝賤時氣量宜度越常人矣乃以官視爲榮言之得意英雄

尙如此常人可知

唐貴賤不平等之醜態

玉泉子韋保衡常訪同人方坐李鉅新及第亦繼至保衡以其後先匿於幃下既入曰有客乎同人曰韋保衡秀才可以出否鉅新及第甚自得意徐曰出也何妨保衡竟不出洎韋尙公主爲相鉅新方爲山北從事焉

按韋李同客友人家韋卽秀才亦士人也何至聞新進士來卽匿避帷下及李問及主人仍不敢令韋卽出見必請命於新進士商其可出否此在今日必遜謝歡迎其出矣而不爾者進士及第卽爲官秀才仍庶人當時社會習慣蓋以庶人與官同會卽褻視官矣故雖同客友人家秀才必迴避進士

豪貴見郡王則駭散

摭異記上明皇爲臨淄王時曾戎服臂小鷹於昆明池會有豪家子盛酒饌方宴因疾驅直突會前諸少年頗露難色忽一少年持酒船令曰宜以門族官品備陳之酒及於上因大呼曰皇祖天子父相王某臨淄郡王也諸少年聞之驚走四散不復顧車服

按諸少年必皆貴人也宴飲時來一極貴之郡王此在今日必益致其敬恭何至驚駭遽鳥獸散如賊之懼捕而唐時不爾者以郡王之威嚴非他大官可比故駭散也

士人不能與官人同宴

摭言彭伉湛貢俱宜春人伉妻又湛姨也伉舉進士及第湛猶爲秀才妻族爲置賀宴皆官人名士湛至命飯於後閣其妻憤然責之未數載湛一舉登第初伉嘗悔湛及湛及第伉方遊郊郭忽家僮馳報伉聞失聲墜驢驚湛之驟貴也

聞壻及第卽與女同席

因話錄趙琮妻父爲鍾陵大將琮以久隨計不第窮悴甚妻族益相薄雖妻父母不能不然也一日軍中高會州郡請之春設者大將家相率列棚以觀之其妻雖貧不能勿往然所服故弊衆以帷隔絕之設方酣廉使忽馳吏召將將甚恐既至廉使曰趙琮非汝壻乎曰然曰已及第矣卽授所馳書乃榜也將遽以榜奔歸呼曰趙郎及第矣妻族大喜卽撤去帷帳相與同席以簪服慶遺焉世態炎涼至此極矣當壻未第以衣弊故隔絕不與其女通及聞壻及第卽刻撤帷與女同席似忘其衣弊者且萬目睽睽在稠人廣衆中公然如此未聞有嗤之者則當時社會貴貴之念同也

唐宋時請貴人到宅飲宴後須往謝

五燈會元鵝湖智孚禪師傳侍者來請赴堂吃飯師曰我今日在莊吃油糍飽者曰和尚不會出入師曰你但問取莊主者方出門忽見莊主歸謝和尚到莊吃油糍智孚爲唐末人是唐時貴人時方丈甚到宅飲

食過日須往謝也。又曲洧紀聞杜祁公留守洛陽有何平叔者年七十餘隱於城西南隅蒔花種竹於園中以詩酒自娛從不入市一日祁公便服獨遊見園內花竹清幽便入其中值何飲酒祁公問訊即使共酌何乃更炙茄餉客歡謳樂甚俄署中車騎來迎旌旗拂路歐陽永叔尹師魯等亦至立侍於側何曰公等何人何侍從之多也答來迎相公何乃知共酌者爲留守也久之公辭歸何曰久不入官府明日恕不往謝又老學菴筆記荆公少與孫少述相契重及罷相歸高沙亟往訪之少述遂留荆公置酒供飯至暮乃散荆公曰退卽解舟無由再見少述曰如此更不去奉謝矣是宋時貴人過友人飲宴雖非請來亦須謝也

卷三十二

行唐尙秉和著

歷代物價

周時糧每石值黃金二兩每兩金值錢不足百文

管子黃金一斤值食八石。按十六兩爲一斤。正合二兩一石。此非周時食貴。乃金價賤也。

又管子今齊西之粟釜百泉則鑪二十也。齊東之粟釜十泉則鑪二也。按左傳昭三年。齊舊有四量。豆區釜鍾。四升爲豆。各自其四。以登於釜。杜注四豆爲區。一斗六升。四區爲釜。六斗四升。是齊定制。一斗六升爲區。四區爲釜。正六斗四升。乃管子曰釜百泉則鑪二十似五倍鑪方爲釜。故注云一斗二升八合爲鑪。豈區鑪不同歟。泉錢也。以一斗二升八合之粟。貴則值錢二十。賤則二錢。以此證古粟固賤。然亦因古錢貴故也。

又按齊粟每石黃金二兩。每斗金二錢。每合金二分。則一斗二升八合。值金二錢六分。若與錢則爲二十。是黃金二錢六分。當錢二十也。是黃金一錢。值不足十文。一兩不足百文也。雖未能恰合。大概如斯矣。

漢書食貨志。黃金重一斤。值錢萬。朱提銀重八兩。爲一流。值一千五百八十。它銀一流。值千。是爲銀貨二

漢金價貴銀價五倍

品案朱提縣所產銀最高故重三斤餘卽當一斤金價它銀則五斤價方當一斤金價也又一兩金值錢六百二十五文比周加五倍

漢時銀價

據食貨志朱提銀一流值一千五百八十八兩爲一流是每兩銀易錢一百九十七文半也是銀之最高者尋常銀一流值錢千是每兩易錢一百二十五也

元明清金銀錢之值

桐城吳先生日記云元初中統時每鈔一貫折銀一兩每鈔四貫易赤金一兩是金一兩當銀四兩也洪武十八年金一兩當銀五兩永樂十一年金一兩當銀七兩五錢未幾金一兩復當銀十兩至清乾隆金一兩換銀十四兩九錢六分嘉慶八年換銀十五兩四錢一分道光十二年換銀十五兩七錢三分同治十年換銀十五兩五錢七分十三年換銀十六兩一錢七分光緒二年換銀十七兩八錢七分五年換銀十八兩一錢六分十八年換銀二十三兩七錢一分二十二年換銀三十一兩七錢金價始暴漲二十三年換銀三十三兩九錢一分蓋至光緒末年金價隨世界爲轉移故暴漲如是也

兩漢之穀價米價

漢書食貨志歲數豐穰穀至石五錢以一石穀春米五斗計之是一斗米值一文也又明帝紀歲比登稔粟斛三十十斗爲斛是每斗三文也是最賤之價值其最貴者史記平準書物踊騰糶米至石萬錢是漢初兵革時之價不足爲例又食貨志元帝卽位齊地饑穀石三百餘民多餓死又王莽時青徐地人相食米石二千夫米至每斗二百幾與清時相埒無怪人相食若穀石三百每斗祇三十較後代賤十倍矣而民仍餓死以此證漢時錢貴過後代遠矣

唐時尋常米價每斗四十文

通鑑苻堅建元七年歲大熟斗米五錢又唐貞觀十三年大熟斗米三錢是皆不能爲定價攷唐人聞奇錄晉國公王鐸爲丞郎時以江淮運米至京每斗水陸費計七百而京國米價四十議欲不運米折價是每斗米價四十錢爲唐時尋常之米價較清用銅錢時之米價賤十倍也

漢時地價及一金之值

漢書東方朔傳故鄧鎬之間號爲土膏其價畝一金按莊子逍遙遊不過數金注云金方寸重一斤爲一金是每地一畝值金十六兩也又按公羊隱五年百金之魚注云百金猶百萬也古者以金重一斤若今萬錢矣公羊爲何休注休漢人是漢一斤金可當萬錢也是亦以一斤爲一金也然則鄧鎬上地萬錢一畝他則不及也

漢中人產值十金

漢書文帝紀常欲作露臺召匠計之直百金上曰百金中人十家之產然則漢時中人產平均值十金據史記平準書注漢時金四兩直二千五百文是一斤直萬錢十金直十萬是在後世錢賤之時猶爲貧家漢時不爾者錢貴後世十倍也

周時蘭草之貴

說苑晏子曰今夫蘭本三年湛之以鹿醢既成則易以匹馬按蘭產於南方中原氣候高燥生殖不宜古人培以鹿醢使之開花值敵匹馬雖今世無此價可證古人愛花重於今世

戰國時之錐價狸價

說苑客說齊王曰駢驥驥倚衡負輶而趨一日千里此至疾也然使捕鼠曾不如百錢之狸干將镆铘拂鐘不鏗試物不知此至利也然以之補履曾不如兩錢之錐按周時有迎貓之祭似其時貓尙未馴擾成爲家畜故以狸捕鼠狸形微大於貓毛作蒼黑色有紋無他色者其靈捷等於貓而凶狠過之故貓畏焉常以數寸長之初生狸與貓尙畏而不敢食古以此捕鼠似曾爲家畜故值百錢若補履之錐祇值二文此無他錢貴故也

漢胡餅價

三國志注趙岐遭家禍詣北海販胡餅孫賓碩過市疑其非常人問曰自有餅耶販之耶岐曰販之賓碩

曰買幾何賣幾何。曰買三十賣亦三十。按唐沈既濟任氏傳有鬻胡餅者方張炭熾爐是卽今日之燒餅也。以漢時錢價之貴而值至三十疑非一枚也。

漢唐酒價

漢書武帝紀賣酒升四錢是斗酒四十文也。典論云孝靈帝末年有司涵酒斗值千文是東漢末酒價較西漢貴數十倍也。至六朝訖唐則每斗三百文楊松玠談藪云北齊盧思道常言長安酒賤斗價三百唐杜甫詩云速來相就飲一斗恰有三百青銅錢是其證至王維詩新豐美酒斗十千李白詩金尊斗酒沽十千侈言酒美價昂耳非實錄也是唐時酒價幾十倍於漢矣此無他唐錢賤也。

漢時一飯之價

風俗通曰太原王子廉一介不取常過其姊飯留錢十五文默置席下按漢時錢貴一飯十五文必美食也。

六朝時木柴屋椽及木製魁椀價

齊民要術榆柴一束三文楊柳柴每載百文桐木榆木椽每根十文柳木椽每根八文木椀七文木魁二十文按魁卽盆也今河北人猶呼瓦盆爲瓦魁載者一車也。

歷代奴婢之價

晏子春秋。晏子之晉至中牟。睹弊冠反裘負芻息于塗側者。以爲君子也。使人問焉。曰我越石父爲人臣僕於中牟。晏子曰可得贖乎。曰可。乃脫左骖以贖之。是周時一奴價准一馬也。又王褒僮約云。從成都安志里楊惠買夫時戶下鬚奴便了。決價萬五十。是西漢奴價萬五千也。又梁任昉奏彈劉整疏。寅以私錢七千贖奴常伯。奴名使上廣州去。後寅亡。整復奪取當伯充衆。是六朝時奴價錢七千。又云。整更奪取婢綠草。貨得七千。整兄弟及姊共分此錢。又不分送。劉寅婢姉及弟各准錢五千文。不分送。是六朝時婢價亦七千。其次者則五千也。至世說所記。苻朗初過江。王咨議問中土奴婢貴賤。朗曰。謹厚有識者。乃至十萬。是憤激語。不足爲憑也。

晉時羊價

搜神記。宋定伯擔鬼至宛市化爲一羊賣之。得錢千五百。當時石崇有言。定伯賣鬼得錢千五。此事固荒唐然足證明羊價也。

漢唐馬價

史記。平準書。物價騰耀。馬一匹百金。是極貴之價。可見賤時亦約十金。馬蓋莫貴于漢也。又集異記。寧王方集賓客。鬻馬牙人。麌神奴。呈二馬。皆神駿精采。問價。牙人曰。此一千緡。此五百緡也。王所乘皆千里馬。非普通馬價。又按鄭簡任氏記。鄭子如市。果見一人牽馬求售。售在左股。鄭子以六千買以歸。後售愈售。

三萬是賤則六千錢貴則三萬錢也是普通馬價也。

唐時牛價

吳融冤債志。至時有人牽跛牛過。以四千買之。養六百日甚肥健。同曲磨家二牛暮卒。以十五千求買。是唐牛值十五千也。按清時中原牛肥大者。值三十餘千倍。唐時價然。唐時錢貴。况清時牛價亦有十五六千者。是古今牛價相等也。

唐驢價

酉陽雜俎。開成初。東市百姓喪父騎驢市凶具。驢忽曰。負君家力已足。南市賣麩家欠我五千四百。我負君數亦如之。可賣我。其人驚異。卽訪麩家果賣得五千四百。

唐時鷄子價鷄價竹筍竹竿價

耳目記。新昌令夏侯彪之初下車。問里正曰。鷄子一錢幾顆。曰三顆。乃取十千錢令買三萬顆。謂里正曰。吾未要且令母鷄抱之。遂成三萬頭。鷄經數月長成。令更與我賣却。一鷄三十文。半年之間成九十萬。是可證唐時一文錢可買三鷄卵。長成之鷄一隻值三十文也。清時一鷄卵三文。與唐較貴十倍。理應如是。至鷄一隻。清時普通值六七十文。較唐祇貴一倍。則不可解也。

又問竹筍一錢幾莖。曰一錢五莖。乃取十千買五十萬。令里正栽之。半年成竿。一竿賣一文。成五十萬。是

可證唐時一文錢可買筍五莖一竹竿則值一文也。

唐鴨卵價

吳融冤債志樂平許元惠家蓄十餘鴨忽多一黑鴨日產一卵凡誕三十卵計其值恰三百錢是每卵值十文也按今之鴨卵值倍於鷄卵耳唐則一錢三鷄卵十錢則三十枚是鴨卵貴鷄卵三十倍也古今之不同如此。

唐時櫓價

西陽雜俎及市櫓正當二千四百文此可證唐時棺價普通者二千餘錢也。

晉時賃牛車價

搜神記高安婦蘇娥有雜繪帛百二十疋欲之旁縣賣之從同縣男子王伯賃車牛一乘直錢萬二千載妾並繪令婢致富執轡按所謂旁縣不知道里若干斷非三五日所能往來故值昂若是又令婢執轡是車主不執鞭隨與今日異也。

唐鏹刀價

唐時鏹刀每枚三十文五燈會元王南泉云吾這茅鏹子三十文買得是其證南泉唐時人也。

六朝布價

通志齊竟陵王子良上表曰晉東渡初絹布所直十倍於今官布一匹直錢一千及宋元嘉匹直六百今則入官好布匹下百餘是東晉初一匹直千錢至齊一匹布直約百錢也

晉練價一匹一金

晉書王導傳時庫中惟有練數千端鬻之不售而國用不給導患之於是乃與朝賢俱製練布單衣士人翕然競服之練價踊至一金按煮熟之縑帛曰練十六兩爲一金一端一金其值頗昂但亦視一端丈尺若干按宋書沈慶之傳年八十夢有人與兩匹絹曰老子今年不免兩匹絹八十也據是是一匹絹四十尺晉宋淳熙當同若如漢制十六兩爲一金是金一兩祇買二尺半絹古今卽賤尙不至是疑晉所謂一金已如正字通所言以二十四銖爲一金卽一兩也

五代時之韓價

歸田錄馮道與和凝同在中書一日和問馮曰公靴新買其值幾何馮舉左足曰九百和性褊急遽回顧小吏云我靴何得一千八百因詬責久之馮徐舉左足曰此亦九百於是哄堂大笑然則五代時官靴一千八百爲定價也

宋時造船價

老學菴筆記建炎中平江造戰艦八艤者長八丈爲錢一千一百五十九貫四艤者長四丈五尺爲錢三

百二十九貫。

唐牡丹花價及絹價筮價

白居易買花詩。帝城春欲暮。喧喧車馬度。共道牡丹時。相隨買花去。貴賤無常價。酬值看花數。灼灼百朵紅。箋箋五束素。是花足百朵者。值帛五匹也。唐時交易多以帛。至帛一匹。值若干錢。尙未得確證。

按杜甫憶昔云。豈聞一絹值萬錢。是天寶亂後之價。不足爲準。前定錄云。宣平坊李生善易筮。以五百文決一局。相國揆持一繩。晨往是一繩之值。必與五百文相當。有贏而無絀也。由是證唐一繩祇數百文。白詩所謂五束素者。殆不過三四千也。

唐馬醫價

諾皋記云。建初中有人牽馬訪馬醫。云馬患脚。以二十鑛求治。是唐時醫馬價爲二十鑛。每鑛一百也。

唐竹籠價

吳融冤債志。乃令多買竹作籠。約盛五六斗者儲之。明年修廣陵城。每籠三十文。大獲利益。

宋繚價每疋千錢

老學菴筆記。承平時。鄜州田氏作泥孩兒。馳名天下。一對至直十繩。一床至三十千。一床者或五或七也。云云。然則一床約三對。一對正值十千。十千卽十繩之價。一繩正千錢也。宋承平時如此。宋去唐近。唐承

平時每繚必不及千錢無怪杜詩以一絹值萬錢爲創聞也然則唐宋時旅行以帛爲糧及以帛易物者其價值大概可比例得之矣

唐宋時平民每年生活費

唐于逖靈應錄紙商陳泰供養一僧二年不倦忽一日僧謂曰爾有多少口幾許金便足陳曰弟子幼累二十口歲約一百緡粗備據是每人五千錢即足一年費又東坡志林在嶺南每日費百文至朔日預將三千錢分爲三十提以畫叉挂於壁上每日取百錢用之按東坡在嶺南從者子過妾朝雲及僕役蓋有六七人之譜而每日祇需百錢即可度日每人日費十餘文月四五年亦五六千與唐于逖所述者略同也此雖貧民生活然在清同光間正用銅錢之時亦相去甚遠若今日則不能比例矣以是證唐宋時銅錢尙貴也

明時米價及清乾隆時米價

明史王文傳請每米四石折銀一兩民以爲便是每石米直銀二錢五分也又隨園隨筆云曾見正德二年吳縣申報米糧時價文書白米一石紋銀二錢又見申文定公與其子書云吳下大荒米每石價貴至六七錢又金罍子云嘉靖癸丑京師大飢人相食米石二兩二錢袁子才云是今日之平價也可見乾隆時米二兩餘一石也已十倍於明之平價若今日則五十餘倍於明矣米價之不測如此

卷三十三

行唐尙秉和著

稱呼

歷代之稱呼天子

西漢稱天子曰縣官。霍光傳曰我何病。縣官非我家將軍不得至是。又東平思王傳今暑熱。縣官年少持服恐無處所。張宴曰不敢指斥成帝謂之縣官也。東漢亦稱曰官家。雜事秘辛。官家重禮緩此結束。當加鞠翟耳。又宋書后妃傳。廢帝欲酈王皇后左右止之曰。若行此事。官便應作孝子。是又對皇帝可稱爲官也。

隋唐稱天子曰大家。海山記隋文帝死。楊素旣立煬帝歸謂家人曰。小兒子吾已提起教作大家。即不知了當得否。唐李泌傳上燒梨賜泌。穎王恃恩亦求上曰。何乃爭此。穎王曰。臣等試大家心。何乃偏耶。又五代史唐家人傳。大家還魂矣。是對天子亦可稱大家也。

宋則稱皇帝曰官家。花蕊夫人詞法雲寺裏中元節。又是官家降誕辰。又詞苑叢談道君幸李師師家不遇。至更初歸愁眉淚眼憔悴可掬。道君問故。師師奏言邦彥得罪去一杯相別。不知官家來。是亦對面稱

也。

按殿廷公見稱皇帝皆曰陛下。自兩漢迄明清皆然。至曰縣官。曰官家。曰大家。皆私稱也。乃亦有對面稱者。蓋燕見親昵者無所不可也。

晉時僕稱主人曰官

世說謝太傅與王渾相惡。太傅卒。王往弔。督帥刁約不聽使前。曰官生平不見此客。又殷中軍妙解經脈。有常所給使。忽叩頭流血。言母抱病。若蒙官一脈。便有活理。是晉時僕稱主人皆曰官也。

唐僕媼稱男主人曰郎女曰娘子

白行簡李娃傳。生申喉發調。聞者歎歎。時生父亦易服私往觀。有老豎卽生乳母壻也。見生將認之而未敢。乃泫然流涕。生父問故。曰歌者酷似郎之亡子。又獵狐記。僕曰吾家郎君爲隴西觀察使。公子亦往隴西省親。祇娘子在家。未便留宿。容吾與娘子商。又劉無雙傳。王仙客以求親之事。聞於舅母。舅母曰。是我所欲也。卽當議其事。又數日。有青衣告仙客曰。娘子適以親情事言於阿郎。阿郎云。向前亦未許之。恐是參差也。又因話錄。李逢吉家有婢好言夢。曰昨夜爲郎君作夢不好。又夢遊錄。獨孤遐叔謂其妻死疾走入門。青衣報娘子夢魘方寤。其小女則曰小娘子。昌黎祭女擎文。曰致祭於小娘子之靈。又小說稱小娘子者尤多。其稱小兒則曰小郎。按今日僕媼稱男主人曰老爺。主母曰太太。唐之稱郎君稱娘子。亦猶是也。

歷代父母之異稱

左傳昭二十八年叔向曰吾母多而庶鮮吾懲舅氏矣注言父多妾媵而庶子少也是春秋亦稱父爲舅又襄二十八年盧蒲癸謀殺慶舍盧蒲姜癸妻舍女曰有事而不告我必不捷矣癸告之姜曰夫子謂父悔莫之止將不出我請止之又襄二十七年成與彊怒將殺之殺棠无咎告慶封曰夫子言其身亦子所知也言封知其父又檀弓曾子曰元起易簣曾元曰夫子之病革矣是春秋時亦稱父爲夫子也又史記高祖紀上奉卮酒爲太上皇壽曰始大人常以臣不能治產又漢書霍光傳光兄票騎將軍去病過河東迎父仲孺曰去病不早自知爲大人遺體是漢稱父爲大人也至對外稱西京雜記云家君劉向以爲史佚教其子讀爾雅又後漢袁隗妻傳馬倫曰家君獲此亦其宜耳又顏氏家訓昔侯霸之子孫稱其祖父曰家公陳思王稱其父曰家父母爲家母潘尼稱其祖曰家祖古人之所行今人之所笑也今南北風俗言其祖父及二親無曰家者田里猥人方有此言

按莊子云其往也家公執席世說云有人問陳元方足下家君何如又謝公問王子敬君書何如君家尊是秦漢魏晉時對朋友稱其父曰家何況自稱乃齊梁時以是爲可笑無怪顏氏非之也

若淮南子云東家母死其子哭之不哀西家子見之謂其母曰社何愛速死吾必悲哭社江淮謂母爲社也按此鄉里方言俗稱亦猶今日閩人呼父曰郎罷粵人呼母曰阿吉北方呼祖父爲爺爺祖母爲奶奶

呼父爲爹。母爲娘。或呼父爲爸爸。母爲媽也。然爹娘之稱雖俗亦最古。古樂府朝辭耶娘去暮宿黃河邊。又杜甫兵車行耶娘妻子走相送。是自晉唐已如此稱呼。耶者爹聲之轉。又南史始興王憺傳。詔徵還朝。始興人歌之曰。始興王人之爹。赴人急如水火。又韓愈祭女挈文。阿爹阿八。是爹稱自六朝及唐亦有也。又顏氏家訓。今世俗呼其祖考爲先亡丈人。疑丈當爲大。按此必已故之祖考。若尙在堂。則不合也。

稱人父母

史記荳政傳。嚴仲子曰。故進百金爲大人粗糲之費。此大人謂荳政母也。是稱友人父母亦曰大人也。又世說人問陳元方足下家君何如。又謝公謂王子敬。君書何如。君家尊是稱友人父亦可曰家。至六朝則加尊字。顏氏家訓。凡與人言。稱彼祖父母。父母。世父母。及長姑。皆加尊字。自叔父母以下。皆加賢字。按文章志云。或問子敬尊君書何如。可證顏氏說之不謬。此等習慣。至今不改。惟稱人伯叔父。或兄弟多曰令。爲小異耳。

若對子字父則爲失禮

魏志司馬朗傳。九歲人有道其父字者。朗曰。慢人親者。不敬其親者也。客謝之。又常林傳。對子字父。是知禮乎。客亦謝之。所以表德。此在周時。不爲不敬。漢魏時文盛則否也。

古伯父叔父之稱呼

顏氏家訓古今皆呼伯父叔父今世多單呼伯叔按左傳僖二十五年周王曰未有代德而有二王亦叔父之所惡也又成二年周王使單襄公辭於晉使曰其敢廢舊典以忝叔父又漢書王莽傳世父大將軍鳳病師古曰世父謂伯父也以居長嫡而繼統又叔父成都侯商又楚元王傳季父不吾取吾取季父矣又項羽本紀其季父項梁是周及漢呼伯父或爲世父叔父或爲季父而皆父稱之證也至單稱伯叔晉初已如此世說王濟謂叔父王湛曰叔好騎乘不武帝每見王濟輒以湛調之曰卿家癡叔死未濟曰臣叔不癡又桓玄謂王楨之曰我何如卿第七叔是無論自稱人稱皆單曰叔矣顏氏以爲非者婦稱夫弟亦曰叔陳平傳嫂曰有叔如此不如無有若兄子祇稱叔不稱父則與嫂叔無別矣

漢世亦稱叔父爲大人漢書疏廣傳廣謂兄子受曰今宦成名立不去懼有後悔受叩頭曰從大人議亦有字叔父者史記爰盎傳兄子種謂盎曰絲但日飲亡何絲者盎字蓋漢時猶有古風也

兄弟子至晉始稱爲姪

古稱猶子禮記兄弟之子猶子也蓋引而進之也亦曰兄子論語以其兄之子妻之漢書疏廣傳兄子受袁盎傳兄子種鮮有稱姪者釋名云姑謂兄弟之女曰姪姪迭也更迭進御也禮內則注所謂夫人及兩媵各有姪娣左傳臧宣叔娶于鑄生賈及爲而死繼室以其姪是也故字從女乃至晉始稱兄弟之男子曰姪顏氏家訓云兄弟之子已孤與他人言對孤者前呼爲兄子弟子頗爲不忍北土人多呼爲姪晉世

以來始呼叔姪今呼爲姪於理爲勝云云是至晉始以姪爲兄弟子之專稱故晉書王濟傳云濟才氣抗邁於叔父湛略無子姪之敬北史李郁傳兄瑒卒撫育孤姪歸於鄉里至唐宋則尤以爲確稱不可更僕數矣

或曰左傳云姪其從姑史記田蚡傳云蚡侍酒嬰所跪起如子姪是古稱姪亦同於後世豈知姪其從姑者正姪娣從姑嫁此本筮詞彷彿而已不得以事應懷公爲證史記田蚡傳之子姪姪乃姓之訛漢書作子姓師古曰姓生也言同于禮若己所生師古於史漢攷訂至精設史記爲姪字師古早言之矣是皆後人之妄改史文也又公羊諸侯娶一國則二國往媵之以姪娣從姪者何兄之子也是專謂女也故爾雅釋親云女子謂舅弟子爲姪而於宗族則無姪稱此其證也

婦稱夫族今古之不同

爾雅婦稱夫父母爲舅姑禮內則婦事舅姑是也至漢則稱舅爲丈人顏氏家訓漢時婦對舅稱丈人古樂府詞先述三子次及三婦婦是對舅姑之稱其末章云丈人且安坐調絃未遑央古者子婦供事舅姑與兒女無異故有此言亦稱姑曰大人舅姑曰公姆焦仲卿詩五日斷一匹大人故嫌遲勤心養公姆是也至六朝則呼舅爲丈人公顏氏家訓今北間婦人呼舅爲丈人公是也按今世婦人對人稱舅曰公公姑曰婆婆至當而呼皆從夫不知始於何時與古異矣

至稱夫之兄。爾雅云。兄曰兄公。郭璞注云。今俗呼兄鐘。語之轉耳。是兄公之稱。至晉未改稱夫之弟。則曰叔。史記陳平傳。嫂曰。有叔如此。不如無有夫之姊妹。則曰姑。漢焦仲卿詩。新婦初來時。小姑初扶牀。今日被驅遣。小姑如我長。唐新婦詩。未諳姑食性。先遣小姑嘗是也。蓋必加小字者。以別於舅姑之姑。稱夫。兄弟之妻。周時曰娣。妣。晉曰妯娌。左傳子容之母走謁諸姑曰。長叔姒生男。爾雅長婦謂稚婦爲娣。娣婦謂長婦爲姒。郭注今或曰妯娌。是也。至於今婦稱夫兄曰大伯。弟曰小叔。姊妹則曰大姑。小姑。兄弟婦皆曰妯娌。然對面呼仍皆從夫。

甥與母族之稱呼

爾雅謂我舅者。吾謂之甥。詩大雅韓侯取妻汾王之甥。傳姊妹之子曰甥。廣韻外甥也。甥稱母之父母曰曰外祖。曰外祖母。此古今通稱也。至六朝則去外爲家。顏氏家訓。河北土人皆呼外祖父母爲家公家母。江南田里間亦以家代外。非吾所識。是其證。稱母之兄弟曰舅。詩我送舅氏。曰送渭陽。左傳以伯舅年耄老加勞。漢書王鳳傳。以元舅輔政。舅之稱以迄於今。無有改易。稱母姊妹則曰姨。母。左傳繼室以其姪。穆姜之姨子也。注穆姜姨母之子。與穆姜爲姨昆弟。又會真記。夫人鄭氏。生之姨也。姨稱亦迄于今。稱母姪。則曰中表。晉書山濤傳。濤與宣穆后有中表親。中表者卽表兄弟。徐鉉和表弟包穎詩云。平生中表最相親。是其證。然古祇曰中表。至唐則直稱曰表兄表弟。杜甫有贈表弟詩。蘇軾有飲餞表兄程正輔詩。以迄

於今外家稱呼皆大致不改惟世俗稱外祖有曰老爺者外公者外祖母有曰老老曰外婆者皆方言俗呼又南北普通稱舅母爲姑殊不得其解然集韻已言之其由來久矣

婿與妻族之稱呼

古稱女夫曰甥孟子帝館甥於貳室是也春秋時則稱曰婿左傳文八年晉侯使解揚歸匡戚之田於衛且復致公墻池之封注晉公之墻名池也墻之名至今不改至墻稱婦父爾雅曰外舅漢時則曰婦翁後漢第五倫傳明帝戲倫曰聞君爲吏撾婦翁翁者父稱漢書金日磾傳日磾二子皆爲上弄兒擁上頸日磾見而目之兒走且啼曰翁怒是其證故陳後主曰婦父乃是翁比女夫乃是兒例奈何不敬通鑑特載其言今世田野有如此稱者則人笑之而不知正與古合也自六朝始呼爲丈人野客叢書云后山送外舅詩丈人江淮英稱婦翁爲丈人字俗然字則遠矣僕觀三國志注獻帝舅車騎將軍董承句下承於帝爲丈人古無丈人之名故謂之舅裴爲宋元嘉時人呼婦翁爲丈人已見此時至唐則以丈人爲通稱楊詹事憑柳子厚婦翁也子厚祭文直呼爲丈人是其證後又謂丈人爲泰山西陽雜俎明皇封泰山張說爲封禪使說女婿鄭鎰本九品封禪後獨遷五品並賜紺衣黃繙綽曰此乃泰山之力也此一因也又有謂因東岳有丈人峯世遂謂丈人爲泰山此又一因也至今日則又由泰山轉而爲岳父因岳父呼妻母曰岳母對人稱則曰家岳曰家岳母其不妥蓋甚於古稱外祖母曰家也

壻稱妻兄弟及婿與婿稱

晉書阮瞻傳內兄潘岳每令彈琴唐書李益盧綸大歷十才子之傑出者綸於益爲內兄又文中子有內弟之喪不飲酒食肉內弟內兄之稱至今不改至女兄弟則曰姨左傳莊十年蔡哀侯娶于陳息侯亦娶焉息媯將歸過蔡蔡侯曰吾姨也止而見之此姨稱之最古者迄於今則又曰大姨小姨以別於母姨至婿與婿相稱古謂曰亞爾雅兩婿相謂曰亞注詩曰瓊瑣姻姪漢謂爲友婿漢書嚴助傳家貧爲友婿富人所辱師古曰友婿同門之婿晉謂爲僚婿郭璞爾雅注今江南呼同門爲僚婿是也宋謂爲連袂潛確類書范仲淹鄭戩皆自小官布衣選配李參政昌齡女爲連袂又李晉卿有二女將死語家人曰長女配王樂道次女配滕元發足矣二人遂爲連袂後又由連袂而轉爲連襟姪真子江北人呼連袂爲連襟至今仍之妻族稱呼以此與婦翁爲最繁矣

唐謂及第進士爲先輩

自古皆稱高年耆舊爲先輩如吳志闕澤傳澤州里先輩丹陽唐固又魏志陶謙傳注郡守張磐同郡先輩又舊唐書孔穎達傳隋煬帝集諸郡儒於東都令國子秘書與之論難穎達最年少而先輩宿儒皆爲之屈是隋時尙如此乃至唐中葉則稱先輩者爲及第進士而非老稱王維詩爲學輕先輩何能訪老儒北夢瑣言王凝知舉司空圖第四人登科王謂衆曰今年榜帖爲司空先輩一人而已是所謂先輩

實後輩也。按瑣言之說仍微不合。先輩實進士及第之專稱。雲溪友誼云。牛僧孺被舉常投贊於補闕劉禹錫。禹錫對客塗竄其文曰。必先輩期至矣。又北里志。楊萊兒傳。進士趙光遠一見溺之。及應舉自謂必取。萊兒亦大爲誇於賓客。指光遠爲一鳴先輩。是皆應試前祝其及第爲先輩也。非普通後輩之稱。

卷三十四

行唐尙秉和著

奴婢傭賃

周盜賊妻子沒爲奴婢可上市買賣

周禮。秋官司厲掌盜賊之任器貨賄其奴男子入於罪隸。女子入於春橐。按罪隸者隸司空爲役春橐者言女子力弱充春米炊食之職是官奴婢皆由盜賊沒入故可買賣。周禮質人掌成_{平也}市之貨賄人民牛馬注人民奴婢也疏言奴婢則非良人而罪人也蓋官家奴婢多而賣於民間民間復可以奴婢上市而買賣之與牛馬同。

亦有因饑寒而鬻爲奴婢者故多可贖

晏子春秋晏子之晉至中牟睹弊冠反裘負芻息於塗者以爲君子也使人問焉曰我越石甫爲人臣僕於中牟晏子曰何爲至此曰不免凍餒之累是以爲此也晏子曰可得贖乎曰可乃脫左骖以贖之按此自鬻爲僕也其契約或若干年或終身或可贖不可贖故晏子問之又檀弓子柳之母死子碩請具子柳曰何以哉子碩曰請粥庶弟之母又史記陳軫傳故賣僕妾不出里巷而售者良僕妾也又淮南子魯人

有爲妾於諸侯。有能贖之者。取金於府。此皆因貧自鬻爲婢妾。主人又因貧而轉鬻於人。故多可贖也。

漢奴婢狀況

漢魏時奴婢有三種。一因罪沒入者。二因貧而爲者。三被掠賣爲奴婢者。因罪因貧有之。掠賣則周時所無。以此見周時社會較後世不紊亂其鄉政善也。

其因罪沒入者。如外戚世家薄姬原魏豹妾。魏豹平輸織室。又如吳志潘夫人傳。父爲吏坐法死。夫人與姊俱輸織室。又魏志高柔傳。營士賣禮近出不還。營以爲亡。沒其妻及男女爲官奴婢是也。其因貧者。如高祖紀。民以餓自賣爲官奴婢者。詔皆免爲庶人。又干寶搜神記。漢崔永父死不能葬。因自賣爲奴。又魏志楊俊傳。王象少孤。特爲人僕隸。見使牧羊。而私讀書。被笞楚是也。其被掠賣者。如外戚世家。竇廣國年四五歲時。家貧爲人所略賣。傳十餘家。其家不知其處。又魏志楊俊傳。爲人所略作奴僕者。凡六家。俊皆傾財贖之。又史記樂布傳。爲人所略賣爲奴於燕是也。按略賣之事。不惟春秋時無之。卽戰國亦不見。蓋周時鄉政之善。爲後世所未有。凡作姦犯科之事。無所容藏。一易地。卽自困。故絕無此事也。

漢奴婢之多空前絕後

有以上三因。漢奴婢之多。爲自古所未有。其見於史者。如陸賈傳。陳平以奴婢百人遺陸生。武帝紀。發官奴婢三萬人。苑中養馬。貢禹傳。諸官奴婢十餘萬人。戲游無事。哀帝紀。詔諸侯王列侯公主吏二千石。及

豪富民多畜奴婢田宅亡限。令有司條奏諸王奴婢二百人。列侯公主百人。關內侯吏民三十人。遞品皆沒入官。誠以其時富人如蜀卓王孫僮客八百人。程鄭亦數百人。卓文君嫁司馬相如。王孫分與僮百人。又季布傳。乃髡鉗布。并其家僮數十人之魯朱家所賣之。夫一賣卽至數十人。少分卽至百人。則當時社會奴婢之在豪富家者。誠不可以億計也。故哀帝下詔限之。然蜀志糜竺傳。祖世貨殖。僮客萬人。是東漢末此風仍未已也。

漢時賣奴婢衣以繡衣置市上闌中

賈誼傳。今民賣奴者爲之繡衣絲履偏諸緣。牙縫內之閑中服虔曰。閑賣奴婢闌。按衣以鮮服者。飾其貌使姣好易售也。內之閑中者。懼其逸去與閑牛馬同也。蓋市官特爲置闌而稅之也。

惟買賣奴婢者多故價有定準

漢書食貨志。田宅奴婢價爲減賤。又毋將隆傳。博太后使謁者買將官婢。賤取之。復取執金吾官婢八人。隆奏言。賈賤請更平直。是可證當時奴婢皆有定價。與牛馬五穀同。故有價貴賤之感覺。又可證奴婢卽財貨。故陸賈傳。謂其子曰。侍者十人。寶劍直百金。過汝十日而更。所死家得寶劍車騎侍從者。是以奴婢與車馬寶劍並爲貨財也。

漢爲奴婢開一線生機

自周以來主可殺奴。史記田儋傳。儋陽爲縛其奴從少年之縣廷欲謁殺奴服虔曰古殺奴皆當告官是不過告以殺之之故耳。非告官判其可否也。殘酷極矣。至漢文帝四年五月詔免官奴婢爲庶人。哀帝時又詔官奴婢五十以上免爲庶人。魏志齊王芳詔官奴婢六十以上免爲良人。是以宣帝時京兆尹趙廣漢脅魏丞相夫人賊殺侍婢事可見。是時雖丞相殺侍婢有罪又食貨志云除專殺之威。又王莽時詔敢炙灼奴婢者論如律。免所炙灼者爲庶人。又詔除奴婢射傷人棄市律。又詔民有被略爲奴婢自訟者免爲庶民。自此以後專殺者禁。炙灼者禁。五十以上可得自由。始有奴婢亦人之感覺。若漢以前則視爲當然也。至晉時奴亡祇黥其面。酉陽雜俎云晉令奴亡黥兩眼。再亡黥兩頰。三亡橫黥目下皆長一寸五分不能殺也。

然自唐以來不免笞笞之苦。摭言云有奴事蕭穎士十年笞筆備至。祇不敢專殺耳。至於炙灼侍婢以在閨房之內。官家不易知。雖今日不免吾每聞其聲。每徧徨慘痛恨不使其主人卽身受其苦。嗚呼此等惡習。何日革除淨盡耶。

唐仍有官奴婢

次柳氏舊聞玄宗幸太子宮見使用無妓女。令高力士選民間女五人進之力士曰掖庭中故衣冠以事沒入者不少宜可備選。又劉無雙傳以父曾爲朱泚僞官置大辟無雙沒入掖庭。又因話錄天寶末蕃將

阿布恩伏法。其妻配掖庭。是唐罪人妻子。仍沒爲官奴婢也。惟據史傳所載。祇掖庭有之。他衙署不見。蓋較漢時少多矣。餘民間所有奴婢。大概皆因貧而爲也。

唐脫奴婢籍名從良

唐蔣防霍小玉傳。長安有媒鮑十一娘者。故薛駢馬家青衣也。折券從良十餘年矣。又劉無雙傳。蒼頭塞鴻云。某已得從良客戶。又隋唐嘉話。京兆韋袞有奴名桃符。有胆力。每征討必從。袞以久經驅使。乃放從良。是蓋因自古凡爲奴婢者。皆罪人非良人。故以脫奴籍爲從良。豈知因貧自鬻者。原本良人。非罪人。從良云者。殊不公允也。

唐時仍貧則賣僮僕

白行簡李娃傳。生囊中盡空。乃鬻駿馬及其家僮。歲餘資財僕馬蕩盡。是唐時仍以奴爲資財也。

歷代奴婢價

晏子以一驥贖越石父。是春秋一奴價可抵一馬。漢王褒僮約。買奴便了。價萬五千。梁任昉彈劾劉整云。以錢七千贖奴。當伯取婢。綠草貨得七千。是奴價以六朝時爲最賤。且男女價相若。唐以後卽少見。蓋奴漸少矣。然婢仍多。且婢價較奴價日貴也。

古奴僕之服裝

古奴婢皆青衣。通鑑懷帝被虜。青衣行酒。是奴而青衣。霍小玉傳。鮑十一娘者。故薛駢馬家青衣也。是婢而青衣。光武紀。彭寵爲其蒼頭所殺。注秦謂奴爲蒼頭。以別於良人。又梁武帝詩。平頭奴子擎履箱。李白詩。平頭奴子搖大扇。蒼者黑也。平頭者言奴所服之帽不許有屋。卽今日戲劇所服之平頂奴帽是也。故一望而知爲奴。又韓愈詩。一奴長鬚不裹頭。一婢赤脚老無齒。摹繪奴婢之狀況如目覩矣。

古奴僕之忠主

古奴僕之忠於主人者甚衆。茲舉一二以見梗概。後漢書李善傳。善清陽人。本同縣李元蒼頭也。元家病疫相繼死。唯孤兒續生。始數旬。奴婢謀殺之。而分其財產。善負孤兒潛逃。親自哺養。乳爲生漚。續十歲歸。告奴婢於長吏。收殺之。光武聞。拜善爲太子舍人。遷日南太守。轉九江太守。又涑水紀聞。王達者。屯田郎中。李曇僕也。旣而曇父子俱坐事繫獄。親友無敢餉問之者。達旦夕守臺門。給飲食四十餘日。曇貶恩州。諸子流嶺外。達哭送之。旣而曇死。達爲治喪。朝夕哭奠如兒子。他若唐之墨崑侖紅線。亦忠義之尤著者也。

自宋以來。惟聞買婢。老學菴筆記云。都下買婢。謂未嘗入人家者。爲一生人。喜其醇謹是也。不聞買奴。至清末並買奴亦禁。然至今不能斷絕。冤苦時聞。或再數十年。可與奴一律絕迹乎。

傭與客作

傭與僮僕異。古所謂僮僕皆奴也。奴不能自由。傭有短傭。有長傭。短傭或一日。或二三日。長傭或以月計。以年計。計時受值。皆可自由。自春秋有之。說苑甯戚爲商旅。賃車以適齊。賃者僕也。僕卽傭也。至戰國漸多。史記荆軻傳。高漸離變姓名爲人庸保。匿作於宋子。齊世家湣王子法章爲莒太史敫家庸。范睢傳。臣爲人庸賃。庸與傭通。注云。謂庸作受僕也。至漢魏益多。有爲農家僕者。如陳涉傳。常與人傭耕。兒寬傳。時行賃作。帶經而鉏。梁鴻傳。爲人賃春。有傭於商家者。如樂布傳。窮困賣庸於齊。爲酒家保。杜根傳。爲宜城山中酒家保。有傭於學校者。如兒寬傳。詣博士受業孔安國。貧無資用。常爲弟子都養。師古曰。主給烹炊也。世說服虔匿姓名爲崔烈門人。賃作食。有傭於官署者。如班超傳。家貧。常爲官傭書。其期最短者。謂之客作。高士傳。夏馥旣誣入黨錮。乃改服易形。入林慮山中爲冶工。客作。魏志。焦先者隱士也。饑則出爲人客作。飽食而已。尤自由也。蓋古士人身體健壯。而質樸。故窮則爲傭以自給。不以爲恥。六朝以後。士風華靡。雖因鮮肯爲傭以求活。祇世說記袁宏。此亦士人習尚之一小變也。

古待遇傭耕者狀況

韓非子。夫賣庸而播耕者。主人費家而美食。調選也布而求易錢者。非愛庸客也。曰。如是耕者且深耨者熟耘也。庸客致力而疾耕。盡巧而正畦陌者。非愛主人也。曰。如是羹且美。錢布且易云也。按今日田家待遇傭工。年節以酒肉犒賞。春夏以巾布餽贈。傭者尙輒有煩言。不知數千年前情狀已如此也。

卷三十五

行唐尙秉和著

治病讎疫

古醫病之法周禮天官疾醫瘡醫獸醫言之詳矣而黃帝內經素問及史記扁鵲傳尤能闡發其精理茲俱不錄錄其治法爲後世所無者數則以及古社會於醫者之情況

古以口吮疽

史記吳起爲將與士卒分勞苦卒有病疽者起爲吮音盾之卒母聞而哭之人問其故母曰往年吳公吮其父父戰不旋踵而死今又吮其子妾不知死所矣是可證古社會皆以口吮疽故起施之士卒期得其死志蓋疽熟必有膿血以手攝之則痛不如以口吸收血易淨盡且不痛也

古以舌舐痔

莊子宋人曹商使秦歸以得車多驕穉莊子曰吾聞秦王有病召醫破癰潰瘻者得車一乘舐痔者得車五乘所治益下得車愈多子豈治其痔耶按說文舐以舌取物也痔後病也增韻隱創也是痔者肛門之病今所謂痔創漏創也而以舌舐之今雖貴人不能有是也莊子謂所治益下下莫下於斯矣

古爲小兒剔首搣座

韓非子。夫嬰兒不剃首則腹痛。不搣座則寢益。剃首搣座必一人抱之。慈母治之。注嬰兒癰瘡當搣剔勿使滋益。按注說非也。剃首搣座自爲二事。嬰兒頂門多不潔。故剔除之。至不剃則腹痛。今已不曉其義。瘡者癰也。搣者擠其膿血也。非與剃首爲一事。又彈瘡者痛。夫癰至成熟腫起。破之潰之法至多矣。乃必彈之。以試其熟否。則後之所嗤也。

至漢時吮癰已嫌其穢

史記佞倖傳。文帝常病癰。鄧通常爲帝吸音借之。文帝不樂。從容問通曰。天下誰最愛我者乎。通曰。宜莫如太子。他日太子入問疾。文帝使吸癰。吸癰而色難之。夫吸膿血於口中。乃天下之至穢。雖以父子之親。有不能勉強者。故後世爲之者少也。

古皆官醫

周禮天官醫師掌醫之政令。聚毒藥以供醫事。凡邦之有疾病者。瘍瘍者造焉。則使醫分而治之。歲終則稽其醫事。以制其食。十全爲上。十失一次之。十失二次之。十失三次之。十失四爲下。觀是則周時所謂醫皆官醫也。藥亦官家所備。蓋其時士民既無醫學。亦無藥劑。故政府設專官。以供民求取。憲繹經文。似皆就醫而無往醫。若疾重而不能造者。其如之何。此一疑問也。又有疾醫。今之內科也。瘍醫。今之外科也。獸

醫今之獸醫也。惟食醫專掌飲食爲今之所無。

至春秋末始有以醫爲業者

史記扁鵲傳既傳長桑君禁方爲醫或在齊或在趙在趙者名扁鵲診趙簡子病過邯鄲聞貴婦人卽爲帶下醫過洛陽聞周人愛老人卽爲耳目痺醫入咸陽聞秦人愛小兒卽爲小兒醫秦太醫令李醯自知伎不如扁鵲使人刺殺之是可證庶人初有以醫爲業者而伎過官醫故官醫妬之若後世則不勝其妬矣

其在漢初則齊人太倉公診脈知人生死行遊諸侯不以家爲家或不爲人治病病家多怨之者被告得罪少女緹縈上書願以身代者是也其伎與扁鵲等漢末則華佗佗之師爲長沙太守張仲景仲景名機華佗聞機名特詣長沙拜謁機盡以其術傳之其著述今祇存傷寒論餘外科書盡佚此皆以士人專精醫術是以漢書杜延年傳云昭帝末徵天下名醫可見業醫者多不似春秋前之必爲官醫也

中醫退化之故因自古賤醫

中國醫術古發明若是之精魏晉以降復失傳者何也以中國社會自古賤醫論語云人而無恆不可以作巫醫醫與巫並稱其賤可知列子云雖乞兒馬醫不敢侮也以馬醫與乞兒並其輕可想史記李廣傳以良家子從軍如淳曰謂非醫巫商賈百工也是爲醫卽非良家魏志華佗傳云佗本作士人以醫見業

意嘗自悔。悔醫賤於士也。世說殷浩妙解經脈。有常所給使。忽叩頭流血。言其母病。浩感其誠。爲診脈處方。一劑便愈。遂燒其秘方。恐人知其能醫而賤視也。夫社會風尙如此。讀書士人。誰肯爲醫。其肯爲者。學業類不足以輔之。故古人費千辛萬苦而得之者。後之人皆不能傳也。

周時防疫之法

古防疲之法。至爲精密。如杼井萩室。以灰水攻驪蟲。而儻疫尤爲大觀。秦漢以後。遺法皆廢。獨儻禮尙存。以近於游戲也。

以蜃炭攻驪蟲

周禮秋官赤发氏掌除牆屋。以蜃炭攻之。以灰洒毒之。凡隙屋除其驪蟲。按周時無石灰。而以蜃殼燒灰。其功用與今石灰同。灰洒者蓋以灰和水洒於屋隙。毒死驪蟲。驪蟲者蚤蟲之屬。可爲傳染疫病之媒介。故殺之。自周時卽研究至此。可謂密矣。

萩室防疫

管子當春三月。萩室燠造。注燠謂火以乾之也。三月之時。陽氣盛發。易生瘟疫。楸樹鬱臭。以辟毒氣。故燒之於新造之室。以禳祓。按說文。萩蕭也。是艾草之屬。茲注云。楸樹是以萩爲楸也。新造之室。濕氣亭蓄。易生瘟疫。燒萩使乾。兼以殺疫。則室可安居。

至春則淘井易水

管子鑽燧易火杼井易水。所以去茲同滋。注春時之井。當杼之以易其水。去滋長之毒。按方言杼柚作也。土作謂之杼。水作謂之柚。據此則杼井者。必挖掘井土。使易新水。以舊水過冬有亭毒也。清時北方人家。至春必淘井。蓋猶仍周制。亦所以防疫。

儺疫

周禮夏官方相氏掌蒙熊皮。黃金四目。玄衣朱裳。執戈揚盾。率百吏而時難。同儺。以索室驅疫。注方相者。方想言可畏怖也。方想蓋漢語也。冒熊皮者。以驚敵癘疫之鬼。如今魑頭也。時儺四時作索度。同搜也。按說文魑醜也。如今之顛頭。徐鍇注方相四目也。卽鄭所謂魑頭。然則漢之魑頭。卽周之方相。必黃金四目。執戈盾者。古以爲禡。有鬼月令云。季春命民儺。有大陵積尸之氣。與民爲厲。是其證。方相氏家逐室。敵鬼見此凶威。自驚怖逃去。是以孔子恐並驚其室神。遇鄉人儺。則朝服立阼階。俾廟神有所依附。今鄉里疫重。輒然爆竹以衝散疫氣。猶是理也。

漢儺年祇一次以十二月臘祭前一日爲儺期

張衡西京賦爾乃卒歲大儺。歐除羣厲。方相秉鉞。巫覡操荔。黍穠。倅子萬童。丹首玄製。桃弧棘矢。所發無集。飛礮雨散。剛瘅。雄鬼必斃。煌火馳而星流。逐赤疫於四裔。

按文選注引續漢書曰大儺謂逐疫。選中黃門子弟百二十人爲儼子皆赤幘皂首逐疫禁中。蓋禁中地小祇百二十人卽足。若國民逐疫於都市則非萬童不足以示威。又注引漢舊儀歲十二月使方相氏蒙虎皮黃金四目玄衣丹裳執戈持盾率百隸時儺索室驅疫以桃弧葦矢且射之以赤丸五穀播洒之然則漢儺裝飾與周同。儼子萬人且必以童並以赤丸五穀到處播洒其繁盛則較周或過也。惟查月令仲秋季冬季春皆儺。漢祇十二月儺禮儀志云先臘一日大儺謂之逐疫是儺與臘並行也。

唐儺疫之盛况

樂府雜錄儺用方相四人戴冠及面具黃金爲四目衣熊裘執戈揚盾口作儺儺之聲以除逐也。右十二人皆朱髮衣白畫衣各執麻鞭辯麻爲之長數丈振振聲甚厲口呼各凶神名振子豆百小兒爲之衣朱褶青襦戴面具以晦日爲之。按面具者漢以木禮儀志百官宮府各以木面獸是刻木爲之後世以紙糊戴於首使猶惡可怖卽周禮之黃金四目亦假面具也不然如何能以黃金爲目目胡能四哉。又周儺漢儺皆玄裳唐則衣白衣而畫之更被以朱髮狀尤可畏又以麻鞭振響亦古所無振子卽漢之儼子振子豆者蓋令振子洒豆打鬼也。

宋儺疫

老學菴筆記政和中大儺下桂府進面具比進到稱一副初訝其少乃是以八百枚爲一副老少妍醜無

一相似者，乃大驚。至今桂府作此者，皆致富。按一副卽八百枚。是凡儺者，無不帶面具也。又夢華錄，除夕禁中大儺，用皇城親事官戴假面繡畫色衣，執金槍龍旗，以是證宋儺比唐尤奇麗。蓋久視爲游戲矣。

古防疫已用隔離法

漢書平帝紀：民疾疫者，舍空邸第，爲置醫藥。按疫起傳染最速，舍之空邸，使與家屬隔離。自漢已如此也。又曾子固越州救菑記：春大疫，爲病坊，募僧二人，視醫藥飲食，是亦用隔離法防疫。但病者無人敢看護，僧家慈悲，故募以侍疾也。

卷三十六

行唐尙秉和著

賦稅力役戶籍

賦役之制通志等書詳矣茲所述者多可驚駭之事令人知百姓之不易爲自古而然而非其詳制也又後世習焉不察多謂三代賦役輕於後世雖班固亦如此豈知孟子之稱述三代對戰國立言耳今一追想其實况民困亦甚也茲編正比較其事實也

周賦稅過後世

漢書食貨志周時有賦有稅稅謂公田什一賦謂車馬甲兵士徒之役按孟子云夏后氏五十而貢殷人七十而助周人百畝而徹其實皆什一也什一者謂十取其一也戰國亂世不能爲準若漢初則十五取一漢末及東漢則三十取一過三代遠矣供車馬甲兵士徒之役者按周禮地官縣師若將有軍旅會同作其衆庶及馬牛車輦又鄉長則以旗鼓兵革帥而至是以遂人以歲時登記夫家衆寡及六畜車馬必登記者備賦之也不但此也委人職云掌斂野之賦斂薪芻凡疏材木材凡蓄聚之物注疏材草木有實者也蓄聚之物瓜瓠芋葵禦冬之具也是正賦正稅以外尚斂及薪芻蔬果以備賓客師旅之用由今思

之周民負擔之重。及其被擾情況。殆過於後世。蓋封建之過也。

周卽有人口稅

周禮天官大宰以九賦斂財賄。鄭玄云。賦謂口率出泉也。今之算泉疏以九賦斂財賄者。此賦謂口率出泉其處有九。故云九也。又地官閭師職。凡無職者。凡夫布注使出一夫口稅之泉。按泉者錢也。天官外府掌布之出入。注布泉也。藏曰。泉行曰布。口率者以口爲率。家有若干口。卽出若干泉。漢曰。算算口出錢。今外洋有人頭稅。係以頭計。茲則以口計也。於正稅。正賦以外。復稅及人口也。

周稅居宅

周禮載師。凡任地國宅無征。後鄭云。國宅凡官所有宮室。吏所治者也。夫經特云國宅無征。是民宅征也。然民宅征率。經無明文。疑下云園廛二十而一。卽民宅征率也。民宅亦名廛。非必商賈。遂人失一廛。田百畝。注廛城邑之居。又詩胡取禾三百廛兮。傳一夫之居曰廛。是廛卽民宅。園廛二十稅一。卽民宅二十稅一也。以故先鄭云。國宅城中民宅無稅。而後鄭不從之。誠以一夫之廛與田皆受之官。皆當有稅。特宅稅輕於田稅耳。

周已斂布帛

孟子有布縷之征。有粟米之征。有力役之征。君子用其一而緩其二。是周時已征及布帛也。

總周時之稅有田稅宅稅口稅車馬甲兵薪芻布縷菜蔬等稅凡後世所有者周無不有之周所有者後世或無也。

漢田稅輕於周

周田稅十取一公羊傳所謂天下之中正什一行而頑聲作也至漢初則十五稅一孝惠元年詔減田租復十五稅一是也後三十而稅一王莽傳漢氏減輕田租三十而稅一是也王莽廢至光武而復建武中詔田稅三十稅一復西漢舊制是漢之田賦較周輕數倍信矣。

漢人稅百二十錢

高祖紀初爲算賦如淳曰漢舊儀民年十五以上至五十六出賦錢人百二十爲一算爲治庫兵車馬按周之口率錢不詳其確數又不詳其年若干方出口錢即使輕於漢然另有車馬甲兵之賦漢則以此賦治車馬甲兵則漢仍輕於周也。

至武帝復稅小兒年二十三錢

漢算雖稅人然祇稅成童以上之男子尙未若周以口爲率至武帝用兵始算口並嬰兒亦稅之貢禹傳禹以爲古民無賦言不稅人周官晚出禹未見算口錢起伐四夷重賦於民民產子三歲則出口錢故民重困生子輒殺甚可悲痛宜令兒七歲去齒乃算詔從之其口賦若干據昭帝紀母收四年五年口賦注如淳曰漢儀注

民年七歲至十四出口賦錢二十三二十錢食天子三錢補車騎馬。是蓋貢禹奏請以後之定制。若以前則兒三歲卽出錢。且不論男女祇有口卽稅錢。誠以民至十五乃算其十五以前不算甚爲疏漏。然以齋齡之年而使出錢。則無名故名曰口。又幼童難出整算。故祇賦二十三。在當時計臣可謂滴水不漏矣。又按貢禹請年二十乃算茲漢儀仍言至十四。是十四以前出二十三以後出百二十也。詔從其七歲未從其二十也。又景帝詔民年二十乃傳禹所請乃復景帝舊制也。

武帝復稅人家藏錢及六畜

武帝紀初算緝錢李斐曰緝絲也以貫錢千錢爲一貫出算二十也是百分稅二也夫人家藏錢難以稽核稅者必少故元鼎元年詔民告緝者以其半與之觀此則其稅之不當且難斂錢可知矣而用以擾民則有餘真可謂拙而少功又昭帝紀毋斂今年馬口錢是養馬亦出稅也。

魏晉復兼稅布縷以迄于明

通典魏武初平袁紹令收田租畝粟四升戶絹二匹綿二斤晉初畝租米三升戶輸絹三匹綿三斤按中原地畝收穀不過四五斗今稅粟米三四升以二穀一米計是幾十取二也稅莫重於是矣又西漢無稅絹絲之事自魏晉開其端至六朝隋唐後兼稅麻布及麻自木棉興至元明於布絹絲綿之外復稅木棉若干斤皆實物故歷朝復有絹布匹長幅寬及重量之規定然胥吏上下其手繁瑣擾民之狀况可知矣

至清代始將布疋絹帛之稅一概革除而田稅亦輕于往古也。

民役

自春秋以來凡國家築城浚河築路修造宮室官署無不役民爲之此役於工者也瞭望烽燧守堠關塞此役於兵也在國民對於國家爲當然義務然使之不時或太過如秦築長城隋開汴河不世建築雖賴以成而民亦叛之今將漢以前役民概略略述以覘古社會狀況至漢以後詳制自有專書

周赴役免役期限及自然免役之人

周禮地官鄉大夫以歲時登其夫家之衆寡辨其可任者國中自七尺以及六十野自六尺以及六十五皆征之。注征者給公上事也疏七尺者韓詩外傳云二十行役故知此七尺爲二十六尺者年十五論語可以託六尺之孤鄭注云六尺年十五以下故知十五是遠郊年十五卽赴役至六十五免國中年二十赴役六十而免也此定制至春秋猶守之左傳襄三十年晉悼夫人食輿人之城杞者絳縣人或年長矣與於食後問知其年七十三矣趙孟召之而謝過焉遂仕之而廢其輿尉是過免役之年而役之故罪其主者鄉大夫又云其舍者國中貴者賢者能者老者病者是自然免役之人也。

周役民年祇三日而弗與食

王制用民之力歲不過三日又周禮司徒均人豐年則公旬用三日焉中年二日無年一日由是證役時

不惟不與值。且并不與食。如公家與食。則無豐歉之計。較彼晉悼夫人之食與人者。以爲其母家築城。偶食之以爲犒。非常食之也。

漢赴役期免役期

高帝紀。蕭何發關中老弱未傅者悉詣軍。如淳曰。律年二十三傅之。漢儀注云。民年二十三爲正。一歲爲衛士。一歲爲材官騎士。習射御騎馳戰陣。年五十六衰老。乃得免爲庶民。就田里。今老弱未嘗傅者。皆發之。未二十三爲弱。過五十六爲老師。古曰。傅著也。言著名籍給公家徭役也。據是。是漢初民年二十三始充役。至五十六而免也。至景帝時。改爲二十。景帝紀。令天下男子。年二十始傅。師古曰。舊法二十三更舊制也。

漢兵役一月戍邊役三日然可僱人代役

昭帝紀。元鳳四年正月。詔三年以前逋未出錢更賦。未入者皆勿收。如淳曰。更有三品。有卒更。古者正卒無常也。皆當迭爲之。一月一更是謂卒更也。有踐更。貧者欲得顧更錢者。次直者出錢僱之。月二千。是謂踐更也。以是證漢民每年有當兵一月義務。如不赴直。卽出錢二千。令前卒代也。如淳又云。有過更。天下人皆直戍邊三日。亦名爲更。律所謂徭戍也。然不可人人自行三日。又行者當自戍三日。不可往便還。因使往一歲一更。諸不行者。出錢三百入官。官以給戍者。是謂過更也。漢因秦法而行之。後遂改易。有調乃

成邊一歲耳。以是證漢戍邊義務。每人歲三日。其實不能行。因自內地至邊塞。或數百里。或數千里。行數月。始至。至三日。卽更徒勞往返於勢不便。故使往者一歲一更。其不往者。則與往者以錢。然錢交官。官蓋不全與戍者。若全與則一年得三萬六千。可致富官。蓋以此爲聚斂之法耳。故逋者多。

漢役平等

昭帝紀。雖丞相子亦在戍邊之列。又蓋寬翹傳。身爲司隸。子常步行。自戍北邊。

六朝時從軍自買鞍馬

木蘭詩。軍書十二卷。卷卷有爺名。阿爺無大兒。木蘭無長兄。願爲市鞍馬。從此替爺征。東市買駿馬。西市買鞍轡。南市買轡頭。北市買長鞭。朝辭爺娘去。暮宿黃河邊。夫從軍已苦。從軍而自買鞍馬。尤非富人不辦也。是等詳細狀況。史皆不詳。賴詩歌傳寫。略知其梗概。而歎古社會狀況之難。與今等也。

古從軍戍邊之慘狀

自唐以前。皆徵兵制。除貴人外。皆有當兵義務。非若後世募兵。多無室家。故一遇戰事。則生死難卜。遠戍邊塞。則多年不歸。征夫有離鄉之悲。思婦有久曠之怨。臨行送別。哭泣悲號。至爲慘痛。此等狀況。惟於詩歌中見之。他不能親切也。

古遠戍。其衣皆由家寄官家。蓋負輸送之責。而不爲製衣。故量動思婦之恨。宋謝惠連擣衣詩云。紈素旣

已成君子行未歸。裁用筍中刀。縫爲萬里衣。盈篋自余手。幽緘候君開。腰帶準疇昔。不知今是非。又唐杜甫擣衣詩。亦知戍不返。秋至拭清砧。已近苦寒月。况經長別心。寧辭擣衣倦。一寄塞垣深。用盡閨中力。君聽空外音。又陳陶詩。可憐無定河邊骨。猶是深閨夢裏人。讀此三詩。知古社會幽怨之婦多矣。

其述從軍送別者。如杜新婚別。結髮爲妻子。席不暖君床。暮婚晨告別。無乃太匆忙。妾身未分明。何以拜姑嫜。是必當時社會有此事。故有此詠。又垂老別云。男兒旣介胄。長揖拜上官。老妻臥路啼。歲暮衣裳單。孰知是死別。且復傷其寒。是垂老而從軍。無子可知。妻何以爲情。其悲傷與新婚等。又兵車行。車轔轔。馬蕭蕭。行人弓箭各在腰。耶娘妻子走相送。塵埃不見咸陽橋。牽衣頓足攔道哭。哭聲直上干雲霄。夫有妻有子。是中年而從軍者。乃家屬哭送哭聲震天。不有詩史。後世孰知古社會有如此慘狀哉。

戶籍

古以有口賦。故戶籍冊。最重。漢魏以後。無口賦。而徵兵。故戶籍仍重。其謂中國人戶口數不確者。乃清以來現象耳。若唐以前。則人口數不惟真確。即男女有微眚者。籍必書也。其死亡之率。更真確。不待言矣。非若後世之視爲具文也。

周有戶籍專官

周禮秋官司民掌萬民之數。自生齒以上。皆書於版。異其男女。登上其死生。又地官遂人。以歲時登其夫

家之衆寡。國中自七尺以及六十。野自六尺以及六十五。皆征之。其捨者。國中貴者。賢者能者。服公事者。老者疾者。皆捨以歲時入其書。夫曰。自生齒以上。皆書是。民間生兒。無論男女。必報官也。曰。登上其生死。是無論男女長幼。凡病死。必報官也。曰。七尺六尺以及六十六十五。皆征之。是庶民年歲官家皆有冊記。雖欲避而不能也。

周戶籍上親屬必詳

大戴禮記。古者殷屬爲成男。成女名屬升於公門。注殷衆也。成者成人者也。名姓名屬親屬是一戶之內。除家主外。其長幼親屬皆登於籍也。

漢唐造戶口冊時無論男女老少皆入城查看

漢唐戶口籍詳於後世。夫人而知之。至其登記時。如何情狀。史不言之。若不詳。致不知其擾民其嚴厲至於如此也。攷後漢禮儀志。仲秋之月。縣道皆案戶比民。又江革傳。母至歲時。縣當案比。革以母老。不欲搖動。自在轍中。輓車不用牛馬。唐章懷注云。案比者。驗以比之。猶今貌閱也。按婦人既不能給役。婦而老尤無用。乃年年校閱。其相貌以憑登記。老婦如此。少婦可知。女子如此。男子可知。卽此一端。古社會庶民之多事。過於後世也。乃自漢迄唐。慎審如出一轍。誠以人人相貌。皆有特別標識。或小有改易。年年校閱。登記詳悉。如犯法而逃避。則易於緝獲也。

唐戶口冊登記之標識種種

唐開元二年交河柳城二縣戶口冊。冊式如表式。首填戶主姓名。次填親屬。大戴禮所謂殷屬也。其親屬之中無論男女。有皆必書。有誌必書。書者如右足跛。左目眇等。書誌者如耳下有瘤。面何部有黑子。及面白面赤面黑等是。也是冊爲新疆布政使王晉卿先生得之。迪化古墓中。原爲一畫繪一松。松下立一女鬼。糊於墓牆上。高約五尺。寬一尺六七。背一分厚。皆戶口冊紙。今迪化正唐交河柳城二縣地。王維詩所謂瀚海經年別。交河出塞流是也。迪化空氣乾燥。故紙經千年不壞。縣印大與今等。先生曾借余觀之。故得其詳如此。

卷三十七

行唐尚秉和著

行旅

周會盟時旅野狀況

周禮天官掌舍。掌王會同之舍。設陛棟再重。設車宮。轅門。棘門爲帷宮。設旌門。注陛棟者聯三木交互以爲遮列。車宮者次車爲藩牆。轅門者仰車以轅表門。棘門者以戟爲門。帷宮者張帷幕以爲宮室。旌門者樹旌於門也。按古會盟不於都邑於曠野。故以車爲垣牆。以轅爲門。張幃幕以爲宮室。左傳昭十三年晉合諸侯於平丘。子產子太叔相鄭伯以會。子產以幄幕九張行。子太叔以四十至日命外僕速張於除。於除是其證也。此國君與卿大夫之旅行雖齋攜多輜重爲累然有車馬有僕役所至有官邸尚能任之。若士庶旅行則其難有三。

一古無鬻食者凡旅行須自行擔糧

莊子逍遙遊適百里者宿春糧。適千里者三月聚糧。又胠篋篇某所有賢者贏糧而從之。又庚桑子曰。今吾才小不足以化子。子胡不南見老子。南榮趨贏糧七日七夜至老子之所。按贏者擔也。列子云商丘開

因假糧荷畚之子華之門。畚者竹器，所以盛糧，荷亦擔也。倘中途糧匱，則不得食。列子韓娥東之齊，糧匱過雍門，鬻歌假食。又論語孔子在陳絕糧，從者病，莫能興。此皆旅行自行裹糧之證也。

一旅行須攜釜鬲自行炊飯

古裹糧旅行，飯須自炊者勢也。自炊則須攜釜鬲。史記蔡澤傳：去之趙見逐，入韓、魏遇盜，奪釜鬲於途。又孟子孔子接淅而行，是皆攜釜鬲旅行自炊之證。蓋春秋時雖有逆旅而不鬻食，客至假釜鬲爲炊，少則可，衆則有時不給，故必自攜始便於用。夫釜鬲尚須自備，則匕箸椀勺之類更不待言。以是證古行李之繁多，過今日十倍。

一旅行無節傳則卽時入獄

客無驗者逆旅不納，僉以爲商君之法。豈知自成周卽如此。周禮地官大司徒令：無節者不行於天下。注無節不行，所以防寇姦。又比長職徒于國中及郊，則從而授之。若無授無節，則唯圜土也。納之，又司關，則以節傳出內之。又掌節凡通達於天下者必有節。此其事可於韓非子證之。韓非子云溫人之周，周不納。客主問之曰：客也。對曰：主人問其巷人而不知也。吏因囚之。是旅行而無驗，卽納圜土。又史記孟嘗君傳：昭王旣釋孟嘗君，卽馳去，更封傳變姓名以出關。關法鷄鳴而出客。孟嘗君恐追至，客之居下坐者，能爲鷄鳴而鷄盡鳴，遂發傳出。按更封傳者，書僞姓名於傳上，其入關時所給之真傳爲孟嘗君，茲恐見阻，故

易僞名。是無節傳。卽不能出入關。又商君傳。商君亡。欲舍客。舍人不知其商君也。曰。商君之法。舍人無驗者坐之。驗者證也。亦傳也。是無傳。並不能宿逆旅。然則古旅行之艱難。飲食猶其次也。

春秋戰國客店之情狀

周時行旅除官吏出使商賈運輸外。旅客蓋甚稀。而官吏所至駐官邸。周禮遣人所謂十里有廬。三十里有宿。五十里有候館。是也。故以逆旅爲業者少。然亦有之。國語陽處父如衛返過甯。舍于逆旅。甯嬴氏說苑鄭桓公東會。封於鄭。暮舍於宋。東之逆旅。逆旅之叟從外來曰。客將焉之。莊子。陽子之宋。宿於逆旅。逆旅人有妾二人。是皆非官設。而自以逆旅爲業者也。又莊子。孔子之楚。舍於蟻邱之漿。注司馬云。謂逆旅舍以菰蔣草覆之也。李云。謂舍於賣漿家。是蓋業逆旅而兼賣漿故。孔子舍之。又陽子居至梁。遇老子於中道。至舍進盥漱巾櫛。與老子語。其往也。舍者迎。將其家公執席。其返也。舍者與之爭席矣。是尤私人業逆旅業之證。又史記商君傳。亡至關下。欲舍客。舍人曰。舍人無驗者坐之。是商君頒布客舍規程不得。貪受報。而宿無驗之客。其爲商業尤顯然。第其時雖有客店。似不賣食。故客仍須自炊。漿者飲料。如今之賣茶非食也。

周貴人旅行時祖道犯軾之盛況

祖道者。祭道也。風俗通云。共工之子曰脩。好遠遊。舟車所至。足迹所達。靡不窮覽。故祀以爲祖神。祖者。徂

也。詩云韓侯出祖。左氏傳襄公將適楚。夢周公祖而遣之。又按詩大雅。仲山甫出祖。箋云。祖者犯軾之祭。犯軾者。按周禮夏官大馭掌馭王路車以祀。及犯軾。王自左馭。馭下祝登受轡。犯軾遂驅之。注行山曰。軾犯者封土爲山象。以菩音阜草芻棘柏爲神主。旣祭則以車轢之而去。喻無險難也。王自左馭者。大馭旣下車祭軏。王暫執轡。祭訖馭登車取王手之轡。遂驅而速行也。又按詩大雅云。取蕭祭脂。取羝以軾脂。與羝乃祖道之祭品。以是證祖道在先。旣祖則以車轢神主及土山以行。故曰犯軏也。

按祖神風俗通以爲祖者徂也。而漢書疏廣傳。祖道供張東都門外注云。祖者送行之祭。一說黃帝之子。纍祖好遊。遠死於道。後人以爲行神。故出行必祭之。而飲於其處。是以祖爲人名似較應劭訓祖爲往說爲勝。

周送行必飲餞

詩大雅。申伯行邁。王餞於郿。箋云。祖而舍軏。飲酒於側曰餞。又聘禮。乃舍軏飲酒於其側。注大夫道祭無牲牢。洒脯而已。故祭畢又於旁飲酒以餞別也。是自王及卿大夫送別者皆飲酒。又詩邶風。出宿於沚。飲餞於沚。女子有行。遠父母兄弟。是女子送別亦飲讌也。

漢魏時旅行

其官吏旅行。則舍宿都亭。史記司馬相如傳。往舍都亭。嚴延年傳。母止都亭不肯入。或止鄉亭。鮑宣傳。舍

宿鄉亭人皆非之是也或止傳舍中尹翁歸傳是日移病不聽事因入臥傳舍何武傳武行部必先詣學宮見諸生然後入傳舍傳舍與都亭皆官設有官掌之專備官吏過往魏相傳御史大夫桑宏羊客詐稱御史止傳丞不以時謁客怒縛丞師古曰傳謂縣立傳舍是可證非官不許入故詐稱御史又官吏入傳舍傳舍須供飲食龔勝傳勝辭官歸里詔行道舍傳舍縣次具酒肉食從者及馬是因勝旣罷官特詔仍以官吏待遇又光武紀至饒陽官屬皆乏食光武乃自稱邯鄲使者入傳舍傳吏方進食食使從者饑爭奪之是皆傳舍供給官吏飲食之證以故廉潔自好者則不入傳舍魏志張旣傳注每行縣飭吏攜鑊自刈草食馬不宿亭傳是也

漢客店仍不賣食客仍自炊

漢官吏旅行有傳舍有都亭殊無所苦若士庶旅行較周時少便者商設逆旅似漸多後漢黃憲傳穎川荀淑至慎陽遇憲於逆旅又郭泰傳每行宿逆旅輒躬洒掃及去後人見之曰此必郭有道宿處也又世說鄭玄欲注春秋傳尙未成時行與服子愼遇客舍又魏武詩逆旅整設以通商旅可證其時旅店已漸多惟仍不具食後漢周防傳父揚少孤危常修逆旅以供客而不受其報是不責房值耳若具食而不受報焉有此力又魏志胡質傳注爲武威太守子威以家貧無車馬自驅驢單行拜見父告歸質賜絹一匹爲道路糧每至客舍自放驢取樵炊爨食畢復隨旅進道夫食畢復行非夜可知設客舍而售食萬無日

中。小。憩。之。時。必。自。炊。以。悞。時。而。少。行。路。也。

漢初旅行仍須持傳但祇過關用

漢書文帝紀十二年除關無用傳張宴曰傳信也若今過所也如淳曰兩行書繪帛分持其一出入關合之乃得過謂之傳也時承平久故過關廢傳至景帝四年七國反詔諸關復用傳出入自是迄漢末不廢甯成傳詐刻傳出關終軍傳步入關關吏予軍繻軍問此何爲吏曰爲復傳復返還當以合符軍曰大丈夫西遊終不復傳棄繻而去及軍爲謁者建節出關關吏識之曰此使者乃前棄繻生也張宴曰繻符也若券契亦傳也由終軍傳證之可見未至關時旅行卽不用傳傳祇過關用又以證官吏雖過關不用傳也

至漢末凡官民旅行皆用傳否則廚傳不留

王莽傳吏民出入持布錢以副符傳不持者廚傳勿舍關津苛留師古曰舊法行者持符傳卽不稽留乃更令持布錢與符相副乃得過也廚行道飲食處傳置驛之舍也按此廚傳疑卽客舍非傳舍傳舍非官舍有符傳耶是官吏舍官舍須以符傳爲憑茲渾言吏民不持傳廚傳勿舍是庶民無傳者廚傳不敢留卽官吏無傳亦不敢留也觀師古注是爲漢舊法莽不過副以布錢耳是漢末旅行難於漢初也

後漢過關符傳須向官家買

西漢時符傳無賣者。終軍傳。關吏予軍繙。是至關即予傳之證。至東漢則賣傳以爲斂財之法。郭丹傳。後從師長安買符入函谷關。注符即繙也。又東觀記。丹從宛人陳洮買入關符。是符傳亦可轉賣也。

東漢時旅行有符傳則到處護送

高士傳。申屠蟠與濟陰王子居同在太學。子居病卒。蟠卽負其喪至濟陰。遇司隸從事於河輦之間。從事義之。爲符傳護送。蟠不肯。投傳於地而去。按從洛陽至濟陰。東行不過關。然從事特與以符傳。云護送者蓋有符傳即可。舍亭驛。免宿逆。旅行路益便也。

五代時旅行仍用傳

徐鉉稽神錄。道士張謹既失書囊行李。將及潼關。時秦隴用兵。關禁綦嚴。客行無驗。皆見刑戮。因不敢東渡。是至五代。有事時。行路仍用傳也。

漢魏送別時之祖餞

漢書疏廣傳。廣及兄子受上書乞骸骨歸里。公卿大夫故人邑子設祖道供張東都門外。送者車數百輛。注祖者送行之祭。因饗飲也。又劉屈釐傳。貳師將軍李廣利將兵出擊匈奴。丞相爲祖道。送至渭橋。是送別兼飲讌。與周同也。惟不言犯較似其時祇祭祖神也。

六朝時客店始賣食

世說王敦爲逆。晉明帝乃持金鞭著戎服騎馬陰察地勢。未至十餘里。有客媿居店賣食。又魏書崔光傳。光弟敬友置逆旅於蕭然山南大路之北。設食以供行者。是可證凡逆旅皆不設食。獨敬友設食以便行人。故史特書其異。隋唐以來。客舍旗亭皆賣飲食。行旅勞頓所至如歸。與古異矣。

六朝時送別須啼泣。否則謂爲寡情。

世說周叔治作晉陵太守。周侯仲智往別。叔治以將別涕泗不止。仲智恚之曰。斯乃婦人與人別。惟啼泣。便舍去。周侯顥獨留與飲酒言話。臨別流涕搘其背曰。奴好自愛。又顏氏家訓。別易會難。古人所重。江南餞送下泣。言離有王子侯。梁武帝弟出爲東郡。與武帝別。帝曰。我年已老。與汝分張。甚以惻愴。數行淚下。侯遂密雲。言不雨。赧然而去。坐此被責。北間風俗不屑此事。歧路言離歡然分首。然人性自有少涕淚者。腸雖欲絕。目猶爛然。如此之人不可強責。

按江淹別賦云。黯然銷魂者。惟別而已矣。狀送別之情。最爲親切。乃黯然銷魂則可。而必強以下淚。則外貌也。彼李陵送蘇武詩曰。擣手上河梁。日暮欲何之。其悲痛豈祇下淚而已哉。乃六朝人以是爲送別儀式。且以是而見責。其前乎六朝如漢魏。後乎六朝如唐宋。皆未有也。真特殊之風俗已。

唐宋時旅行已大便。惟唐仍以帛爲路費。

明清以來旅行者皆持銀沿路易銅錢用之若唐以前皆以帛爲糧家語孔子之荊與程子相遇傾蓋而語命子路取束帛贈程子是贈路費也魏胡質與其子絹一匹爲道路糧見前是魏晉時亦以帛充路費至唐尤甚鄭哲才鬼記竇玉妻曰君不合居此宜速命駕常令君有絹百匹言訖贈絹百匹而別又酉陽雜俎秀才權同休下第游蘇湖間遇疾貧窘困褫垢衣授僕曰可以此少辦酒肉予將會村老丐少道路資也乃具牛肉旨酒村老皆醉飽獲束縑三千又稽神錄謹得行李更詣主人遺絹數匹乃得歸又劉無雙傳古押衙爲具擔子一馬五匹絹三百匹五更便發是皆以絹爲旅費也用銀者絕少蓋行路裹糧萬不能多而古代金銀賤亦難以多帶惟帛則輕而易舉行旅最便故古視帛與錢幣等不曰幣帛則曰錢帛即今久不用帛俗語猶曰財帛是其證宋元以來用者漸少明清則皆以銀換錢無以帛爲糧者

卷三十八

行唐尙秉和著

兵事

周時以鼓進兵以金退兵

左傳哀十一年。吾聞鼓而已。不聞金矣。注鼓以進兵。金以退兵。不聞金言將死也。按莊十年戰於長勺。公將鼓之。勸曰。未可。齊人三鼓。又韓詩外傳。趙簡子卒。中牟畔之。葬五日。襄子圍中牟。圍未匝而城自壞者十丈。襄子擊金而退之。曰。吾不乘人於危。又墨子。越王焚舟失火。親自鼓其士而進之。士蹈火死者百餘人。王擊金而退之。是皆以鼓進兵。以金退兵之證。想見古戰時聲勢之浩大也。金者今俗謂之鑼。

漢戰時仍用金鼓

漢書韓信傳。信建大將旗鼓。鼓行出井陘口。大戰良久。於是信耳棄旗鼓走水上軍。趙空壁爭旗鼓。又李陵傳。鼓聲不起。又聞金而止。又光武紀。鉦鼓之聲。聞數百里。蓋仍以鼓進兵。以金退兵也。

古戰時主將可對面語

春秋時戰陣之間。仍不廢禮讓。如晉郤至見楚子必下。免胄而趨。風櫟鍼餽子重以飲。雖大戰之時。餽遺

不絕。至漢初漢王與項王臨廣武而語。又蜀志關羽傳注。羽與魏將徐晃夙相愛。遙共語。但說平生。不及軍事。徐晃下馬宣令曰。得關雲長頭者賞千金。羽驚怖謂晃曰。大兄是何言耶。由是證之。古兵陳相距甚近。故能對語。若稍遠。則語不能聞矣。故漢王數項王以十大罪。項王怒。伏弩射中漢王也。

礮之沿革

前漢甘延壽傳。投石絕等倫。注張宴曰。范蠡兵法。飛石重十二斤。爲機發行二百步。按此卽礮也。蓋以大木激石。飛至敵所。故廣韻云。機石也。是以字從石。又按後漢袁紹傳。曹操發石車擊袁紹。軍中呼爲霹靂車。唐韋懷注云。卽今拋車。又唐書李密傳。以機發石爲攻城具。號將軍爲礮。是至唐仍石礮也。至金元時火銃興。遂又本其法而爲火礮。法以銅鐵爲巨銃。內實火藥。然以發彈。明紀太祖與陳友諒戰於鄱陽湖。礮碎御舟。是也。自洋槍興而火銃廢。大礮術亦愈精。於是明清以來所鑄之土礮。又廢。今沿邊之地所廢置者。是也。其餘戰器。刀矛以外。惟弓箭用之。最久。自三代至清不廢。其製造之術爲極精。外觀亦最華美。可愛。乃至今無習之者。不惟射術亡。其製造弓箭之絕技亦亡。甚可惜也。

烽燧報寇警

烽燧報寇警法。最迅速。自三代至明清。數千年不廢。清咸豐時。太平亂。猶用此法。凡大道十里一墩。高約四丈。有警。則以次傳烽。頃刻可達數百里。而狼煙最佳。狼煙者。蓄狼屎然之。其煙冲天。風不能動。尤可傳。

五里

一鋪

遠方望見自鐵道興官路廢墩鋪五里一鋪亦燃惟沿長城仍有此遺蹟耳然狼煙之發明唐以前無有墨子築郵亭者圓之高三丈以上令特殺爲辟梯亭一鼓寇烽警亂烽傳火以應之至主國止其事急者引而上下之烽火以舉輒五鼓傳又以屬之言寇所從來者少多旦弇還去來屬次烽勿罷望見寇舉一烽入境舉二烽射妻樓疑爲舉三烽藍郭會舉四烽二藍郭會舉五烽按墨子善守其言築亭之法及舉烽規矩詳矣至烽燧之形則未言。

漢書賈誼傳斥候望烽燧不得臥文穎曰邊方備胡作爲土櫓櫓上作桔槔桔槔頭兜零以薪草置其中常低之有寇卽火然舉之以相告曰烽又多積薪寇至卽然之以望其煙曰燧張宴曰晝烽夜燔燧師古曰晝燔燧夜舉烽又按司馬相如傳邊郡之士聞羨舉燔燧孟康曰羨如覆米箕懸著契臯頭有寇則舉之燔積薪有寇則然之。

按櫓者樓也土櫓者卽墨子所謂郵亭明清時之墩臺也兜零者廣雅云籠也卽孟康所謂覆米箕略如懸桔槔頭有寇則高舉使遠處易望見墨子不言桔槔然曰引而上下之則亦懸桔槔也惟置薪草於兜零中而然之不並然兜零乎抑兜零爲鐵製物乎至於烽燧之分史記索隱云烽主晝燧主夜魏張宴亦曰晝烽夜燧誠以白日不能見光故以烽煙告警夜能見光不能見煙故然燧使起火光以報警而師古則謂晝燧夜烽實烽燧爲一物皆須然薪而後起煙起火光不過晝以煙爲識夜以火光爲識耳。

至唐則焚狼糞爲烽煙

無論烽燧在漢魏時皆然薪爲之。至唐造烽煙之法益精。酉陽雜俎云：狼糞煙直上，烽火用之，蓋煙直上，則能望遠。否則爲風吹倒，遠處難見。法誠善也。自此以後，遂名烽燧爲狼煙。宋史曹翰傳：先是虜至，必舉狼煙，翰分遣人舉煙直上，虜疑有伏引去。然此必自晝用夜，則仍然燧爲光，且以證古時狼多，若今日雖深山亦不易得若干狼糞爲用也。

歷代驛傳之狀况

古人交通迅速之法，惟恃驛傳。凡官文書來往，緊急報告，皆賴之。法定若干里爲一驛。凡車馬上路疾馳，至驛而更，以休人馬，故傳遞迅速。春秋時，名曰遞。左傳僖三十三年，且使遞告於鄭。定二年，鄭公孫黑將作亂，子產在鄙聞之，懼弗及，乘遽而至，亦名曰駟。文十六年，楚子乘駟會于臨邑，是也。至漢，名曰傳。高帝紀：田橫懼，乘傳詣雒陽。英布傳：王怒，欲捕赫，赫上變事，乘傳詣長安。如淳曰：四馬高足爲置傳，四馬中足爲馳傳，四馬下足爲乘傳。一馬二馬爲輶傳，急者乘一乘傳，如如淳說，傳以四馬爲最多，而亦有六馬者。袁盎傳：將乘六乘傳，會兵滎陽。注：六乘者六馬，蓋事愈急，馬愈多。漢又名置。劉屈氡傳：時上避暑甘泉宮，丞相長史乘疾置以聞。師古曰：驛也。按風俗通：漢改郵爲置，增韻云：步傳曰郵，馬傳曰置。蓋春秋時人不能騎馬，故祇有傳車。至漢人能騎馬矣，而官吏仍不騎行。又其時往來文書，仍竹簡書囊，堆積非車不能載。

載。而官吏有急事。亦常乘傳。故仍有傳車。凡置馬。謂之驛騎。自馬遞興。而車傳漸少。自晉初紙多。而文書簡省。馬亦可遞。故尤迅速。元馬哥婆羅遊記云。元世祖時。自塞外闢大道。直達西域。東西數萬里。凡傳遞文書。二十五里爲一站。騎馬搖鈴。到站即更易。傳遞迅速。朝發夕至。此皆馬遞也。至於清。惟官吏往來。蒙古者有傳車。馳行沙漠中。謂之台站。餘內地大路。每三十里一驛。蓋馬遞。故每行官道。輒聞鈴聲。驛馬絡繹不絕。至光緒末。郵政興。而驛馬始廢。

卷三十九

行唐尚秉和著

歲時伏臘

凡歷代歲首皆爲令節。士民和會古今如一茲編不論。論歲首以外時節之沿革蓋無論士農工商終歲勤動無娛樂之時則精神不活潑古之人於是假事以爲娛樂原以節民勞和民氣亦卽所謂張弛也。此其義也。乃執者往往以時節酒食歡娛祭賽迷信謂爲無理而欲刪除之豈知古人用意乃假時節以爲娛樂非娛樂之義在時節也。時節者乃人爲故自古及今有沿革有轉移有風俗習慣習慣旣久便視爲當然不能究其所以然。

其在周時則假祭神爲娛樂期

禮記郊特牲唯爲社事單出里注事祭也單同出里者里人盡出祭也按古二十五家爲一里里必有社年分兩季祭之有春祭月令仲春擇元日命民社元日者甲日也有秋祭周禮春官社之日蒞卜來歲之稼注秋祭也祭之日椎牛宰羊里人盡出祭罷而分其肉則社日之不治事酒食謳樂手舞足蹈可知矣而一年兩舉其在仲春者以民將勞動而爲之在秋後者以民勞動旣久而爲之皆具深意非漫然也。

其次爲蜡禮雜記子貢觀於蜡孔子曰賜也樂乎對曰一國之人皆若狂賜未知其樂也子曰百日之蜡言勤稼穡有百日之勞一日之澤非爾所知也張而不弛文武弗爲也弛而不張文武弗爲也一弛一張文武之道也按郊特牲蜡也者索也歲十二月合聚萬物而索盡也饗之也是舉於歲終一年祇一次其詳細狀況及其禮節今已不得知第觀子貢所云一國之人皆若狂則當時社會以是日爲唯一之娛樂期殆與社日同也

至戰國仍以社臘爲唯一令節

韓非子秦昭王病百姓爲之禱病愈殺牛塞禱公孫衍出見之曰非社臘之時也又豕身三蟲相與訟一蟲曰若不患臘之至而毛之燥耶是可證社臘時殺牛宰豕之多爲社會大酺之唯一令節臘卽蜡也說文冬至後三戊爲臘祭百神

社臘外周重上巳節

周禮春官女巫掌歲時祓除疾病鄭注以漢三月上巳修禊當之然不甚明確惟風俗通引韓詩曰三月桃花水之時鄭國之俗三月上巳於溱洧兩水之上執簡招魂祓除不祥是三月上巳爲周時令節士民遊春祓禊水上娛樂可知鄭建國在春秋初在列國爲最後鄭如此列國可知再證以周禮上巳爲令節無疑矣

兩漢時所行之節令

一爲上元。漢志執金吾掌禁夜行。唯正月十五勅許弛禁。謂之放夜。一爲三月上巳。衛皇后傳帝祓霸上還。孟康曰祓除也。從霸水上自祓除。今三月上巳也。又後漢周舉傳六年三月上巳商大會賓客讌于洛水。又周禮春官女巫鄭注如今三月上巳如水上之類是漢以三月上巳爲節也。故後漢禮儀志云是月上巳官民皆潔於東流水上官民皆出其盛可知。一爲伏臘。東方朔傳久之伏日賜從官肉。大官丞日宴不來。朔獨拔劍割肉曰伏日當早歸。夫曰早歸可見伏日皆歡娛讌飲。又嚴延年傳母從東海來欲從延年臘是可見以臘爲令節。又楊惲傳歲時伏臘烹羊魚羔。又元后傳至漢家正臘日獨與其左右相對飲酒。是益可證社會至伏日臘日酒食醉飽之娛樂。一爲日至薛宣傳及日至休吏賊曹掾張扶獨不休宣出教曰日至吏以令休由來已久。曹雖有公職事家亦望恩私意掾宜從衆歸對妻子設酒殽請鄰里一笑爲樂。注日至冬至夏至也。夫至日至而官吏且休沐社會可知。一爲社日。陳平傳里中社平爲宰分肉甚均。蓋其歡娛仍與周同也。

漢末之寒食

總漢家之令節爲上元。上巳爲伏日。臘日。春社。秋社。夏至。冬至。其見於史者。共有八日。皆社會遊宴飲樂之時。至七月七日彩女穿鍼。見西京雜記。五月五日浴蘭湯。見大戴禮。五月五日賜羣臣梟羹。見漢書。以

及後漢劉玄傳立秋日驅謫皆未敢必社會以是日爲娛樂之期故不詳惟至後漢末忽爲介子推而有寒食之節鄉民無知演爲風俗政府迭禁之而其風至唐宋仍不已禁火三日甚無謂也

後漢書周舉傳太原一郡舊俗以介子推焚骸有龍忌之禁至其亡月咸言神靈不樂舉火由是士民冬中輒一月寒食老小不堪舉言盛冬去火殘損民命使還溫食又魏武帝令聞太原上黨西河雁門冬至後百五日皆寒食云爲介子推北方冱寒之地老少羸弱將有不堪之患令到禁絕火如有犯者家長半年刑是寒食在漢末初起祇太原上黨諸郡未普及於中原各郡且自周舉傳觀之祇子推亡月一月寒食自魏武帝觀之則自冬至起至清明皆寒食變本加厲又觀周舉傳是子推亡於冬月胡爲寒食至清明始已又胡爲至唐宋全國皆然風俗推移有不可思議者然則寒食節在漢末最爲苦境也

魏晉六朝之佳節

世說華歆蜡日集子姪讌飲晉書戴洋傳陳愍問洋人言江南當有貴人顧彥先周宣珮是不洋曰顧不及臘後果以十二月十七日卒十九日臘按蜡臘皆祭百神其義一也歆於此日集子姪讌飲可證仍爲令節也又十九日臘可見臘仍無定日仍於冬至後三戊爲之也

社臘外則以上已爲最重晉書夏統傳會三月上巳洛中王公已下並至浮橋士女駢墳車服燭路觀此則上已爲社會最繁華之節但沈約宋書云魏以後但用三月三日不復用已蓋社會習慣已重三月三

日三日與上已期相距甚近故併上已節於三日非若周時之專用三月上巳而忽視三日也。蓋自秦漢以來漸重三月三日文選有顏延年三月三日曲水詩序注引齊諧記曰晉武帝問尚書虞摯曰三月曲水其義何摯曰昔秦昭王三日置酒河曲見有金人出二漢相沿皆爲盛集據此是自漢以來已重三月三至曹魏以與上已近遂卽於是日修禊而廢除上已故宋顏延年有三月三日曲水詩序齊王元長亦有三月三日曲水詩序皆於曲水修禊而皆於三月三是其證也至是日之繁盛盡見於沈休文三月三日詩詩云麗日屬元巳年芳具在斯開花已匝樹流鶯復滿枝洛陽繁華子長安輕薄兒東出千金堰西臨雁鷺陂清晨戲洛水薄暮宿蘭池元巳卽上巳實是日未必爲巳日仍沿舊稱耳又庾信有三月三日華林園馬射賦亦一證也。

六朝時至冬至卽拜節

顏氏家訓已孤而履歲及長至之節無父拜母無母拜父又云南人冬至歲首不詣喪家按以冬至與歲首並稱可見其重相等不詣喪家者不赴喪家賀節也長至卽冬至拜父拜母亦拜節也是六朝時視冬至更重於前。

其次則重九亦重太平廣記晉宣帝於九月九日賜羣臣桑落酒晉書孟嘉爲桓溫參軍九日遊龍山風吹帽落南宋書武帝爲宋公在彭城九日登項王戲馬臺至今相承爲故事而謝靈運謝宣遠皆有九日

從宋公宴戲馬臺詩。又陶淵明嘗九月九日無酒。坐東籬下。摘菊盈握。又南史齊武帝立商飈館於孫陵寺岡。世呼爲九日臺。秋九日車駕幸焉。是六朝之重九。與三月三日同。惟三日則近水修禊。九日則擇地登高。三日則漢舊俗重九。則魏以後始行也。

其他若人日見薛道衡詩。七月七日都人皆曝衣。郝隆則仰臥於庭。曝腹中書。又七月七日當晒衣。諸阮庭中爛然。皆見於世說。然社會似不以是爲娛樂之期。又寒食端午中秋在六朝時見於文人歌詠者亦少。似其時不甚重也。

惟梁簡文帝有看燈賦。殆上元夜也。蓋上元承歲首娛樂之時。而值月夜。自漢以來。金吾卽放夜三日。六朝想當益盛。惟其時燈油蓋尙貴。無植物油。故帝賦有南油俱滿。西漆爭然之語。夫爲燈戲而至於然漆。則後世所無也。

唐宋之令節 上元燈火之大觀

古人精神之活潑。遠過後人。其魄力之偉大。尤非後人所可比。卽如上元燈火。其布景之奇麗高遠宏大。在唐代固夐絕後人。卽宋時亦非今人所能辦。其唐宋燈火見於詩歌者。如王珪詩雙鳳雲中扶輦下。六鼇海上駕山來。又向子諲云。紫禁煙花一萬重。鼇山宮闕隱晴空。玉皇高拱雲霄上。人物嬉遊陸海中。又蘇味道詩。火樹銀花合。星橋鐵鎖開。又李商隱詩。月色燈光滿帝都。香車寶輦溢通衢。讀此數詩。唐燈火。

之影及和樂之聲如耳聞目覩矣。蓋龍山鳳輦不惟排列雲空並能浮搖上下其宏大固可驚其技妙之精能亦可佩至其高度據開元遺事上在東都結繒綵爲燈樓二十間高一百五十丈又雍洛靈異小錄唐時元夜寺觀街巷燈明若晝山高百餘丈又天寶遺事韓國夫人造百枝燈高八十丈照數十里查唐時尺與今尺正同高至百五十丈幾一里真驚人矣此長安東都之盛也此外如開元天寶遺事云明皇移仗上陽宮葉法善言西涼府燈亦亞於此令上閉目已在霄漢俄而及地觀燈果然以鐵如意質酒爲驗又幽怪錄明皇於正月望日問葉天師四方何處極麗對曰無踰廣陵帝曰何術觀之師曰可俄而紅橋起殿前帝步而上俄頃至廣陵士女皆仰望曰仙人現五色雲中是西北涼州東南廣陵燈火皆亞於兩京也。

宋時燈火其見於宋詩者王安石云別開闔闔壺天外特起蓬萊陸海中想見空中樓閣之佈置程漢金陵元夕云三山火照瓊花發人在南天白玉京想見空中山島之崢嶸王磐云夾路星燧留去馬燒空火樹亂歸鴉讀此詩知宋上元燈火不亞於唐至元夜狀況之見於紀載者如容齋隨筆西京正月十五前後各一日看燈宋增爲五夜因錢氏納土展至十八又程史宋宣和中張燈有夫婦相失者婦至端門飲賜酒竊懷金杯衛士察知送御前婦口占詞有竊取金杯作證明之句上喜以杯賜之命黃門引歸又王韶幼子宋元夜觀燈爲姦人負去兒覺其異納珠帽於懷適內家車過宋攀轡大呼賊駭逸內人抱置之

膝擁至上前。上問誰氏。具道所以上歎其早慧。賜壓驚金屋錢果值鉅萬。此皆因元夜都城人馬擁擠。山崩海沸。故至夫婦相失。幼子被刦。又以證宋時皇帝觀燈時出至端門與民同樂。仍與唐同。故是等小事。輒爲皇帝所見。隨時處分。得民歡心。內家者宦官也。

唐宋之清明節

按杜甫詩。三月三日天氣新。長安水邊多麗人。足見唐三月三日赴水上修禊之盛。然吾疑祇都邑士人及富貴人家爲之。在社會未必普遍。其普遍社會雖鄉曲不遺者。乃清明之寒食也。其普遍殆與歲首同。然元旦上元日至社臘等日。純爲社會娛樂之節。獨清明時值春和芳草遍地。天涯遊子最動歸思。而柳綠桃紅。士女踏春不忘和樂。其趣味介乎娛樂非娛樂之間。而唐宋時尤甚。分述於後。以見當時風俗。一。禁火。禁火之俗。先起於并州各地。見後漢書周舉傳。及魏武帝令。均見周舉已移書介子推廟曰。寒食一月。老小不堪。今則三日而已矣。是後漢中葉已創行三日禁火。乃觀魏武令仍不止三日。其所以如此者。據荆楚歲時記。介子推三月五日爲火所焚。國人哀之。每歲春暮不舉火。謂之禁煙。犯之則雨雹傷田。觀此則愚民迷信有所畏忌。故周舉三日之約不能即行。至六朝則斷火一日。齊民要術云。之推忌日斷火。煮體而食之。名曰寒食。蓋清明節前一日是也。至唐則於清明前三日禁火。至第三日晚。則山宮內出火。賜近臣。韋莊詩所謂。內官初賜清明火。韓翃詩所謂。日暮漢宮傳蠟燭。輕煙散入五侯家。歐陽修詩所

謂火禁開何晚。禁火仍風雨者是也。故過清明則曰新火。杜甫詩朝來新火起新煙。賈島詩暗風吹柳絮。新火起廚煙。東坡詩寒食清明都過了。石泉槐火一時新。因會斷故曰新初祇。起於并州後漸普遍全國。風俗推移之不可思議如此。

一寒食。鄭中記。并州俗爲介子推斷火。冷食三日作乾粥。今之糗是也。蓋旣斷火卽冷食。而冷食以甘者爲佳。故唐宋至清明社會賣餳者獨多。宋之間詩馬上逢寒食。春來不見餳。李商隱詩粥香餳白杏花天。劉筠寒食詩餳市喧簫吹。宋祁詩簫聲吹暖賣餳天。又集異記工部尚書邢曹進討叛飛箭中肩鏃不可拔。有胡僧曰何不灌以寒食餳。如法應手清涼。是可證餳多於寒食賣故有專名。蓋餳最便於冷食。可塗餅餌製餅餌。沃各種酪食。故寒食前爭蓄之。白居易詩留餳和冷食。張文昌寒食內宴詩廊下御厨分冷食。歐陽修詩多病正愁餳冷足。見當時寒食之苦况。而寒食二字自唐以來遂變爲節名。余幼時讀詩每問先生清明何以有二名。先生曰前二日爲寒食。末日爲清明。今已不寒食而有其名。無怪汝疑也。或問蜜與糖亦味甘。唐宋時胡不食答曰蜜值昂白糖自大歷前未有。宋雖有值仍昂。非社會所通用。若餳則米製價最廉也。

一祭墓。自漢以來。墓祭與廟祭並重。而庶人尤重。至唐則以寒食爲定期。唐書開元勅。寒食上墓禮經無文。近代相傳。寢以成俗。宜許上墓同拜掃禮。觀此則寒食祭掃至早起於隋唐之間。隋以前蓋無有。至唐

中葉而大盛。柳子厚與許京兆書。近世禮重拜掃。今已缺者四年矣。每遇寒食。則北向長號。以首頓地。想田野道路。士女遍滿。早隸傭丐。皆得上父母邱墓。馬醫夏畦之鬼。無不受子孫追養者。讀此書。則唐時祭掃之盛。如在目前。其祭品則田家多持麥飯。五代史。唐家人傳。妃臨死呼曰。何不留吾兒。使每歲寒食持一盂飯。酒。明宗墳上。又宋夏竦詩。漢寢唐陵無麥飯。是其證。其焚化則紙錢。五代史。寒食野祭焚紙錢。宋史外戚傳。李用和少窮困。居京師。鑿紙錢爲業。范成大寒食詩。鳥啄紙錢風。孫蕙蘭詩。明朝又是清明節。愁聽人家買紙錢。然唐時王勃焚陰錢十萬。爲老叟償債。見於摭言。想亦用以祭墓也。

一。清明各種游戲。曰打球。酉陽雜俎。荊州百姓郝惟諒。寒食日與其徒郊外蹴鞠。北里志張住住傳。幼與龐佛奴有結髮契。及將筵。其家拘束嚴。稀得見之。後佛奴因寒食爭球。故偏其窗以伺之。又大唐新語。清明新進士開宴於曲江亭。又有月燈閣打毬之戲。白居易詩。蹴毬塵不起。灤火雨初晴。韋莊詩。隔街聞築氣毬聲。又上相闈分白打錢。白打者兩人對踢也。曰鬪鷄。唐人東城老父傳。玄宗在藩邸時。樂民間清明節鬪鷄戲。李山甫寒食詩。錦袖鬪鷄喧廣場。是也。曰鞦韆。古今藝術圖。北方人寒食爲鞦韆戲。以習輕蹠。又天寶遺事。宮中至寒食節競築鞦韆。嬉笑爲樂。韋莊詩。滿街楊柳綠絲煙。畫出清明二月天。好是隔簾花樹動。女郎撩亂送鞦韆。又蘇軾詞。牆裏鞦韆牆外道。曰野宴。開元天寶遺事。長安士女清明日遊春野步。遇名花則設席藉草。以紅裙遞相插挂。以爲宴幄。又夢華錄。京師清明日。四野如市。芳樹之下。園圃之

內羅列杯盤。互相酬酢。又歲華記。都人遊賞。散布四郊。謂之踏青。然則寒食時。人民之嬉游娛樂。不惟城邑。且遍於四郊。其精神之活潑。後之亂世。固未有卽承平之日。亦未見古今民族精神之衰旺。由此可以致見矣。

唐宋之社日

凡節除歲首外。皆隨風俗爲盛衰。獨社日自三代迄南宋數千年間。行之不替。在中國歷史上可謂最古。最普遍之佳節。乃自元以後。此風頓已。蓋蒙古主政。八十餘年間。中國舊風俗爲其所蹂躪。因以滅亡者。不知凡幾。社日亦其一端也。推原其故。必因社日。全國鼎沸。簫鼓喧填。恐民衆起事。嚴爲制止。及禁之既久。遂忘其事。於是。以數千年之故俗。竟爾革除。可不悲哉。可不痛哉。

婦女停鍼線歸寧

張籍吳楚歌詞。今朝社日停鍼線。起向朱櫻樹下行。墨莊漫錄。今人家閨房遇春秋社日。不可組紉。謂之忌作。故周美成秋蕊香詞云。聞知社日停鍼線。是自唐迄宋婦女至社日皆休假。又夢華錄。社日婦女皆歸娘家。外舅姨舅皆以新葫蘆爲遺。俗云宜良外甥。是婦女至是日皆歸寧也。

社日簫鼓飲讌之盛況

韓愈詩。願爲同社人。鷄豚宴春秋。張蠟詩。桑柘影斜春社散。家家扶得醉人歸。杜甫詩。明年大作社。拾遺

還在否。陸游詩。社日取社猪燔炙香滿村。周子諒詩。鷄豚上戊家家酒。鶯燕東風處處花。讀此詩。則唐宋時社日飲食醉飽之樂。有若目覩。劉禹錫詩。楓林社日鼓。梅堯臣社日詩。樹下賽田鼓。壇邊祠肉鴉。范成大詩。社下燒錢鼓似雷。日斜扶得醉人迴。青枝滿地花狼籍。知是兒孫鬪草來。讀此詩。則祭社時簫鼓沸天之聲。有如耳聞矣。而一年兩舉。故燕子有春社來秋社去之語。凡節皆有定日。惟社臘無定日。周用甲日。漢用午日。魏用未日。唐以來用戊日。

唐宋之端午中秋

自漢以來至五月五日故事獨多。蓋以此日爲陽極之日。風土記。端者始也。正也。五日午時爲天中節。故作種種物能辟邪惡。在漢時以五絲繫臂。名長命縷。見於風俗通。在晉時作赤靈符。著心前可辟兵。見於抱朴子。然故事雖多。在社會似不爲娛樂之節。至唐則漸盛。一競渡。荆楚歲時記。俗以五日爲屈原投汨羅日。傷其死。故以舟楫拯之。其舟輕謂之飛鳬。一鬪草。歲時記。五日四民並蹋百草。故有鬪百草之戲。又劉公嘉話。謝靈運鬚美。臨刑施爲南海祇洹寺佛像。鬚唐中宗朝安樂公主五日鬪百草。欲廣其物。令馳騎取之。由此二事可證。唐時端午日民間之娛樂。又舊唐書。孫伏伽諫曰。太常官司於民間借婦女裙襦五百餘具充妓服。擬五月五日於元武門游戲。非所以爲子孫法。夫必社會於是日游戲。然後官司設游戲於元武門。與民同樂。至若飲菖蒲酒。剪艾爲人懸門戶上。以角黍相餽遺。雖其來已久。然至唐則家

家如是，宋仍與唐同，不具述。

至八月十五夜，在唐時雖有玩月故事，在社會視之似無若何興趣，不惟不能與寒食等並，不能與端午同也。其見於唐人小說者，除集異記、異聞錄、唐逸史記明皇入月宮服仙丹、宣室志記周生梯雲取月事外，餘事甚少。而唐詩除王建今夜月明人盡望，不知秋思在誰家，最馳名外，餘如杜工部李太白白香山韓昌黎柳河東等吟詠中秋者偶有之而不甚著，是其證也。至宋時似盛於唐。太宗紀八月十五日爲中秋節，三公以下獻鏡及承露盤，又膳夫錄汴中秋節食中秋翫月羹，是可證已。以中秋爲節令，故大臣有獻而翫月羹成爲汴京風俗。又晏殊中秋詩苦吟含翰久，清宴下樓遲，是中秋宴飲之證。然閱龐元英文昌雜錄記祠部休假節有立秋、七夕、秋分、重陽而無中秋，是社會仍不以是日爲令節，而端午則休假一日，可見宋時中秋尚不能與端午等也。

唐宋之重陽

重陽故事在唐時多於中秋。詩人歌詠者亦倍蓰。中秋是亦重陽，盛於中秋之證也。蓋時至重九，天高氣清，最宜登高眺望。唐書王勃過鍾陵九月九日閣都督大宴賓客於滕王閣，又韋綬傳，綬爲集賢學士，九日宴羣臣於曲江。王維詩遙知兄弟登高處，共把茱萸少一人，是其證。而俗食蒸糕，歲時雜記二社及重陽皆食糕，而重陽爲盛，以棗爲之，或加以栗，聞見後錄劉夢得作九日詩，欲用糕字，以五經無此字，輒不

復爲是以宋子京九日食糕詩云飈館輕霜拂暑袍糗粢花飲鬪分曹劉郎不敢題糕字空負詩家一代豪而茱萸菊花橙橘爲此節之點綴品說寶唐太宗九日在蓬萊殿賜羣臣橘西京雜記九日佩茱萸飲菊花酒張說有九日進茱萸山詩東京夢華錄都下重陽酒家皆以菊花縛成洞戶飲者皆以菊花插帽簷而去故劉景文九日與東坡詩云四海共知霜鬢滿重陽曾插菊花無是以菊插帽之證也

唐謂冬至前一夜爲除夜宋謂冬住

老學菴筆記陳師錫家享儀謂冬至前一日爲冬住與歲除夜爲對余讀太平廣記三百四十卷有盧頊傳是夕冬至除夜乃知唐人冬至前一日亦謂之除夜云云蓋至宋已以冬至除夕與歲暮除夕同名廢而不用矣故放翁云云又按是夕冬至除夜之語見唐張諲尸媚傳記范陽盧頊家婢小金事太平廣記偶引之非盧頊傳也放翁蓋未見尸媚傳耳

唐宋之七夕與中元

七夕白日曝衣夜陳瓜果祀牛女二星士女月下穿鍼乞巧備見唐宋小說與詩歌中蓋織女嫁牽牛牽牛負天帝錢十萬不償帝罰之祇七夕許與織女渡河相見自漢時卽有是說淮南子云七夕烏鵲填河成橋渡織女是其證故古詩有迢迢牽牛星皎皎河漢女盈盈一水間脈脈不得語之句以事涉情戀動人慕思雖明知爲附會歷代稱說而不已然不如中元節之盛中元爲佛生日唐宋時佛教盛故至七月

十五卽有孟蘭會之設。而開元四年竟於中元夜許京師張燈見於唐會要。而戎昱有中元日開元觀觀樂詩足見其社會點綴猶勝於中秋也。又東京夢華錄中元買冥器綵衣爲孟蘭盆挂搭冥錢衣服焚之是宋時仍與唐同也。

宋時節令輕重之等差

文昌雜錄云。祠部休假歲凡七十有六日。元日寒食冬至各七日。是此三節最重。上元夏至中元下元臘各三日。是爲次重節。立春人日中和節春分社清明上巳立夏端午初伏中伏立秋七夕末伏社秋分授衣重陽立冬各一日。是爲再次重節。其中授衣節不知爲何日。然似非中秋。又寒食與清明並列。不知如何分別也。

明清時之端陽中秋

說薈嘉靖時有張積中者江陰人爲禮部書吏窮困不能歸。至五月五日書吏皆歸家度節。令積中在署值日。并釀資數千以爲酒食之費。是可證明時值端午節官吏皆休假飲讌社會可知。又野史元至正二十六年夏卽有八月十五殺韃子之謠。至中秋夜果數省同時起事。各縣蒙古人同時被戕。蓋中秋人民無不夜飲。飲既醉乘酒興爲之。又按元時各縣皆設蒙官肆虐於民。至今父老有十家養一韃之傳說。平日敢怒而不敢言。至中秋人民乘酒醉之餘不約而同同時起事。是可證自明初以來人民中秋夜飲讌。

普遍全國。

至清則以端午中秋與歲首並稱三節。至時則商賈歇業，百工休假。官吏士民於前一日卽衣冠賀節。端午糉子，中秋月餅，餽遺紛紜。凡錢債至五月節，八月節必清結。謂之節關。而中秋視端午尤重。卽鄉僻小民，必飲酒食肉。與元旦同方之往古，惟六朝之冬至可以彷彿。餘則無此盛也。社會風俗推移之不可思議如此。

其他若社臘。若正月初七爲人日。社會久已不知。惟上元有燈火。然唐宋時所謂鼈山星橋空中樓閣之觀。久已絕迹。三月三日士流偶有修禊者。市民已不曉其義。清明節謁墓祭掃而已。久不寒食。故無賣餳者。若打毬鞦韆蹴鞠游戲之舉。春日廟會或有爲之者。而不於寒食。獨七夕以牛女故。實人尙知之。然晒衣乞巧之舉已無。中元節仍有爲盂蘭會者。小兒剪綵放燈而已。九日登高亦士流爲之。與修禊等。獨臘月初八日之臘八粥。社會頗普遍。或盛於宋時。臘八粥起宋時見夢華錄也。

卷四十

行唐尙秉和著

遊戲

打毬 古戲失傳之一

打毬古名蹴鞠。史記扁鵲傳。處後蹴鞠。注打毬也。漢書藝文志有蹴鞠經。可見其戲甚古。荆楚歲時記云。按劉向別錄。寒食蹴鞠。黃帝所造。以練武士。本兵勢也。或云起於戰國。鞠與毬同。古人蹴蹋。以爲戲也。自漢以來。好此戲者甚多。皆不錄述。其可考見當時打球情狀者。

打毬之時節及其規矩

自隋唐以來。打毬多於春日。而寒食爲此者尤多。白居易詩云。蹴毬塵不起。濺火雨初晴。是其證。其詳在歲時。伏臘中。事物紺珠云。毬兩人對踢爲白打。三人角踢爲官場。毬會曰員社。故韋莊詩內官初賜清明火上相閑分白打錢蓋打毬時以錢爲賭也。

至宋打毬仍賭物

紫薇雜記。熙甯間。神宗與二王打毬子。上問二王欲賭何物。徐王曰。臣不別賭物。若贏時只告罷了新法。

是宋時打毬。仍賭財物。特勝負規則不詳耳。

漢時打毬窟室中

漢書戚夫人傳。呂后斷夫人手足耳目。使居鞠域中。師古曰。如踢鞠之域。謂窟室也。又史記驃騎傳。而驃騎尚穿域踢鞠。徐廣曰。穿地營域。是漢時皆鑿地爲域。而打毬其中。蓋以毬易他適。追逐爲勞。穿地爲域。則有限制也。

古毬製造之法

揚子法言。椀摩也革爲鞠。史記霍驃騎傳注。索隱云。鞠戲以皮爲之中。實以毛。正義云。今之打毬也。按中實。以毛。則輕而易起。外輓以革。則堅實不壞。一毬可用數年。且輕重適宜。不惟無走氣之嫌。亦無太輕之弊。故抵力足而起落靈敏。當光緒中葉。同學有皖人陳某者。善此技。其球係自製。用棉絨一撮。外以粗棉線纏爲圓形。徑約二寸餘。外不用皮。尤爲靈敏。打時有緩急。緩則呆立。如木鷄平舒左臂。或右臂。毫不抑揚。其球上下。若掌與地相吸。然如欲過右或左。蓋手掌稍用力。卽飛落一邊。換手打之。而身仍呆立。不動。如此久之。忽而冲天。忽而左右。一打一易。至尤急時。則身隨毬舞。蹈作勢。毬隨身旋轉。飛舞。或穿袴下。或繞臂纏項。纏股。不知其毬之胡。以隨身不墜如此也。疑卽古蹴鞠之遺法。而今人無述之者。

漢打毬在地域中至隋唐則有毬場隋唐嘉話騎馬楊慎至油灑地以築球場唐書劉悟傳卽徙軍山東開毬場韓偓詩帝宴文思毬場夫旣曰場必其地寬廣平坦便於蹴鞠有若今日運動場觀唐僖宗宴於毬場場內必有樓閣以爲觀毬游戲之所也

唐大臣皆善於馬上擊毬

金華子云周侍中寶高中令駢起家神策打球軍將而擊拂之妙天下知名李相國領鹽鐵在江南春時酒樂方作乃使人傳語曰在京國久聞相公打球盛名如何得一見寶乃輶樂命馬馳驟于綵場中都憑城樓下瞰見其懷挾星球揮擊應手夫球可懷挾則不甚大又騎馬馳驟則是擊球於馬上馬上打球爲後世所無蓋已失傳久矣

至宋有毬門

五燈會元石門云莫來攔我毬門路又宋史禮志打球本軍中戲太宗令有司詳定其儀三月會鞠大明殿有司除地鑿木東西爲毬門高丈餘首刻金龍下施石蓮花座加以采繢左右分朋主之以承旨二人守門衛士二人持小紅旗唱籌御龍官錦繡衣持哥舒棒周衛毬場按此毬門架木爲之東西各一與今日足毬場之毬門正同想亦打入門者勝也故有守門者有持旗唱籌者唱籌蓋記入門之次數以多少分甲乙定勝負創始於宋歟自隋唐如是歟不敢定也

唐宋有毬杖

西陽雜俎有河北軍將常於毬場中累錢十餘走馬以擊鞠杖擊之一擊一錢飛起六七丈又云以鞠杖擊田彭郎折足是唐有毬杖宋史樂志打毬樂隊四色窄袖羅襦繫銀帶裏順風脚簇花幞頭執毬杖又儀衛志毬杖金塗銀裹又錄異記蘇校書善製毬杖外混於衆內潛修真每有所闕卽以毬杖干於人得酬金以易酒按以杖打毬唐以前不見據錄異記不惟宮中用杖社會亦用杖蓋鞠戲又變矣至以杖擊鞠之狀後人亦無從懸揣祇酉陽雜俎云章行規少時行城西日暮風雨忽至乃下馬負一樹見空中有電光相逐如鞠杖以是見鞠杖旋轉飛舞如空中電光也又云某多力趨鞠高至半塔想見打球之高至清以杖打毬之法又失只學校網毬以拍打毬甲乙往來擲打中隔以網落地者負宋之毬杖或亦類是歟

按毬戲自清以來卽失傳鮮有能之者後學校興毬戰起其技術規則皆傳自泰西其器亦購自泰西而中國固有之蹴鞠法無能之者然天下大矣未必果失傳也大力者登高一呼必有應者至中國舊法所製之毬果加研究必能適用且工省價廉亦杜塞漏卮之一也

彈棊之戲古蓋未有物原云劉向作彈棊庾信象戲賦注云彈棊之制始自漢成帝帝好蹴鞠羣臣以爲

彈棊 古戲失傳之二

過勢。帝曰。可用其意同者以爲代。劉向乃作彈碁以獻之。是此戲確起於西漢。劉義慶世說。謂彈碁始自魏宮內爲妝奩戲者誤也。

某數及某局形狀

後漢書梁冀傳。善彈碁。注引藝經曰。彈碁兩人對局。以白黑各六枚。先列碁相對。更先彈也。局以石爲之。方五尺。中心高。又蔡邕彈碁賦。豐腹斂邊。中隱四企。是兩人對局。各用碁六枚。或黑或白。局必以石者。取其滑而易行。若木則澀也。中心高故曰豐腹。腹高故四邊下斂而低。隱者隔者。中高故兩邊子相隔不相見。企者仰視。四邊低。故仰望中心也。李義山詩。玉作彈碁局。中心最不平。必不平者。欲因難見藝也。故魏文帝最擅名。此某數及某局之概略也。

彈碁規則勝負及其巧妙

世說魏文帝善彈碁。用手巾角拂之。無不中。有客自言能。帝使爲之。客箸葛巾角。低頭拂之。妙踰於帝。是可證兩人對彈。以我碁中彼碁則勝。兩人皆中。中多者勝。否則負。又藝經云。列碁相對。更先彈之。是又可證。彈時互爲後先。如此次甲先彈。再則乙先彈也。然彈局中心隆起。用力猛則超過不能中。緩則難越凸坡。仍不能中。又兩邊碁子爲中心隱隔。雖相直而不相見。彈中尤難。故蔡賦又云。不遲不疾。如行如留。放一敵六。功無與儔。皆言其善彈。惟所謂放一敵六者。已不能詳其故。又梁簡文彈碁論。有完五全六八反。

四角之說尤不能解然則其概略雖得其詳細節目則無從盡得也。

彈碁至宋已失傳

中國古藝術一亡於五胡亂華再亡於唐末五代之亂至宋而僅存者更亡於蒙古如彈碁小技唐末猶能見於李義山之吟詠乃至宋而失傳老學菴筆記云呂進伯作考古圖謂古彈碁局如香爐蓋謂其中隆起也李義山詩玉作彈碁局中心最不平今人多不能解以進伯說考之粗可見然恨其藝之不傳也云云今遍加考索義山詩能解矣而蔡賦及梁簡文所論仍不能盡通則欲復其術無由也。

鬪草 古戲失傳之三

漢以前亦不見物原云始於漢武荆楚歲時記五月五日四民並蹋百草有鬪百草之戲又歲華紀麗端午結廬蓄藥鬪百草纏五絲在唐時爲最盛劉賓客嘉話云謝靈運美鬚臨死日施爲南海祇洹寺摩訶像鬚唐中宗朝安樂公主五日鬪百草欲廣其物令馳騎取之又恐爲他所得因剪棄其餘由此徵之名爲鬪草實所鬪不祇百草蓋以物罕而類多爲他人所無者爲勝是以劉禹錫詩云若共吳王鬪百草不知應是欠西施昌黎城南聯句蹙繩覲娥婆鬪草擣璣珵杜牧詩鬪草憐香蕙簪花間雪梅吳融詩數錢紅帶結鬪草舊裾盛范成大青枝滿地花狼籍知是兒童鬪草來司空圖明朝鬪草多應喜剪得燈花自掃眉是無論男女兒童皆爲之至宋仍盛蘇轍夫人閣詩尋芳空茂木鬪草得幽蘭晏幾道詞鬥草贏多

裙欲卸周必大詩陌上花開人門草甕頭酒熟客傳觴惟觀各家吟詠不必五月五日似爲之於春日者多婦女兒童尤多壯夫爲者似少也然其詳細規則輸贏節目究以品類多爲勝乎抑以物罕爲貴乎祇兩人爲抑多人亦可爲乎既名鬥草如謝鬚非草附於草上爲草之點綴品乎抑鬚徑爲一草乎今則茫然矣

藏鉤 古戲失傳之四

辛氏三秦記漢昭帝母鉤弋夫人手拳而有國色先帝寵之世人藏鉤之戲法此也又宋書符瑞志漢武趙婕妤家在河間生而兩手皆拳不可開武帝巡幸河間望氣者言此有奇女子氣召而見之武帝自披其手卽時申得一玉鉤由是得幸號拳夫人由是漢世有藏鉤之戲又周處風土記義陽臘日爲藏鉤之戲分爲二曹以校勝負若人偶卽敵對人奇卽奇人爲游附或屬上曹或屬下曹名爲飛鳥以齊二曹人數一鉤藏在數手中曹人當射知所在一藏爲一籌三藏爲一都按李義山詩隔座送鉤春酒暖分曹射覆蠟燈紅送鉤卽送至曹中使藏也藏在上曹卽下曹射之在下曹卽上曹射之二句詩全詠此也又採蘭雜志古人以每月十九爲下九每值九置酒爲婦人歡至夜爲藏鉤諸戲有忘寐達旦者又酉陽雜俎成式嘗於荊州藏鉤每曹五十餘人又云藏鉤剩一人來往於兩朋間謂之餓鷗想見古人宴會之樂也

射鉤之巧法

酉陽雜俎舉人高映善意彊十中其九同曹鉤亦知其處當時疑有他術訪知映言但意舉止辭色若察囚視盜也又山人石旻尤妙打彊與張又新兄弟夜會張藏鉤於巾屨中旻曰盡張空拳左眼有頃鉤在張君幞頭左翅中惟所謂鉤者今已不知其形式藏而射得其賞罰若何又所謂游附許射鉤否其細則今更不能知

格五 古戲失傳之五

漢書吾丘壽王傳年少以善格五召待詔蘇林曰博之類不用箭但行梟散劉德曰格五某行簎法曰簎白乘五至五格不得行故云格五師古曰卽今戲之簎也按莊子駢拇篇問穀奚事則博簎以遊注引吾丘壽王善格五待詔卽博簎也是格五之戲自戰國已行又後漢書梁冀傳善格五注引鮑宏簎經云簎有四采簎白乘五是也至五卽格不得行又說文行某相簎謂之簎亦格五也觀師古注可證格五至唐猶盛行惟其詳較彈某尤不明了觀各家注似祇行某不擲投而蘇林所謂不用箭但行梟散簎經以簎白乘五爲四采皆莫知其義又至五而格勝負如何亦無及之者蓋其亡尤久也

博 古戲失傳之六

世本桀臣烏曹作博是此戲起於夏時乃至宋而失傳宋李易安打馬圖序云長行葉子博塞彈某世無傳者是自宋博已失傳故古人所言有絕對不能解者蓋博之事甚複雜而歷代有改變又古人所爲各

經祇詳器具不詳規則故能知其粗迹不能悉其細目

博之定名

古博亦用碁故後人往往謂博卽弈宋孫奭孟子弈秋疏解弈字云論語陽貨第十七不有博奕者乎而解弈爲博也云云此實大誤查論語博奕不惟何宴注未以弈爲博卽邢昺疏亦祇云博六箸十二碁也古者烏曹作博圍碁謂之弈云云亦未以弈爲博此等誤解皆由博用碁而起故疑博與弈碁爲一事豈知左傳曰弈者舉碁不定不勝其偶公羊傳南宮長萬與閔公博博自博弈自弈判然兩事安得以論語並舉遂疑爲一事乎

在漢以前皆曰六博因每人投六箸行六碁以箸碁爲主而得名也在漢以後曰樗蒲曰五木以五投爲主而得名也

博具考

箸碁 五木

楚辭云琨蔽象碁有六博此王逸注投六箸行六碁故爲六博也蔽簿箸琨蔽者以玉飾之也又說文籀局戲也六箸十二碁後漢書注引博經云用碁十二六碁白六碁黑故古皆云六博戰國策臨淄甚富其民無不六博踢鞠史記滑稽傳六博投壺易林野鳥山雀來集六博晉書張重華傳六博得梟者勝徐陵玉臺新詠序爭博齊姬心賞窮於六箸似以碁箸爲主要具而名之也

自博變爲樗蒲。六博之稱較少。多名曰樗蒲。漢馬融有樗蒲賦。樗蒲者博之變名。而五木最重。樗蒲經云。古者烏曹作博以五木爲子。山堂肆考云。樗蒲以五木爲子。晉書劉毅傳。喝五木成盧。世說桓溫厲色擲去五木。國史補用骰五枚擲之。李習之集有五木經注云。樗蒲古戲。其投有五。以木爲之。故呼爲五木。是以五木爲樗蒲主要具。而名之也。然則箸也。某也。五木也。習博之重要具。故緣以得名。茲分述其形象如下。

箸之形象後又名箭矢策子

西京雜記。許博昌善陸博。竇嬰好之。相與游處。法用六箸。以竹爲之。長六寸。徐陵玉臺新詠序。爭博齊姬。心賞窮於六箸是也。亦名曰箭。列子擊博樓上。其箭長五寸。其數六。漢書吾丘壽王傳。格五注云。六博之類不用箭。是可證。博必用箭。箭卽箸也。後亦名曰矢。晉書胡貴妃傳。嘗與帝樗蒲。爭矢傷帝指。五木經云。矢百有二十是也。亦名曰子。國史補云。法三分其子爲三百六十是。子卽矢。矢卽箭。箭卽周秦之箸。名雖變。而用則同。蓋戲時得若干彩。卽投若干箸。以爲標識。五木經云。皆玄曰盧。厥策十六。注云。十六策者。行馬時便以此數矢而隔之。是可證得。盧卽投十六矢以爲志。又以證五木經之策卽矢也。

某之形象

酉陽雜俎云。依六博某形。頗似枕狀。說苑荀息曰。臣能累十二某子。加九卵其上。南史王僧虔傳。臣能累

博基十二不墜。夫基上可加卵。其大可知。至晉唐則曰馬。世說袁耽投馬絕叫。國史補人執六馬。五木經馬策二十。厥色五。凡擊馬及王采皆又投注云行馬。古者人用六基。故曰行六基。此云人執六馬。云行馬實一物也。

五木形狀

五木經云。樗蒲五木判玄白。注其投有五。故呼五木。初以木爲之後。以牙角判半也。合其五投。並上玄下白。故曰玄白判。又云。厥二作雉。背雉作牛。注取二投於白上。刻爲鳥。背鳥皆刻牛。國史補云。其骰五枚。分上爲黑。下爲白。黑者刻二爲牛。白者刻二爲雉。夫所謂骰五枚者。卽五木也。五投也。依五木經。雉牛相對。見二牛。卽不見二雉。見二雉。卽不見二牛。依國史補不必相對。不相對則可全見。然十采之中。並無二牛。二雉同見者。知五木經是國史補非也。

博關

以上博具。曰箸。曰箭。曰矢。曰策。曰子。爲一物。曰基。曰馬。爲一物。曰五木。五投。五骰。音頭爲一物。尙有一物。蓋施於局上者。曰關。五木經云。矢百有二十。設關二間。矢爲三。注云。間別也。刻木爲關。彫飾之。每聚四十矢。又馬出初關。非王采不出關。國史補云。法三分其子。爲三百六十。限以兩關。人執六馬。關之用。不見於他書。五木經雉牛注云。雉牛逢敵必鬥。雖矢馬關亦皆角逐。以關與馬矢並。其重可知。觀經云。馬出初關。非

王采不出關似關所以防遏行馬非擲得貴彩馬行不能出也。

采名考

采名亦曰博齒。楚辭呼五白些。王逸云：五白博齒也。晉書葛洪傳：不知棋局幾道，樗蒲齒名列子樓上。博者射明瓊。注：明瓊今之投子。初以木後飾以玉，故曰瓊。又鮑宏博經：所得頭謂之瓊。瓊有五采，頭者骰也。投也三字音同，故互用也。皆博齒也。世說桓公與袁彥道樗蒲，彥道齒不合。宋史張昭遠傳：一擲六齒皆赤，是可證木之頭刻有采名，視采名以定勝負，以其頭類齒，故亦曰齒名也。

齒名言人人殊。惟五木經及國史補相同，且甚詳悉。樗蒲經云：有雉梟雉犢，爲勝負之采。博經云：瓊有五采，刻一畫者謂之塞，二畫者謂之白，三畫者謂之黑。一邊不刻者，五塞之間，謂之五塞。山堂肆考云：有梟盧雉犢塞，爲勝負之采。博頭有刻梟形者，爲最勝。盧次之，雉犢又次之。塞最下。二經之言太略，肆考以五采若全刻於五木者尤誤。全黑爲盧。自六朝及唐皆如此。盧之反卽五白，非刻於梟頭。肆考以五采當五木，全屬想像之詞。

五木經云：樗蒲五木玄白判。厥二作雉，背雉作牛。注：以雉犢爲彩者，謂其悍戾，逢敵必鬪，以求勝也。雖矢馬鬪，亦皆角逐，防遏之義也。王采四盧白雉牛，毗采六開塞塔禿擗。注：毗賤也。采義未詳，全爲王駁爲毗。皆玄曰盧。厥筭十六皆白曰白。厥筭八雉二玄三曰雉。厥筭十四牛二六投矣。依國史補改。

白三曰犢。

厥筭十雉一牛一各本皆作二
依國史補改白三曰開厥筭十二雉如開厥餘皆玄曰塞厥筭十一雉白各二玄一曰

塔厥筭五牛玄各二白一曰秃厥筭三白二玄三曰撮厥筭二

國史補云其骰五枚分上爲黑下爲白黑者刻二爲犢白者刻二爲雉擲之全黑乃爲盧其彩十六二雉三黑爲雉其彩十四二犢三白爲犢其彩十全白爲白其彩八四者貴彩也開爲十二塞爲十一塔爲五禿爲四梟爲二撮爲三

二書所言彩名彩數皆同惟五木經以犢爲毗采第六國史補以梟爲賤彩第五爲小異耳

其齒名見於漢前者曰梟韓非子戰國策言之曰五白楚辭言之尙有一齒見於列子列子樓上博者射明瓊張中反兩犢魚而笑注犢魚骰采之名漢以前齒名可考見者祇如此若盧雉等名皆起於漢以後漢以前有無不敢定至犢魚祇列子言之漢以前亦少見梟與五白至唐仍存梟之用前後雖殊五白則今古皆貴以是二者爲最久矣

以上所述者曰箸曰棗曰馬曰關曰五木曰骰皆博具也曰梟曰五白曰犢魚漢以前所見之博齒名也曰盧白雉牛四貴采曰開塞塔禿撮梟四賤采漢以後博齒名也博具既明然後其戲法可得而述

對局人數

公羊莊十三年南宮長萬與宋閔公博史記吳王濞傳吳太子侍皇太子博爭道不恭皇太子引博局提

殺之。信陵君傳。公子與魏王博。博經六槩白。六槩黑。是皆以二人對局也。楚辭分曹並進。逍相迫。些王逸注云。言分曹列耦。並進技巧。投箸行槩。轉相遁迫使。不擇行也。是人可多。但分爲兩曹。故云列耦也。故世說桓溫請袁耽代戲。二人齊叫。袁旣擲。桓卽不擲。敵家頃刻失數百萬。是仍兩人對局。但桓與袁爲曹耦。與楚辭同也。至東晉末。則可多人共局。晉書劉毅傳。在東府聚樗蒲。餘人皆得犧。毅後擲得雉。劉裕最後又得盧。是共局在三人以上。至唐則可五人對局。五木經云。馬策二十。厥色五。注大率戲時。不過五人。五色者各辨其所執也。國史補所謂人執六馬也。是共局可五人也。

古得梟則倍贏食子

楚辭成梟而牟。注牟倍勝也。史記魏世家。王獨不見博之所以貴梟者。便則食。不便則止矣。正義云。博頭有刻爲梟形者。擲得梟合食其子。若不便則餘行也。是得梟則倍贏可食他人子也。子卽箸卽矢也。惟戰國策云。夫梟某之所以能爲者。以散某佐之也。夫一梟之不勝。五散亦明矣。又焦氏易林云。三梟四散。主人勝客。今皆不能通其義。

然旣勝則殺梟

韓非子。齊宣王問匡倩曰。儒者博乎。曰不也。博貴梟勝者必殺梟。是殺所貴也。儒者以爲害義。故不爲也。又家語。儒者不博。爲其兼行惡道故也。按梟爲惡鳥。故古人多方殺梟。然博得梟則勝。旣勝而殺之。過河

拆橋於義有害。行害義之事是行惡道也。故不爲。然梟如何殺其規則則不能詳。

自漢至西晉仍貴梟。漢張衡傳咸以得人爲梟。注猶六博得梟勝。又晉書張重華傳謝艾曰：梟邀也。六博得梟者勝。今梟鳴牙中。尅敵之兆。是自漢迄西晉仍以梟爲勝采。

東晉貴盧雉唐以梟爲最賤

晉書劉毅傳。喝五木成盧。世說桓公樗蒲失數百斛米。求救於袁耽。耽在艱中。便云大快。我必作采卿。但大叫卽脫其衰服。共出門去。旣戲袁形勢呼袒。擲必盧雉。二人齊叫。敵家頃刻失數百萬。是時已以盧雉爲上采。蓋樗蒲以盧雉爲最貴。不貴梟。故自樗蒲興而盧雉之名大著。梟名遂寂。而呼盧喝雉之聲訖。唐尚盛。杜甫詩咸陽客舍一事無。相與博塞爲歡娛。憑陵大叫呼五白。袒跣不肯成梟。盧韓愈詩梟盧叱迴旋。以梟與盧並。仍沿古稱。詩歌用故事。則然耳。實唐時以梟爲賤采中之賤者。前采名節已詳之矣。

盧雉牛白四王采等級攷

晉唐貴盧雉。然盧雉二采。又孰勝乎。是亦規則之一也。考南史宋武帝與顏師伯樗蒲。帝得雉大悅。後師伯得盧。帝失色。師伯遽歛手曰。幾得盧。是可證盧勝雉。故帝失色也。又貴采中之牛。較盧雉又孰勝。考晉書劉毅傳。後在東府聚樗蒲。大擲一判贏至數百萬。餘人竝黑犢。惟劉裕及毅在後。毅次擲得雉。大喜。褰衣繞牀叫曰。非不能盧。不事此耳。裕因接五木久之曰。老兄試爲卿答。旣而四子俱黑。一子轉躍不定。裕

厲聲喝之卽成盧焉。是可證雉不如盧。犧不如雉也。

又五白在古爲最貴。雖梟不如楚辭成梟而牟呼五曰些。注梟二爲珉采。牟勝也。勝梟必五白。是敵人成梟故呼五白以求勝敵人。見朱子集注。與王逸注異。

蓋自六朝以來。盧爲最貴。無能上之者。故南史李安人討晉安王勛所向克捷。事平明帝大會新亭樓。勞諸軍主。樗蒲官賭。安人五擲皆盧。帝大驚。驚其得采。之最上。可證此時五白絕不能勝盧。又五木經述王采曰。盧白雉牛。以五白居第二。國史補述貴采曰。盧雉牛白。以五白第王采之末。若證以劉毅傳及南史。則五木經非國史補。是何者。毅傳明言盧最貴。雉次之。犧又次之。可證犧之下方爲五白。若如五木經之次序。雉之上尚有五白。有盧。何爲大喜乎。此確證也。杜甫云。憑陵大叫呼五白。用楚辭耳。非最上采也。

各項規則考

國史補云。三分其子三百六十限。以兩關人執六馬。其骰五枚。貴采得連擲。得打馬。得過關。餘采則否。

五木經云。矢子百有二十。設關二間。矢爲三。

注每聚四十矢。凡擊馬及王采皆又投。註擊馬謂打敵人子也。打子得售王采自專。故皆許重擲。王采

累得累擲之變則止。

馬出初關疊行。

注謂逢可以疊馬。卽許疊也。如不出。故用王入坑有謫。

注其所罰隨所約並輸合坐。行不擇策馬。一矢爲坑。

注謂矢行致馬落坑也。亦有馬不可均融數奇而入坑者。

按入坑出坑爲國史補所未言。注云。名爲落坑。義在難出。故用王采能出云云。於一矢爲坑。及矢行致馬。

落坑之義。仍未釋明。致令人仍不能了解。蓋古戲具以博爲最複雜。有五骰又有箸矢。又有棊馬。其行。棋行馬。投箸。投矢。必有與五骰相關聯作用。而各書皆不詳。故今日雖能將博齒上之采名考究明晰。而其相關聯之點。仍不能詳悉也。所可悉者。對局時。憑陵大叫。喧嚷號呼數千年如一也。

若據劉毅傳。初時人皆得贖。毅得雉勝之矣。宋武帝後得盧。又勝劉毅。若今日之擲色子。全憑博齒判輸贏。似甚簡單。而又有關有矢。有馬。又甚複雜。其關聯之點。祇得王采可出關。可又投。可越坑。餘則不能知也。

古謂博有神嘗以此卜富貴

晉書慕容寶與韓黃李根等樗蒲誓曰。世云樗蒲有神。若富貴可期。願得三盧。於是三擲盡盧。袒跣大叫。又宋史張昭遠傳。少喜與里中惡少游。一日衆祠里神。昭遠適至。有以博投授之者。謂曰汝他日倘有節鉞。試擲以卜之。昭遠一擲。六齒皆赤。又李安人五擲皆盧。明帝大驚。劉毅擲得雉大叫。劉裕擲得盧。毅甚不悅。是皆以盧爲采。王得之於身命。有關。惟陶侃以爲牧猪奴戲。投之江中。毅然不惑。

古謂博主爲囊家。今之聚博徒賭者。謂曰局家。古則曰囊家。王得臣塵史云。世之糾率樗蒲博者。謂之公子家。亦謂囊家。樗蒲經云。一有賭兩人以上須置囊合。依條檢文書了。授錢入囊家。是古博徒條例。亦與今同也。

雙陸 古戲失傳之七

事始博陸采名也。六隻骰子皆六。朝野僉載。貝州潘彥好雙陸。泛海遇風。船破。左手持雙陸局。口銜雙陸骰子。二日不捨。是雙陸亦有骰子。惟用六。與樗蒲異。又樗蒲尚有馬。有箭。雙陸則有籌。集異記。則天命梁公與張昌宗雙陸。公就局則天曰。以何賭。公對曰。爭先三籌。賭昌宗所衣毛裘。疑所謂籌。卽樗蒲之箸。是蓋從博變通而爲者。又宋洪遵有譜。雙序云。弈棋象戲。家徹戶曉。至雙陸打馬葉子。視明瓊爲標的。非圖牒無以得彷彿。雙陸最近古。號雅戲。以傳記考之。獲四名。曰握槊。曰長行。曰婆羅塞。曰雙陸。蓋始于西竺。流於曹魏。盛於梁陳魏齊隋唐之間。

今觀其圖局上各列小杵十五枚。白與黑相錯。而下有門。疑卽樗蒲之關。小杵則所謂馬。所謂槊也。而北雙陸與南雙陸又微不同。至所謂打馬者。又與雙陸不同。李易安有打馬圖經。圖較雙陸尤複雜。而馬以能過函谷關爲勝。自宋以後。爲之者少。疑今日打馬。將是沿其名也。

弈棋 古戲僅存之一

左傳襄二十五年。今甯子視君不如。弈棋。弈者舉棋不定。不勝其耦。注。弈圍棋也。疏云。方言。圍棋謂之弈。自關東齊魯之間。皆謂之弈。說文。弈從卍。言竦兩手而執之。棋者。所執之子。圍而相殺。謂之圍棋。不勝其耦者。謂舉子下之不定。故不勝也。

後人以博用棋有白黑，有局有道，而弈棋亦有白黑，有局有道。於是誤以博弈為一事，豈知博弈祇十二六白六黑，弈棋則三百，以其多故能圍。若人執六棋，如何能圍，甚不同也。博物志云：堯作圍棋，教丹朱，或曰舜作教商均，世本云：桀臣烏曹作賭博圍棋，莫能定其原起。然左傳已言之，則其戲之古可知。若起於堯舜，至今已四千年，仍守而不失，毫無變易，則可慶也。

古棋局狀況及攻守之法

馬融圍棋賦三尺之局，分爲戰鬥場。先據四道兮，保角依傍緣邊，遮列兮，往往相望班。固弈旨云：局必方正，象地則也。道必正直，神明德也。棋有黑白，陰陽分也。駢羅列布，效天文也。四象既陳，行之在人。蓋王政也。又吳韋躍論所務，不過方罫之間。方罫者，棋道一縱一橫，故成方界形。然則古棋局形狀，正與今同，惟稍大耳。

按今圍棋先下四子於四角，白黑相錯，謂之四柱。卽孟堅所謂四象，旣陳馬融所謂先據四道也。此本無關係，故日本不著四柱子。中國必著者，遵古義也。日本雖不著，然前四子亦先據四角，與豫著者等也。中國古戲，祇此尙存原狀。又所謂保角依傍緣邊，遮列古著子法，亦與今同。邊角易活，易作眼，故爭據之。宋浮山禪師云：肥邊易得，瘦肚難求，亦謂此也。

古今棋局道數及棋子數目考

今棋局縱橫各十九道。若漢魏時則十七道。邯鄲淳藝經曰。棋局縱橫各十七道。共二百八十九道。白黑子各一百五十枚。共三百子。韋曜論。枯棋三百所。志一枰之上。是漢魏時枰爲十七道。至唐增爲十八道。柳子厚柳州山水記。其始登者得石枰於上。黑肌而赤脈。十有八道可弈是也。至宋時爲十九道。比漢時縱橫各多二道。五燈會元。歐陽文忠請浮山禪師以某說法。浮山云。縱橫十九路。迷悟幾多人。是其證。十九道則用子各一百八。共三百六十一子。蓋當期之日。故今日弈者算輸贏。皆以一百八十起算。山谷詩枯棋三百共一樽。仍沿韋曜語也。惟由十七道增至十九道。不知始於何人。尙待考也。

惟棋子有數百之多。故三國志記王粲觀人圍棋局壞。粲爲覆之。棋者不信。以杷覆局。另以他局爲之。不悞一道。以著其強記。若今日善弈者亦能覆局。然皆由下子時如何布局。如何攻守。無一子不嘔心瀝血。而來。故可覆其子。術淺者不能也。若粲則純以記憶得之。故罕有也。

古以兩眼爲活。一眼爲死之證。

鄭侯外傳云。方若棋局。圓若棋子。動若棋生。靜若棋死。至。如。何。生。如。何。死。古。書。均。不。言。其。故。惟。黃。山。谷。詩。云。湘。東。一。目。誠。堪。死。天。下。中。分。尙。可。持。言。祇。得。一。眼。則。棋。死。也。兩。眼。則。生。矣。又。馬。融。圍。棋。賦。離。離。馬。目。兮。連。連。雁。行。馬。目。卽。雙。眼。也。

凡圍棋爭一子可來回相殺。而刦敵人他處。使其不暇顧此。而我得復殺此子者曰刦。此法亦甚古。晉書阮簡爲開封令。有刦賊外白甚嚴。簡方圍棋長嘯。吏曰刦急。簡曰。局上刦亦甚急。此古亦打刦之證。

受子

凡兩人強弱不能相敵。則強者讓弱者一子或兩子或三四子。於未戲之先。先使著幾子於局上。名曰受子。此例於魏晉時不見。至宋則有之。荆公詩話蘇子瞻云。太宗時有賈元者。侍上棋。太宗饒元三子。元常輸一路。太宗知其挾詐。謂曰。此局復輸當撆汝。既而滿局不死不生。太宗曰。更圍一棋。勝賜汝紺。不勝當投泥中。既而局平。不勝不負。太宗曰。我饒汝子。是汝不勝。命抱投之水。乃呼曰。臣握中尚有一子。太宗大笑。賜以紺衣。

古圍棋皆賭物

吳韋曜弈論曰。或賭及財物。東坡志林張懷民與張昌言圍棋。書字一紙。勝者得之。負者出錢五百作飯。山堂肆考楊大年與西廳參政侍郎弈棋。輸紙筆硯三物。墨宣毫適盡。但送紙與端硯。是自三國時至宋皆賭物。惟所賭亦雅不似博之純以財也。

弈棋爲諸戲之王

凡戲皆取其熱鬧。圍棋則取其寂靜。凡戲皆用氣力。圍棋獨運心思。黃山谷云。心似蛛絲遊碧落。身如蜩

甲化枯枝可謂窮形盡相矣。故晉支公以爲手談。王坦之謂爲坐隱嗜之者多屬幽人精之者推爲國手。石幢花影古刹偏多夜雨秋燈書齋每有或疏簾清簟嘿爾旁觀或流水長松鏗然落響其韻味之冷靜幽僻絕非紈袴市井之所能領略故歐洲人絕不喜之扶桑國知其韻味至古今弈棋故事多不勝舉祇資談助無關考核因並略而不述焉。

象戲 古戲僅存之二

今日之象棋在古均名象戲。古所謂象棋皆以象牙爲飾猶象車象箸象牀也。說苑雍門子謂孟嘗君曰燕則鬥象棋而舞鄭女楚辭琨蔽象棋皆謂六博棋加以象飾也。蔡邕彈棋賦列象棋彫華麗則謂彈棋皆非象戲象之名始見於干寶搜神記記云巴邱人家有園橘大如益斗剖之有二叟象戲於其中然象戲情形晉時莫有詳者至周武帝作象戲經後人遂以爲武帝創也。

北周時象戲爲日月星辰

北史王褒傳武帝作象經命褒注引據賅博甚見稱賞同時庾子山承旨作象戲賦亦云臣伏讀象經是武帝創此戲並著象經以爲說明也。惟繹庾賦與今象戲迥不相同賦云局取諸乾仍圖上玄月輪新滿日暈重圓坤以爲輿剛柔舒卷若方鏡而無影似空城而未居是取象於天地日月也又云促成文之畫亡六龜之圖馬麗千金之馬符明六甲之符是取象於龜馬也又從月建而左轉起黃鐘而順行是又取

象於十二月順六律以行也。故宋李昉太平御覽云：象戲周武帝所造，而行棋有日月星辰之目，與今所爲不同。是可證周武之所造久已失傳。

唐象戲略與今同

牛僧孺玄怪錄寶應元年汝南岑順於呂氏故宅夜聞鼙鼓聲介胄人報曰金象將軍傳語與天那賊會戰順明燭以觀之夜半後東壁鼠穴化爲城門有兩軍列陣相對部位既定軍師進曰天馬斜飛度三止上將橫行擊四方輜重直入無迴翔六甲次第不乘行於是鼓之兩軍俱有一馬斜去三尺止又鼓之各有步卒橫行一尺又鼓之車進須臾砲石交下云云因發掘東壁有古塚有象戲局車馬俱焉。

按今日象戲橫九道豎十道中爲黃河河南北各五道兩家列陣相對每家有二車列於最下層之兩邊次爲兩馬次爲兩象次兩士將居中其橫第三道與馬相直者兩邊又各有一砲五卒列於第四道當中一隔一道左右各一又隔一道守邊卒各一牛僧孺所言天馬斜飛度三止者卽今所謂馬走日字角也輜重直入無迴翔者卽今車走直路也各有步卒橫行一尺者卽今步卒祇許行一道也砲石交下者卽今砲可隔子擊物也此唐與今同者也其微異者唐之軍師可發命令似今日之將然今日之士居將左右似亦可傳達命令不知唐之軍師卽今將抑卽今之士也至於今之將不許出城唐之將則橫行四擊今之將被虜則輸若能橫行四擊則不能被虜此其不同者抑唐時以軍師爲主另有上將乎又所謂鼓

今亦無之。知今之象戲又與唐微不同矣。

然牛僧孺所言乃古塚局。古塚既爲住宅。總須數百年。則其物爲六朝爲隋爲唐初不定也。至確爲唐時者。白居易詩云。鼓應投壺馬。兵衝象戲車。是唐戲有車有象有兵。大致與今同。惟鼓爲今所無。

宋有七國象戲

晁補之有廣象戲圖序。司馬光有古局象棋圖。其局分七國。王居中。秦居西方。楚韓居南方。東方齊魏。北方燕趙。一國用十一子。用各色爲別。可合從可連衡。後又有改爲三國者。不知始於何時。余幼時尙見有此戲。今則絕迹矣。

色子戲 古戲僅存之三

此戲創自宋朱河。後訛爲猪窩。李易安打馬圖序。所謂猪窩族鬼鄙俚不堪者是也。卽今之擲色子。朱河則名曰除紅。有譜。楊維楨有除紅譜序。除紅者以一紅爲主。而餘三爲客。取象於徑一圍三。據其凡例。凡除紅以四骰。音頭擲之。以四紅爲主。除一四紅。但以餘五色計之。自八點以下。皆爲罰色。十三色以上。俱爲賞色。俱不必賽。自九點以至十二點。俱爲賽色。凡賽色點數相同者。謂之趕上。賞一帖。凡賽色多一點者。謂之壓倒。賞二帖。少二點三點者。止罰一帖。

按今之擲色子。用三骰。宋則用四骰。子一點及四點皆紅色。餘皆黑色。宋則四點爲紅色。餘則分五

色。今骰除二骰點相同者餘一骰若爲一點則罰。亦爲一點則勝。爲六則賞皆不賽。宋則除四紅一骰。計餘三骰之點八以下輸。十三以上贏。皆不賽。今骰自二點至五點皆賽。宋則自九點至十二皆賽。今賽色只趕上卽贏。宋則分等級。今骰三骰點相同名曰報子。皆贏。宋骰四骰點相同亦贏。惟今骰擲得一二三。名猪尾。二三四名蹭。皆輸。三四五名花。三五四五五六名大順。皆贏。皆不賽。則除紅所無也。蓋此戲純取古六博中之五投變化用之。惟博齒祇用兩頭。此則用六面耳。

牙牌 古戲僅存之四

今之牙牌戲最盛行。曰推牌九。曰打天九。曰頂牛。賭博用之。曰牙牌神術。卜筮用之。而推牌九最盛。豪富之家。至一推數十萬。實其戲甚不古。宋始有也。

諸事音考云。宋宣和二年。有臣上疏設牙牌三十二扇。共計二百二十七點。按星辰布列之位。譬天牌三扇二十四點。象天之二十四氣。地牌二扇四點。象地之東西南北。人牌二扇十六點。象人之仁義禮智。發而爲惻隱羞惡辭讓是非。和牌二扇八點。象太和元氣。流行於八節之間。其他名類。皆合倫理。庶物器用。表上貯於御庫。疑繁未行。至高宗時。始詔如式。班行天下。以是證宋以前未有。惟當時祇說明造牌意義。至其用法。並未分疏。至高宗時。且班行天下。疑非純用於戲者。如純爲戲具。下詔班行。雖荒淫之朝。無此政體也。

鬥鷄

鬥鷄之戲最古。紀渢子爲周宣王養鬥鷄。見於列子。左傳季郈之鷄門。郈氏介其鷄。季氏爲之金距。注。擣芥子。播其羽也。或曰以膠沙播之爲介鷄。是等求勝之法。爲後來所未覩。史記袁盎傳。盎與閭里相浮沈。鬥鷄走狗。後漢梁冀傳。好鬪鷄走狗。唐李林甫傳。在東都爲擊毬鬪鷄戲。五代史王彥章曰。亞次鬪鷄小兒耳。是自周迄五代。皆尙此戲。至鬪鷄之時。則以清明節爲最盛。東城父老傳。唐明皇在藩邸時。喜民間清明鬪鷄。故韓愈鬪鷄聯句云。天時得清寒。地利喜爽壇。清明正清寒之時。最宜此戲也。宋元以後。此戲漸稀。今遂絕迹。至臂鷹走狗。歷代有之。皆弋獵之事也。

古捕蟬戲

呂氏春秋。燭蟬者。務在明其火。振其樹而已。火不明。振柳何益。按今之捕蟬者。於黑夜置籠燈樹下。而撼其樹。蟬受震向燈而飛。因捕之。而周時即如此行之數千年。此用火捕蟬也。淮南子謂之耀蟬。

又莊子仲尼適楚。出於林中。見荷儻者承蜩。猶掇之也。孔子曰。巧乎。曰。吾執臂若槁木之枝。天地之大。萬物之多。而唯蜩翼之知。吾不反側。不以萬物易蜩之翼。何爲而不得。注。以竿黏蟬曰承。按今日仍有以竿黏蟬者。法以蠟膠黏於竿頭。或黏鳥。或黏蟬。潛以竿拂之。黏其羽。卽得此。以竿黏蟬也。

蓋自古小兒最愛蟬。論衡充爲小兒。與儕儈遨戲。儕儈好掩雀捕蟬。充獨不肯。以小兒愛蟬之故。因常有。

捕蟬入城市售賣者清異錄唐世京城遊手夏月捕蟬貨之唱曰只賣青林樂婦妾小兒爭買以籠懸窗戶間亦有驗其聲長短爲勝負者謂之仙蟲社是自周秦迄漢唐皆以蟬爲戲至於今不改其樂。

卷四十一

行唐尙秉和著

古家庭狀況

食飯次數

莊子適莽蒼者三餐而返。腹猶果然是。每日三餐之證也。又戰國策士三食不饜。而君鵝鷺有餘食。三食者三餐饜飽也。故陸游詩疾行逾百步。健飯每三餐。三餐者一晨餐。詩朝食于株左。傳我姑剪滅此。而後朝食。世說羊孚與謝益壽相好。常早往謝許。未食俄而食下。是晨起早餐也。蓋古人皆鷄鳴而興。若至日出則爲宴起。故晨時須飯。彼韓昌黎答東野詩。朝餐動及午。夜吟恆達卯。狀東野之貧困慵懶耳。非朝餐至午始食也。又呂氏春秋云。旦至食亦其證也。

一中餐。漢書淮南王傳。帝使爲離騷傳。旦受詔日食時上。言晨受詔至日中午飯時。書已成而奏上也。又蕭望之傳。太官方上晝食。又宋書江夏王義恭傳。諸王食皆五盞盤。義恭恃寵。常求須菓食。日中無筭。音得未嘗噉。夫所謂午飯晝食。日中菓食。皆中食也。卽周禮天官膳夫所謂燕食也。燕食者。鄭玄云。謂日中與夕食。又五燈會元黃山谷晨粥午飯。是自周至宋朝食午食未嘗改也。

一。晚餐。戰國策。晚食以當肉。南史齊明帝紀。帝性儉約。大官進御食。有裹蒸。帝十字畫之曰。可四片破之。餘充晚食。又唐薛用均集異記。及家暝矣。入門方見其親與弟妹張燈會食。又唐書柳玭傳。戒子孫曰。先君非速客。不二羹。裁夕食。乾葛瓠而已。又說苑趙簡子曰。吾門客千人。朝食不足。暮收市征。暮食不足。朝收市征。是皆晚食之證。晚食近睡。故柳玭先人只乾葛瓠而止也。又五燈會元。黃山谷。晨粥午飯。過午卽不食。不食晚飯也。佛律也。

古人早起

內則子事父母。鷄初鳴。咸盥漱。婦事舅姑。鷄初鳴。咸盥漱。以適父母舅姑之所。又男女未冠笄者。鷄初鳴。咸盥漱。昧爽而朝。又凡內外鷄初鳴。咸盥漱。衣服斂枕簟。洒掃室堂及庭。布席各從其事。唯孺子早寢。宴起。唯所欲。食無時。又文王世子。文王之爲世子。朝於王季。日三。鷄初鳴而衣服至於寢門外。是周初皆鷄鳴而起也。至春秋時。趙武。晨興將朝。尙早坐而假寐。見於左傳。鷄既鳴矣。朝既盈矣。又三歲爲婦。靡室勞矣。夙興夜寐。靡有朝矣。朝如此。見於毛詩。其早起。仍與周初同。此等習慣。歷六朝訖。唐不改。宋書后妃傳。江穀讓婚表云。召必以三哺爲期。遣必以日出爲限。夕不見晚魄。朝不識曙星。言公主必日出方令起。故不識曙星。斯可證。不爲駢馬者。皆戴星而起也。又玉泉子。鄭餘慶罷相間居。一日召郎舍會食。衆以鄭公望重。平旦皆集。又幽怪錄。杜陵韋固少孤。思早娶。客有以前清河司馬潘明女爲議者。來日期龍興寺。

門旦往斜月尚明。按今日京朝官請客早餐。若平明旦者明也。卽往。豈不可笑。卽有事與友人期明朝相見。亦豈能戴月而往。而唐時不爾者。以社會習慣皆早起也。雖所言皆士大夫家。然士夫如此。農商可知。今無論士人。卽鄉舍農人。祇農忙時。可黎明起。若鷄鳴而起。除元旦一日外。他無有也。此亦民氣朝暮之一證也。

晨起爲父母進盥洗狀況

禮內則冢子冢婦鷄初鳴咸盥漱適父母舅姑之所。問衣寒燠疾痛疴痒而敬抑搔之。進盥長者奉槃少者奉水。請沃盥。盥卒授巾。問所欲而敬進之。嘗而後退。此成人且有室者之責也。若男未冠女未笄者。亦鷄鳴起昧爽而朝。問何飲食矣。若已食則退。若未食則佐長者視具此。只贊助長者事親而非其專責。若再幼而爲孺子。則不必早起。唯所欲也。

古浴身詳狀

禮玉藻。浴用二巾上。繸下給出杆。音零履。蒯席連用湯。履蒲席。衣布。晞身乃履。進飲。按繸精故用以拭上身。絿粗故用以拭下身。出杆者出浴盆也。蒯草澀可刮垢。故履之。連用湯者。再以湯淨身也。身淨履蒲席衣布。以俟身燥而進履。凡浴後必渴。故進飲。

古沐浴面洗足次數

內則五日則燬湯請浴。三日則燬湯請沐。其間面垢燬潘請礪面足垢燬湯請洗。

按浴浴身也。沐沐頭上髮也。古人留髮上覆以巾易垢膩故至三日必沐。沐後當風晞髮使乾。其詳盡在首服中。若浴身則可少緩。故五日爲之。其間者三日五日之間也。潘者米汁。燬者溫也。言日日洗面及足。不似沐浴之隔三日五日爲之也。

古今沐浴去垢法之變遷

周時洗衣以灰水。內則衣垢和灰請澣是也。沐髮礪面則以米汁去垢。內則沐稷而礪梁是也。至漢仍用米汁。史記外戚傳。丐沐沐我注沐米潘也。潘卽米汁。左傳使疾而遺之潘沐是也。至晉有澡豆見于世說。然以王敦之貴尙不識爲何物。竟以爲飯倒著水中而飲之。可見世俗尙無此物。至唐陸暢娶貴人女亦不識澡豆。沃水服之以爲食辣麵。見酉陽雜俎貶誤門。至宋王荊公面黑。夫人爲置澡豆。荊公不用。是唐宋時洗面用澡豆者仍少。第古之所謂澡豆與後世異。王敦以爲乾飯而飲食之。陸暢則以爲食辣麵。是唐與晉亦異。然究爲何質。造成作何形狀。今已不能揣知。又以證石鹼之發明最晚。說文雖有鹼字。皆詰作鹵。本草綱目始言山東濟甯出石鹼。可澣衣蓋在明時至清遂有鵝胰猪胰肥皂等名。去垢之劑遂大備矣。

古人精神最活潑。其男子至歲時伏臘則游戲娛樂。女子亦然。社日停鍼線。端午鬪草藏鉤。既詳於時節。游戲各門中。乃漢時婦女每月復有二日爲嬉戲確期。漢焦仲卿妻詩云初七與下九。嬉戲莫相忘。下九者。據採蘭雜志云。九爲陽數。古人以二十九日爲上九。初九日爲中九。十九日爲下九。每月下九置酒爲婦人之歡。名曰陽會。蓋女子陰也。待陽以成。於是夜爲藏鉤諸戲。有忘寐達曙者。

據是證。每月十九日爲下半月嬉戲之期。前半月嬉戲期則初七也。七亦陽數。此等取義頗似周人。疑仍周之遺俗。蓋婦女終歲炊爨紡績織布組紩。無日夜不工作。較男子尤勤苦。故於每月擇二日具酒食。息勞動。游戲歡娛。以酬其苦。焦仲卿爲廬江郡府小吏。並非富貴之家。乃亦如此。足證當時社會皆然。且以見古人調濟勞逸之妙用也。

古以牽牛娛小兒

左傳哀六年。鮑子曰。汝忘君之爲孺子牛而折其齒乎。而背之也。注。孺子茶也。景公嘗銜繩爲牛。茶牽之頓地折齒。按今日家人娛小兒之法。無所不至。而老人爲之者少。齊景公生荼之年。約已五十。乃猶銜繩爲牛。使小兒牽之。呼叱以爲戲。以是見古人活潑氣象。至老不息。

漢以來婦女皆學樂

古家家有樂器。不惟男子能奏樂。婦女尤人人能奏樂。故古家庭之樂。迥非後世可比。史記萬石君傳。石

晉對高祖曰。家有妹能鼓琴。漢書楊惲傳。家本秦也。能爲秦聲。婦趙女也。雅善鼓瑟。元后傳。相者言。政君當大貴。禁後父名心以爲然。教書學鼓琴。又司馬相如傳。卓王孫有女文君。新寡好音。相如以琴心挑之。夫琴者。至高之樂。而最難能。漢時婦女皆能之。觀焦仲卿詩。十三學織素。十四學裁衣。十五彈箜篌。十六學詩書。似學樂爲女子。一定課程。是以自魏晉六朝以迄唐宋。士大夫家庭。除本爲歌妓外。其夫人姬妾。或彈箜篌。或吹簫。或擫笛。或彈琵琶。見於詠歌及雜記者。不可勝數。自朱熹。女子無才便是德之說。興南宋元代。尙未受其影響。及至有明。方孝孺。胡廣等。本朱熹之說。演而爲嚴氣正性。於是家庭音樂。不爲女子。能之。視爲不正。卽士夫能之。亦目爲不材也。而古人活潑性情。節調勞逸之妙用。全失而反響。遂生爲孔聖。唯一之罪人。

古育嬰方法

禮內則。子生男子。懸弧於門左。女子設帨於門右。三月之末。擇日剪髮爲髻。注髻遺髮也。疏所留不剪也。又子能食。教以右手。今仍教小兒。右手使箸。能言。男唯女俞。六年教之數與四方名。七年男女不同席。不共食。八年出入門戶。及卽席飲食。必後長者。始教之讓。九年教之數日。注朔望六甲。十年出就外傳。居宿於外。學書記。衣不帛襦袴。注爲太暖傷陰氣。故溫。禮率初。朝夕學幼儀。請肄習簡諒。

按周時育嬰之法。大致與今同。惟幼儀必習。爲今日所忽略。蓋洒掃應對。古人爲小學。一定課程。所謂履

端於始禮慎厥初也。簡諒者注謂所書篇數猶今小兒寫仿影也。

古賀生兒

史記盧綰傳高祖盧綰同日生里中持羊酒賀兩家又世說元帝生子普賜羣臣此漢晉賀生兒也至唐尤甚撫異記明皇何后愛弛乘間泣曰三郎獨不念何忠脫紫半臂換斗麵爲生日湯餅耶湯餅者宋嬪真子云長命麵也人家生兒作湯餅會祝兒長生也按劉禹錫詩云憶爾懸弧日余爲座上賓舉筯食湯餅祝詞添麒麟又唐書李林甫舅姜度生子手書賀曰聞有弄麿之慶故東坡賀人生子詩云甚欲去爲湯餅客惟愁錯寫弄麿書用劉禹錫詩及林甫故事也又北史高澄尙馮翊公主生兒爲湯餅之會是湯餅之名六朝已有。

小兒束髮狀況

詩總角丱兮注總束其髮以爲兩角玉藻童子束髮朱錦蓋古人自幼留髮而髮皆上梳分左右束爲兩角使不下披此式最久至明皆如此也不以朱束髮必有服者。

試兒

顏氏家訓江南生兒一朞爲製新衣盥浴裝飾男則用弓矢紙筆女則用刀尺鍼縷並加飲食之物及珍寶服玩置之兒前觀其發意所取以驗貪廉智愚名爲試兒按此純爲迷信心理小兒何知視其物之可

喜者取之。自然之理。荀子云。今以百金與搏黍示小兒。小兒必取搏黍。棄百金何者可愛也。今以不可愛之物與珍玩並陳。則十九必取珍玩。胡能驗哉。然此法今仍有行之者。似不詳審也。搏黍者鳥名也。至育兒之法。玉藻云。童子不裘不帛。內則云。不帛襦袴。襦袴皆裏衣。帛則太暖。注云。傷陰氣實有至理。若裘則尤不宜。今富貴人家童子往往犯此而反不健。致疾因以害兒。

古屋內冬日取煖之法

木炭自周時有之。月令草木黃落。乃伐木爲炭。冬日卽燃以取煖。周禮天官宮人執燭共爐炭。左傳邾子自投於床。廢於爐炭。遂卒。是裝炭於爐可移徙取煖。亦有爲竈熾炭者。呂氏春秋衛靈公天寒鑿池。宛春諫曰。天寒傷民。公曰。寒乎。宛春日公衣狐裘坐熊席。陬隅有竈。是以不寒。又左傳昭十年。初元公惡寺人柳欲殺之。及喪。柳熾炭於位。將至則去。是於屋隅築竈以取煖。又熾炭於坐處。古席地。使地溫也。漢晉坐。使地溫也。漢晉洛中子弟作煉炭。以次起矣。

家庭捕鼠之歷史 周貓爲野畜

鼠爲害於家庭最烈。而古尤甚。古雖王家牆皆版築。無磚石。易作穴。古無貓。詩麌鹿嘵嘵。有熊有羆。有貓

有虎以猫與野獸並列足證周時猫尙爲野畜未馴爲家畜故蜡祭迎猫詩曰穹室薰鼠又曰洒掃穹室穹室者箋云鼠穴也又韓非子云社鼠燻之則焚木灌之則塗阤足見當時畏鼠之烈

周以狗捕鼠

古於薰灌之外則以狗捕鼠因捕鼠之故有以相狗爲專業者相其能與否也周禮秋官犬人凡相犬牽犬者屬焉呂氏春秋云齊有善相狗者其鄰假以買取鼠之狗期年乃得之畜數年而不取鼠以告相者相者曰此良狗也其志在麋鹿豕而不在鼠欲其取鼠也則牿之其鄰牿其後足狗乃取鼠又莊子徐無兒吾常相狗也又參同契狸犬守鼠又晉書劉毅傳既能搏獸又能殺鼠何損於犬是皆古以犬捕鼠之證也

以狸捕鼠

次則用狸狸者狐類詩幽風取彼狐狸爲公子裘是也微大於貓而能食貓貓見之則不敢動故貓亦曰狸奴其皮青黑而作波文無他色者法言所謂辨人狸別其文萃也故至今仍以爲裘性尤嗜雞鄉間名曰雞豹子後人因貓亦名狸奴輒疑狸卽貓者誤也本草云狸有數種有斑如貓而圓頭大尾者爲貓狸善羈雉鵠舊爲野獸在周時曾馴爲家畜用以捕鼠莊子驥驥驥驥一日千里捕鼠則不如狸牲韓非子令鷄司夜使狸捕鼠皆用其能說苑驥驥驥驥一日千里此至疾也然使之捕鼠曾不如百錢之狸是狸

能捕鼠故有賣者。又孔叢子孔子彈琴見狸訛字方捕鼠。又呂氏春秋以狸致鼠以冰致蠅雖工不能是皆以狸捕鼠之證。惟狸性凶很雖能捕鼠而害亦多故至漢卽不畜之。淮南子狸執鼠而不可脫同託於庭者爲搏鷄也。蓋是時馴猫之事已告成功故卽捨狸。

最後用貓

貓之馴爲家畜不知確始於何時。東方朔云飛鴻驛驅天下之良馬然用以捕鼠於深宮之中曾不如跛貓。是西漢時已以貓捕鼠再證以淮南子之不畜狸必是時馴貓之事已告成功。貓雖勇毅而性溫良畜之久而無弊故漢晉時雖甚少至唐時其族卒大繁遂爲家畜不可離之物與鷄狗同而狸復變爲野畜然在魏晉時殊不多見如世說魏武愛子倉舒蹙額憂鼠嚙其衣簡文帝對客有大鼠登牀謝虎子上屋薰鼠苦鼠之事見於載記者甚多而不言貴貓足證此時貓族孳乳尙未繁至唐則家有戶育妝樓記云貓一名狸奴張搏好貓一曰東守二曰白鳳三曰紫英四曰祛憤五曰錦帶六曰雲圖七曰萬貫每視事退至中門則數十頭曳尾延頸盤接而入唐書高宗王廢后傳我後爲貓武后爲鼠我當嚙其喉而韓愈有貓相乳記又俗以貓洗面過耳有客至見酉陽雜俎尤足徵社會皆有與今日同。

今人家偶無貓則鼠立猖獗以是知古風禍之烈乞之其鄰而宋黃山谷乞貓詩最馳名詩云秋來鼠輩欺貓死窺瓮翻盆攬夜眠聞道狸奴將數子買魚穿柳聘銜蟬又陸游贈貓詩裏鹽迎得小狸奴蓋護山房萬卷

書宋以後吟詠者益多。蓋自貓族大繁後而鼠禍立輕此亦家庭治安上之一大紀念也。

古婦人見男子則以帳自蔽

家語。孔子見南子隔幃聞環佩璆然風俗通。泰山太守李張舉六孝廉函封未發。張病物故。夫人於柩前下帷。見六孝廉。晉書謝道韞傳。夫弟獻之常與賓客談議。詞理將屈。道韞遣婢白獻之曰。欲爲小郎解圍。乃施青綾步鄣自蔽。申獻之前議。又會稽太守劉柳聞其名。請與談議。道韞素知柳名。亦不自阻。乃簪髻素襦。坐於帳中。柳束脩整帶。造於別榻。是自周迄晉。凡婦人見外客。皆以帳自蔽也。乃對家中男子。亦隔以帳。鄴洛鼎岐記。盧虔後妻元氏。升堂講老子道德經。虔弟元明隔紗帳以聽之。是嫂叔也。古嫂叔不親授受。則有之更隔以紗帳。不太拘乎。乃至唐婦人出入亦擁以幃。天寶遺事。寧王有樂妓寵姐善歌而色美。客不能見。李白醉戲曰。王何惜示于衆。乃設七寶花帳。召寵姐歌於帳後。又物怪錄。犧車入中門。白衣姝一人下車侍者以幃擁入。是又懼座上客及門外男子窺見也。

古家庭對於各項禽蟲之徵驗

西京雜記。樊將軍噲問陸賈曰。自古人君受命各有瑞應信乎。賈曰。有之。夫目瞤即眼跳。得酒食燈火華得錢財。乾鵠噪而行人至。蜘蛛集而百事嘉。小既有徵。大亦宜然。故目瞤則呪之。火華則拜之。乾鵠噪則餒之。蜘蛛集則放之。况天下大寶乎。又酉陽雜俎。猫洗面過耳有客至。

按猫洗面者。以舌舐其掌使潤。再以掌拭面使淨。過耳者拭面時過耳上也。乾鵠者蓋南方此本迷信之事。而家庭日所常有。每見猫洗面則曰有客。喜鵠鳴燈花結。喜蜘蛛下。則曰報喜。惟眼跳則惡之。與漢不同耳。

謂嘆噴爲人道之歷史

終風詩曰。願言則嘆。言夫不見禮。願言我而嘆也。鄭康成箋云。今俗人嘆云人道我。此乃古之遺語也。云可證。自周迄漢皆謂嘆噴爲人說我也。又漢藝文志雜占十八家三百一十卷內嘆耳鳴雜占十六卷。是嘆可占吉凶也。宋嬪真子云。俗說以人嘆噴爲人說。是宋時仍有此俗語。至今不息。家庭婦女只要嘆。卽云某人說我以無理俗語。三千年仍舊可謂久矣。

卷四十二

行唐尚秉和著

社會雜事

古以頭戴物歷史

孟子。斑白者不負戴於道路矣。斑白者言鬚髮白黑相間也。負以背負物。戴以頭戴物也。古敬老幼者於道路遇老者必代爲負戴也。又漢書朱買臣傳。買臣擔束薪行且誦書。其妻亦負戴相隨。是自周迄漢皆以頭戴物也。

按今中國人無以頭戴物者。惟高麗有之。凡中國人之以肩挑以背負者。無不戴之於頭。卽汲水之桶。挹水之盆。無論男婦。皆惟頭是賴。巍巍然不傾不欹。不溢不墜。中國人見之。反詫其能怪。其拙不知我古人盡如此也。然所以能平穩者。賴有一物。薦於頭上。又所戴之物。恆至百餘斤。亦須有物護持頭骨。使不受創。其物維何。則窯數也。

窯數者。據漢書東方朔傳。迺覆樹上寄生。令朔射之。朔曰。是窯數也。郭舍人曰。果知朔不能中也。朔曰。生肉爲膾。乾肉爲脯。著樹爲寄生。盆下爲窯數。師古曰。窯數戴器也。以盆盛物。戴於頭者。則以窯數薦之。今

賣白團餅人所用者是也。寄生者芝菌之類，淋潦之日，著樹而生，形周圓似窯數。

按寄生者夏日大樹雨淋後生耳，色白形圓中薄而窯數者或以瓶或以絮亦輪厚而中薄置頭上高低正平兩物之質不同而形則如一頭若戴盆薦於頭之上盆之下不惟頭不受創且能平穩故曰盆下爲窯數此所覆本是寄生，朔能射其形不能射其名初曰窯數此亦如管輶射柂爲梳之類及舍人說其不中朔乃提出寄生若曰非窯數卽寄生也宋劉敞不明文義反謂師古說不通最可笑也。

又楊惲傳鼠不容穴銜窯數也注益下之物有飲食氣故鼠銜之據是則以益盛飯或羹今以兩手舉者漢時盡以頭戴又據師古注今賣白團餅人所用者知唐時仍戴物也。

髮辯之歷史

中國自古髮皆上挽而夷狄髮皆下被左傳有被髮而祭於野者論語吾其被髮左衽矣禮記東方曰夷被髮文身西方曰狄被髮朱身是周時夷狄髮皆下垂被於項領至漢時稍進化則編髮漢書終軍傳殆將有解編髮削左衽而蒙化者焉西南夷傳自桐師以東北至葉榆名爲雋昆明編髮又晉書東夷傳肅慎氏俗皆編髮又宋史宗澤傳見編髮者盡誅之編髮卽髮辯是自漢迄遼金四夷皆髮辯然自五胡亂華拓拔魏遼金統中國北部蒙古更進而一統訖未能將編髮之風改易中國舊式自朱明亡滿人入關滿人卽肅慎氏之苗裔不惟將數千年衣冠制度盡行更革且強迫華人將頭髮四

周羅去留其中下垂編之被於背上此種醜態甚於髡刑因不樂從而被殺者至數千人而遺民若老舊臣因避此禍竄身海外隱匿於山陬海澨者不可勝數此一變也及至清末近三百年不惟愚民莫知其從來卽卿大夫亦頗忘其固有後學生赴外國留學髮辮垂垂外國人嗤之名曰豚尾學生歸來始述其醜不可言於是資政院議決許國民剪去髮辮然當時雖有詔令實卿大夫無一剪去者民國元年厲行剪髮凡官吏無一有辮者然髡者十八九無定式此又一變也

古敬老狀況

古最重老故國家有養老之禮見於禮經者甚詳因之社會亦敬老孟子斑白者不負戴於道路矣言民知禮讓行路時遇老人無論識與不識卽代爲負戴也又漢書食貨志入者必持薪樵輕重相分斑白不提携又地理志魯地爲周公子所封其民有聖人之風地濱洙泗其民涉渡幼者扶老而代其任俗既益薄長老不自安與幼少相讓故曰魯道衰洙泗之間斷斷如也夫至於相讓則有形迹故曰俗薄若淳美之時少者視爲當然老者視爲固然不驚異也

此等風俗至漢猶存故國家時有賜肉賜帛賜米賜絮之詔令魏晉以降漸爾稀薄蓋人口日繁老者益多不勝其養而社會之優容老者雖至今不免也

漢魏時刲質

今俗曰綁票

漢書趙廣漢傳富人蘇回爲郎二人劫之有頃廣漢將吏叩堂戶曉賊曰京兆尹趙君謝兩君無得殺質又魏志夏侯惇傳呂布遣將僞降共執持惇責以寶貨軍中震恐惇將韓浩乃勒兵屯惇營門召軍吏諸將皆案甲當部不得動諸營乃定遂詣惇所叱持質者曰汝等凶逆乃敢執劫大將軍復欲望生耶且吾受命討賊寧能以一將軍之故而縱汝乎因涕泣謂惇曰當奈國法何促召兵擊持質者持質者惶遽叩頭言我但欲迄資用去耳浩數責皆斬之惇旣免太祖聞之謂浩曰卿此可爲萬世法乃著令自今已後有持質者當并擊勿顧質由是劫質者遂絕

按此事裴注引孫盛曰光武紀建武九年盜劫陰貴人母弟吏以不得拘質迫盜盜遂殺之也然則合擊者擊^{卽并}乃古制也自安順已降政教陵遲劫質不避王公而有司莫能遵奉國憲者浩始復斬之故魏武嘉焉按今後漢書光武紀無此事而陰皇后傳有九年盜劫殺后母鄧氏及弟訢之語蓋一事也觀此則後漢之時王公皆被劫頗類於今日之津滬蓋劫質勒贖最盛之時也不贖則殺質與今同而古人遇此事不惟禁贖且質與盜並擊使盜無所得則源絕矣若遇劫而贖是獎盜也愈獎愈多若擊盜而顧質是縱盜也愈縱愈肆故夏侯惇以大將軍之尊而被劫其部下亦毅然不顧何者犧牲少而影響大不如是不能絕其源後世法律師其意亦著令禁贖然在國家立法以合擊爲最優而在家屬私情則捨質爲不忍故有被劫不敢告官者矣此盜風之所以益肆也

古租宅狀況

魏晉以前租宅住者不多見。至六朝則多。北史邢劭傳也。小屋與染工爲鄰。又劉昉傳。使妾賃屋沽酒當壚。至唐時士大夫僦屋以居者不可勝數。乃有祇租一日者。白行簡李娃傳。生至李娃舊宅。門局鑰甚密。生大駭。詰其鄰人曰。李本租而居。約已周矣。第主自收。姆徒居不知其處。生復回宣陽以詰其姨。既至叩扉。食頃有宦者出曰。此崔尚書宅。昨者有一人稅此院。云遲中表之遠來者。未暮去矣。是僅租一日也。故徐積詩云。貨屋爲無揚子宅。休官非爲武昌魚。李洞詩。稅房兼得調猿石。租地仍分洛鶴泉。蓋至唐宋租宅而居遷徙靡定。其狀況已與今同。

煖房

今人移新宅。戚友恆送酒食會飲宅中。名曰煖房。亦曰溫鍋。蓋以新宅尙未經人住。集多人讌飲其中。以爲厭勝。而唐時卽有之。唐王建宮詞云。太儀前日煖房來。又輟耕錄。今之入宅爲遷居者。鄰里釀金治具過主人飲。謂曰煖屋。亦曰煖房。是此俗自唐至今行之已千餘年。

歷代貸錢利息 周息五釐

其在周時。政府貸錢於民者。息祇五釐。周禮泉府。凡民之貸者。以國服爲之息。鄭玄曰。以其於國服事之。稅爲息。假令貸萬泉。期息五百。按載師云。凡任地國宅。官署無征園。廛二十而一。是國服之息也。鄭云。貸

萬泉。錢也。期一年息五百亦二十取一也。卽年息五釐也。

漢普通息二分急則十分

史記貨殖傳庶民農工商賈率亦歲萬息二千百萬之家卽二十萬是貸息爲二分蓋普通無事私人與私人借貸如此及吳楚兵起長安中列侯封君行從軍旅齎貲同貸子錢家以關東成敗未決莫肯予惟母鹽氏出捐千金貸其息十之三月吳楚平一歲之中則母鹽氏息十倍是急則可至十分也至王莽時凡貸民錢治產業者旣受息歲十一復取其所贏又變年息而爲月息令市官貸民錢收息百月三是政府貸民錢月息三分也。

中保人爲債權者奔走狀況

後漢桓譚傳今富商大賈多放錢貨中家子弟爲之保役作中保趨走與臣僕等勤收稅與封君比入是以衆人慕效不耕而食按今之放債者亦有中保人日趨附其門且有因以起家者飲食醉飽猶其餘事證以桓譚所言今古如出一轍又樊宏傳年八十餘終其素所假貸人間數百萬遺令焚削文契文契者債權之證中保所取予削者漢用竹簡爲契也

漢貧民租地種每年租率

漢書食貨志貧民租富民田種租十五卽每畝收十斗以五斗與地主也今名曰分種糧與薪皆分之然

分種者少納租者多租率十之二三無及半者是租率古重於今也。

研莖

莖者草也。馬牛所食之芻秣也。草長必研之使細短然後便於應用。漢書尹翁歸傳有論罪輸掌畜官使研莖不中程輒笞督極者至以鉄自剗而死。又世說陶侃幼時家極貧孝廉范達過宿時大雪母湛氏研柱各半爲薪剗諸薦以爲馬草。

按薦者席下所鋪草也。鉄者剗草之刀。古罪人嘗使研莖舂米然有程限不中程則笞也。

古以磨麵爲業

周時無論爲米爲麵皆以碓舂成後乃以磨爲麵粉捷於舂碓數倍日久遂有以此爲業者。蜀志許靖傳少與從弟劭俱知名而私情不協劭爲郡功曹排擯靖不得齒敍以馬磨自給。按給者養也。以馬磨自給者必爲人磨五穀得報酬以自養也。唐吳融冤債志同曲磨家二牛暴卒後世業此者尤多自機器磨興此業漸廢然山僻之邑仍不絕也。

古有以磨鏡生光爲專業者

古用銅鏡鏡始鑄成固必磨而後生光然用之久光仍退故有以磨鏡爲專業者。淮南子明鏡之始下型模也。矇然未見形容及其粉以玄錫磨以白旃。毡也。鬚眉微毫可得而察唐荳隱娘傳忽值磨鏡少年至

門女曰此可爲我夫父不敢不從遂嫁之其夫但能淬鏡餘無他能又雲溪友誼有胡生者家貧少爲磨鏡鍛釘之業是皆以磨鏡淬鏡洗鏡爲專業沿街售藝以自給者也又世說補徐孺子事江夏黃公黃公歿欲會葬無資以自致乃以磨鏡具自隨所在取直然後得達按磨鏡具卽淮南子所謂白旃玄錫諸物也玄錫者水銀也

自玻瓈鏡興而銅鏡始廢玻瓈在古時爲至寶本草云本出頗黎國故名玄中記大秦國有五色玻瓈以紅色爲貴梁四公記扶南人來賣碧頗黎鏡內外皎潔向日視之不見其質按此卽今日之玻瓈鏡也在六朝時珍異若是又唐書貞觀十七年拂蒜國遣使貢赤玻瓈又宋史大中祥符八年注輦國貢碧玻瓈是在宋時仍視爲至寶迄蒙古混一西域來者益多至明代番舶交通運輸愈衆於是以水銀塗其背製爲照鏡皎潔精瑩卽四公記所謂向日視之不見其質也價廉物美於是明清以來銅鏡遂絕迹

歷代養蜂攷

蜂能爲蜜造蠟人利賴之然自周時不見以畜蜂爲業者有之自漢始中國人自古輕實業漢以前卽有之亦無人紀載也故數千年來畜蜂之事毫不進步至可慨嘆攷高士傳姜岐當延熹中橋玄爲漢陽太守召岐岐不就遂隱居以畜蜂豕爲業教授者滿天下營業者三百餘人夫旣云教授則姜岐必創有新法於蜂之性嗜好居處以及採割分房並防患之法研究詳悉著爲書說然後可憑以教授而其書不

傳其法遂亡。至晉張華博物志云。遠方諸山出蜜蠟處。以木爲器。開一小孔。以蜜塗器內外。令通。春月蜂將生育時。捕取兩三頭著器中。宿夕飛去。尋伴來。經日漸益。遂停其中。此不知爲岐遺法否。其所謂木器。頗類於今日之蜂箱。但此祇爲分房之一法。姜岐所教授者。當不止此。又陰陽變化錄云。蜂每歲三四月。生黑色蜂。名曰將蜂。又名相蜂。相蜂不採花。但能釀蜜。按此卽蜂王爾雅翼。蜂以千百數中。有大者爲王。爲蜂羣之主。一羣中不能有二王。有二則鬨而分出。而張華博物志亦未言及。蓋姜岐之教授法。至晉已全亡。然分房之法。訖未失傳。五代潘昉蜂詩云。今歲分成第幾房。剗松爲屋。蜜爲糧。剗松者自古蛇鼠最爲蜂害。故古人爲蜂造屋。皆剗木爲之。屋成塗以蜜。備新蜂來爲糧。法略與張華同也。

明劉基養蜂之詳法

郁離子云。靈邱丈人喜養蜂。歲收蜜數百斛。蠟稱之。於是富比封君。丈人卒。其子繼之。未期月。蜂有舉族去者。陶朱公問其故。鄰叟曰。昔者丈人之養蜂。剗木以爲蜂之宮。不罅不漏。其置也疏密有行。新舊有次。五五爲伍。一人伺之。視其生息。調其暄寒。時其墐發。蕃則縱之。析之寡。則與之裒之。不使有二王也。去其蜘蛛。蠍蟬。彌其土蜂蠅豹。夏不烈日。冬不凝澌。其取蜜也。分其贏而已矣。不竭其力也。於是故者安。新者息。

按宮不罅漏者。恐蜘蛛。土蜂等爲害也。土蜂大於蜜蜂。不惟食其蜜。並食其子。蕃則析之者。卽春日分房。

也。一房祇一王。惟此與爾雅翼言之。他書未有也。

蓋古人得蜜之法有二。一則畜蜂。一則採野蜂蜜。博物志遠方山郡僻處出蜜蠟。所著皆絕巖石壁。非攀緣所及。採者於山頂以籃輿自懸下。乃得之。又段成式酉陽雜俎蜀中有竹蜜蜂好於野竹上結窠巢與蜜並紺色。廿倍常蜜。是皆野蜂蜜也。賈島詩鑿石養蜂休買蜜。亦致野蜂也。

今仍有野蜂。惟家蜂蜜色黃。野蜂蜜色白白。蜜爲古所未有。古記載皆言蜜爲紺色。卽崖蜜。野蜜亦未有言白色者。今河北密雲昌平阜平綠山諸邑所產蜜皆白色而皆野蜂蜜。其白如脂。其味含各種花香。較黃蜜尤佳。而家蜂無白者。不知其故也。又今北平市上所有蜜皆白者。白可攏糖霜。黃則不便。故蜜雲古北口等處所產白蜜。盡爲北平市收去。至其出賣。則每十兩不過二三兩真蜜而已。

今西法興以木箱養蜂。蜜則隨釀隨採。故其味甚薄。若中國法。一年祇春時採蜜一次。故其味之甘濃勝。洋蜂數倍。釀之久與不久。故也。西洋人從未嘗過此味厚之蜜。反以爲僞。又蜜過夏則結品味尤甘。而西洋人尤以爲僞。真可笑也。

糖之歷史

古味甘食料曰飴曰餉曰蜂蜜。皆液質而色黃。惟蔗糖則白似霜。甜似蜜。不液而沙。取攜便而潔白可喜。於飴蜜而外。別有風味。真食品中無上之寶也。然唐以前無之。唐以前所謂糖。皆飴餉。揚子方言餉謂之

糖說文糖飴也是其證至六朝笮蔗汁爲糖齊民要術云笮蔗汁如飴鵠名之曰糖是仍與鵠無異又云煎而曝之既凝而冰破如塽食之入口消釋時人謂之石蜜是六朝時已有冰糖仍無沙糖攷北史真臘國傳飲食多酥酪沙糖史書此者以沙糖爲中國所無又攷唐書摩揭陁國傳貞觀二十一年始遣使者自通於天子太宗遣使取熬糖法卽召揚州上諸蔗搾瀝即榨汁如其劑色味愈西域遠甚又老學菴筆記聞人茂德言沙糖中國本無之唐太宗時外國貢至問其使人此何物云以甘蔗汁煎用其法煎成與外國者等唐以前書傳凡言糖者皆糟也據此是沙糖始於唐初或曰易林有飯皆沙糖之語豈知糖乃糠之訛宋本不如此也漢焉有沙糖哉然唐初所謂沙糖者蓋紅沙糖也尙無白糖霜此有確證宋王灼糖霜譜云唐大曆間有僧號鄒和尚者不知從來跨白驢登繖山結茅以居須鹽米薪菜之屬卽書付紙繫錢遺驢負至市人知爲鄒也取平直挂物於鞍縱驢歸一日驢犯山下黃氏蔗田黃請償於鄒鄒曰汝未知窖蔗爲糖霜利當十倍試之果信如貞觀時卽有白沙糖到大曆幾二百年此糖霜胡能取十倍利乎故唐初仍無白糖。

按說文云窖地室也今謂地窖藏酒曰窖窖蔗者必以蔗藏於地窖蔗受濕蒸其汁外浸遇冷而成霜其白如雪其甜如蜜在初發明時必利十倍然此法用蔗多而得糖少至宋時卽將紅沙糖復熬之使變爲白沙糖以迄於今其詳盡在王灼及洪邁糖霜譜中實北宋時糖霜已盛行東坡送僧圖寶詩云冰盤薦

琥珀何似糖霜美山谷有寄糖霜詩是其證

漢冬日藝蔬之法

今日嚴冬一切園蔬皆有鮮者法掘地數尺深而覆屋其上屋北低南高仰其簷使能受日光又恐其受風也簷之下至地皆爲窗糊以紙而於窖室內壘塹爲炕炕之上覆土尺餘和以糞種各蔬炕之端生煤火使炕上土皆暖雖蔓生之黃瓜亦可結實與夏日無異而其法實創始於漢時漢書召信臣傳太官園種冬生葱韭菜茹覆以屋廡晝夜灑蘊火待溫氣乃生信臣皆奏罷之是其法發明最早乃至魏晉又失傳晉石崇與王愷鬥富冬日恆食韭蓀羶王愷百計不得其法後賄其侍者云合麥苗韭根擣之因冬月無韭麥苗可僞韭菜加以韭根則有韭味是可證晉時無以溫室藝蔬者不然奢侈如石崇等當有鮮韭矣尙以麥苗作僞哉知其法久已失傳

漢織錦法

西京雜記霍光妻遺淳于衍蒲桃錦二十四匹散花綾二十五匹綾出鉅鹿陳寶光家寶光妻傳其法霍顯召入其第使作之機用百二十鑷六十日成一匹匹直萬錢按此卽今日之提花也提花用多鉤爲之卽鑷也織錦藝術在漢已發達若此

古殺猪後以火燎毛

今殺猪後割其後腿用鐵條從割口挺入其腹遍攪之再以口吹氣於其腹中令全身鼓漲然後縛其口使勿洩氣再以湯洗之用捲刀刮去其毛使皮膚雪白若古則殺豕後先以火燎其毛莊子云濡需者豎也擇疏蠶自以爲廣宮大囿奎蹄曲隈乳間股脚自以爲安宮利處不知屠者之一旦鼓臂布草操煙火而已與豕俱焦也又韓非子三虱相與訟爭肥磽之地一虱過之曰若亦不患臘之至而毛之燥耶夫曰布草操煙火曰毛之燥則既殺而以薪燎其毛也燎毛之後其垢汙如何去而古書不詳

至六朝時仍用燎毛之法而去垢則詳齊民要術矣音缶蒸也 猪肉法淨爆猪訖更以熱湯遍洗之毛孔中卽有垢出以草痛揩如此三遍疏冷令淨四破于大釜煮之按說文爆火爇也燎其毛也既燎更洗以熱湯揩以薪草去其垢污然後煮之法亦善矣然仍不如今日之潔今日之法始于何時則難攷也

自古狐爲祟

狐之爲祟自漢魏以來小說家所載不知凡幾誠怪獸也而周以前亦不能無有自虞初志亡周以前社會詳情俱湮沒不傳於是狐史亦不詳然時時見於經史詩爲鬼爲蜮毛傳蜮短狐也以狐與鬼並列其幻可知又莊子步仞之丘陵巨戰無所隱其形而孽狐爲之祥祥者變異之氣也又戰國策狐假虎威又史記陳涉傳令吳廣之近所旁叢祠中夜篝火狐鳴曰大楚興陳勝王於是人多指目勝足見秦時社會久以狐爲妖故假狐言以惑人此周秦之狐祟也

其見於漢魏者。干寶搜神記。董仲舒下帷講誦。有客來詣。舒知其非常客。又云欲雨。舒曰。巢居知風穴居。知雨。卿非狐狸。卽是鼷鼠。客化爲老狸。又魏志管輅傳注。輅遠鄰數患失火。一日有書生宿其家。主人盛設。書生疑之。不敢寢。持刀倚積薪假寐。歛有一小物。手中持火。以口吹之。生驚。舉刀斫正斷其腰。視之乃一狐。自此無火患。此狐祟之。見於漢魏者也。自晉以後。狐祟之見於傳記者。汗牛充棟矣。茲皆不錄。

古吹火用排

今人家炊飯。冶工治鐵。用風匣扇火。古則用排。世說鍾季士先不識嵇康。往詣之。康方大樹下鎛。向子期爲佐鼓排。康揚椎不輶。

按排者吹火器。亦名曰鞴。音憊玉篇云。鞴韋囊。可以吹火令熾。鼓者。蓋伸縮韋囊令進氣也。然可以水激。後漢杜詩傳。造水排鑄農器。注云。冶者爲排以吹炭。今激水鼓排。卽水碓也。又魏志韓暨傳。爲監冶謁者。作水排利益三倍。是可證以水激鞴使扇風吹火。亦如水碓水磨。以水激輪使磨。旋轉也不過水排。但取其能吹火使熾耳。而省人力。故利三倍。至唐時仍用鞴。薛昭幻影傳云。乃遣崔元亮市汞一斤入瓦鍋。蓋一方瓦。疊炭埋鍋。鞴而焰起。又牛嶠靈怪錄。見一革囊。喘若鞴囊。是其證。若今之風匣。不知始於何時。法以木板塞匣內。更以鷄毛粘於板之四周。以塞罅漏。而安雙柄於板上。俾通於外。來回拉之。風從口出。凡人家及鐵工竈邊。無不用之。而排遂少見矣。

飲茶之歷史

周時飲料有六曰水漿醴涼醫酏見於周官漿人所掌醴者甜酒涼者冰水醫者梅漿涼與醫即今日之酸梅湯而鎮以冰者也想當時社會款客聯歡即以此六飲而不及茶然周時實有之詩採荼薪樗又予所持茶野客叢書云世謂古之茶卽今之茶不知茶有數種惟槚茶之茶爲今之茶爾雅釋木槚苦茶也注葉可作羹飲今呼早采者爲茶晚茶者爲茗周禮有掌茶之官然自周迄秦社會飲者殊少見至西漢王褒僮約云烹茶盡興又武陽買茶是西漢人漸有飲者三國時吳主孫皓每宴饗飲酒以七升爲率韋曜不能飲皓密賜茶荈以當酒然至六朝時飲者尙少世說王濛好飲茶人至輒命飲士大夫皆患之云今日有水卮又洛陽伽藍記齊王肅不食羊肉及酪漿常食螂魚羹渴飲茗汁高帝曰羊肉何如魚羹茗飲何如酪漿肅曰羊比齊魯大邦魚比邾莒小國惟茗飲不中與酪漿作奴夫以飲茶爲水卮可證晉時士夫嗜茶者十不有一以飲茗汁不飲酪漿爲可怪又以證北齊時社會普通皆飲酪漿仍嗜茶者少也王肅亦以違衆故遜其詞曰茗爲酪奴也清異錄云茶至唐而始盛然自陸羽以前春日茶發芽採之而已烹之而已與淪蔬而啜者無異也及陸羽作茶經創製茶法烹茶法於是茶事益精家置而戶有國家至榷茶稅則當時社會用茶之多可想矣待至宋製造益精迭見於歐陽蘇黃諸詩人歌詠其狀況略與今同

古掃地苕帚卽用黍穰

左傳襄二十九年楚人使公視繢乃使巫以桃荔先祓殯楚人弗禁既而悔之杜注荔黍穰也孔疏檀弓云君臨臣喪以巫祝桃荔執戈惡之也鄭玄云桃鬼所惡荔苕帚可掃不祥君臨臣喪禮有此法荔是帚蓋以桃爲棒也毛詩傳曰蘆爲萑萑苕謂蘆穗也杜云荔黍穰者今世所謂苕帚者或用蘆穗或用黍穰二者皆可爲之也

按蘆者荻屬陸機詩疏蘆或謂之荻至秋堅成則謂之萑故其穗可以爲帚黍穰者黍穗秋老實落縛其稍爲帚今北方人家多如此無以荻葦穗爲帚者而古則兼用之

古帚之長短與今同

曲禮凡爲長者糞之禮加帚於箕上又管子弟子職執箕膺搢箕舌厥中有帚以是證古帚長不過二尺正與今同至孔疏所謂以桃爲棒似今日掃院之帚以木柄縛帚尾可遠掃亦可高拂也

魏晉宮殿榜額皆墨書

世說韋仲將能書魏明帝起殿欲安榜使仲將登梯題之旣下頭髮皓然又太極殿始成時王子敬爲謝公長史謝送版使王題之王有不平色語使云可置著門外後謝語王云題之上殿何若昔魏朝韋仲將諸人亦自爲也王曰魏祚所以不長乃罷按題額後世皆刻木爲之魏晉時有刻石尙無刻木故題殿額

皆墨書以是證社會榜額無不墨書也。

古待遇乳母之重

漢武帝乳母賜良田美宅所言無不聽見褚補史記滑稽傳中是漢人之重視乳母也。韓昌黎有乳母墓銘曰入韓氏乳其兒愈遂老韓氏又曰及見所乳兒愈舉進士第歷官員外郎河南令生二男五女時節慶賀輒率婦孫列拜進壽夫對乳母自稱曰兒稱其妻曰婦子曰孫其重視乳母等於骨肉又老學菴筆記東坡主試李方叔下第其乳母年七十大哭曰吾兒遇蘇內翰主試不第他復何望遂自縊死是亦在李氏養之終身者故關係若是之切是唐宋皆重視乳母不與僕媼等蓋爲兒而食其乳以生其恩不與尋常等故古人皆厚報之養之終身不令其去今人情涼薄兒長則視乳母若路人者非也。

古縫帛之幅廣幅長

周禮內宰淳制注云淳幅廣制幅長天子巡狩制幣丈八尺淳四狶同咫八尺疏云四狶三尺二寸幅太廣四當爲三古三四積畫故易誤三狶則二尺四寸也。

按周用律尺每尺當清時工部尺八寸二分周幅廣三尺二寸正清工部尺二尺五寸若裁尺不過二尺二寸正與今綢緞之幅廣相同若二尺四寸祇當今裁尺一尺六寸則太窄矣疏疑四狶爲三狶者誤也且鄭時書四字已不積畫與三字迥不同有漢碑可證然則周時帛每端長一丈八尺幅廣三尺二寸合

今尺長一丈四尺餘廣二尺四寸餘也。

六朝時布帛匹長四十尺幅廣二尺二寸

宋書沈慶之傳年八十夢得絹兩匹曰老子今年不得活兩匹絹八十尺也由是證六朝時一匹絹四十尺也又通志賦貢門魏天平初綢絹不依舊式興和三年各頒海內悉以四十尺爲度是北朝帛長亦四十尺也至幅廣據通志云魏舊制絹布皆幅廣二尺二寸長四十尺爲一匹而南朝幅廣則不詳想亦同也。

唐帛匹長仍四十尺廣尺八寸布幅廣亦八寸長五丈爲一端

通志唐武德二年制絹爲匹布爲端布絹皆闊尺八寸絹長四丈爲匹布長五丈爲端至開元八年復申舊制不得因兩不足而加尺至德宗建中年復據大歷定制凡尺皆以秬黍爲准是唐布帛長廣始終不變也。

卷四十三

行唐尚秉和著

平民仕進

自周至六朝官人之法大致以選舉。自隋唐迄明清官人之法大致以科舉。選舉者以德行為先。以材藝爲輔。自周秦迄兩漢只能敦品勵行。習藝明經無不脫穎而出。故人人自勵樹立聲名。乃行之久而弊生。魏晉六朝。尙門第。貴簪纓。而平民受擠。於是變選舉而爲科舉。科舉者始於隋。開場命題較閱文藝。文藝及第。賜進士出身。與以官。謂曰進士科。以文藝爲先。以德行爲後。然歷隋唐五代宋元明清千餘年不廢者。以科舉比較。最爲公允。而平民可從此有出路也。故孤寒之士。亦爭自琢磨。不能在他途與貴族競爭者。則致力於科舉。其選舉科舉詳制。盡在通攷通典中。茲所述者。乃歷代平民對於仕進之致力及社會。對於仕進者之感想也。

周時選舉以三物

周雖封建。然鄉大夫遂大夫及其所屬。又司馬司寇司徒所屬。亦取之平民。非所有官吏。蓋世襲也。周禮地官五州爲鄉。使之相賓。又曰以鄉三物事也。教民而賓興之一曰六德。智仁聖義忠和。二曰六行。孝友。

睦姍任恤。三曰六藝禮樂射御書數注興猶舉也。教成鄉大夫推舉其於三事之尤賢者能者以飲酒之禮賓之。興於太學而授官也。又曰三年則大比是賓興之禮三年一舉也。後世科舉每三年一次本周禮遺意也。

漢平民仕進之法 有以富得官者

漢書張釋之傳以訾同貴爲騎郎如淳曰漢注貲五百萬得爲常侍郎。又司馬相如傳以訾爲郎。師古曰以貲多得爲郎也。又景帝後二年詔曰今訾算十以上迺得官廉士算不必衆有市籍不得官無訾又不得官朕甚憫之訾算四得官母令廉士失職貪夫長利應劭曰古者疾吏之貪衣食足知榮辱限訾十算乃得爲吏十算十萬也。賈人有財不得爲吏廉士無訾又不得官故減訾四萬。

按常侍郎官較尊侍從皇帝故必有貲五百萬方得爲若普通官吏有家貲十萬即得爲也然廉士有貲十萬者少故減爲四萬也是無論何官必有家貲四萬者方得爲也。

蓋當時風俗爲官者富人居多而郎官尤甚所謂貲郎也楊惲傳郎官故事令郎出錢市財用給文書又任安傳有詔募擇衛將軍舍人以爲郎將軍取舍人富給者令具鞍馬絳衣玉具劍欲入奏之後趙禹爲選任安田仁衛將軍見此兩人貧意不平是當時郎官俸入不能自給而郎署公用又多責之於郎官貧者尤不辦故張釋之曰久宦減仲之產司馬相如免官歸家徒四壁可證漢時京曹年年賠累與清代同。

故喜富人也。

有由郡縣吏爲大官者

漢時古道猶存。只敦品勵行，即可被選爲縣吏。淮陰侯布衣時貧無行，不得推擇爲吏。許靖爲許劭所排擯，不得齒敍，是其證。及得爲吏，樹立聲名，自然遷秩。如張敞以鄉有秩補太守卒史，察廉爲甘泉倉長。鮑宣初爲鄉嗇夫，任安爲亭長。是由縣吏以次遷擢。陳萬年爲郡吏，察舉至縣令。趙廣漢爲郡吏，州從事擢爲平準令。是皆由郡吏以次遷擢，而其初皆平民也。以上略述一二人以見例。

有以文學入仕者

孤寒下士，他不能有所作爲。惟恃讀書爲出路。如賈誼河南守聞其秀才，召置門下。後吳公爲廷尉，即薦爲博士。又疏廣以好學徵爲博士。又鄭崇爲郡文學史。梅福爲郡文學補南昌尉。是皆以文學起家。自博士有弟子員，弟子能明一經以上者，內則爲郎侍，外則爲郡掾。如眭弘以明經爲議郎，諸葛豐以明經爲郡文學，是皆以明經而貴顯。自武帝詔舉賢良文學之士射策，如董仲舒、公孫弘、嚴助、馬宮、何武並以射策得貴顯，而嚴助一擢即爲中大夫。朱買臣、吾丘壽王、主父偃終軍之屬，並以上書得貴顯，而朱買臣亦一擢即爲中大夫。自此孤寒讀書之士始奮迅起矣。

有以品行得舉者

馮唐以孝著爲郎中署長京房蓋寬饒杜鄴師丹並以孝廉爲郎而後漢李善本民家奴以救主故卽徵爲太子舍人自是以後孝友義俠蒸爲風氣三公及州郡聞名爭相辟舉無不彰顯者故東漢風俗較西漢尤良。

魏晉六朝尙門第平民進取難

自魏陳羣創九品官人之法於是州郡皆置中正以定其選擇六朝皆承用其法然自魏晉以來崇尙門第寒俊之士得上品甚難世說周伯仁母本汝南民家女謂伯仁兄弟曰我所以屈節爲汝家作妾爲門戶計耳汝若不與吾家親親者吾亦不惜餘年伯仁等悉從命由此李世在世得方幅齒遇又陶侃少時家酷貧同郡范達舉孝廉投侃宿于時冰雪在地室如懸磬而達僕馬甚多侃母旣截髮易米斫柱爲薪剗席薦爲馬秣人人贊足明旦去侃追送百里許達感其賢始薦於張夔羊晫諸人後晫爲十郡中正舉侃爲鄱陽小中正始得上品由是觀之在晉時平民進取已不易如斯也若貴族子弟幾見如是哉又通攷晉時州有大中正郡國有小中正皆掌選舉吏部選人必下中正徵其人居及父祖官名夫徵父祖官名卽上門第之證故南齊書云鄉舉里選不覈才德其所進取以官婚胄籍爲先遂令甲族以二十登仕後門平民以三十試吏平民與貴族不平等若是又北齊辛術傳管庫必擢門閥不遺鑑衡之美一而已言不專取門閥也又北周蘇綽傳懲魏齊之失罷門資之制察舉精慎言置門閥不論也

以尙門閥之故策士時出種種醜態

通攷北齊選舉多沿後魏之制。凡州縣所舉秀才貢士廉良。天子服乘輿出坐於朝堂中檻而課試之。秀才孝孝廉方正各以班草對字有脫誤者呼起立席後書有濫劣者飲墨水一升文理猛浪者奪席脫容刀蓋既尙門閥則貴游子弟進而寒士受擠不論才藝則紈袴少年多而詩書之士少故有如是種種醜態也。

隋唐以來進士科之榮貴

進士科始於隋而大盛於唐。唐貞觀時有秀才明經進士三科而秀才科尤高後以舉不中第卽反坐其州長由是廢絕祇明經進士二科而明經科較易取故世所貴者唯進士科。

摭言云進士科始於隋大業中盛於貞觀擢紳雖位極人臣不由進士者終不爲美其都會謂之舉場通稱謂之秀才投刺謂之鄉貢得第謂之前進士互相推敬謂之先輩俱捷謂之同年有司謂之座主京兆府考而升者謂之等第外府不試而貢者謂之拔解將試相保謂之合保造請權要謂之關節激揚聲價謂之還往旣捷列名於慈恩寺塔謂之題名大宴於曲江謂之曲江會。

進士科榮貴之由

在選舉時代終假人力以進取惟進士及第則全由考試文藝所致不假人力首試以時務策及經義次

試以當代法律條教及小學中說文字林算學中周髀五經算等書後更兼試詩賦雖當時尚有門第餘習及權要聲氣之弊而孤寒下士亦往往得售在社會心理似進士科全以文學得官視他途進身之假力於人者有仙凡之殊有清濁之異又應試得售今日白衣明日朱紫在社會耳目尤以爲榮故雖鄉曲之士亦父諭其子兄勉其弟以讀書

唐新進士曲江大宴之盛況

摭言新進士曲江大宴先期牒教坊請奏上御紫雲樓垂簾觀焉公卿家率以是日擇墻傾城縱觀鉢車珠幕櫛比而至既徹饌則移樂泛舟都爲恆例夫新進士大宴至請皇帝臨觀則其鄭重可知又何怪社會以是爲榮哉

故進士放榜謂登科記爲千佛名經見摭言進士及第以泥金書帖附家信報喜謂之泥金信

見開元遺事狀元

及第謂曰奪錦標見古今詩話劉禹錫寄劉侍郎放榜詩云禮闈新榜動長安九陌人人走馬看一日聲名遍天下滿城桃李屬春官孟郊及第詩曰昔日齠齶不足誇今朝放蕩思無涯春風得意馬蹄疾一日看遍長安花又紀事詩云元和十一年李涼公榜三十三人皆取寒素時有詩曰元和天子丙申年三十三人同得仙袍似爛銀衣似錦相將白日上青天觀此三詩唐時社會之艷羨及第進士可謂極矣

唐舉人考試規矩及入棘闈情況

紀事詩云。唐舉人試日許燒燭三條。韋承貽題詩於壁云。褒衣博帶滿塵埃。獨上都堂納卷回。蓬巷幾時聞吉語。棘籬何日免重來。三條燭盡鐘初動。九轉丹成鼎未開。殘月漸低人擾擾。不知誰是謫仙才。又薛能詩云。白蓮千朵照廊明。一片昇平雅頌聲。更報第三條燭盡。南宮風景寫難成。夫曰報三條燭盡。是燭盡不交卷則逾限也。曰鐘初動則是曉鐘已動也。以是知唐試進士以一日一夜爲限。

唐社會待遇新進士之醜態

玉泉子。韋保衢常訪同人方坐。李鉅新新及第亦繼至。保衢以其後先匿於幃下。旣入。有客乎同人曰。韋保衢秀才可以出否。鉅新新及第甚自得意。徐曰。出也何妨。保衢竟不出。及韋上公主爲相。鉅新方爲山北從事焉。是秀才遇新進士於友人家。卽須迴避。又摭言云。彭伉湛賁俱袁州宜春人。伉妻又湛姨也。伉舉進士及第。湛猶爲縣吏。妻族爲置賀宴。皆官人名士。賁至命飯於後閣。其妻憤然責之。是白衣卽不得與官人同席宴。後湛亦一舉登第。伉初嘗悔湛甚。時伉方跨驢。縱遊郊郭。忽有家僮馳報。伉聞失聲而墜。是進士及第可使姻戚之有宿嫌者。懼而墮驢。又因話錄。趙琮妻父爲鍾陵大將。琮以久隨計不第。窮悴甚。妻族益相薄。雖妻父母不能不然也。一日軍中高會。州郡請之。春設者。大將家相率列棚以觀。琮妻雖貧。不能勿往。然所服故弊。衆以帷隔絕之。設方酣。廉使召大將旣至。曰。趙琪非汝婿乎。曰。然。曰。已及第矣。大將遽持榜歸白家人曰。趙郎及第矣。妻族大喜。卽撤去帷帳。相與同席。以簪服慶遺焉。是其婿不及。

第則以與貧女同席爲恥。及既第則又以與貧女同席爲榮也。然士雖進士及第終身坎坷者多矣。而社會榮視若是似一種迷信也。

惟唐考試之法尚疏不盡公允

玉泉子云。翁彥樞蘇州人。應進士舉有僧與同鄉里出入故相國裴坦門下。以年耄雖中門不禁其出入。坦持文柄入貢院。子助質日議榜於私室。其予奪進退僧聞之熟矣。歸寺而彥樞訪焉。僧曰。公成名須第幾人。彥樞謂僧戲已。謾應曰第八人足矣。卽復往裴宅。二子議如初。僧忽張目曰。侍郎知舉耶。郎君知舉耶。卽歷數其權豪私仇。予奪去取之由。全榜人名不差一人。助等大懼。問僧所欲。曰。有鄉人翁彥樞第八人及第足矣。榜發彥樞果及第。又摭言云。高錯知貢舉。誠門下不得受請託。及入闈。裴思謙持仇士良宦官。關節非狀元及第不可。錯不得已許之。又廣陵記。王維以公主力爲舉首。此皆由考法疏闊。故舞弊易也。

不過唐時雖通關節。播聲氣而及第之人仍多名士。倘子弟不文。雖豪宗右族亦恥之而不爲。彼王維雖由關節進。因其文采素爲岐王所賞拔。故樂爲延譽於公主。卽裴思謙由宦監進身而狀元及第後。宿平康里詩云。銀釭斜背解明璫。小語低聲喚玉郎。從此不知蘭麝貴。夜來新惹御爐香。此詩馳名千古。故仇士良肯爲盡力。非若後世之無所挾。而徒以勢力進取。又以證唐世之文章爲極盛。苟文采不足。徒憑勢。

力得第。無論何人皆以爲辱也。

至宋考試之法始密不能徇私

唐祇制科糊名進士科皆亮卷故弊端百出至宋將試卷糊名使主試者莫知誰何之文通考云景德四年命晁迥知貢舉滕元晏封印卷首先是雍熙二年殿試糊名至是用之禮部迨明道二年而天下州郡無不用之而又恐主試者之認識筆迹則又將試文滕錄以易字體通考云景德八年始置滕錄院凡試卷經彌封官封卷後付吏錄本監以內侍二人京官校對訖復送封印院始送知貢舉定去取自糊名滕錄之法興於是主試者雖門生故吏無能爲力老學菴筆記云東坡知貢舉李方叔被黜其乳母年七十大哭曰吾兒遇蘇內翰知貢舉不及第他復何望遂閉門自縊死緣方叔爲東坡門生東坡主試而方叔不第故以爲絕望豈知試卷自糊名滕錄後雖親子弟亦無從摸索其法實已大公自此以後凡平民求進取者只致力於文學不患不達故歷元明清行之千年而不改及清末春秋兩圍竟廢滕錄而不用不知此爲防弊之唯一良法幸科舉廢耳設沿襲至今其弊不可勝言矣

明清以來平民進取之法大概有三級由童子應縣試府試再應學政試取中者曰生員卽秀才也由秀才應省鄉試取中者曰舉人第一名曰解元由舉人再應會試取中者曰貢士第一名曰會元貢士經殿試取列一甲第一名者曰狀元一甲二名曰榜眼三名曰探花一甲祇三人次爲二甲皆賜進士出身次

爲三甲。賜同進士出身。再分別授以官。凡一省置學政一人。考試童生。甄別秀才。凡舉人科進士科。每三年一舉行。舉人科曰鄉試。合一省秀才試之。進士科曰會試。合天下舉人試之。鄉試恆在八月。曰秋圍。所謂槐花黃。舉子忙。故有攀桂折桂等名也。會試恆在三月。曰春圍。所謂春風得意馬蹄疾。故有探花簪花諸故事也。凡秀才每縣取中有定額。舉人每省取中有定額。大省百餘人。小省或不到百人。進士每科有一定額。共甲榜不過三百人。而每省復有定額。大省得中二十餘人。小省十餘人。故雖荒陬僻壤。文化較低者。亦不至脫榜也。此明清以來。平民進取之大略也。

卷四十四

行唐尙秉和著

妓

古之所謂妓與後世稍異論語齊人饋女樂史記貨殖傳鄆邯女子彈弦跕屣游媚富貴徧諸侯之後宮漢張禹後堂所蓄皆妓也而皆爲女樂故世說云殷仲文勸武帝蓄妓帝曰吾不解聲又魏武遺令於銅雀臺上設匡牀施總帷每月朔十五令諸妓向牀前作伎樂又謝太傅攜妓遊山絲竹陶寫宋蕭琳有聽妓詩梁簡文帝有聽夜妓詩又十六國春秋石虎鄭后原晉僕射鄭世達家妓唐書太平公主傳供張聲妓與天子等順宗紀貞元十一年放後宮女妓六百人是皆以妓爲樂之證不然王公貴人及天子宮中所蓄曰姬妾可矣胡必名之曰妓曰妓則聲樂也茲所述者非貴人家所蓄之妓乃社會以妓爲業者也

唐時妓女聚居之地及妓院佈置之清雅

自唐以前營業之妓載籍不詳至唐始有詳記而北里志則妓史之班馬也志云平康里入北門東回三曲卽諸妓所居之聚也妓中有錚錚者多在南曲中曲其循牆一曲卑瑣妓所居頗爲二曲輕斥之其南曲中者門前通十字街初登館閣者多於此竊遊焉二曲卽卷中居者皆堂宇寬靜各有三數聽事前後

植花卉。或有怪石盆池。左右對設小堂。垂簾茵榻幃幌之類稱是。諸妓皆私有所指。占聽事皆彩版以記。諸帝后忌日。按記忌日者。例禁歌舞讌宴於忌日也。

假母今之養家之狀況與今同

北里志。妓之母多假母。原注云。俗呼爲爆炭。不知其因。亦妓之衰退者爲之。無夫。其未甚衰者。悉爲諸邸將輩主之。或私蓄侍寢者。亦不以夫禮待。原注云。多有游惰者。於二曲中爲諸娼所豢養。號爲廟客。不知所謂。按今日妓之假母。俗呼爲老爆子。蓋仍沿唐時爆炭之稱。爆炭者。言其鞭撻。辟妓威怒。爆發如炭之爆也。亦曰鵠母。蓋爆之訛。至其所豢之侍寢者。今曰拚頭。亦曰靠家。唐廟客之稱。訖不得其義。

唐妓之來歷及受虐情形

北里志。諸女自幼丐有。或傭其下里貧家。常有不調之徒。潛爲漁獵。亦有良家子。爲其家聘之。以求厚賂。誤陷其中。無以自脫。初教之歌令而責之。其賦甚急。微涉退忘。則鞭撻備至。皆冒假母姓。咸呼以女弟。兄爲之行第。

按今日妓女皆由假母買貧家女。自幼調習歌曲。及其稍長。則責其斂錢。稍不如程。則鞭扑交至。今古鵠母。如出一轍。

唐妓捐錢始能出遊

北里志諸妓以出里艱難。每南街保唐寺有講席。多以月之八日相牽率聽焉。皆納其假母一縉。然後能出里。其於他處必因人而遊。或約人與同行。則爲下婢而納資於假母。故保唐寺每三八日士子極多。蓋有期於諸妓也。亦有樂工聚居其側。或呼召之立至。每飲率以三錢繼燭卽倍之。

妓從良仍不悛

北里志。楚兒傳。楚兒字潤娘。往往有詩句可傳。近以退暮爲萬年捕賊官郭鍛所納。置於他所。潤姬狂逸特甚。及被拘繫。仍未能悛。鍛主繁務。又有正室。至潤娘館甚稀。每有舊識過其所居。多於牕牖相呼。或使人詢訊。或以巾箋送遺。鍛乃汾陽裔孫。爲人異常凶忍。每知必極笞辱。潤娘雖自痛憤。而不少革嘗。一日自曲江與鍛行。前後相距數十步。鄭光業時爲補袞道。與之遇。楚兒出簾招之。光業亦使人傳語。鍛知之。曳至中衢。擊以馬笞。聲甚冤楚。觀者如堵。光業遙視之。甚驚悔。且慮其不任矣。光業明日特過其居。偵之。則楚兒已在臨街牕下弄琵琶矣。駐馬使人傳語。潤娘持彩箋送光業詩云。應是前身有夙冤。不期今世惡姻緣。蛾眉欲碎巨靈掌。鷄肋難勝子路拳。祇擬嚇人傳鐵拳。未應教我踏金蓮。曲江昨日君相遇。當下遭他數十鞭。光業取筆於馬上答之。云。大開眼界莫言冤。畢世甘他也是緣。無計不煩乾偃蹇。有門須是疾連拳。據論當道加嚴箋。便合披緇念法蓮。如此興情殊不減。始知昨日是蒲鞭。

按今日妓女從良者。仍風騷不已。舊習不悛。未幾下堂。仍操舊業者有之。蓋妓女在妓院風狂成性。乍入

人家有如牢獄難以久安乃如潤娘者走筆和答詩詞微妙直與文人學士相埒可謂大雅不羣矣乃以所適非人之故不甘寂寞仍招蜂引蝶念舊輸情不知已身之已脫籍妓也甚矣結習之難忘

黠妓自高聲價以斂錢

北里志天水仙哥字絳真住南曲善談謔能歌令姿容平常而蘊藉不惡劉覃登第年十六七聞衆譽天水亦不知其妍醜每辭以他事重難其來覃則增緝不已會天水實有所苦不赴召覃殊不信有戶部府吏李全者能制諸妓居里中覃聞召吏至授以銀花榼逕入曲追天水入兜輿中至則蓬頭垢面涕泗交下寒簾一視即使昇回

又雲仙雜記史鳳宣城妓也待客有差等最上者有迷香洞神鷄枕鎖蓮燈次則交紅被傳香枕下則不可見以閉門羹待之使人傳語曰請公夢中來馮垂客宣城罄囊有錢三十萬盡納之得至迷香洞

按天水等伎倆至今娼妓祖述其法而紈絺子弟墮其術中者今古如一豈不異哉又史鳳曰請公夢中來謹亦甚矣若後世必有人痛懲之而宋時遊人熟視不怪今古習尚之不同若是

唐時妓院之危險

自來妓院爲危險地卿士大夫入其中而被刦被辱者不可勝數乃唐時竟至殺人北里志王金吾相國起之子曾遊北曲遇有醉而後至者遂避之牀下俄頃又有仗劍後至者以爲金吾也因梟其首而擲之

曰來日更呵殿入朝耶。遂據其牀金吾獲免。又裴晉公嘗狎遊爲兩軍力士十餘輩凌轢勢甚危窘。公潛遣介召同年胡證尙書證皂貂金帶突門而入主人上燈。胡起取鐵燈臺摘去枝葉而合其跗。台足橫置膝上。卽改令曰：「凡三鍾引滿一遍。三臺酒須盡。不得有滴瀝。犯令者一鐵躋。羣惡叩首乞命而遁。」

按妓院爲不名譽之地。在其中雖被殺亦無聲訴者。而被刦被辱者更暗默不言。猶憶光緒三十年冬有名妓謝珊瑚者。寓李鐵拐斜街。某貝子往遊。貂裘金表玄狐斗蓬等物爲惡少刦奪席捲而去。亦忍痛不言。至妓女爲刦賊掠去勒贖惡少因一語不合搗毀什物咆哮肆威者尤衆。及三十一年巡警部立警察滿街。刦賊既不敢肆行。偶遊客發怒搗毀什物。則妓院立呼警察來處罰。於是妓院治安始有保障。千餘年不改之狀況。至此一變。此亦志北里者之一大紀念也。

唐京妓與外妓謹肆不同然遇貴人皆須行參謁禮

北里志牙娘居曲中亦流輩翹楚者性輕率惟以傷人肌膚爲事故。故陝州夏侯表中澤相國少子及第中甲科。宴集因醉戲爲牙娘批頰傷面。次日期集師門。同年皆竊視之。表中因厲聲曰：「昨日子女牙娘抓破澤面。同年皆駭然。主司裴公瓊俯首而哂。不能舉者久之。又云比見東洛諸妓體裁及諸州飲妓固不侔矣。然其羞七箸之態勤參請之儀或未能去也。若北里之妓。公卿與舉子其自在一也。朝士金章者始有參禮。按惡妓風狂專以打人取樂者今古皆有。至貴人入妓院受諸妓參謁殆唐人獨有風俗。若後世貴

人治遊者愈貴則愈諱之誠以游戲之地而忽行參禮得毋施之非其人行之非其地乎

唐宋時官妓

以上所述皆私妓以歌舞自由營業厭則從良乃唐宋時又有所謂官妓營妓蓋一類也或曰始於管仲以管子有女閭三百之語或曰始於漢武以漢武外傳有置營妓以惠軍吏無室家者之語此皆不可信漢魏時軍中宴饗之事多矣不見有妓祇貴人第內宴饗有之東晉時士夫放蕩極矣乃見於世說者謝安可遊山挾妓官吏公讌從不見其呼召官妓是晉宋時尙無也故謂營妓始於管子者固無稽卽謂始於漢武者亦非信史官妓之有蓋起於唐天寶以後此有一徵凡唐載記所謂某與官妓狎某喜營妓某皆天寶以後人以前則無有也

凡官吏宴飲則召官妓侑酒

摭言楊汝士尙書鎮東川其子知溫進士及第開宴汝士命營妓人與紅綾一匹又東皋雜錄東坡自錢塘被召過京口林子京作郡守有會坐中營妓出牒鄭容求落籍高瑩求從良又清波雜志東坡在黃岡每用官妓侑觴羣妓爭持紙乞歌詞是唐宋官吏祇有宴會無不召妓蓋其時士風不似後來之拘執視聲妓絲竹爲固有之事兼其時官吏多文人學士妓女之風流文采又足以副之故觴詠所至則湖山生色歌詞傳播則今古蜚香自蒙古興此風漸衰自洪武起懸爲厲禁於是古人所恃以舒寫勞瘁活潑精

神之事。至清末途剷除無餘。而文化之低落。隨之出軌之反動。以起則以疏導失宜之故也。

官妓皆由私妓選拔

本事詩。韓滉鎮浙西。戎昱爲部內刺史。郡有妓善歌。色亦閑妙。昱情屬甚厚。滉聞其名。召置籍中。昱不敢留。餞於湖上。爲歌詞以贈之。且曰。至彼首歌是詞。旣至。韓爲開筵。自持杯令歌。果唱戎詞曰。好是春風湖上亭。柳條籜蔓繫離情。黃鸝住久渾相識。欲別頻啼四五聲。曲旣終。滉曰。戎使君於汝寄情耶。妓竦然起曰。然。淚隨言下。韓卽歸之。以是證當時官妓皆由私妓選拔而來。蓋一入官籍。卽不能自由。且往往受官吏之虐。魏泰詩話云。呂士隆知宣州。好笞官妓。會杭州一妓到。士隆喜之一。日郡妓犯小過。欲笞之。妓曰。不敢辭。但恐杭妓不安耳。乃捨之。梅聖俞因作莫打鴨詩以戲之。又古今詩話。蘇子瞻守錢塘。有官妓李秀蘭。天性慧黠。善於應對。一日湖中有宴會。羣妓競集。惟秀蘭不至。督之良久方來。子瞻已怒之。坐中一倅怒其晚至。詰之不已。子瞻爲作賀新涼。使歌以侑酒。倅怒頓止。觀是二事。則官妓受虐之種種情形。可推想矣。

有能脫籍者同輩皆羨之

快雪堂東坡帖云。杭州營籍周韶多蓄奇茗。嘗與君謨門勝之。韶又知作詩。子容過杭。述古飲之。韶泣求落籍。子容曰。可作一絕。韶援筆立成曰。隴上巢空歲月驚。忍看回首自梳翎。開籠若放雪衣女。長念觀音。

般。若經韶時有服衣白。一坐嗟歎。遂落籍。同輩皆有詩送之。二人者最善。胡楚云。淡妝輕素鶴翎紅。移入朱闌便不同。應笑西園舊桃李。強匀顏色待東風。龍靚云。桃花流水本無塵。一落人間幾度春。解佩暫酬交甫意。濯纓還作武陵人。固知杭人多惠也。

按周韶原唱以鸚鵡自况。故曰隴上。產隴上西。曰雪衣女。雪衣女楊妃所蓄鸚鵡見外傳。胡楚以花卉起興。以桃李自比。其欣慕周韶悲傷自己。不能脫籍之意溢於言外。讀之令人憐。故楚詩尤佳也。然觀東皋雜錄所記。鄭容求落籍。高瑩求從良。見前。以是證落籍不定從良也。只脫官家羈絆耳。

唐宋名人與官妓之眷戀

凡唐宋名人不惟宴飲呼妓侑酒。其戀戀寄情於官妓者亦不諱也。古今詩話。元稹廉訪浙東。喜官妓劉採春題詩曰。因循歸未得。不是戀鱸魚。是戀官妓不歸也。又麗情集。元稹使蜀。籍妓薛濤有才色。往侍焉。後登翰林。寄以詩。又云。灼灼錦城官妓也。御史裴質與之善。裴召還。灼灼每以紅綃聚淚爲寄。是旣歸。仍念官妓不捨也。又古今詩話。韓魏公爲陝西安撫使。李師中過之。李有詩名。席間爲官妓賈愛卿賦詩曰。願得貔貅十萬兵。大戎巢穴一時平。歸來不用封侯印。只問君王覓愛卿。又吹劍錄。范文正守饒喜妓籍中一小鬟。旣去。以詩寄魏介曰。慶朔堂前花自栽。便移官去未曾開。年年常有別離恨。爲託春風幹當來。介遂買以遺公。是見官妓而心欲雖隔多年。必設法以致之也。又以證。韓范皆名儒。亦不諱此也。又詞苑

叢談。周邦彥方在李師師家。道君忽至。邦彥伏牀下。備聞道君謔語。乃櫛括其事。成少年遊。他日師師賦之。道君大怒。因遷謫邦彥。押出國門。是君臣同戀。一妓而相妬也。又青箱記。魏仲先與寇萊公同遊陝郊。僧寺留題。後復行到。公詩已用碧紗籠。仲先詩塵昏滿壁。時有從行官妓頗慧。以衣袖拂之。仲先徐曰。若得時將紅袖拂。也應勝似碧紗籠。萊公大笑。又后山詩話。司馬溫公爲武定從事。同幕私幸營妓。而公諱之。適會僧廬。王荊公往迫之。妓踰垣去。荆公集句戲之曰。年去年來來去忙。暫偷閒臥老僧房。驚回一覺遊仙夢。又逐流鶯過短牆。野客叢書云。錢文僖公留守西京。梅聖俞尹師魯歐陽公同在幕下。一日宴集。歐與所眷妓後至。錢責妓。妓云涼堂午睡失金釵。猶未見錢曰。若得歐推官一詞。當爲償汝。歐卽席成臨江仙。錢令公庫償釵。是長官與屬以妓爲戲。雖遊寺亦不離官妓。甚或幽會於僧房也。至其他文人如黃山谷與瀘南官妓。盼盼相戀。秦少游在蔡州。與營妓婁琬甚密。周邦彥在姑蘇。與營妓岳楚雲相戀。更不可勝數也。

唐宋時妓界之文采

麗情集。長安有娼女曹文姬。尤工翰墨。爲關中第一。時號書仙。又天寶遺事。長安名妓劉國容。有姿色。能吟詠。與進士郭昭述相愛。後昭述授天長尉。與國容相別。詰旦赴任。國容使女僕賣短書云。歡寢方濃。恨鶼聲之斷愛。恩情未洽。歎馬足以無情。使我勞心。因君減食。再期後會。以結齊眉。是妓而富於文詞。

北夢瑣言。江淮間名妓徐月英送人詩曰。惆悵人間萬事違。兩人同去一人歸。生憎平望橋頭水。忍照鶯鶯相背飛。又抒情集。韋蟾廉訪鄂州。罷任賓僚盛陳祖席。蟾遂書文選句云。悲莫悲兮生別離。登山臨水送將歸。以箋毫授賓從。請續其句。座中皆不能屬。有一妓泣然曰。武昌無限新栽柳。不見楊花撲面飛。座客無不嘉歎。是妓而能詩。而武昌妓之續句爲學士大夫所不能者。而妓能之。且出語敏妙。當場刺譏。想當時坐客。皆赭顏也。又楚兒與鄭光業見前。走筆和答。鄭詩尚不如楚兒。卽周韶胡楚之詩。在士夫亦爲難能也。

能改齋漫錄。杭之西湖有一倅。閑唱少游滿庭芳。偶誤舉一韻云。畫角聲斷斜陽。妓琴操在側云。山抹微雲。天連衰草。畫角聲斷譙門。非斜陽也。倅因戲曰。爾可改韻否。琴卽改作陽字韻云。山抹微雲。天連衰草。畫角聲斷斜陽。原作譙門。暫停征轡。原作棹。聊共飲。原作引。離觴。原作尊。多少蓬萊舊侶。原作事。頻空。原作回首。煙靄茫茫。原作紛。孤邨裏。原作斜陽外。寒鴉萬數。原作點。流水遶空牆。原作邨。魂傷。原作銷。當此際。輕分羅帶。暗解香囊。原作香囊暗解。謾贏得秦樓薄倖名狂。原作存。此去何時見也。襟袖上空有餘香。原作染。傷心處長高。原作城望。斷燈火已昏黃。原作昏。

答曰落霞與孤鶩齊飛秋水共長天一色何謂景中人答曰裙拖六幅瀟湘水鬢聳巫山一段雲何謂人中意答曰隨他楊學士鼈殼鮑參軍如此究竟如何坡云門前冷落車馬稀老大嫁作商人婦琴操大悟卽削髮爲尼

此皆略舉一二以概其餘其他見於載籍者尙多如煙霧也蓋其時妓女無不知書其高者能吟詠通詩歌可與文人學士相和答次亦無不通文故詩詞脫手立可付歌能定其聲知其意久之遂習與俱化以是證古妓界文學亦高出後世也